

Namo tassa bhagavato arahato sammāsambuddhassa.

Subodhālaṅkāraṭīkā

Ganthārambhakathā

Yo pādanīrajavarodararādhitena [...rādikena (ka.)],
Lokattayena'vikalena nirākulena;
Viññāpayī nirupameyyatamattano taṃ,
Vande munindamabhivandiyā vandanīyaṃ.

Patto sapattavijayo jayabodhimūle,
Saddhammarājapadaviṃ yadanuggahena;
Sattāpasatta [sattappasattha (ka.)] vipulāmalasagguṇassa,
Saddhammasāraratanassa namatthu tassa.

Yo bhājanattamabhisambhuṇi sagguṇassa,
Tassāpi dhammaratanassa mahārahassa;
Sambhāvitaṃ sasirasāhitasannatehi,
Sambhāvayāmi sirasā gaṇamuttamaṃ taṃ.

Ye'nantataratanākaramanthena,
Manthā'calollasitaññāvarena laddhā;
Sārā matāti sukhitā sukhayanti caññe,
Te me jayanti guravo guravo guṇehi.

1. Dosāvabodha paṭhamapariccheda

Ratanattayappaṇāmavaṇṇanā

1. Munindavadanambhoja-gabbhasambhavasundarī; Saraṇaṃ pāṇinaṃ vāṇī, mayhaṃ pīṇayatāṃ manāṃ.

1. Athāyaṃ ganthakāro ganthārambhe pubbapayogānubandhasabhāvasiddhikaviguṇopetānaṃ yatipotānaṃ tadupāyantaraviratā kamantarāpetaparakkamasambhavenādhiगतabyasanasatamupalabbha dayāsañjātarasahasahadayatāya tadupāyabhūtaṃ bandhalakkhaṇaṃ viracayitukāmobhimitasiddhinimittamattanodhigatasaddhammadevatānussaraṇaṃ tāva dassetumāha “**muninde**”ccādi. Nanu “bandhalakkhaṇaṃ viracayitukāmo”ti vuttaṃ, kimettha lakkhaṇakaraṇena adīṭṭhalakkhaṇāpi dissanti bandhantāti? Saccamaṃ, tathāpi te ghuṇakkharappakāsā tabbidūnaṃ payogānusārino vā siyumaṃ, pubbe katasatthaparicayā vā siyunti viññeyyaṃ. Vāṇī mayhaṃ manāṃ pīṇayatanti sambandho. **Vāṇī**ti vā sarassatyaparanāmadheyyā kāci devatā, sā sabbāvadātā yathicchitatthasādhanapuṇḍarīkagabbhe nisīdatīti lokavādo. **Vāṇī**ti pana paccuhavirahenābhimitasiddhinibandhanekatāṇo sammāsambuddhabhāsito saddhammo, tatoyevāyaṃ devatā ruppate. Tattha sarassatiyā yathā'sattā jātāya manosampīṇananti loko, saddhammadevatāya tu manopīṇanaṃ, tassā sabbavajjarahitāyaccantanimalāya nirantarathanekatāṇappavattiyā manaso sampīṇanaṃ. Tena ca passaddhi, tāya pana sukhaṃ, tenāpi samādhi, samādhisambhavana yathābhūtāvabodhasambhavato vicittānekasaddatthavisesā paṭibhantyanāyāsena, tato ca yathicchitasiddhinipphattīti vaṅkavuttiyā tappasādamāsīsati.

Kimvisiṭṭhoccāha “**muninde**”ccādi. Ubho loke munāti jānātīti muni, indati paramissariyaṃ pavatteti sabbatthāti indo, muni ca so indo ca, munīnaṃ indoti vā **munindo**, sammāsambuddho. Tatoyaṃ tassa nimittakasaññā. Vijjamānesupi pariyāyasaddesvaññesu

kavikāmitassatthassekantavācakatteno' cityasamposakoyaṃ **munindasaddo**, tathā hi yo ubhaya lokajānanaṃ munīnaṃ paramissariyapuggalānampi paramissariyaṃ vatteti, so paraṃ pīṇeti hetubhāvena'tre'tyu'citameva, tathā padantarānampi ocityaṃ poseti. Tathā hi tādissa vadanāravindodare sambhavā sundarī, tatoyeva paṭisaraṇaṃ, tasmā ca mano pīṇetīti. Tassa vadaṇaṃ, tamiva **munindavadanaṃ**, ambhojaṃ. Tameva vā lakkhasaṃyogitādisadhammena'mbhojaṃ, padumaṃ. Tassa gabbho. Tattha **sambhavena** pavattiyā, uppattiyā vā **sundarī** niravajjā devatā. Vācā pana dosalesenāpa'samphuṭṭhāva niravajjā, tathā ca vakkhati "guṇālaṅkārasaṃyuttā" [subodhālaṅkāra 14 gāthā] iccādi. Tatovāyaṃ **saraṇaṃ pāṇinaṃ** sattānaṃ paṭibhānādiguṇavisesāvahattamattena paṭisaraṇabhūtā devatā. Vācā pana sabbupaddavanivāraṇena sabbahitasukhasampadāsampādanenaccantapaṭisaraṇabhūtā. Sabhāvanapuṃsakattā cettha na līngaparivattanaṃ. Mayhanti ekavacānenattano nirabhimānata'māneti sajjanaṃcāraṃ. Abhinna padasilesa cāyaṃ, sabbatthevāvīkatasaddappayogato. Silesa cāyaṃ vaṅkavuttiyā sabbattha sirim poseti. Tathā ca vakkhati "vaṅkavuttisu poseti, silesa tu sirim para"nti [subodhālaṅkāra 172 gāthā]. Ayamettha saṅkhepena nayena atthavaṇṇanā. Vitthāranayena pana nānappaḥārenattho saṃvaṇṇetuṃ sakkā. Tathā sati ganthagāravopi siyāti pakāroyamevabbhupagato.

1. Suparisuddhabuddhigocaraparamavicittaganthakāra koyaṃcāriya-saṅgharakkhitamahāsānipādo sapīṭakattayasabbasatthapārāvatarāṇena sañjātānappaḥāpītisukhamanubhavaṃ paṭipattipaṭivedhasānadavayassa pariyattimūlakattā yena kenaci pariyāyena tassā pariyattiyā atthāvabodhena "appeva nāma sādhujaṇaṃ paritoseyya"miti tadadhigamopāyabhūtamidāṃ pakaraṇaṃārabhanto ganthāraṃbhe iṭṭhadevatāya paṇāmakaraṇaṃ satācārānurakkhaṇattham [sadācārānurakkhaṇattham (ka.)], visesato abhimataganthassānantarāyena parisamattiyā ca kāraṇamiti iṭṭhadevatānussaraṇaṃ, ganthantarāraṃbhapaṭikkhepakajanaṃpaṭibhānapubbakāni abhidhānābhidheyyakaraṇappaḥārapayojanāni ca dassento "**munindavadanaṃbhoja...pe...parissamo**"ti gāthattayamāha. Ettha paṭhamagāthāya iṭṭhadevatāsaṅkhātaratanattayappaṇāmo dassito, dutiyagāthāya āraṃbhapaṭikkhepakajanaṃ nisedhitā, tatiyagāthāya abhidhānādikaṃ dassitaṃ. Tathā hi lokuttaradhammanissitapariyattisaṅkhātasabbaññubhāratiyā manosampīṇanāsīsanāpadesena attano nissesadhammaratane pasādo pakāsito. So pana dhammapasādo tadavinābhāvato buddhasaṅghesuṃ siddhoti ratanattayavisayaṃ paṇāmaṃ vaṅkavuttiyā dasseti. So hi atthato paṇāmakriyābhiniṭṭhādikaṃ kusalacetanā. Ettha phalaṃ heṭṭhā vuttameva.

Puna santesu rāmasammādyalaṅkāresu piṭṭhapisaṇaṃ viya hotīdaṃ alaṅkāra karaṇanti vadantā viruddhavādino rāmasammādīnamatthibhāvaṃ ubbhāvetvā [abhyupagametvā (ka.)] te suddhamāgadhikā na vaḷaṅjenti iminā paṭisiddhā. Nirākaraṇaphalañhi ganthassa niddosabhāvova. Apica saddālaṅkāraatthālaṅkāradīpakena **alaṅkārasaddena** ganthasarīrasaṅkhātasāññino saññāsaṅkhātaabhidhānañca **alaṅkārasaddassa** saddālaṅkāradīyabhidheyyañca suddhamāgadhikattaṃ vatvā **alaṅkārasaddassa** visesaṇabhūtaanurūpasaddopādānena buddhavaṇṇassa upayogattaṃ māgadhikavohārena bhavānti gamyamaṇattā karaṇappaḥārañca alaṅkāraganthappavattiyā atthālaṅkāradīnissitattā iminā **alaṅkārasaddeneva** alaṅkārasaṅkhāraṇasaṅkhātapayojanañca dasseti.

Satthappayojanaṃ sādhyasādhanalakkaṇaṃ sambandho pana sambandhassa nissayabhūtasatthappayojanaṃ dassaneneva tannissitattā sayampi vutto hoti. Vuttaṃ hi—

“Sattham payojanañceva, ubho sambandhanissayā;
Vuttā taṃvuttiyāeva, vutto tannissitopi so”ti.

Tassattho— **sambandhanissayā** sambandhassa ādhārabhūtā **sattham**, **payojanañca ubho vuttā**, **taṃvuttiyāeva** tesam ubhinnaṃ kathaneneva **tannissito** te nissāya pavatto **sopi** sambandho **vutto** bhavānti.

Ettha abhidhānakathanaṃ vohārasukhatthaṃ, abhidheyyādīkathanaṃ pana tehi yuttānaṃyeva ganthānaṃ subuddhipubbakādīnaṃ upādeyyattañca tabbiparīṭānaṃ ummattakavacānādīnivaanupādeyyattañca pakāsanatthanti vedittabbaṃ. Vuttañhi —

“Sambandhānugūṇopāyaṃ [[sambandhyanugūṇopāyaṃ \(ka.\)](#)], purisatthābhīdhāyakaṃ; Vīmaṃsādhigataṃ [[vīmaṃsādhikataṃ \(sī.\)](#)] vākya-matonadhigataṃ [[...nadhikataṃ \(sī.\)](#)] para”nti.

Tassattho— **sambandhānugūṇopāyaṃ** sādhiyasādhanalakkhaṇasambandhassa nissayabhūtavāccavācakānaṃ sambandhibhūtānaṃ aññamaññānurūpaṇaparijānane kāraṇabhūtaṃ **purisatthābhīdhāyakaṃ** catubbidhadhammaatthakāmamokkhasāṅkhātānaṃ purisatthānaṃ vācakabhūtaṃ **vākyaṃ** “ekākhyāto padaccayo, siyā vākyaṃ sakārako”ti [[abhidhānappadīpikā 106 gāthā](#)] vuttalakkhaṇamajjhapatitavākyaśamudāyopetaṃ mahāvākyaśarūpasatthāṃ **vīmaṃsādhigataṃ** ñāṇagatilakkhaṇapaparikkhāya adhigataṃ adhippettaṃ, **ato paraṃ** vuttalakkhaṇasatthato aññaṃ **anadhigataṃ** nādhippetanti. Idaṃ panettha gāthānaṃ nikkheppappayojanaṃ.

Loke padumagabbhe vasantiyā sabbaṅgadhavalāya yathicchitthasādhikāya sarassatīnāmikāya devatāya “vāṇī”ti vohārato iminā atthena yojetvā abhinnaṇapadasilesālaṅkāravasena vuttatā padattho evaṃ vedītabbo – munindassa sobhāsugandhādiguṇayogato mukhasadisassa, no ce mukhasāṅkhātāmbhojassa **gabbhe** udare **sambhavana** pavattiyā uppattiyā vā **sundarī** niddosā, sobhanā vā **pāṇinaṃ saraṇaṃ** atoyeva ahitāpanayanahitāvahatthena sabbasattānaṃ paṭissaraṇabhūtā **vāṇī** yathāvuttaguṇopetā sarassatīdevatā, no ce sabbaññubhārattī vuttasaddhammaratanaṃ **mayhaṃ manāṃ** ganthaviracane byāvaṭassa me cittaṃ **pīṇayataṃ** abhimatthasampādanena pīṇayatūti.

Ubhayalokaajānanato muni ca so indabhāvapavattanato indo ceti kammadhārayena vā, agāriyamunianagāriyamunisekhamuniasekhamunīnaṃ catunnaṃ pañcama hutvā indoti chaṭṭhītappurisena vā **munindo**. Devatāpakkhe vadanamiva **vadananti** ambhoje, saddhammapakkhe ambhojamiva **ambhojanti** vadane ca upacārena gahite kammadhārayo. Munindassa vadanambhojamiti ca, tassa gabbhoti ca, tasmīṃ sambhavoti ca, tena sundarīti ca vākyaṃ. Vāṇiyā visesanatēpi ekantanapūṃsakattā **saraṇasaddassa** na liṅgaparivattanabhāvo. **Pāṇinanti** rassattaṃ, dīghassa byabhicārattā. Mayhanti ekavacanena attano sādhuṇodāyakaṇaṃ niraṭimānataṃ dīpeti. Santesupī aññesu jinapariyāyesu **munindasaddo** iṭṭhamanosampīṇanaambhojatulyatāsundarittasaraṇattasāṅkhātānaṃ atthantarānaṃ ocityaṃ poseṭīti payutto. Tathā hi tādisassa mukhaṃ ambhojatulyaṃ, tasmīṃ mukhodare sambhavā sundarī, tatoyeva pāṇinaṃ saraṇaṃ. Tasmāyeva manosampīṇane paṭuttaṃ subyattamiti ocityaṃ hoti. Loke patthaṭamīdamocityamādarāṇīyaṃ hoti. Tasmīñhi uttamakavayoyeva upadesakāti. Vuttañhi –

“Ocityaṃ nāma viññeyyaṃ, loke vikhyātamādarā;
Tatthopadesappabhavā, sujanā kavipuṅgavā”ti [[subodhālaṅkāra 104 gāthā](#)].

Nimittavaṇṇanā

2. Rāmasammādyalaṅkāra, santi santo purātanā; Tathāpi tu vaḷaṅjenti, suddhamāgadhikā na te.

2. Athevamabhiṅgātāmitasiddhisampadāpādanekacaturaparamiṭṭhadevatā- bhāvarūpitasaddhammaratanasso’ padassitanipaccakārena iṭṭhadevatāpūjaṃ dassetvā “nanu bandhalakkhaṇamatthiyeva pubbakāṃ, tasmā kīmanena piṭṭhapīṇane”ti lakkhaṇantarāmbhapaṭikkhepakajānapaṭibāhanapubbakāmbhidheyyappayojana- sambandhe dassetumāha “**rāmasamme**”ccādi. Rāmasammādināṃ rāmasammāpabhūtīnaṃ pubbācariyānaṃ, rāmasammādayo vā taṃsambandhato. Bhavati hi taṃsambandhato tabbohāro yathā kiñcipi vejjasatthāṃ “bimbisāro”ti. **Alaṅkāra** bhūsāvisesā, bandhālaṅkārapaṭipādakatthena alaṅkārahyaṃ ganthavisesā vā. **Santo** sobhanā. Dvepi purā pubbakāle bhavā **purātanā**, porāṇikā. Ubhopī santi. Yajjapī saṃvijjanti. **Tathāpi tūti** nipātasamudāyoyāṃ visesābhīdhānārambhe. Evaṃ santēpīti attho. **Suddhamāgadhikā**ti magadhesu bhavā, tattha viditā vā magadhā, saddā. Te etesaṃ santi, tesu vā niyuttatī māgadhikā. Suddhā ca sakkaṭādhībhāsitaḷusiyābhāvena visuddhā, asaṃmissā vā aparicitattā te māgadhikā cāti **suddhamāgadhikā**, yatipotā. **Te** yathāvutte alaṅkāre ābharaṇavisesā

na vaḷaṅjenti, pasādhanavisesse nānubhavanti. Ganthavisesse pana uggahaṇadhāraṇādivasena attano suddhamāgadhikattā, rāmasammādīnaṅca sakkaṭādi bhāvato ayamettha saddattho. Bhāvattalesopettha paripūrati, tathāvidhapatītiyogato. Suddhamāgadhikā attano parisuddhabhāvena pubbe sobhanāpi te alaṅkāra idāni malaggahitabhāvappattā “kiṃ tehi malaggahitehi amhādisānaṃ suddhasattāna”nti na vaḷaṅjentīti.

“Patīyamānaṃ pana kiñci vatthu,
Attheva vāṇīsu mahākavīnaṃ;
Yaṃ taṃ pasiddhāvayavātiritta-
Mābhāti lāvaṇyamivaṅganāsū”ti.

Hi vuttaṃ.

2. Santo viññūhi pasatthattā sobhanā **purātanā** pubbakālasambhūtā **rāmasammādyalaṅkāra** rāmasammādīhi ācariyehi viracitattā, tesam taṃsambandhato tabbohārasadisaṇāmattā vā rāmasammādayo nāma alaṅkāra kismiñci vejjasatthe “bimbisāro”ti vohāro viya. Alaṅkāra bhūsāvisesā, alaṅkāratapaṭipādanato alaṅkāraṇāmikā ganthavisesā vā **santi** kiñcāpi vijjanti, **tathāpi tu** evaṃ santepi **suddhamāgadhikā** sakkaṭapākatādīsu aññabhāsāsu paricayābhāvato kevalamāgadhikā **te** rāmasammādīke alaṅkāre **na vaḷaṅjenti** pasādhanavasena, uggahaṇadhāraṇādivasena na sevanti. Magadhesu bhavā, tesu vā viditā magadhā, saddā. Te etesaṃ atthi, tesu niyuttāti vā **māgadhikā**. **Suddhasaddo** magadhavisesano, māgadhikavisesano vā hoti. Saddānaṃ tādīsapatītivisesayogato bhāvattalesopi idha dīpati. Tathā hi suddhamāgadhikā attano suddhattā tesam vīnyāseṇa sobhanatte satīpi bhāsāya purātanattā aparīsuddhoti avamaññamānā na vaḷaṅjentīti. Vatticchitassatthassa upatthambhakabhūto bhāvattalesopi mahākavīnaṃ vacanesuyeva labbhatīti daṭṭhabbo. Vuttaṃ hi—

“Patīyamānaṃ pana kiñci vatthu,
Attheva vāṇīsu mahākavīnaṃ;
Yaṃ taṃ pasiddhāvayavātiritta-
Mābhāti lāvaṇyamivaṅganāsū”ti.

Tassattho – **mahākavīnaṃ** pūjītakavīnaṃ **vāṇīsu** vacanavisesesu **patīyamānaṃ** gammamānaṃ **yaṃ kiñci vatthu** yo koci atthaleso **attheva** atthi eva, **taṃ** vatthu **aṅganāsu** vanitāsu **pasiddhāvayavātirittaṃ** hatthapādādīpākaṭasarīrāvayavato adhikaṃ **lāvaṇyamiva** manogocarībhūtasundarattaṃ viya **pasiddhāvayavātirittaṃ** pakāsasaddāvayavato adhikaṃ hutvā **ābhāti** dīpatīti.

Abhidhānādivaṅṇanā

3. Tenāpi nāma toseyya-mete’laṅkāravajjite; Anurūpenā’laṅkāre-ne’sameso parissamo.

3. Tenecādi. Yena te alaṅkāre na vaḷaṅjenti, **tena** kāraṇena **alaṅkāravajjite** ābharaṇehi, ganthavisesehi vā rahite, alaṅkāra vā yathāvuttavajjitā yehi te, **ete** yatipote **esaṃ** yatipotānaṃ **anurūpena** idāni viraciyamānattābhīnavabhāvato, dasabalavadanakamalamajjhavāsītabhāsītaviracitabhāvato ca anucchavikena **alaṅkārena** ābharaṇena, alaṅkārasatthena vā **toseyyaṃ apināma** yathicchitapasādhanavasena, savanadhāraṇādivasena vā vaḷaṅjanena santuṭṭhe kareyyaṃ appeva nāma yannūnāti **eso parissamo** ayaṃ amhākaṃ tādīsasantuṭṭhijanakālaṅkārapakaraṇappayogo.

Alaṅkaronti attabhāvamanenāti **alaṅkāro**, ābharaṇaṃ hārakeyūrādi. Alaṅkaronti bandhasarīramanenāti **alaṅkārotimīnā** pana **alaṅkārasaddena** pasādādayo saddālaṅkāra, sabhāvavutyādayo ca atthālaṅkāra nānappakārā saṅghitā, yehi saddatthasaṅkhātāṃ bandhasarīraṃ sobhate, yathā hi purīsarīre hārakeyūrādyalaṅkāro nyasyate, yena sobhate, tathā bandhasarīrepi saddālaṅkāra, atthālaṅkāra ca nikkhipīyanti, yato sobhate. Teneva vakkhati “taṃ tu pāpentulaṅkāra,

vindanīyatarattana’’nti [subodhālānkāra 9 gāthā] ca, ‘‘atthālānkārasahite’’ccādikañca [subodhālānkāra 164 gāthā].

Alānkāravidhānabhāvena tu bandhasarīrampi tadatthiyā alānkāro, tathā tappaṭṭipādakaṃ subodhālānkāranāmadheyyasatthaṃ alānkatapaṭṭipādakattena maṅgalasuttanti viya. Vakkhati hi ‘‘ganthopi kavivācāna-malānkārappakāsako’’ [subodhālānkāra 12 gāthā] ccādi. Atra uccate –

‘‘Mukhyolānkārasaddoṃ, saddatthālānkātissito;
Sāmatthiyā tvadhiṭṭhāne, tathā sattheṇi tabbatī’’ti.

Anenassābhidheyyādīni vuccanti. Abhidhīyate iti abhidheyyaṃ, samuditeṇa satthena vacanīyatto. So ca sarīrālānkāravibhāgakappaṇāya tesāṃ paṭṭipādanāṃ. Subodhālānkāreṇa hi te paṭṭipādīyanti. Yena ca yo paṭṭipādīyati, tassāyamattho bhavatīti abhidheyyasatthopi. Dassitameva tu sarīrālānkārasaṅkharāṇaṃ payoṇaṃ, taṃ nissāya subodhālānkārappavattito. Yassa hi yamuddissa pavatti hoti, taṃ tassa payoṇaṃ, taṃ pana kavittakittipāsiddhādilakkhaṇaṃ, paramparāya tadatthatāya subodhālānkārasaṅkharāṇassa. Satthapayoṇaṇaṃ, sādhiyasādhanalakkhaṇo sambandho tu nissayapadassinā dassitoyeva. Yathāha –

‘‘Satthaṃ payoṇaṇeṇa, ubho sambandhanissayā;
Vuttatāṃvuttīyāyeva, vutto tannissitopi so’’ti.

Abhidheyyādīkathanañca taṃsamaṅgisṣeṇa ca vīmaṃsāvisesasamaṅgīnamupādīyamānattā, aññādisassa pana ummattakavacanādino viya heyyattā. Vuttañhetā –

‘‘Sambandhānugūṇopāyaṃ, purisatthābhidhāyakaṃ;
Vīmaṃsādhigataṃ vākya-matonadhigataṃ para’’nti.

Vākyanti cettha vākyalakkhaṇopetamantaravākyasannicayaṃ mahāvākyasarūpaṃ satthamevādhīpetāṃ.

3. Yena te te alānkāreṇa vaḷaṅjenti, **tena** kāraṇeṇa **alānkāravajjite** ābharaṇavisesehi, ganthavisesehi vā vajjite, te virahite yehi **ete** suddhamāgadhike **esaṃ** suddhamāgadhikānaṃ **anurūpeṇa** abhinavabhāvato māgadhikasārūpaṃ anugatarūpeṇa, dasabalabhāsītaviracitattā vā anukūleṇa **alānkāreṇa** ābharaṇavisesena, ganthavisesena vā **toseyyaṃ** alānkāraḷaṅjāpanena, ganthavisesa [ganthavisaye (ka.)] uggahaṇadhāraṇādīkāraṇeṇa vā santuṭṭhe kareyyaṃ **apināma** yaṃnūna sundaramīti, **eso parissamo** ayaṃ mama alānkārapakaraṇappayogo. **Apināmā**ti ettha itisaddo gamyamaṇo.

Alānkārehi vajjitā, alānkārā vajjitā yehi vāti ca. Rūpassa anu **anurūpaṃ**, rūpaṃ anugataṃ anurūpaṃ vā, tena anurūpeṇa. Alānkāraṇi attabhāvamāneneti **alānkāro**, hārakeyūrādī ābharaṇapakke, ganthapakke tu alānkāraṇi bandhasarīramāneneti **alānkāro**. Iminā mukhyabhāveṇa pasādādisaddālānkārā ca sabhāvavutyādiatthālānkārā ca pavuccanti. Amukhyato pana imesaṃ dvīnaṃ alānkārānamadhiṭṭhānabhūtabandhasarīrampi, tathā maṅgalasuttaratanasuttādivohāro viya alānkārapakāsakaṃ ‘‘sammā bujjhanti dvīpakārā alānkārā anene’’ti iminā atthena laddhasubodhālānkāravarānāmadheyyasatthampi vuccati. Vuttamidameva –

‘‘Mukhyolānkārasaddoṃ, saddatthālānkātissito;
Sāmatthiyā tvadhiṭṭhāne, tathā sattheṇi tabbatī’’ti.

Ettha **sāmatthiyaṃ** nāma tadādhāratappaṭṭipādakattavohārato tadādheyyatappaṭṭipādānīyaṃ na bhavati ce, aññaṃ kiṃ bhavatīti aññathānupapattilakkhaṇamevāti.

4. **Yesaṃ na sañcitā paññā-nekasatthantarocitā;
Sammohabbhāhatāve’te, nāvabujjhanti kiñcīpi.**

5. **Kim tehi pādasussūsā, yesaṃ natthi gurūnī’ha [garūniha (ka.)];
Ye tappādarajokiṇṇā, te’va sād’hūvivekino.**

4-5. Evaṃ lakkhaṇārambhapaṭikkhepakajanapaṭibāhanapubbakamabhidheyyādikaṃ dassetvā idāni satthato va sabbattha guṇadosavivecanaṃ. Atoyeva vuccati –

“Sabbattha satthatoyeva, guṇadosavivecanaṃ;
Yaṃ karoti vinā satthaṃ, sāhasaṃ kimatodhika’nti.

Tasmā guṇadosavibhāgavicāraṇaṃ nāma tabbidūnaṃyeva, nāsatthaññūnaṃ purisapasūnaṃ. Tathā cāha –

“Guṇadosamasatthaññū, jano vibhajate kathaṃ;
Adhikāro kimandhassa, rūpabhedopaladdhiya’nti [kābyādāsa 1.8].

Yenevaṃ, tenettha guṇadosadassane pasannānekasatthacakkhuyevādhigato, nañño tabbiparītotaṃvayabyatirekavasena dassento “**yesa**”ntiādigāthādvayamāha. Tattha **yesanti** aniyamuddeso, yehīti attho. Yehi na sañcitā na rāsikatā, nānāsantānavuttinīpi ekattanayena ekasmiṃ santāne na vāsītā napaṭibhāvitāti vuttaṃ hoti. Kā sā? Paññā heyyopādeyyavivekarūpā. Kīdisīti āha “**anekasatthantarocitā**”ti. **Anekasmiṃ** tipītakatakkabyākaraṇālaṅkārasatthādhike satthantare **ucitā** savanadhāraṇādivasena paricitā sāyaṃ paññā yesaṃ na sañcitāti pakataṃ. **Eteti** yathāuddiṭṭhānaṃ niyamavacanaṃ. **Sammohabbhāhatā**ti yathāvuttāyātisayavatiyā paññāyābhāvato balappattena mohena abbhāhatā visesena pahatā, evasadditā hontīti adhippāyo. Yato evaṃ, tasmāpi **kiṅcipi** heyyopādeyyarūpaṃ yaṃ kiṅcideva atṭhānāniyojakatādisagurupādasussūsānisayapaṭiladdhavivekapaññāti- sayālābhena **nāvabujjhanti**, na jānantītyattho. Yato ālasiyādidosalesapariggahopi satatācariyasevanavasena sirovikiṇṇatādisagurupādapāṅkajambujaparāyano cirenapi kālena nānāvidhasatthantarakataparicayabalena pappoti tādisaṃ paññāveyattiyaṃ. Tenevāha bhagavā –

“Nihīyati puriso nihīnasevī,
Na ca hāyetha kadāci tulyasevī;
Seṭṭhamupanaṃ udeti khippaṃ,
Tasmā’ttano uttaritaraṃ bhajethā’nti [a. ni. 3.26].

Tato etādiso paññāvāyevettha guṇadosavibhāgavivecane adhikārī, nañño tabbiparīto purisapasūti ayametthādhippāyo. Ruḷho atthaviseso. Tenāha “**kim tehi pādasussūsā, yesaṃ natthi gurūnihā**”ti. **Ihāti** imasmiṃ loke **yesaṃ** janānaṃ gurūnaṃ kātābbā **pādasussūsā** pādaparicariyā **natthi, tehi** janehi yathāvuttanayena paññāveyattiyarasānabhiññehi **kim** payojanaṃ, lesamattampi natthi, anadhigatāyevettha eteti adhippāyo. Idāni byatirekamukhena āha “**ye**”tiādi. **Ye** pubbe katapuññatādisampattisampannā **tappādarajehi** tesāṃ gurūnaṃ pādadhūlīhi **okiṇṇā** onaddhā gavacchitā, **teva sād’hū** yathāvuttanayena paññāveyattiyena abhiññātā sajjanā eva **vivekino** heyyopādeyyaguṇadosavibhāganiyamanapaññāsampattisamaṅgino honti, teyevettha guṇadosavivecane adhigatāti adhippāyo. Sā cāyaṃ gurupādasussūsā visiṭṭhādarena karaṇīyāti vaṅkavuttīyā tadabhyāse sād’hujane niyojati.

4-5. Ye sakalasatthaparicitaññāpāṭavā yadi dosamāropayanti, tesāṃ taddosanirākaraṇaṃ vinā padesāvabodhanamattena paṇḍitamānīnaṃ vacanassāgurukaraṇaṃ vaṅkavuttīyā dassento ca taṃdvāreneva attano anaññāsādhāraṇagurugāravataṃ sād’hujanehi paramādarena sampādetabbamiti dassetuṃ “**yesaṃ...pe... kino**”ti gāthādvayamāha. **Anekasatthānaṃ** tipītakatakkabyākaraṇādīnaṃ anekesaṃ ganthānaṃ **antare** tatvatthasaṅkhātāabbhantare **ucitā** savanauggahaṇadhāraṇādivasena paricitā **paññā** sutamayā paññā **yesaṃ** yehi **na sañcitā**, dvinnamekakkhaṇe pavattiyābhāvepi upacitasamūhabhāvato, pubbakālikapaññāya aparakālikapaññāya anantaraāsevanādipaccayalābhato avatthabāhullapavattito vā sañcitābbāpi na rāsikatā. **Ete** īdisapaññāpāṭavarahitā ime **sammohabbhāhatā** paññāpāṭavābhāvato balappattena mohena visesena pahatā eva **kiṅcipi** heyyopādeyyaṃ nāvabujjhanti. Na eke aneketi ca, te ca te satthā ceti ca, tesamantaramiti ca, tasmīṃ

ucitāti ca sammohena abbhāhatāti ca viggaho. Tena vuttam–

“Guṇadosamasatthaññū, jano vibhajate katham;
Adhikāro kimandhassa, rūpabhedopaladdhiya’nti [[kābyādāsa 1.8](#)].

Tassattho – asatthaññū jano guṇadosam katham vibhajate. Tathā hi **rūpabhedopaladdhiyam** nīlapītādirūpavisesāvabodhane **andhassa adhikāro** abhimukhakaraṇam **kiṃ** hoti, na bhavatyeva, tasmā anekasatthantaragatasuppasannapaññācakkhunā eva guṇadosavivecanam bhavati, tadabhāve na bhavatyeva. Idameva vuccate–

“Sabbattha satthatoyeva, guṇadosavivecanam;
Yaṃ karoti vinā sattham, sāhasam kimatodhika’nti.

Tassattho – sabbattha guṇadosavivecanam satthatoyeva hoti, **sattham vinā** satthocitatādisapaññam vinā **yaṃ karoti** guṇāguṇavibhāgam karoti, yaṃ karaṇam atthi, **atodhikam sāhasam kiṃ** āsum kiriyā anupaparikkhanakiriyā nattheva.

Iha imasmim loke **yesam** akatapuññānam janānam **gurūnam**

“Piyo garu bhāvanīyo,
Vattā ca vacanakkhamo;
Gambhīraṇca katham kattā,
No cā’ṭṭhāne niyojako’nti [[a. ni. 7.37](#)].

Niddiṭṭhaguṇopetānam ācariyānam kātabbā **pādasussūsā** pādaparicariyā natthi, **tehi kiṃ** payoanam. **Ye** katapuññā janā **tappādarajokiṇṇā** tesam gurūnam pādarajehi gavacchitā, **teva sādhu** janā eva **vivekino** kalyāṇamittagurupāsanāhi adhigatavisiṭṭhavivekabuddhino bhavanti, te eva vivekam jānantīti bhāvo. Sotumicchā sussūsā, tam nissāya kattabbapādaparicariyāpi tadatthiyā sussūsā nāma hoti. Pādesu sussūsāti ca, tesam pādāti ca, tesu rajāntīti ca, tehi okiṇṇāti ca viggaho. Sissānam sakalābhībuddhiyā gurupaṭibaddhattā attano guṇato adhikatarāyeva sevitabbā. Vuttañhi bhagavatā –

“Nihīyati puriso nihīnasevī,
Na ca hāyetha kadāci tulyasevī;
Seṭṭhamupanamaṃ udeti khippaṃ,
Tasmā’ttano uttaritaram bhajethā’nti [[a. ni. 3.26](#)].

6. **Kabbanāṭakanikkhitta-nettacittā kavijjanā;**
Yaṃkiñci racayante’tam, na vimhayakaram param.

7. **Teye’va paṭibhāvanto, so’va bandho savimhayo;**
Yena tosentī viññūye, tatthāpya’vihitādarā.

6-7. Evametthānvayabyatirekavāsenādhighate dassetvā idāni “kiṃ amhākam kabbanāṭakaparicayābhāveracanāvisesābhiyogopajanitaparissamenā”ti olīnavuttino sotujane samussāheti “**kabbanāṭakā**”tiādīnā. Kavippayogasañkhāto bandhova kavino idanti **kabbaṃ**. Muttakādivākyasvammuttikādyavayavasabhāvā antaravākyasamudāyasampannam vuttajātibhedabhinnaṃ pajjamayaṃ gajjamayaṃ pajjagajjamayaṃ campūnāmakaṇca, mahāvākyarūpaṃ mahākabbaṇca, tam pana mahākabbaṃ saggehi sagganāmakehi paricchedavisesehi bandhyate karīyatīti saggabandhoti pavuccati. Tassa tu lakkhaṇam “saggabandhassa mukhaṃ iṭṭhāsīnaṃ siyā paṇāmo vā bandhasambandhino kassaci atthassa niddeso vā”tiādīnā anekadhā vaṇṇenti. Tam yathā?

“Saggabandho mahākabba-muccate tvassa lakkhaṇam;

Paṇāmo vatthuniddeso, āsīsāpi ca tammukhaṃ.

Itihāsakathubbhūtaṃ, santasannissayampi vā;
Catuvaggaphalāyattaṃ, caturodāttanāyakaṃ.

Puraṇṇavutuselindu-savitūdayavaṇṇanaṃ;
Uyyānasalilakkīlā, madhupānaratussavaṃ.

Vippalambhavivāhehi, kumārodayavaḍḍhihi;
Mantadūtappayānāji-nāyakābhyūdayehipi.

Alaṅkatamasamkhitta-rasabhāvanirantaraṃ;
Nātivitthiṇṇasaggehi, piyavuttasusandhibhi.

Sabbattha bhinnasaggante-hupetaṃ lokarañjakaṃ;
Kappaṃ kappantaraṭṭhāyi, jāyate sādharmaṅkatī”ti [kābyādāsa 1.14 – 19 gāthā].

Tattha **itihāsakathubbhūtaṃ** purāvuttakathāsannissayaṃ. **Santasannissayanti** itarasobhanādihikaraṇaṅaṅarājacaritādinissayaṃ vā. **Catuvaggaphalāyattaṃ** dhammādicatuvaggaphalāyattaṃ. **Dhammo** nāma abbhūdayanibbānāhetuko. **Attho** nāma vijjābhūmyādīnaṃ yathāññāyamajjanaṃ, ajjitānañca rakkhaṇaṃ. **Kāmo** nāma nirayo visayo payogo. **Mokkho** nāma sabbasaṃsāradukkhanivatti. **Caturodāttanāyakaṃ** ussāhasattimantasattipabhūsaṭṭiyogena caturo kusalo cāgāṭisayādiyogena udātto udāro nāyako vipakkho, paṭipakkho ca yattha, taṃ. **Madhu** nāma surā. **Vippalambho** viraho. **Manto** nītivēdīhi saha kāriyanicchayo. **Dūto** sandhānappavatto puriso. **Payānaṃ** saṅgāmādinimittagamaṇaṃ. **Āji** sandhyābhāve viggaho. **Asaṅkhattarasabhāvanirantaraṃ** asaṅkhittā bahuttā **rasā** siṅgāravīradāyo, **bhāvā** ratiussāhādayo, tehi **nirantaraṃ** patthaṇaṃ. **Piyavuttasusandhibhīti** piyāni sutisubhagāni vuttāni indavajirādīni aññamaññasambandhasaṃsaggaṭāya sobhano sandhi aññamaññasaṅgahā yesaṃ saggānaṃ, tehi.

Punapi yathāvuttesu aṅgesu nagaravaṇṇanādīsu kiñca yathāsambhavaṃ madhupānādirahitampi taññūnaṃ mano rañjeti upādiyateva sabbhīti dassatumāha—

“Kappaṃ na dussataṅgehi, nyūnamapyatra kehici;
Bandhaṅgasampadā taññū, kāmamārādhayanti ce”ti [kābyādāsa 1.20].

Punapi —

“Guṇato paṭhamaṃ vatvā, nāyakaṃ tena sattuno;
Nirākaraṇamiccesa, maggo pakatisundaro.

Vaṃsavīrasutādīni, vaṇṇayitvā ripussapi;
Tajjayā nāyakukkamsa-kathanañca sukhēti no”ti [kābyādāsa 1.21 22 gāthā] āhu.

Sabbampetaṃ saddhammāmatarasapānasarasahadayānaṃ
samhappalāpavipulavisappavesopaddutakabbanāṭakaparammukhānaṃ
satatacaritasāncaritaratanabhājanānaṃ sappurisānaṃ kiṃ hadayakhedopajanitaparissameneti
tadanurūpamevopadassitanti.

Nāṭakaṃ nāma bharaṭādīnātyasatthe nānappakāranirūpitarūpaṃ kappaṃ,
taṃlakkaṇekadesabhūtalakkaṇāni pakaraṇādīni nava rūpakāni. Nāṭikā ca ethevāvarumbhanti.
Kappañca nāṭakañca, tesu nikkhittaṃ ṭhapitaṃ nettañca cittañca yehīti viggaho. Ke te? Kavino.
Tattha **nikkhittanettacitta**vacanena sutassa cintanañca ūhāpohamukhena yathuggahitaniyāmaṃ,
aviparītattathanicchayanaṃ, nicchitassa bhāvanā, nirantarābhiyogo ca dassito. **Kabbanāṭaka**vacanena

sutaṃ, cintitaṃ, bhāvitañca dassitaṃ. Sute dassite tannissayaṃ sutamayaññāṃpi dassitameva siyāti. “Kabbanāṭakanikkhittanettacittā”ti iminā sutacintābhāvanānukkamena sampāditapaññāpāṭavānaṃ kabbaracanāya sāmattiyaṃ dasseti. Hoti hi tādisānaṃ taṃsutādi bandhanakāraṇaṃ. Vuttañhi –

“Sābhāvikī ca paṭibhā,
Sutañca bahu nimmalaṃ;
Amando cābhiyogoyaṃ,
Hetu hotiha bandhane”ti [kābyādāsa 1.103 gāthā].

Yaṃkiñcīti attano cittāruḷhaṃ yaṃkiñci bandhajātaṃ. Iminā pana aniyamavacanena attano tatha ādarābhāvaṃ dīpeti. **Racayanti** karonti. **Etam** tehi racitaṃ bandhajātaṃ **param** accantameva vimhayakaraṃ na hoti, tādisopāyasampattisampannassa upeyyasampattisabbhāvato anacchariyamevāti adhippāyo. **Tattha** tesu kabbanāṭakesu racanāvisesaekantopāyabhūtesu **avihitādarāpi** sutādivasena akatādarāpi **ye** sappurisā paññavanto **yena** bandhavisesena **viññū** guṇadosaviduno satthaññuno paṇḍitajane **tosenti** pīṇenti. Tosentiyeva hi te tādisa sābhāvikipaṭibhāvirahepi etādisesu atthesu sutacintābhāvanāvasena vāyamantā. Vuttañhi –

“Na vijjatī yajjapi pubbavāsana-
Guṇānubandhi paṭibhānamabbhutaṃ;
Sutena vācu’ssahanenupāsītā,
Dhuvam karotyeva kamapyanuggaha”nti [kābyādāsa 1.104 gāthā].

Paṭibhāvanto heyyopādeyyaparicchedalakkhaṇapaññāya paññavanto nāma, **teyeva** sappurisā. **Savimhayo** “kīdisāyaṃ, tādisopāyantarahitānaṃpi etādiso bandho siyā”ti vimhayena saha vattamānopi. **Sova bandho** tameva bandhanaṃ tādisopāyasampattivirahenopeyyasampattiyā sabbhāvato, nāññoti.

6-7. Idāni kabbanāṭakesu aparicitānamamhākaṃ gantharacanāsabhāvāvabodhova kutoti osakkante “**kabbanāṭakā**”digāthādvayena samussāheti. **Kabbanāṭakanikkhittanettacittā** kabbanāṭakesu sutānulokanacintābhāvanāvasena ṭhapitanettacittā **kavijjanā** kabbakārakā **yaṃ kiñci** attano abhimataṃ **racayanti** karonti, **etam** bandhanaṃ **param** atisayena **na vimhayakaraṃ** acchariyakaraṃ na hoti, nirantarābhiyogato siddhopāyamūlapaññāsampadāya upeyyabhūtaganthesaṅkharāṇaṃ bhavatyevāti adhippāyo. Kavino idam **kabbanti** ca, naṭakassa idam **nāṭakaṃ**, naccagītādi. Idha pana tappaṭipādakakathāpakāsakagantho **nāṭakaṃ** nāma. Kabbañca nāṭakañcāti ca, kabbanāṭakesu nikkhitaṃ nettacittaṃ yehīti ca viggaho. **Ye** janā **tattha** tesu kabbanāṭakesu **avihitādarāpi** savanadhāraṇādivasena akatasambhamā eva **viññū yena** gantharacanāvisesena **tosenti** pīṇenti, **teyeva paṭibhāvanto** paṭibhānaṅkhatapaññavanto bhavanti. **Sova bandho savimhayo** aññesaṃ uppajjamānavimhayena sahito. Paṭibhā etesaṃ atthīti ca, saha vimhayena vattatīti ca, avihito ādaro yehīti ca viggaho. Bāhiraṣatthābhiyogābhāvepi pubbavāsānābhāvepi iha nirantarābhiyogaṃ karonto tādisasāmattiyaṃ sādhetīti vuttaṃ hoti. Vuttañhi –

“Na vijjatī yajjapi pubbavāsana-
Guṇānubandhi paṭibhānamabbhutaṃ;
Sutena vācu’ssahanenupāsītā,
Dhuvam karotyeva kamapyanuggaha”nti [kābyādāsa 1.104 gāthā].

Tassattho – yadi **pubbavāsanaṅguṇānubandhī** atītajatīyā paricayavāsanaṅguṇassa anubalappadānavasena anubandho yassatthi, tādisaṃ **abbhutaṃ paṭibhānaṃ** na vijjatīpi, tathāpi **sutena** savanena **ussahanena** paṅṅakaraṇādivācussahanena vā **upāsītā** katagurupāsana **vācā kamapi anuggahaṃ** kiñcīpi paññāpāṭavaṃ **dhuvam** ekantena karoti evāti.

Ettha **kabbaṃ** nāma muttakakulakādivākyavasena ca avayavasabhāvehi tesamyeva

antaravākyāvayavasamūhehi paripuṇṇaṃ vuttavisesehi pabhedagataṃ kevalaṃ pajjamayaṃ vā gajjamayaṃ vā campūtikhyātapajjagajjamayaṃ vāti mahāvākyasabhāvena ca tiṭṭhati. **Nāṭakaṃ** nāma bharatādinaṭasatthagatanānappakāradassitasabhāvaṃ. Kabbañca idheva dassitalakkhaṇato ekadesayuttappakaraṇādinavarūpakāni ca nāṭikā ca bhavanti. Kabbalakkhaṇaṃ pana evaṃ daṭṭhabbaṃ–

“Saggabandho mahākabba-muccate tvassa lakkhaṇaṃ;
Paṇāmo vatthuniddeso, āsīsāpi ca tammukhaṃ.

Itihāsakathubbhūtaṃ, santasannissayampi vā;
Catuvaggaphalāyattaṃ, caturodāttanāyakaṃ.

Puraṇṇavutuselindu-savitūdayavaṇṇanaṃ;
Uyyānasalilakkīlā, madhupānaratussavaṃ.

Vippalambhavivāhehi, kumārodayavaḍḍhihi;
Mantadūtappayānāji-nāyakābhyūdayehipi.

Alaṅkatamasamkhitta-rasabhāvanirantaraṃ;
Nātivitthiṇṇasaggehi, piyavuttasusandhibhi.

Sabbattha bhinnasaggante-hupetaṃ lokarañjakaṃ;
Kabbaṃ kappantaraṭṭhāyi, jāyate sādharmaṅkati’ ti [kābyādāsa 1.14 – 19 gāthā].

Tassattho – **saggabandho** saggasaṅkhātehi paricchedavisesehi bandho “**mahākabba**”nti uccate. **Assa lakkhaṇaṃ tu** vuccateti sambandho **kākakkhigoḷakanayena tammukhaṃ** tassa kabbaṃ ādi pana **paṇāmo** devatānamassanaṃ vā, **vatthuniddeso** –

“Astyuttarasyāṃ dīgi devatātma,
Himālayo nāma nagādhirāja?;
Pūvāpareṇa vārinidhī vigāhya,
Sthita? Pathijhā iva mānadaṇḍa?” [kumārasambhava 1.1.].

Iccādibandhasambandhino kassaci vatthuno dassanaṃ, **āsīsāpi** “mayhaṃ pīṇayataṃ mana” miccādiṭṭhāsānaṃ vā bhavati.

Itihāsakathubbhūtaṃ purāvuttakathāsannissayaṃ vā **santasannissayampi** sobhanānampi rājacariyādīnissayaṃ vā **catuvaggaphalāyattaṃ** lokiyalokuttarasukhākāraṇaṃ **dharmo**, vijjābhūmiādīnaṃ sañcayo, sañcitānaṃ rakkhā ca **attho**, apāyasaṃvattanikapāñcakāmaguṇasaṅkhāto **kāmo**, sabbadukkhā nivattihetu **mokkho** cāti catuvaggaphalādhīnaṃ **caturodāttanāyakaṃ** ussāhasattimantasattipabhūsaṭṭiyogato caturo dakkho cāgāṭisayādiyogena udātto uḷāro sapakkho, vipakkho vā nāyako yattha, taṃ yathāvuttaṃ **puraṇṇavutuselindu-savitūdayavaṇṇanaṃ puram** nagaraṃ, **aṇṇavaṃ** sāgaraṃ, **utu** hemantavasantādiutu, **selam** pabbato, **indusavitūdayo** candasūriyānaṃ udayo cāti imesaṃ vaṇṇanaṃ yattha, taṃ. **Savitāti** ettha **tupaccayanto**. **Uyyānasalilakkīlāmadhupānaratussavaṃ** uyyānakīlāsuraṇṇapānaratikīlāsāṅkhāto ussavo yattha, taṃ **vippalambhavivāhehi** dārāvīyogadārāpariggāhehi ca **kumārodayavaḍḍhihi** kumārūppattikumāraḍḍhihi ca **mantadūtappayānājināyakābhyūdayehi** nītijānanapaññā **manto**, sandhānakārako **dūto**, yuddhābhigamaṇaṃ **payānaṃ**, yuddhasāṅkhāto **āji**, sapakkhanāyakaṃ abhivaḍḍhisāṅkhāto **abhyūdayo** cāti imehi **alaṅkataṃ** sajjitaṃ **asaṃkhitta...pe... ntarāṃ** asaṃkhittā vitthārā **rasā** siṅgārādayo aṭṭha **bhāvā** ratiussāhādayo cāti imehi **nirantaraṃ** vitthiṇṇaṃ **piyavuttasusandhibhi** sutisubhagehi indavajirādīhi vuttehi pubbāparasambandhaparicchedatāya sobhanā sandhi yesaṃ saggānaṃ, tehi **sabbattha** sabbasmaṃ paricchede **bhinnasaggantehi** bhinnasaggā pariyoṣānā yesaṃ, tehi **nātivitthiṇṇasaggehi** nātivitthārasaggasaṅkhātehi paricchedehi **upetaṃ** yuttaṃ **sādharmaṅkati** sobhanālaṅkāravantaṃ **kabbaṃ lokarañjakaṃ** taṃ samānaṃ

kappantarattḥāyi kappanirantarattḥāyi kappantare tḥāyi vā **jāyate**. Ettha madhupānādirahitapuravaṇṇanādayopi taññūnaṃ cittaṃ ārādheti ce, taṃpyaduṭṭhaṃ. Vuttañhi –

“Kappaṃ na dussataṅgehi, nyūnamapyatra kehici;
Bandhaṅgasampadā taññū, kāmamārādhayanti ce”ti.

Tassattho – **atra** imesu kabbāṅgesu majjhe **kehici aṅgehi** kehici avayavehi **nyūnamapi** ūnamapi, **nisaddotratabbhāve**. Kappaṃ na dussati, taṃ pana adussanaṃ **bandhaṅgasampadā** racitapuravaṇṇanādiṅgasampadā **taññū** kabbāññū jane **kāmaṃ** icchānurūpaṃ **ce ārādhayanti**, evaṃ sante bhavati. Punapi nāyakavaṇṇanāsu sapakkhanāyakaṃ vaṇṇetvā tena nirākaraṇabhāvampi. No ce, paccatthikaṃ vaṇṇetvā attano nāyakena tassābhivhavanampi vaṇṇetuṃ vaṭṭati. Vuttañhi –

“Guṇato paṭhamaṃ vatvā, nāyakaṃ tena sattuno;
Nirākaraṇamiccesa, maggo pakatisundaro.

Vaṃsavīrasutādīni, vaṇṇayitvā ripussapi;
Tajjayā nāyakukkaṃsa-kathanañca sukheti no”ti.

8. **Bandho ca nāma saddatthā, sahitā dosavajjitā; Pajjagajjavimissānaṃ, bhedenā’yaṃ tidhā bhava.**

8. Evametehe sotujanasaṃsāhanaṃ dassetvā idāni kattumicchitabandhoti vuttaṃ bandhassa lakkhaṇaṃ kattumārabhate “**bandho cā**”tiādi. **Dosavajjitā** dosehi saddanissitehi, atthanissitehi ca virodhehi vajjitā pariccattā, te vā vajjitā yehi, saddatthā **sahitā** ekībhūtā. Vuttalakkaṇā yehi te pubbācariyehi sahitā vuccanti. Sahitānaṃ bhāvo sahadayaḥilādakāraṇaṃ sādhyāṃ sāhiccaṃ. Iti dosavajjite sahitā saddatthe pasiddhabhāvena anuvaditvā **bandho nāma** sabhāvavuttivaṅkavuttialaṅkāvuttivasena tividhopīti appasiddhaṃ bandhasarīraṃ vidhīyate yathā “yo kuṇḍalī, so devadatto”ti. **Casaddovattabbantarassa** samuccayo, kiñcīti attho.

Tattha jātiṅgūnakriyādabballakkaṇaṃ saddānamattho mukhyo catubbidho hoti. Mukhyassatthassa catubbidhattā tividhesu saddesu tabbācako catubbidho hoti jātisaddo guṇasaddo kriyāsaddo dabbasaddoti. Tividho hi saddo vācako lakkhaṇiko byañjakoti byāpārabhedena. Byāpāro ca nāma saddassa tḥappatītikārittameva. So hi tividho mukhyo lakkhaṇaṃ byañjanasabhāvo ceti. Tattha jātyādinirantarathavisayo saddabyāpāro mukhyo. Soyeva abhidhāti uccate. Taṃbyāpāravā abyavahitajātyādisakehi tamatthaṃ mukhyabhāvena yo vadati goḍiko, so vācako. Saddantarathavisayaniddiṭṭho saddabyāpāro lakkhaṇo. Sā duvidhā suddhā, upacāramissā ceti. Tattha suddhā yathā “go muccatu, mañcā ugghosenti, gaṅgāyaṃ ghoso”ti. Ettha **gosaddena** visesaṃ gottasāmaññamevocate, na tu gobyatti. Vuttañhi –

“Visesyaṃnābhidhā gacche, khīṇasatti visesane”ti [[kābyappakāse dutiyaullāse āgatanyāyo’yaṃ](#)].

Sāmaññassa byāpakattā, asarīrattā ca. Tattha bandhanamocanāni na sambhavatīti attano nissayaḥbhūtā gobyatti ākaḍḍhīyate, tathā mañcānamugghosanaṃ na sambhavatīti attano ugghosanakriyāsiddhyatthaṃ mañcasamaṅgino purisā ākaḍḍhīyanti. Tathā gaṅgāsaddavāccassa jalappavāhassa ghosappatyākaraṇā na sambhavatīti **gaṅgāsaddo** attanobhidheyyassodakappavāhassa nikaṭaṃ taṭaṃ lakkheti. Upacārasānekappakārattā upacāramissā lakkhaṇāpyānekadhā siyā. Yathā katthaci kāraṇe kāriyamupacariyate, yathā “āyu ghata”nti. Katthaci kāraṇakāriyānamabhedo yathā “āyuyevēda”nti. Katthaci upamāne upameyyamupacariyate, yathā “go bāhiko”ti. Katthaci abhedo tesāṃ, yathā “goyevāya”nti. Katthaci tadādhāratāya [[tadatthāyā \(ka.\)](#)] taṃbyapadeso, yathā “padīpaṭṭhā kapallikā padīpo”ti. Katthaci taṃkamma sambandhā taṃbyapadeso, yathā “avaḍḍhakīpi vaḍḍhakī aya”nti. Katthaci saṃsāmisambandhā, yathā “rājasambandhī puriso rājāya”nti. Katthaci avayave samudāyabyapadeso, yathā “paṭekadese paṭasaddo” iccādi.

Lakkhaṇāya nissayo saddo lakkhaṇiko. Byañjanasabhāvo pana parapariyāyo saddassa tatiyo

byāpāro. Tassa nissayo saddo byañjanako. Icceṭaṃ tiṇṇaṃ saddānaṃ vasena atthopi tividho hoti vācco lakkhaṇiyo byaṅgyoti. Tattha byaṅgyoyevattho bandhasatthā vuccate. Teneva padhānabyaṅgyo bandho uttamo, apadhānabyaṅgyo majjhimo, abyāṅgyo adhamo, byaṅgyena vinā bandho nijjīvo siyāti pubbācariyānaṃ pavatti, sabhāvavutti bandhopi tu nijjīvoti nāsankaniyo. Yasmā kavīnaṃ lokavohāraṅkosallaṃ sabhāvavuttiyeva gameti. Yo hi sakalalokaṭṭhitim na jānāti, so kaviyeva na hotīti.

Athettha tividhampi atthaṃ tādīsajanāvabodhatthaṃ samudāharissāma **“munindavadanambhoje”** tyādi. Ettha **vāṇī**saddassa saddhammasaṅkhāto attho vāccattho. Vāṇī nāma cetanā, tassaṃ yāva devatatthaṃ nāropyate, tāva tappatī attano manosampīṇanaāsīsanā na saṃgacchatīti vākyasāmatthiyāyeva vāṇiyaṃ sāmocityabhedena **devatās**saddassa āropittho lakkhaṇiyo. Tathā **vadanā**saddassāpi mukhaṃ vāccattho. **Ambhojas**saddassa samāropittho lakkhaṇiyo. Manosampīṇanassa tu aññathā anupapattiyā passaddhyādikkamena yathābhūtāvabodhasambhavā anāyāsena vicittānekasaddatthapaṭibhānena ganthaparisaṃmattisaṅkhātā yathicchitathanipphatti hoteva, ayaṃ byaṅgyattho. Tabbācakā saddā vācakaṃ lakkhaṇikabyañjakā hontīti evaṃ sabbattha saddatthavicāro gantabbo.

Tamevaṃ yathāvuttabandhasarīraṃ katividhamiccāha **“pajje”** ccādi. **Ayaṃ** yathāvutto **bandho** bandhasarīraṃ **tidhā bhava** tippakārena siyā, nādhikaṃ nāpyūnaṃ. Kathaṃ? **Pajjagajjavimissānaṃ bhedena** pajjasabhāvādīnaṃ visesena tidhā bhaveti pakataṃ. Tattha **pajjaṃ** nāma amhehiyeva viracitavuttodayākhya chandasi nirūpitā vuttajātippabhedā catuppadikatthā nirūpito muttakādipi vuttajātippakāroyeva. Tenevettha tesamadassanaṃ. Tesu ekagāthā niṭṭhitatthā sappadhānā gāthantarānirapekkhā **muttakam**, ekakriyādānena aññamaññasāpekkhā niṭṭhitatthā paccakaṃ aniṭṭhitatthā gāthā **kulakam**, nānābhittiyo bhinnakiriyo sappadhānā gāthā koso viya ṭhapitā **koso**, ekabhittipadosādikaṃ vaṇṇetum samudāyena pavattā bhinnakriyā gāthā **saṅghāto**, sopi catubbidho pajjappakāro yathāvuttasaggabandhovāti viññātabbaṃ. **Gajjaṃ** nāma pādasanniṭṭhānarahito syādyantatyādyantappabandho. Tassa tu dve pakārā ākhyāyikā, kathāti. **Vimissaṃ** pajjagajjamayaṃ nāṭakappakaraṇādi, campū jātakamālādikā ca.

8. Idāni sañjānanābhilāsīnaṃ alaṅkāranissitaṃ bandhasarīraṃ, sova bandhoti adhikataṃ, “yo kuṇḍalī, so devadatto” ti pasiddhakuṇḍalittānūvādena appasiddhassa devadattavidhānaṃ viya dassento **“bandho”** ccādimāha. Tattha **bandho nāma ca** bandhanaṃ pana. **Dosavajjitā** saddatthanissitadosehi pariccattā, te vā vajjitā etehi tādīsā. **Sahitā** aññamaññānurūpatthena sahabhāvaṃ gatā. **Saddatthā** saddo, attho ca. Evampakārehi tu īdisasaddatthānaṃ viññūnaṃ tuṭṭhijanakaaññamaññānurūpagaṇasahitānaṃ bhāvoti vacanatthena “sāhicca” miti vadanti. **Saddatthāti** ettha saddatthānaṃ kiṃ nānākaraṇanti? Saddo pana atthappatītiyaṃ attano mukhyabyāpāraṃ lakkhaṇabyāpāraṃ byañjanasabhāvavyāpāraṇceti tividhaṃ byāpārabhedena. Kamato vācako lakkhaṇiko byañjanako ceti tividho. Tathā atthopi vācco lakkhaṇiyo byaṅgyo cebhi tividho. Atra tu vācako saddo attanā dīpetabbamukhyatthassa jātiguṇakriyādabbabhedena catubbidhattā sayampi jātiguṇakriyādabbasaddavasena catubbidho. Vācakasaddassa mukhyabyāpāro “abhidhā” ti ca vohariyati. So mukhyabyāpāro jātyādīhi abyavahitattheva vattate. Tathā hi “go nīlaṃ pācako visāṇi” ccādo goādisaddānaṃ mukhyabyāpāro gopiṇḍanīlapaṭapācakaṭṭusingīti dabbānaṃ visesanabhūtājātiguṇakriyādabbesveva pavattati, na pana jātyādīnaṃ nissayabhūtagopiṇḍādīsūti. Vuttaṃ hi—

“Visesyaṃ nābhidhā gacche, khīṇasatti visesane” ti [\[kābyappakāse dutiyauḷlāse āgatanyāyo’yaṃ\]](#).

Tassattho – **visesane** visesanabhūtājātyādīmhi **khīṇasatti** khīṇabyāpāravatī **abhidhā** mukhyabyāpārova **visesyaṃ** dabbam **na gacche** na paṇṇatīti.

Jātyādīnaṃ nissayagopiṇḍādikaṃ abhidhā na vadati ce, evaṇca sati “go gacchati, nīlaṃ nivāseti, pācako āgacchati, siṅgī dhāvati” ccādīsū jātyādivisiṭṭhagopiṇḍādīnaṃ goādisaddassa kathaṃ vācakaṭṭhaṃ yujjati? Dabbādīnājātiguṇādīsū vuttessu tabbisiṭṭhassa dabbassa pariyāyato vācakaṭṭha. Nīpariyāyato pana suddhalakkhaṇabyāpārasseva visayo. Lakkhaṇabyāpāropi suddho upacāramissoti

duvidho. Tatha suddho lakkhaṇabyāpāro jātyādivajjitatthavisayo. Tathā hi “go gacchati, nīlaṃ nivāseti, pācako āgacchati, siṅgī dhāvati, mañcā ugghosenti, gaṅgāyaṃ ghoso” tyādīsu jātiṅṅakriyāsīṅgadabbamañcagaṅgādīnaṃ gamanādīhi yogāsambhavato jātiṅṅādayo atikkamma yathākkamaṃ gamananivāsanaāgamanaadhāvanaugghosanaḡhosaḡdīnaṃ nissayabhūtagopiṅṅādayo parāmasati.

Misso tu upacārabhedena bahuvidho. Tathā hi katthaci kāraṇe kāriyamupacariyate, yathā “āyughata” nti, ettha āyuvaḡḡhanakāraṇabhūte ghate kāriyabhūtaāyuno vohāro āropito hoti. Uparipi upacāro yathāyogaṃ yojetabbo. Atamaḡabhāve hi taḡsabhāvāropanaṃ upacāro. Katthaci kāraṇakāriyānamabhedo, yathā “āyuyeva ghata” nti. Katthaci upameyyaupamānopacāro, yathā “go bāhiko” ti. Katthaci upamānaupameyyānamabhedo, yathā “goyevāyaṃ bāhiko” ti. Katthaci tadādhāratāya tadūpacāro, yathā “padīpaḡḡhā kapallikā padīpo” ti. Katthaci kriyāsambandhena taḡbyapadeso, yathā “avaḡḡhakīpi vaḡḡhakī aya” nti. Katthaci saḡsāmisambandhena taḡbyapadeso, yathā “rājavallabhopi rājā aya” nti. Katthaci avayave samudāyabyapadeso, yathā “paḡo daḡḡho” ti. Iminā mukhena upacārabhedo daḡḡhabbo. Byaṅṅanasabhāvabyāpāro eva “dhana” nti ca vuccati, tassa tatiyabyāpārassa visayo tādisavākyameva vāti daḡḡhabbo.

Ettha byaṅṅyatthaṃ bandhassa jīvitamiti ca, byaṅṅyatthapadhānaṃ bandhamuttamanti ca, byaṅṅyatthapadhānarahitaṃ majjhimanti ca, abyāṅṅyabandhaṃ adhamamiti ca vadanti. Honti cettha

Atthappaḡītiyaṃ sadda-byāpāro tividho bhava;
Mukhyo lakkhaṇabyaṅṅjana-sabhāvo cāti ettha tu.

Abhidhāparapariyāyo, byāpāro paḡhamo bhava;
Dhanantāparapariyāyo, byāpāro tatiyo puna.

Mukhyo nirantarathesu, lakkhaṇā tu tirohite;
Atthe’ taro tu vākyassa, attheyeva pavattati.

Byāpārassa pabhedena, tidhā saddopi vācako;
Lakkhaṅiko byaṅṅjakoti, tadatthopi tidhā mato.

Vācco lakkhaṅiyo byaṅṅyo-ccevaṃ saddesu vācako;
Jātiṅṅakriyādabba-bhedena so catubbidho.

Vāccatthassa catuddhāva, bhinnattā jātiādito;
Jātyādīnaṃ pabhedena, tathā lakkhaṅiko mato.

Upacārabahuttena, bhede satipi tassa tu;
Byaṅṅjako tu anaṅṅattā, visuṃ tehi na vuccatīti.

Lakkhaṇato evaṃ veditabbaṃ – “munindavadanambhoje” tyādigāthāyaṃ **vadan**saddassa mukhattho vāccattho, āropitaambhojattho lakkhaṅiyattho. **Ambhoj**saddassa padumattho vāccattho, upacaritamukhattho lakkhaṅiyattho. **Vāṅis**saddassa saddhammasaṅkhāto attho vāccattho, āropitadevatāattho lakkhaṅiyattho. Ettha āsīsanā nāma yathāvuttanayena puṅṅātīsayatā, tato idha abhimatattabādhakākusalānivāraṇaṅca kusalānāmanubalappadānaṅca tato kāyacittapīḡāvīgamo ca tato sukhappaḡīlābho ca tato cittasamādhānaṅca tatoyeva anekavidhatthāvabodho ca tato abhimataganthaparīsamatti ca bhavatiyayaṃ vākyasāmatthiyato laddhattho byaṅṅyattho. Taḡtaḡmatthappakāsakā saddā vācakalakkhaṅikabyaṅṅjanakā nāma bhavanti. Evaṃ saddasaddatthavicāro veditabbo.

Idāni pakāsītabandhassa bhedaṃ vadati “**pajjā**” dinā. **Ayaṃ** vuttalakkhaṅo bandho **pajjagajjavimissānaṃ bhedena** gāthācuṅṅiyatadubhayamissānaṃ vasena tidhā bhava. Saddo ca

attho ceti ca, sahabhāvaṃ itā pattāti ca, dosehi vajjitā, dose vā vajjitā yehīti ca, pajjañca gajjañca vimissañceti ca viggaho. Iha **pajjam** nāma muttakakulakakosakasañghātavasena catuppabhedam chandasi niddiṭṭhavuttavisesaviracitam catuppadikagāthābandham. Tattha **muttakam** nāma niṭṭhitatthā sappadhānā ekā gāthā, **kulakam** nāma paccekamaniṭṭhitatthā aññamaññasāpekkhā ekakriyādvārikā nānāgāthā, **kosako** nāma nānāvidhavaṇṇanābhūmikā bhinnakriyādvārappavattā sappadhānā gāthārāsi, **sañghāto** nāma sañcyākālādiekavaṇṇanābhūminissitā bhinnakriyāsamudāyena pavattā gāthā. **Gajjam** nāma aniyatapado ākhyāyikākathāvasena dvippabhedo syādyantatyādyanto vacanappabandho. **Misso** pana imehi dvīhi sammisso nāṭakapakaraṇādi ca jātakamālādicampū ca.

9. Nibandho cā'nibandho ca, puna dvidhā niruppate; Taṃ tu pāpentya'laṅkāra, vindaṇiyatarattanam.

9. Evaṃ tippakāraṃ bandhasarīraṃ vatvā idāni aññathāpi dassetumāha “**nibandhocā'nibandho ca, puna dvidhā niruppate**” iti. **Puna** bhiyyo yathāvutto pajjamayabandho dvidhā dvippakārena **niruppate** nicchīyate. Kathaṃ? **Nibandho ca** tadekadesabhūtehi muttakādīhi catūhi saggabandhādivasena bandho ca **anibandho ca** kevalaṃ muttakavasenāti evaṃ **dvidhā niruppate** iti pakatam. Nanu tassetassa yathāvuttavātimayassa sakkaṭam pākataṃ apabbhamso pesācikaṃ missañceti pañcavidhattam vatvā “**sakkaṭam** nāma devatābhāsā. **Pākataṃ** catubbidham sakkaṭehi vaṇṇaññattamattena uppannattā mahindasindhavādi tabbhavam, tassamaṃ hiriharakamalādi, mahāraṭṭhādidesapasiddham desīyam, tabbhavādīhi sammissam missam. Ābhīrādīnam vācā **apabbhamso**, so ca pākataṃ viya catubbidho, tividho ca nāgaraupanāgaravuddhabhedena. Pisācānam vacanam **pesācikaṃ**. Sabbesam vasena missa”nti sakkaṭādīnam lakkhaṇam vuttam. Tathā “siṅgārapadhānanaccasaṅkhātalāsyādīnam paṭipādakatthena lāsyādikamabhinayappadhānattā **dassanīyam**, itaram kabbam **savanīya**”nti duvidham vuttam, evaṃ pubbācariyehi bhāsābhedena vuttam pañcavidhattam, viniyogabhedena vuttam duvidhattaṅca idha kasmā na vuttanti? Saccam, tathāpi tadevamidhānupayogitāya na vuttanti veditabbam.

Evamalaṅkāradhiṭṭhānabhāvena paṭhamam bandhasarīraṃ dassetvā idāni hārakeyūrādīnā purisasarīramiva bandhasarīraṃ saddālaṅkāraatthālaṅkārehi vindaṇiyataram hotīti dassetumāha “**taṃ tu**” iccādi. **Tusaddo** visesavacanicchāyam. **Taṃ** bandhasarīraṃ **tu alaṅkāra** alaṅkariyati taṃ bandhasarīrametehīti pasādādayo saddālaṅkāra, sabhāvavutyādayo atthālaṅkāra ca **vindaṇiyatarattanam** atisayena vindaṇiyabhāvam assādanīyabhāvam **pāpenti** nayanti. Sabbathā niddosabhūtānam saddatthānam aññamaññānurūpato sahitabhāvena paramāya vaṇṇapokkharatāya samannāgataṃ tādisapurisasarīramiva vindaṇiyampi samānam alaṅkārehi pasādHITE sati accantameva vindaṇiyam siyāti adhippāyo.

9. Punapi tasseva bandhassa bhedaṃ kathetum “**nibandho cā**”dimāha. Puna **nibandho ca** muttakādīhi catūhi avinābhāvato mahākabbādisabhāvena nirantaram katvā bandho ca **anibandho ca** kevalaṃ mahākabbādisabhāvena muttakattā anirantaram katvā bandho cāti sova bandho dvidhā **niruppate** nicchīyate. Punapi so bandho sakkaṭapākataapabbham sapesācikaṃ missabhāsābhedena pañcavidho. Siṅgārapadhānanaccasaṅkhātalāsyādīnam dassanappadhānattā tādisam naccam dassanīyam, tadanñam kabbam savanīyamiti vaḷaṅjanabhedato duvidho ca hoti. So sabbopi payoanābhāvato iha na gahito. Tattha **sakkaṭam** nāma devatābhāsā. Tato kehici akkharehi bhinnam **pākataṃ** nāma. Taṃ pana tabbhavattasamadesiyamissavasena catubbidham hoti. Tattha sakkaṭato vaṇṇaññattamattena nibbattam **tabbhavam** nāma, taṃ mahindasindhavādi. **Tassamaṃ** hiriharakamalādi. Dese pasiddham **desīyam**. **Missam** nāma tabbhavādīhi sammissam. **Apabbhamso** nāma gopālakādīnam vācā, so ca tabbhavādīhi catubbidho, nāgaraupanāgaravuddhabhedena tividho ca hoti. Pisācānam vacanam **pesācikaṃ**. Tehi sakkaṭādīhi sammissam **missam** nāma hoti. Idāni īdisappabhedavantabandhassa alaṅkārena sobhanattam vuttum “**taṃ tu**”ccādimāha. **Taṃ tu** taṃ pana vuttappakāraṃ bandhasarīraṃ **alaṅkāra** pasādādisaddālaṅkāra, sabhāvavutyādiatthālaṅkāra ca **vindaṇiyatarattanam** atisayapasādanīyattam pāpenti. Nirantaram bandho **nibandhoti** ca, na nibandho **anibandhoti** ca, atisayena vindaṇīyo vindaṇiyataro, tassa bhāvo **vindaṇiyatarattananti** ca viggaho.

**10. Anavajjam mukhambhoja-manavajjā ca bhāratī;
Alaṅkatāva sobhante, kiṃ nu'te niralāṅkatā?**

10. Tameva samattheti “**anavajja**” miccādinā. **Anavajjam** aññamaññānurūpādhikatanettakannādiavayavena piḷakatilakakāḷakādyanāhatāya ca sundarabhāvato agarahitaṃ **mukhambhojam** vadanāravindañca tathā **anavajjā** padādidosaṅgabhūṭāya sundarabhāvena agarahitā **bhāratī** ca vāṇī upacārato tappaṭipādanīyo attho cāti **ete alaṅkatāva** mukhaṃ tilakatāḍaṅkādinālaṅkārena, saddatthā saddālaṅkāraatthālaṅkārehi pasādhitā sajjitā eva, **niralāṅkatā** tathā apasādhitā asajjitā **sobhante kiṃ nu**, na sobhantevāti vitakkemīti attho. **Nūti** vitakke.

10. Tameva “**anavajja**” miccādinā samattheti. Vaṇṇasaṅgāhānādiavayavasampattiyā ca piḷakatilakakāḷakādidosaṅgahitattā ca aninditaṃ **mukhambhojañca anavajjā** padadosavākyadosaatthadosehi amissattā agarahitā **bhāratī** vāṇī ca abhedopacārena tappaṭipādanīyattho cāti ime **alaṅkatāva** kuṇḍalatilakādiābharaṇehi ca saddālaṅkāraatthālaṅkārehi ca sajjitā eva, **niralāṅkatā** tehi avibhūsitā **sobhante kiṃ nu**, na sobhanteti maññe. Natthi avajjamassāti ca, mukhameva ambhojamiti ca viggaho. **Kimiti** paṭisedhe, **nūti** vitakketi.

**11. Vinā gurūpadesaṃ taṃ, bālo'laṅkattumicchati;
Sampāpuṇe na viññūhi, hassabhāvaṃ kathaṃ nu so?**

11. Alaṅkaraṇaṅca tesam vinā gurūpadesena karonto vinā pahāsaṃ nāparaṃ viśesamadhigacchatīti dassetuṃ silesālaṅkāramāha “**vinā**”tiādi. **Gurūnaṃ** pasādhanopāyopadesakānaṃ, alaṅkāraṅkaraṇopāyopadesakānaṃ vā **upadesaṃ** “ettha evaṃ kate sobheyyā”ti upadisaṇaṃ **vinā** pariccajja mukhassa, bandhassa ca alaṅkaraṇānabhiññatāya **bālo** aññāṇako yo koci puggalo **taṃ** mukhaṃ, bandhaṃ vā **alaṅkattum** anurūpavasena sajjetuṃ **icchati** adhippeti, **so** tādiso aññāṇapuggalo **viññūhi** tabbidūhi paṇḍitajanehi **hassabhāvaṃ** avahāsaṃ **kathaṃ** kena pakārena **na sampāpuṇeyya**. “Kimidaṃ aññāṇapurisena kariyatī”ti hasantevāti adhippāyo. **Nūti** vitakke.

11. Idāni padādidosaṅgahitabandhasarīrassa alaṅkārehi bhūsanamapi gurūpadesasahitameva seṭṭhanti dassetuṃ “**vinā gurūpadesa**” miccādisilesālaṅkāramāha. **Bālo** mukhādisarīrālaṅkāre, bandhālaṅkāre vā asamatto yo koci **gurūpadesaṃ vinā** sarīrālaṅkāraṅkaraṇassa, bandhālaṅkāraṅkaraṇassa vā anurūpopadesamantarena **taṃ** sarīraṃ, bandhaṃ vā **alaṅkattum** tilakatāḍaṅkādihi, saddālaṅkāraatthālaṅkārehi vā sajjetuṃ icchati ce, **so viññūhi** tadubhayaññūhi **hassabhāvaṃ** avahasitabbataṃ **kathaṃ na sampāpuṇe**, pāpuṇātyeva, tasmā gurūhi sādharato uggaṇhitvā kattabbanti bhāvo.

**12. Ganthopi kavivācāna-malaṅkārapakāsako;
Yāti tabbacanīyattaṃ, tabbohārūpacārato.**

12. Nanu saddagammā, atthagammā ca alaṅkāraṇāni gantho kathanti āha “**ganthopi**”tiādi. **Kavivācānaṃ** kavippayogānaṃ samudāyarūpānaṃ, paṭipādanīyatāya tabbacanīyānañca atthānaṃ **alaṅkārapakāsako** alaṅkāraṇaṃ yathāvuttānaṃ vibhāvito **ganthopi** kiriyākappasaṅkhātāṃ satthampi **tabbacanīyattaṃ** tena **alaṅkārasaddena** vāccataṃ **yāti** upagacchati. Kinti āha “**tabbohārūpacārato**”ti. Tassa katavohāraṇassa **alaṅkārasaddassa**, tasmim vā maṇḍanavisesa pavattassa alaṅkāravohāraṇassa upacāraṇaṃ soyamityabhedena parikkappaṇaṃ upacāro. Kasmā? Paṭipādanīyapaṭipādakānaṃ abhedavasena kāraṇe kāriyassa upacariyatoti adhippāyo.

12. Idāni saddālaṅkāraatthālaṅkāragantho kathamalaṅkāroti āha “**gantho**”ccādi. **Kavivācānaṃ** kavīhi vuttavākyasaṅkhātānaṃ, upacārato tappaṭipādanīyāatthasaṅkhātānañca kavippayogānaṃ **alaṅkārapakāsako** saddatthālaṅkārapakāsako **ganthopi** kiriyākappasaṅkhātāṃ satthampi **tabbohārūpacārato** tassa alaṅkāroti katavohāraṇassa **alaṅkārasaddassa** kāraṇe kāriyūpacārena **tabbacanīyattaṃ** tena **alaṅkārasaddena** vattabbataṃ yāti. **Apisaddo** alaṅkāramapekkhati. Alaṅkāre pakāseti, alaṅkāraṇaṃ vā pakāsakoti ca, tena vacanīyo, tassa bhāvoti ca viggaho. Ettha bhāvoti

vāccavācakasambandho. Tassa saddādialaṅkāraṇassa vohāroti ca, tabbohāraṇassa **alaṅkāra**saddassa upacāroti ca vākyanti.

13. **Dvippakārā alaṅkāra, tattha saddatthabhedato; Saddatthā bandhanāmāva, taṃsajjitatadāvali.**

13. Idāni yathāvuttaalaṅkāraṇaṃ pabhedam, tappasaṅkaṅca taṃbandhasarīraṅca heṭṭhā vuttampi ekato sambandhetvā dassetum **“dvippakārā”**di āradham. **Tattha** tasmim kiriyākappasaṅkhāte ganthe, tasmim vā bandhālaṅkāradhikāre **alaṅkāra** yathāvuttā **dvippakārā** honti. Katham? Saddabhedato, atthabhedato ca, saddālaṅkāra atthālaṅkāraṇi alaṅkāra dvippakārā hontīti attho. Yesam bhedena te dvippakārā, te saddā, atthā ca. **“Bandho”** iti vuttam nāmaṃ yassā āvaliyā sā **bandhanāmā eva. Taṃsajjitatadāvali** tehi alaṅkārehi sajjitā pakāsītā taṃsajjitā, tesam saddatthānaṃ āvali samudāyā, mahāvākyam, antaravākyam vā. Paripuṇṇo bandho mahāvākyam, muttakādayovayavā antaravākyāni, taṃsajjitatadāvalikam pasiddhabhāvena anuvaditvā appasiddhā saddatthā vidhīyante.

13. Idāni yathāvuttaalaṅkāraṇaṃ avuttabhedaṅca tadādhārādhikataṃ yathāvuttabandhasarīraṅca ekato dassetum **“dvippakāre”**ccādimāha. **Tattha** tasmim kiriyākappasaṅkhāte alaṅkāraganthe, no ce, alaṅkāradhikāre vā **alaṅkāra** vakkhamānālaṅkāra **saddatthabhedato** saddālaṅkāraatthālaṅkārabhedena dvippakārā honti, yesam bhedena alaṅkāra bhinnā, te saddatthā bandhanāmāva. **Taṃsajjitatadāvali** tehi saddatthālaṅkārehi alaṅkatā, tesam saddatthānaṃ mahākabbādisamudāyarūpā paṭipāṭibandhoti vuttam hoti. **“Bandho”** iti nāmaṃ yasseti ca, tehi saddatthālaṅkārehi sajjitāti ca, tesam saddatthānaṃ āvalīti ca samāso.

14. **Guṇālaṅkārasaṃyuttā, api dosalavaṅkitā; Pasamsiyā na viññūhi, sā kaññā viya tādīsī.**

14. Evaṃ guṇena alaṅkāreṇa sajjitāpi sā saddatthāvali appakenapi dosena saṃyuttā satī asamphusitabbāva viññūhi siyāti dassetumāha **“guṇa”** iccādi. Saddālaṅkāraṅkhyena guṇena, atthālaṅkāreṇa ca **saṃyuttāpi** visesena sajjitāpi saddatthāvali **dosalavena** dosalesenāpi **aṅkitā** abhilaṅchitā satī **viññūhi** guṇadosavibhāgavidūhi paṇḍitapurisehi **na pasamsiyā** neva pasamsitabbā. Kāvīyāti āha **“kaññā viyatādīsī”**ti. Yathā hi **kaññā** dasavassikā sannaddhayobbanābhimukhabhāvena janānayanamanovilubbhinīguṇena, ābharaṇavisesena cālaṅkatā kenaci kuṭṭhadosaesena aṅkitā viññūnaṃ asamphusanīyā siyā, pagevāparā, evameva saddatthāvalipi appakenapi saddarūpena, atthalakkaṇena ca dosena kuṭṭhakappena vajjanīyā eva viññūnaṃ, pageva bahunāti vuttam hoti.

14. Evaṃ saddatthānaṃ guṇibhūtehi alaṅkārehi sajjitā saddatthāvali kenaci padādidosena abhilakkhitā ce, appasatthāti dassento **“guṇālaṅkāri”**ccādimāha. **Guṇālaṅkārasaṃyuttā api** saddālaṅkārasaṅkhātaguṇena, atthālaṅkāreṇa ca visesena yuttāpi sā saddatthāvali **dosalavaṅkitā** padadosādīnā aṇumattenapi dosena aṅkitā yuttā sahitā **tādīsī** guṇālaṅkārasaṃyuttāpi dosalavaṅkitā **kaññā viya** dasavassikā yobbanappattā vanitāva **viññūhi** guṇadosaparikkhakehi **na pasamsiyā** na pasamsitabbā. Yathā hi dasavassikā itthī piyasabhāvasaṅghitā manuññehi guṇehi, sobhanānurūpagīveyyādiābharaṇavisesehi yuttāpi dissamānena kenaci setakuṭṭhalavena yuttā samānā guṇadosaparikkhakehi dassanīyā na hoti, evaṃ vuttappakārāpi bandhapaddhati kuṭṭhatulyena kenaci padādidosena yuttā viññūhi assādanīyāti adhippāyo. Dosānaṃ lavo, tena aṅkitāti ca, sā viya dissatīti **tādīsīti** ca viggaho.

15. **Tena dosanirāsova, mahussāhena sādhiyo; Niddosā sabbathā sā'yam, saṅṅā na bhaveyya kiṃ.**

15. Yato evaṃ, **tena** tasmā kāraṇā **mahussāhena** mahatā vāyāmena **dosānaṃ** padadosādīnāmanatthanimitānaṃ **nirāsova** satthaditṭhiyā satthappabhāvato pariccāgoyeva **sādhiyo** sādhetabbo, **“viññūhi”**ti seso. Evaṃ dosanirāse ko guṇo upalabbhatīti ce. **Sabbathā** sabbappakāreṇa **niddosā** dosehi niggatā **sāyam** saddatthāvali **saṅṅā** saddālaṅkārasaṅkhātehi guṇehi sahitā **na**

bhaveyya kiṃ, bhavatyeva, guṇarahitaṃ taṃalaṅkatamanupādeyyaṃ siyāti adhippāyo.

15. Tena yato dosayuttā viññūhi anupādeyyā, tasmā **mahussāhena** adhikavāyāmena **dosanirāsova** padadosādīnaṃ nirākaraṇameva **sādhiyo** anekasatthavisayāya paññāya viññūhi sādhetabbo, evaṃ sati **sabbathā** sabbākārena **niddosā** dosarahitā **sā ayam** saddatthāvali **saguṇā** saddālaṅkārasaṅkhātehi guṇehi yuttā **na bhaveyya kiṃ**, guṇayuttā bhaveyyāti adhippāyo. Dosānaṃ nirāsoti ca, natthi dosā etissā, niggatā dosehi vāti ca, saha guṇehi vattamānāti ca viggaho.

16. **Sā’laṅkāravīyuttāpi, guṇayuttā manoharā;**
Niddosā dosarahitā, guṇayuttā vadhū viya.

16. Kiṃkāraṇamevaṃbhūto dosapariccāgena guṇādānena bandhoti āha “**sā’laṅkāre**”ccādi. **Sā** saddatthāvali alaṅkārehi viyuttāpi satī **niddosā** sabbappakārena dosehi niggatā guṇehi saddālaṅkārasaṅkhātehi saṃyuttā janānamānandasandohābhisandanekahetutāya mano harati attano santikamākaḍḍhatīti **manoharā** hotīti. Tatthodāharaṇamāha “**dosarahitā guṇayuttā vadhū viyā**”ti. Yathā yena kenacipi dosena virahitā vadhū manāpacāritādīhi guṇavisesehi saṃyuttā satī kenaci ābharāṇena amaṇḍitā apasādhitāpi kinnāma madhurā kavīnaṃ pasādhanam kinnāma manoharā hoti, evamayam saddatthāvalipi manoharā hotīti attho.

16. Idāni dosapariccāgena guṇādāne payojanaṃ dasseti “**sā’laṅkāravīyutte**”ccādinā. **Sā** saddatthāvali alaṅkārehi viyuttā satīpi niddosā sabbappakārena dosarahitā **guṇayuttā** tatoyeva guṇībhūtā saddālaṅkārena yuttā **dosarahitā** dubbaṇḍussañṭhānādīdosehi pariccattā **guṇayuttā** hadayaṅgamaguṇayuttā **vadhū viya** aṅganā viya **manoharā** sādhujaṇe ārādheti.

17. **Pade vākye tadatthe ca, dosā ye vividhā matā;**
Sodāharaṇametesaṃ, lakkhaṇaṃ kathayāmya’haṃ.

17. Yato evaṃ guṇālaṅkārasaṃyuttāyapi dosalavaṅkitāya viññūnāmanādarāṇiyatā, alaṅkāravīyuttāpi dosābhāvena guṇayuttāya manoharatā, evamanatthāvahassāpi dosassa pariharitabbatā satthadīṭṭhiyā, tasmā te dose dassetuṃ paṭijānāti “**pade**”tiādīnā. Tesam padānaṃ vākyānaṃ attho **tadattho**, tasmim. Udāharīyati lakkhyabhāvenāti udāharaṇaṃ, saha udāharaṇehīti **sodāharaṇaṃ**. Lakkhiyati lakkhiyamanenāti **lakkhaṇaṃ**.

17. Evaṃ alaṅkārayuttāpi appakena dosena yuttabandhassa anupādeyyattā, alaṅkāraalaṅkāraṇe asatīpi dosarahite viññūhi upādeyyattā ca mukhyassa dosaparihārassa avassaṃ kattabbattā idāni adhigatadose dassetuṃ paṭijānāti “**pade vākye**”ccādinā. **Pade** nāmādicatubbidhapade ca, **vākye** “**syādyantatyādyantānaṃ cayo vākyam sakāraakiriyā**”ti vuttalakkaṇe vākye ca, **tadatthe ca** tesam padavākyānaṃ atthe ca **vividhā** anekappakārā **ye dosā** viññūhi dosabhāvena **matā** ñeyyā, etesaṃ padādidosānaṃ **sodāharaṇaṃ** udāharaṇasahitaṃ lakkhaṇaṃ ahaṃ kathayāmi. Ettha ca—

“**Padam catubbidham vuttam, nāmākhyātopasaggikaṃ;**
Nipātakañca taññūhi, asso khalvābhīdhāvati”ti [[rūpabhidhīṭkāyaṃ nāmakaṇḍe](#)].

Vuttaniyāmena padaṃ tāva daṭṭhabbaṃ. Udāharīyanti lakkhiyabhāvenāti **udāharaṇānīti** ca, saha udāharaṇenāti **sodāharaṇanti** ca, lakkhiyati lakkhiyamanenāti ca viggaho.

Padadosauddesa

18. **Viruddhatthantarājhattha-kiliṭṭhāni virodhi ca;**
Neyyaṃ visesanāpekkhaṃ, hīnatthakamanatthakaṃ.

Vākyadosauddesa

19. **Dosā padāna, vākyāna-mekatthaṃ bhaggarītikaṃ;**

**Tathā byākiṇṇagāmmāni, yatihīnaṃ kamaccutaṃ;
Ativuttamapetaṭṭhaṃ, sabandhapharusam tathā**

Vākyatthadosauddesa

**20. Apakkamo'cityahīnaṃ, bhaggarīti sasamsayaṃ;
Gāmmaṃ duṭṭhālaṅkatīti, dosā vākyatthanissitā.**

Padadosādiuddesavaṇṇanā

18-19-20. Idāni yathāpaṭiññāte dose uddisati “**viruddhatthantara**” iccādinā. Viruddhaṃ atthantaraṃ yassa taṃ **viruddhatthantaraṃ**. Kiṃ taṃ? Padaṃ. Evamuparipi yathāyogaṃ. Adhiko attho visesyassa yena taṃ **adhyatthaṃ**. Nīyati avutto hetu ettha ānīyatīti **neyyaṃ**. **Dosā padānanti** yehi dosehi padāni duṭṭhāni, te viruddhatthantarātādayo padānaṃ dosāti attho. Evamuparipi yathāyogaṃ. Vākyānaṃ dosāti sambandho. Bhaggā rīti kamo yasmim taṃ **bhaggarītikaṃ**, vākyam. Apakkamatādayo vākyatthadosā, vākyatthānaṃ dosato. Vākyam duṭṭhaṃ siyāti vākyameva visesyate. Tena sabbattha napuṃsakalingena niddeho.

18-19-20. Idāni kathetabbabhāvena paṭiññāte dose uddisanto “**viruddha...pe... nissitā**”ti āha. Kavīhi icchitattatho viruddho aññattho yassa padassāti taṃ **viruddhatthantaraṃ** nāma. Visesyassa adhikattabhāvakaraṇato **ajhatthaṃ** nāma. Kavīhi icchitattassāvīkaraṇe avisadattā **kiliṭṭhaṃ** nāma. Desakālakalādīnaṃ viruddhattā **virodhi** nāma. Aññamāharitvā vattabbato **neyyaṃ** nāma. Visesaṃ patvāva sātthakabhāvappattito **visesanāpekkhaṃ** nāma. Visesyassa hīnatāpādanato **hīnatthakaṃ** nāma. Attharahitattā **anattakaṃ** nāmāti ime aṭṭha padanissitattā **padadosā** nāma.

Vuttatthasseva puna vacanato **ekatthaṃ** nāma. Bhinnakkamattā **bhaggarītikaṃ** nāma. Tathā sammohakāraṇattā **byākiṇṇaṃ** nāma. Viṣiṭṭhavačanavirahato **gāmmaṃ** nāma. Yatisampattivirahato **yatihīnaṃ** nāma. Padatthakkamato cutattā **kamaccutaṃ** nāma. Lokiyam vohāramatikkamma vuttattā **ativuttaṃ** nāma. Samudāyatthato apagatattā **apetaṭṭhaṃ** nāma. Bandhapharusayuttattā **bandhapharusam** nāma, tena sahitaṃ sabandhapharusanti ime nava **vākyānaṃ tathā** dosā nāma. Ettha **tathāsaddo** “dosā”ti padaṃ upasaṃharati.

Apagatakkamattā **apakkamaṃ** nāma. Ucitabhāvassa parihīnattā **ocityahīnaṃ** nāma. Bhinnavibhattikkamattā **bhaggarīti** nāma. Saṃsayajananato **sasamsayaṃ** nāma. Duppatīkarattā **gāmmaṃ** nāma. Dūsitālaṅkārattā **duṭṭhālaṅkatīti** nāmātime cha vākyatthanissitattā **vākyatthadosā** nāma.

Añño attho atthantaro. Viruddho atthantaro yassāti viggaho. Dosapakāsakapadampi dosato abyatirittattā doso nāma. Evaṃ santepi samāsenā padassa gahitattā napuṃsakaṃ hoti. Esevanayo ito paresupi. Visesyassa adhiko attho yassa taṃ, kiliṭṭhaṃ viya **kiliṭṭhaṃ**. Yathā hi malaggahito ādāso attano kiliṭṭhattā mukhādīnaṃ pakāsane avisado hoti, evamadhippetatthappakāsane asamatthaṃ padaṃ **kiliṭṭhaṃ** nāma. Virodho assa atthīti **virodhi**. Nīyati avutto hetu etthāti **neyyaṃ**. Visese apekkhā yassa taṃ. Hīno visesyassa attho yena taṃ. Natthi attho yassa tanti viggaho.

Padadosānaṃ anaññattepī vikappanābhedaṭṭo “**padānaṃ dosā**”ti vuttaṃ, yathā “silāputtakassa sarīra”nti. **Vākyānaṃ dosāti** etthāpi eseva nayo. Eko attho yassa taṃ. Bhaggarīti kamo yassa taṃ. Viṣuṃ viṣuṃ ākiṇṇaṃ **byākiṇṇaṃ**. Gāme bhavo **gāmmo**, abyattānaṃ vohāro. Tappakāsakapadampi upacārato **gāmmaṃ** nāma. Yati hīnā etthāti **yatihīnaṃ**. Kamato cutaṃ **kamaccutaṃ**. Atikkamma vuttaṃ **ativuttaṃ**. Atthato apetaṃ **apetaṭṭhaṃ**. Bandhe pharusam pharusatā yattha taṃ. Apagato kamo yasmā taṃ. Ocityam hīnaṃ yattha taṃ. Bhaggā rīti yattha taṃ. Saha saṃsayena vattatīti taṃ. **Gāmmaṃ** vuttanayameva. Duṭṭhā dūsitā alaṅkatī alaṅkāro yattha taṃ. Vākyānaṃ attho, tannissitā **vākyatthanissitā**ti viggaho. Ettha anattakāpetatthadosadvayaṃ padavākyato bhinnaṃ, aññaṃ bhaggarītidosadvayaṃ, gāmmadvayaṃ, kamaccutaapakkamadvayaṃ vākyavākyatthato bhinnaṃ.

Padadosaniddesavaṇṇanā

21. Viruddhatthantaram tañhi, yassa'ññattho virujjhati; Adhippete yathā megho, visado sukhaye janam.

21. Athoddesakkamena padādīdōse udāharati “**viruddhi**” ccādinā. **Hi** yasmā kāraṇā, pasiddhiyaṃ vā **hisaddo**. **Yassa** padassa **aññattho** adhippetato aparo **attho adhippete** vattumicchite atthe virujjhatīti anuvaditvā tasmā **taṃ** “**viruddhatthantara**”nti vidhīyate. “**Yathe**”tyudāharati. Yathā idaṃ viruddhatthantaram, tathā aññampi tādisaṃ daṭṭhabbam. **Na** tvidameveti **yathāsaddassa** attho. Megho visado sukhaye jananti. Visam udakam, taṃ dadātīti **visado megho** vārivaho **janam** lokam **sukhaye** sukhayatīti kavicchitatho. **Visasaddo** garaḷassa ca vācako siyāti garaḷado megho mārayati, na pana sukhayatīti “visado”ti visesanapadassa viruddhatā.

21. Idāni uddiṭṭhānukkamena viruddhatthantarādīnaṃ salakkhaṇalakkhiyaṃ dassento “**viruddhi**”ccādimāha. **Yassa** padassa **aññattho** kavicchitathato añño attho **adhippete** icchitatho **hi** yasmā virujjhati, tasmā **taṃ** padaṃ **viruddhatthantaram** nāma. Pasiddhiyaṃ vā **hisaddo**. Tathā hesa appasiddham viruddhatthantaram “yassa aññattho adhippete virujjhatī”ti pakāsetvā tasmim pakāsitathavisaye vattati. “Taṃ hī”ti yojitattā “yassa aññattho adhippete virujjhatī”ti lakkhaṇam pasiddhabhāvena anuvaditvā **taṃ viruddhatthantaranti** anuvaditabbaappasiddhaviruddhatthantaram vidhīyate, yathā “yo kuṇḍalī, so devadatto”ti. Upari pasiddhānūvādena appasiddhavidhānameva daṭṭhabbam. “Yathā...pe... jana”nti udāharaṇam lakkhiyaṃ dasseti. **Yathā** “megho visado”ccādi viruddhatthantarassa udāharaṇam, evamīdisamaññampi imassudāharaṇam, na kevalam “megho”ccādimeva bhavatīti vuttam hoti. **Yathāsaddo** cettha **ivasaddapariyāyathepi** udāharaṇattho daṭṭhabbo, uparipyevaṃ. **Megho** ambudharo **visado** visasankhātam jalam dadanto janam **sukhaye** sukhayatīti kavīhi adhippetattho. Ettha **visasaddassa** garaḷasankhātasappavisavācakattā, “visam dadātīti visado”ti ettha visassa udakavisānaṃ sādāharaṇattā visadāyako megho nāsetiyeva, na sukhayatīti kavina adhippetassa sukhakāraṇassa meghavisesanav**isasaddassa** viruddhaaññatthatāti **visapadam** viruddhatthantaradosena duṭṭhanti.

22. Visesyamadhikam yenā'- Dhyatthametam bhava yathā; Obhāsītāsesadiso, Khajjoto'yaṃ virājate.

22. **Yena** padena **visesyaṃ** visesitabbaṃ aparaṃ padaṃ atthavasena **adhikam** bhavatītyanuvaditvā **etaṃ** ajhattham bhaveti vidhīyate. “Yathe”tyudāharati “**obhāsīte**”ccādi. Evamuparipi suviññeyyaṃ. **Obhāsītā** dīpitā **asesā** nikhilā disāyena **soyaṃ** khajjoto **virājate** dippati. Ettha khajjotassākhiladisābhāgāvabhāsanamativuttīti adhikattham.

22. **Yena** visesanapadena **visesyaṃ** visesitabbaṃ padaṃ atthavasena **adhikam** hoti, **etaṃ** yathāvuttalakkhaṇopetaṃ padaṃ **ajhattham bhava** ajhattham nāma padadoso bhava. **Yathā** tassudāharaṇamevaṃ. **Obhāsītāsesadiso** jotitasabbadiso **ayaṃ khajjoto** ayaṃ jotiringaṇo **virājate** dippati. Ettha visesyassa khajjotassa sakaladisobhāsanassa ajhatthattā [atyuttattā (ka.)] “obhāsītāsesadiso”ti visesanapadaṃ ajhatthapadadoso nāma. Obhāsītā asesadisā yenāti viggaho.

23. Yassa'tthāvagamo dukkho, Pakatyādivibhāgato; Kiliṭṭham taṃ yathā tāya, So'yamāliṅgyate piyā.

23. **Pakatyādivibhāgoti** paccayā paṭhamam karīyatīti **pakati**. **Ādisaddena** paccayādīnaṃ pariggaho. **Pakatyādinamvibhāgato** vibhajanato, “ayaṃ pakati, ayaṃ paccayo, ayamādeso”tiādinaṃ pakatipaccayavibhāgakappanatoti vuttam hoti. Pīṇetīti **pī**, **tāya piyā** vallabhāya **soyaṃ** sāmī **āliṅgyate** silissate. Ettha “piyā”ti kiliṭṭham.

23. Yassa padassa **atthāvagamo** atthāvabodho **pakatyādivibhāgato** “ayaṃ pakati, ayaṃ paccayo, ayamādeso”tiādīnā pakatyādīnaṃ vibhajanājānanena, “pakatyādi nāma ki”nti gavesanato vā **dukkho, taṃ kiliṭṭhaṃ** nāma. **Yathā** tassudāharaṇamevaṃ. **Tāya piyā** vanitāya **so ayaṃ** vallabho **āliṅgyate** silissate. Paccayā paṭhamam karīyatīti **pakati**. Sā ādi yesam paccayānaṃ, tesam vibhāgoti vākyam. Piṇetīti **pī**, nārī. Tāya **piyā** ettha piyāsāṅkhātāya vallabhāya kathane **pīsaddassa** avisadattā “piyā”ti padaṃ kiliṭṭhaṃ.

24. **Yaṃ kiliṭṭhapadaṃ mandā-bhidheyyaṃ yamakādikaṃ;
Kiliṭṭhapadadoseva, tampi anto karīyati.**

24. Idāni yamakādikamanadhippetampi kiliṭṭheyyeva antogadhaṃ dassetumāha “**ya**”ntiādi. Tattha **yanti** aniyamavacanaṃ, tassa niyamavacanaṃ yamakādikanti. Yamakamādi yassa paheḷikājātassa taṃ **yamakādikaṃ**. Kīdisanti āha “**kiliṭṭhapada**”ntiādi. Kiliṭṭhāni appatīdosasabhāve ṭhitatāya malitānyavisadāni padāni yassa taṃ **kiliṭṭhapadaṃ**. Mando appako abhidheyyo attho yassa taṃ **mandābhidheyyaṃ**, tādisaṃ **tampi** yamakādikaṃ kiliṭṭhapadadoseyyeva yathāvutte **anto** abbhantare **karīyati** vidhīyati tattheva pakkhipīyati, kiliṭṭhapadadosato na byatiriccatīti adhippāyo.

24. Idāni anadhippetamapi yamakādiṃ kiliṭṭhadoseyyeva antokaraṇabyājena āvīkaronto āha “**yaṃ kiliṭṭhe**”ccādi. **Kiliṭṭhapadaṃ** appatīdosena missakattā avisadapadaṃ **mandābhidheyyaṃ** appakābhidheyyaṃ **yaṃ yamakādikaṃ** yaṃ yamakappaheḷikājātamatthi, **tampi kiliṭṭhapadadoseyyeva** yathāvuttakiliṭṭhapadadoseyyeva **anto karīyati** abbhantare karīyati, kiliṭṭhapadadosato abyatirittanti adhippāyo. Kiliṭṭhāni padāni yassa, mando abhidheyyo yassa, yamakam ādi yassa paheḷikājātassa, kiliṭṭhapadānaṃ dosoti viggaho.

25. **Patītasaddaracitaṃ, siliṭṭhapadasandhikaṃ;
Pasādaguṇasaṃyuttaṃ, yamakaṃ mata’medisaṃ.**

25. Hotu kāmamanabhimatamedisaṃ yamakādikaṃ, kiñcarahi abhimatanti āha “**patīti**”ccādi. Attano vacanīyatthappatītavasena vācakāpi saddā patītāyeva nāmāti patītehi pasiddhehi saddehi pāṭipadikehi racitaṃ kataṃ **patītasaddaracitaṃ**. Siliṭṭhā aññaṃaññāliṅganena maṭṭhā padānaṃ syādyantādīnaṃ sandhaya sandhanā yassa taṃ **siliṭṭhapadasandhikaṃ**. Patītasaddaracitattāyeva **pasādasaṅkhātena guṇena** saddālaṅkārena **saṃyuttaṃ** sammadevopetaṃ **edisaṃ** yathāvuttaguṇāsayaṃ ramaṇīyaṃ yamakaṃ **matam** abhimatanti attho.

25. Idāni adhigatesu yamakesu īdisaṃ yamakamīṭṭhamiti sissānaṃ upadisanto āha “**patīte**”ccādi. **Patītasaddaracitaṃ** “imassatthassāyaṃ vācako”ti patītehi pasiddhehi saddehi racitaṃ pāṭipadikehi kataṃ **siliṭṭhapadasandhikaṃ** siliṭṭhā syādyantādīpadānaṃ sandhaya yassa taṃ **pasādaguṇasaṃyuttaṃ** patītasaddaracitattāyeva pasādasaṅkhātena saddālaṅkāraguṇena saṃyuttaṃ **īdisaṃ** evambhūtaṃ guṇādhikato ramaṇīyaṃ upari vakkhamānaya makasadisam yamakaṃ **matam** viññūhi abhimataṃ. Patītā ca te saddā ca, tehi racitaṃ, siliṭṭhā padānaṃ sandhaya yassa, pasādoti guṇo saddālaṅkāro, tena saṃyuttanti viggaho.

26. **Abyapetaṃ byapeta’ñña-māvuttānekavaṇṇajam;
Yamakaṃ tañca pādāna-mādimajjhantagocaraṃ.**

26. Idāni taṃ yathāvuttamabhimataṃ dassetumupakkamate “**abyapete**”ccādinā. **Āvuttā** adhivuttā punappunuccāraṇupetā anekesaṃ patirūpatā, bahuvaṇṇā sarabyañjanarūpā, na eko vaṇṇo tassānuppāsattā, tathā ca vakkhati “vaṇṇāvutti paro yathā”ti [subodhālaṅkāra 127 gāthā], tehi jātam yamakanti viññāyate. Katividhaṃ taṃ vikappīyatīti āha “**abyapetaṃ byapetañña**”nti. Tattha yaṃ vaṇṇantarābyavahitaṃ vaṇṇasamudāyena vuttaṃ. **Tadabyapetaṃ** yamakaṃ. Yaṃ tu byavahitaṃ, taṃ **byapetaṃ**. Yaṃ pana ubhayamissaṃ, taṃ **aññaṃ** aparaṃ **abyapetabyapetaṃ** tidhā yamakaṃ tāva vikappīyate. Tametaṃ tividhaṃ **yamakaṃ** visayavibhāganirūpanāyaṃ ādi ca majjho ca anto ca gocaro visayo yasseti **ādimajjhantagocaraṃ** viññeyyaṃ. Kesaṃ pādānaṃ? Paccekaṃ catunnaṃgāthāvayavānaṃ. Sāpekkhattepi samāso gammakattā.

Tattha pādacatukkassa ādimajjhantabhāvīnaṃ yamakānaṃ yāvanto pakārā sambhavanti, te mūlā satta. Kathaṃ? Ekasmimyeva pāde kvaci ādiyamakam, kvaci majjhayamakam, kvaci antayamakam, kvaci majjhantayamakam, kvaci majjhādiyamakam, kvaci ādyantayamakam, kvaci sabbayamakanti. Evaṃ paccekam mūlabhūtā sattāti catūsu aṭṭhavīsati honti. Pādādiyamakañca paṭhamapādādiyamakamabyapetaṃ tathā dutiyatatiyacatutthapādādiyamakamabyapetaṃ paṭhamadutiyapādādiyamakamabyapetaṃ paṭhamatatiyacatutthapādādiyamakamabyapetaṃ paṭhamacatutthapādādiyamakamabyapetantiādinā anekadhā pasamsanti. Yadā ca sabbatoyamakam, tadā mahāyamakādayo vikappā jāyantīti veditabbaṃ.

26. Idāni abhimatayamakam dīpeti “**abyapete**”ccādinā. Āvuttehi punappunaṃ vuttehi anekavaṇṇehi samudāyarūpattā anekehi sarabyañjanasarīrehi vaṇṇehi jātaṃ **yamakam** aññehi vaṇṇehi abyavahitattā **abyapetaṃ**, vaṇṇantarehi byavahitattā **byapetaṃ**, ubhayamissakattā tehi **aññaṃ abyapetabyapetañcāti** tividhaṃ hoti. **Tañca** yamakam visayavibhāganīyamaṇa gāthāpādānaṃ ādigocaraṃ majjhagocaraṃ antagocaramiti tividhaṃ hoti. Ettha **casaddo** vattabbantare pavattati, vattabbantaraṃ nāma yathāvuttaabyapetādibhedato aññaṃ vattabbatāya samukhībhūtaṃ pādānaṃ ādimajjhāvasānantaraṃ, upanyāso vākyārambhoti ca etasseva nāmaṃ. Visadisena vaṇṇena apetaṃ **byapetaṃ**. Tabbiparītamabyapetaṃ. Abyapetañca byapetañca aññañcāti samāhāradvando. Aneke ca te vaṇṇā ca, āvuttāyeva anekavaṇṇā, tehi jātaṃ, ādi ca majjho ca anto ca, te gocarā yassāti viggaho.

Tattha pādacatukkassa ādimajjhāvasānesu labbhamānāyamakabhedā ekekasmim pāde satta satta bhavanti. Kathaṃ? Pādādiyamakam pādamañjhayamakam pādantayamakam majjhantayamakam majjhādiyamakam ādyantayamakam sabbatoyamakanti evaṃ paccekam satta satta katvā catūsu mūlabhūtayamakā aṭṭhavīsa bhavanti. Ettha pādādiyamakādīkampi abyapetaṃpaṭhamapādādiyamakam tathā dutiyatatiyacatutthapādādiyamakamiti ca abyapetaṃpaṭhamadutiyapādādiyamakam tathā paṭhamatatiyacatutthapādādiyamakam paṭhamacatutthapādādiyamakamiti ca abyapetadutiyatatiyacatutthapādādiyamakam tathā dutiyacatutthapādādiyamakamiti ca abyapetadutiyacatutthapādādiyamakamiti ca evamabyapetaṃpādādiyamakā dasa honti. Tathā byapetaṃpi dasāti vīsati, abyapetaṃpaṭhamapādamañjhayamakam tathā dutiyapādamañjhayamakamiccādinā majjhayamakampi vīsatividhaṃ hoti. Abyapetaṃpaṭhamapādantayamakam tathā dutiyapādantayamakamiccādinā antayamakampi vīsatividhaṃ. Saṃsaggabhedato pana anekavidhaṃ hoti.

Abyapetaṃpaṭhamapādādiyamakavaṇṇanā

27. **Sujanā’sujanā sabbe, guṇenāpi vivekino;**
Vivekam na samāyanti, avivekijanantike.

27. “**Sujanā**”iccādi. **Sujanā** sajjanā, **asujanā** asajjanāti ete **sabbe** ubhayapakkhapātino visesā janā **guṇena** sīlādinā karaṇabhūtena, hetubhūtena vā **vivekinopi** sādhusu labbhamānānamasādhusvanupalabbhanato puthubhūtāpi avivekīnaṃ janānaṃ antike samīpe tesam sannidhāne **vivekam** vibhāgaṃ **na samāyanti** napāpuṇanti, vibhāgavijānanapaññāvekaḷḷena ca vivekinopi janā te ekato katvā passantīti. Idaṃ paṭhamapādādiyamakamabyapetaṃ.

27. Idāni abyapetaṃpaṭhamapādādiyamakassa mukhamattaṃ dassatumāha “**sujani**”ccādi. **Sujanā** sādhujanā, **asujanā** asādhujanā ceti **sabbe** ubhayapakkhikā sīlādinā, paṇātipātādinā **guṇena** hetunā **vivekino api** sādhusu paṇātipātādinā, asādhusu sīlādinā appavattito guṇena puthubhūtāpi **avivekijanantike** vivekaññārahitānaṃ janānaṃ santike **vivekam** vibhāgaṃ **na samāyanti** na pāpuṇanti. Viveko vinābhavanametesamattāti **vivekino**. Ettha visayopacārena **vivekoti** paññā, na vivekinoti avivekino, teyeva janā, tesam antikamiti ca viggaho. Idaṃ abyapetaṃpaṭhamapādādiyamakam.

Abyapetaṃpaṭhamadutiyapādādiyamakavaṇṇanā

28. **Kusalā’kusalā sabbe, pabalā’pabalā’thavā;**

No yātā yāva'hosittam, sukhadukkhappadā siyum.

28. “**Kusalā**”iccādi. **Pabalā** āsevanappaṭilābhavasena balavanto ca. **Athā**ti anantaratthe nipāto. **Apabalā** tadabhāvato dubbalā ca **sabbe kusalākusalā** dhammā **yāva** yattakaṃ kālaṃ **ahosittam** vinā uppattimattaṃ phaladānāsambhavato kevalaṃ “**ahosī**”ti vacanīyatthanimittamattakammabhāvena ahosikammattaṃ **no yātā** na sampattā, tāva tattakaṃ kālaṃ sukhañca dukkhañca taṃ padantīti **sukhadukkhappadā siyum**. Yāva saṃsārapavatti, tāva sukhadukkhadāyakā hontīti. Idaṃ paṭhamadutiyaṭṭhāpādādiyamakamabyapetaṃ.

28. **Pabalā** āsevanādipaccayalābhena balavanto vā **atha apabalā** tadabhāvena dubbalā vā sabbe kusalākusalā **ahosittam** phaladānābhāvato pavattimattataṃ **yāva** yattakaṃ kālaṃ **no yātā** appattā, tāva tattakaṃ **sukhadukkhappadā** yathākkamaṃ sukhadukkhappadāyino **siyum** bhavanti. Idaṃ abyapetaṭṭhāpādādiyamakaṃ. Kusalapaṭipakkhā **akusalā**. “**Ahosī**”ti vattabbassa bhāvo **ahosittam**. “**Ehipassiko**”tiādīsu viya kriyāpadatopi **ṇā**dipaccayā honti.

Abyapetaṭṭhāpādādiyatatiyaṭṭhāpādādiyamakavaṇṇanā

29. **Sādaraṃ sā daraṃ hantu, vihitā vihitā mayā;**
Vandanā vandanāmāna-bhājane ratanattaye.

29. “**Sādara**”miccādi. **Vandanā** dvārattayopadassiyamānā **māno** ca pūjā, tesam **bhājane** ādhārabhūte ratijananādinā atthena ratanasāṅkhātānaṃ buddhādīnaṃ taye samūhabhūte **ratanattaye sādaraṃ** ādarasahitaṃ katvā **mayā vihitā** katā, **vihitā** alaṃsaṃsāradukkhavisaṭṭhanirākaraṇato visesena hitā padhyā **sā vandanā** so paṇāmo **daraṃ** darathaṃ kāyacittapariḷāhaṃ **hantu** hiṃsatu. **Mayā**ti vuttatā **meti** atthato viññāyati. Idaṃ pana paṭhamadutiyaṭṭhāpādādiyamakamabyapetaṃ.

29. **Vandanāmānabhājane** dvārattayena vidhiyamānapaṇāmapūjānaṃ ādhārabhūte **ratanattaye** ratijananādiatthena ratanasāṅkhātānaṃ buddhādīnaṃ taye **mayā** yā vandanā **sādaraṃ** ādarasahitaṃ **vihitā** katā, **vihitā** lokiya lokuttara sampattisādhanato visesena hitā **sā vandanā daraṃ** mayhaṃ kāyacittadarathaṃ **hantu** vināsetu. Idaṃ abyapetaṭṭhāpādādiyamakaṃ. Saha ādarena vattamānaṃ **sādaraṃ**, kriyāvisesanaṃ. Ettha kriyā nāma **vihitā**saddena niddiṭṭhakarāṇaṃ. Karaṇāñhi **vihitā**saddassa vuttakammattepi aññathānupapattilakkhaṇasāmatthiyato bhijjivā vijjamānaṃ “**akāsi**”nti kriyāya sambandhamupentaṃ kammañca hoti, bhāve vihitassa **yupaccayantassa** napuṃsakattā napuṃsakañca, sattāya ekattā ekavacanañca tabbisesanattā **sādarasaddopi** napuṃsakadutiyaṭṭhāpādādiyamakamabyapetaṃ hoti.

“Visesye dissamānā yā,
Līngasaṅkhyāvibhattiyo;
Tulyādhikaraṇe bhiiyo,
Kātabbā tā visesane”ti [[sambandhacinto 15 gāthā bhedacintā 194 gāthā](#)].

Hi vuttaṃ. Evaṃ kriyāvisesane gahite sāmattiyato “**mayā**”ti tatiyantassa paṭhamantattaṃ, “**vandanā**”ti paṭhamantassa chaṭṭhuntañca hoti. **Vandanā** ca māno ca, tesam bhājanaṃ. Tiṇṇaṃ samūho **tayaṃ**, ratanānaṃ tayanti ca viggaho.

Abyapetacatukkapādādiyamakavaṇṇanā

30. **Kamalaṃ ka'malaṃ kattum-vanado vanado'mbaraṃ;**
Sugato sugato lokaṃ, sahitaṃ sahitaṃ karaṃ.

30. “**Kamala**”miccādi. **Kamalaṃ** aravindaṃ **kaṃ** jalaṃ **alaṅkattum** sajjanattāya hoti, vikasitāravindasandohasambhāvitodakassa vāpādīsu tādisaramaṇīyattasampattisambhavato, avanaṃ rakkhaṃ dadāti sassasampatyādikāraṇabhāvenāti **avanado**. Vanam jalam dadāti na tucchoti **vanado**

megho **ambaraṃ** ākāsaṃ jaladhārabhārabharitambarakuharassa dassanīyatāguṇayogato alaṃkattunti adhikataṃ. **Sahitaṃ** sampuṇṇaṃ **hitaṃ** abhivuddhiṃ **karaṃ** karonto suṭṭhu gadatīti **sugato** mañjubhāṇī pubbabuddhā viya nekkhammādinā kāmacchandādike pajahanto gantvā arahattamaggena savāsanasakalakilese samucchinditvā sobhanaṃ nibbānapuraṃ gatoti vā **sugatoti** vutto so mahāmuni attano aparimitapāramitāsimpakacagalitilakabhāvena **lokaṃ** lokattayaṃ, sahitaṃ lokanti vā yojanīyaṃ **alaṅkattum** alaṃkaraṇāyāti. Idaṃ pādacatukkādiyamakamabyapetaṃ.

30. Kamalaṃ padumaṃ **kaṃ** jalaṃ **alaṅkattum** pañcavidhapadumasañchannassa udakassa ramaṇīyattā sajjetaṃ hoti. **Avanado** kāle vuṭṭhisampadāya sassasampadādīnaṃ kāraṇattā ārakkhaṃ dento **vanado** megho **ambaraṃ** ākāsaṃ **alaṅkattum** jaladhārabhārabharitambarakucchiyā dassanīyattā sajjetaṃ hoti, **sahitaṃ** sampuṇṇaṃ **hitaṃ** abhivuddhiṃ **karaṃ** karonto **sugato** citrakathī sundaraṃ nibbānaṃ gato vā **so sugato** so tathāgato **lokaṃ** lokattayaṃ, **sahitaṃ** lokaṃ vā **alaṅkattum** citrakathādikāraṇehi tādisassa aññassa ca lokarāmaṇeyyassābhāvā sajjetaṃ hoti. Sabbapadatthānaṃ sattābyabhicārittā hotīti gannaṃ. Tatoyeva sabbe paṭhamantabhavanakriyāya yujjantīti vadanti. Idaṃ abyapetacatukkapādādiyamakaṃ.

**31. Abyapetādiyamaka-sseso lesa nidassito;
Ñeyyāni'māyeva disā-ya'ññāni yamakānipi.**

31. Icevamabhimatayamake abyapetapādādiyamakassa disāmattaṃ dassetvā upasaṃharati “**abyapete**”ccādinā. **Abyapetassa** abyavahitassa catunnaṃ pādānaṃ **ādo**, ādibhūtaṃ vā yamakassa **eso** yathāvutto **leso** kocideva bhedo **nidassito** vikappito. Aparānipi kiṃ na vikappiyantīticeti āha “**ñeyyāni**”ccādi. **Imāya disāya** iminā upāyena maggeneva **aññāni** vuttato aparāni dutiyapādādiyamakatatīyapādādiyamakacatutthapādādiyamakādīni abyapetānipi paṭhamadutiyapādādiyamakapaṭhamatīyapādādiyamakānipi byapetāni, paṭhamacatutthadutiyatīyapādādiyamakādīnipi abyapetabyapetāni, tathā majjhantapādayamakāni **ñeyyāni** jānitabbāni, viññūnaṃ tādisāya disāya dassitattāti. Tattha ca –

“Guṇāguṇena saha te, sādhave'sādhave janā;
Vigāhante samaṃ nātha, cittaṃ citte kathaṃ nu te”.

Iccādinā dutiyapādādiyamakādīni abyapetāni,

“Piyena vacasā sabbe,
Piyena'ppiyabhāṇino;
Pādānate jinokāsi,
So dhammo hantu vo'ppiyaṃ”.

Iccādinā paṭhamadutiyapādādiyamakādīni abyapetāni,

“Sa'malaṃ samalaṃ kattaṃ, suciraṃsuci raṃjaye;
Suciraṃ suciraṃgaṃ taṃ, sa'malaṃ samalaṃbhi yo”.

Iccādinā paṭhamacatutthadutiyatīyapādādiyamakādīni abyapetabyapetāni,

“Manohara hara klesaṃ, jina cetobhavaṃ mama;
Nanu tvaṃ pāramīsārā-matabhāvitamosadhaṃ”.

Iccādinā majjhantapādayamakāni,

“Sādhunā raṃjaya jaya-ddhaninā'pūrayi mahiṃ;
Yo taṃ jinavaraṃ dhīra-matthakāmosi ce tvaṃ”.

Iccādinā antapādayamakāni jānitabbāni.

31. Evaṃ abhimatayamakena abyapetayamakānamupāyādīni nigamento āha “**abyapeti**”ccādi. **Abyapetādiyamakassa** visadisavaṇṇehi abyavahitādiyamakassa, abyapetapādādiyamakassa vā **eso lesa** “sujani”ccādiko appakodāharaṇanayo **nidassito** niddiṭṭho. **Aññāni yamakānipi imāyeva disāya** iminā nayeneva **ñeyyāni** viññūhi ñātabbāni. Ādo yamakam, ādibhūtam vā yamakam, abyapetañca tam ādiyamakañcāti vākyam. Evaṃ dassitena iminā kamena abyapetadutiya-pādādiyamakādayo ñātabbāti adhippāyo.

Tattha abyapetadutiya-pādādiyamakamevaṃ veditabbaṃ –

Guṇāguṇena saha te, sādhave’sādhave janā;
Vigāhante samaṃ nātha, cittaṃ citte katham nu te.

Bho **nātha te** tuyham **citte sādhave asādhave te janā guṇāguṇena** sakasakaguṇena aguṇena ca **saha samaṃ** ekajjham **katham nu vigāhante**, cittaṃ acchariyam sujanadujjanesu samamettā acchariyāti adhippāyo.

Abyapetapaṭhamadutiya-pādādiyamakamevaṃ daṭṭhabbaṃ –

Piyena vacasā sabbe, piyena’ppiyabhāṇino;
Pādānate jinokāsi, so dhammo hantu vo’ppiyam.

Jino appiyabhāṇinopi sabbe jane piyena yena vacasā pādānate akāsi, so dhammo vo appiyam hantu. Ettha **apisaddapariyāyassa pisaddassa** gahitattā yatibhaṅgo natthi.

Paṭhamacatutthadutiya-pādādiabyapetabyapetayamakamevaṃ daṭṭhabbaṃ –

Sa’malam samalam kattum, suciram̐suci ram̐jaye;
Suciram̐ suciram̐gam̐ tam, sa’malam samalam̐bhi yoti.

Ettha “samalam samalam, suciram̐ sucira”nti visadisavaṇṇehi abyavahitattā abyapetam, “samalam samala”nti pubbaparayugaḷam [pubbaparayugaḷadvayam (ka.)] “kattu”miti bhinnavaṇṇehi, “suciram̐ sucira”nti pubbaparayugaḷam [pubbaparayugaḷadvayam (ka.)] “jaye”ti bhinnavaṇṇehi ca byavahitattā byapetañca hoti. **Suciram̐suci** sobhanaram̐sinā uci yutto **yo** jino **sam̐** santiṃ nibbānam **salam̐bhi** alabhi, **alam̐** accantam̐ atisayena **suciram̐gam̐** visuddhadeham̐ **tam̐** jinam̐ **salamam̐** jallikāsaṅkhātena, rāgādikucchitasāṅkhātena vā malena sahitaṃ **sam̐** attānam̐ **alam̐kattum̐** nimmalam̐ katvā sajjetum̐ **suciram̐** sucirakālam̐ **ram̐jaye** attani abhiram̐apeyya.

Pādamaññhayamakamevaṃ daṭṭhabbaṃ –

Manohara hara klesam̐, jina cetobhavam̐ mama;
Nanu tvam̐ pāram̐sārā-matabhāvitamosadhanti.

Manohara jina mama cetobhavam̐ **klesam̐** santāpam̐ **hara** apanaya, tvam̐ pāram̐sārā-matabhāvitam̐ **osadham̐** dibbosadham̐ nanu.

Pādantayamakamevaṃ daṭṭhabbaṃ –

Sādhunā ram̐jaya jaya-ddhaninā’pūrayi mahim̐;
Yo tam̐ jinavaram̐ dhīra-matthakāmosi ce tuvanti.

Yo jinavaro sādhunā **jayaddhaninā** veneyyajayaghosena mahim̐ āpūrayi, dhīram̐ tam̐ jinavaram̐ tuvam̐ sappurisa ce atthakāmo asi, **ram̐jaya** abhiram̐apehi. Iminā niddiṭṭhayamakeheva avasesā tatiya-pādādiyamakādayo viññeyyā.

**32. Accantabahavo tesam,
Bhedā sambhedayoniyo;
Tatthāpi keci sukarā,
Keci accantadukkarā.**

32. Kiṃ pana sākallena na vikappitānīti āha “**accanti**”ccādi. **Tesam** vikappānaṃ sambhedo saṅkaro missattamuccāraṇappakāro yoni pabhavo yesaṃ te **sambhedayoniyo**, **bhedā** pakārā **accantabahavo** atisayena bahulā yathāvuttanayena sambhavanti, **tatthāpi** tesu vikappesupi **keci** vikappā sukhena kariyanti payujjantīti **sukarā**, tabbiparīto ca **keci** vikappā accantadukkarā. Iti dvidhā saṅgayhanti, tesu sukarānaṃ kesañci abhimatayamakānaṃ mukhamattaṃ dassitaṃ. Idāni dukkarānaṃ kesañci mukhamattaṃ na sabbamevaṃ veditabbaṃ.

Samunnatena te satā,
Kathaṃ na te na te siyuṃ;
Yato natenatepi'to,
Siyuṃ na te nate subhā.

Idaṃ pādacatukkamajjhayamakamabyapetabyapetamekarūpaṃ dukkaraṃ.

Na bhāsurā tepi surā vibhūsitā,
Tathāsurā bhūri surāparājita;
Sabhāsu rājāpi tathā surājito,
Yathā surājanti surāvinissaṭā.

Idaṃ catukkapādamañjhayamakamekarūpabyapetaṃ.

32. Sabbamidamanuddisitvā lakkhaṇātideseṇa nigamaṇaṃ kimatthamiccāsaṅkāyamāha “**accante**”ccādi. **Tesam** yamakānaṃ **sambhedayoniyo** pabheduppattikāraṇabhūtā **bhedā** uccāvacaapakārā **accantabahavo**, **tatthāpi** tesupi **keci** yamakā **sukarā** susādhiyā, **keci** **accantadukkarā** atisayena dussādhiyā. Sambhedo yoni yesanti viggaho.

Iha sukarassa upadisitattā dukkarayamakapavesopāyamattamupadisiyate –

“Manañ manañ satthu dadeyya ce yo,
Manañ manañ piṇayata'ssa satthu;
Manañ manañ tena dadeyya ce na,
Manañ manañpa'ssa na sādhipujja'ti.

Idaṃ pādacatukkādiyamakamekarūpaṃ abyapetabyapetaṃ.

Yo puggalo **manañ** attano cittaṃ **satthu** jinassa **manañ** khaṇamattampi dadeyya ce, **satthu** munindassa **manañ** cittaṃ **assa** puggalassa **manañ** cittaṃ **piṇayati** sampiṇeti, **tena** tasmā **manañ** **manañ** cittaṃ cittaṃ **dadeyya ce na** yadi no dadeyya, **assa** puggalassa **manañ** cittaṃ **manañpi** muhuttampi **sādhipujjaṃ** sādhihi pūjitabbaṃ **na** bhavati.

“Samunnatena te satā,
Kathaṃ na te na te siyuṃ;
Yato nate'natepi'to,
Siyuṃ na te nate subhā'ti.

Idaṃ pādacatukkamajjhayamakamekarūpamabyapetabyapetaṃ.

Yato yena kāraṇena **te** tuyhaṃ **satā** sobhanena **samunnatena** sammā unnatena hetunā **natepi** avanatepi **anatepi** anavanatepi **te te subhā** te te sobhanā **na na siyuṃ**, bhavanteva, **ato** tena

kāraṇena **te subhā** te sobhanā **nate** avanate **kathaṃ na siyuṃ**, bhavanteva.

“Jinaṃ paṇāmonatasajjanaṃ janaṃ,
Guṇe nivesentamasajjanaṃ’janaṃ;
Veneyyanette guṇabhājanaṃ janaṃ,
Name mamentaṃ khalu sajjanaṃjana’nti.

Idaṃ pādacatuṅkantayamakamekarūpamabyapetayamakam dukkaraṃ.

Paṇāmonatasajjanaṃ paṇāmitukāmonatasādhujanavantam **janaṃ** veneyyajanaṃ **asajja** pamādamakatvā **guṇe** sīlādiguṇe **nivesentaṃ** niyojentaṃ veneyyanette **añjanaṃ** añjanabhūtaṃ **guṇabhājanaṃ** guṇānamādhārahūtaṃ **sajjanaṃjanaṃ** iminā kāraṇena sādhujanānaṃ añjanabhūtaṃ **janaṃ** sādhujanaṃ **khalu** ekantena **mamentaṃ** mamāyantaṃ **naṃ** jinaṃ **name** namāmi.

“Sābhāsu sābhā bhuvane jinassa,
Sābhāya sā bhāsatiyeva jātu;
Sābhāya sā bhāti na ce kathaṃ na,
Sābhā sasābhānamaticca bhāti’nti.

Idaṃ pādacatuṅkādiyamakekarūpabyapetaṃ.

Bhuvane sattaloke **sābhāsu** vijjamānābhāsu **jinassa sābhā** sobhanā ābhā **sābhāya** vijjamānāya, sobhanāya vā ābhāya ābhāto **jātu** ekantena **bhāsatiyeva** dippateva, **sā** jinābhā **sābhāya** vijjamānābhāto adhikā hutvā **ce na bhāti** yadi na bhāsati, **sasābhānaṃ** vijjamānasobhanābhānaṃ brahmādīnaṃ **sābhā** sobhanābhāyo **aticca** atikkamma **kathaṃ na bhāti**, bhāsatiyeva.

“Na bhāsurā tepi surā vibhūsitā,
Tathāsurā bhūri surāparājita;
Sabhāsu rājāpi tathā surājito,
Yathā surājanti surāvinissaṭā’nti.

Idaṃ pādacatuṅkamajjhayamakamekarūpabyapetaṃ.

Surāvinissaṭā surāpānato apagatā janā **yathā surājanti**, tathā **vibhūsitā** visesena alaṅkatā **tepi surā** te devā api **na bhāsurā** sobhamānā na honti, **tathā** evaṃ **surāparājita** surāpānahuṭṭhaṃ parājitaḥbhāvaṃ pattā **bhūri asurā** bahavo vepacittiādayo asurāpi **na bhāsurā** na sobhanti, **tathā** evaṃ **surājito** suṭṭhu alaṅkato **rājāpi sabhāsu na bhāsurā**.

“Jināṇattiyam yo’hitāsā sitāsā,
Avassaṃva te hontya’tāsā hatāsā;
Ato sabbapāpe satāsā vatāsā,
Karonṭeva santissitā sāmitāsā’nti.

Idaṃ pādacatuṅkantayamakamekarūpabyapetaṃ.

Ye sappurisā **jināṇattiyam** buddhassa vinayapaññattisaṅkhātāṇattiyam **ohitāsā** avītikkamavasena patiṭṭhitaāsā honti **sitāsā** parisuddhāsā, **te** sādhuvo **hatāsā** anukkamena hatataṇhā **avassaṃva** ekanteneva **atāsā** bhayarahitā yato honti, **ato** tasmā **sabbapāpe** sabbākusale **satāsā** bhayasahitā **vatāsāva** niravajjavatābhilāsavanto sādhujanā **santissitā** santinissitāyo **sāmitāsā** sāmibhāvāsāyo karonteva.

**33. Yamakam taṃ paheḷi ca, nekantamadhurāni’ti;
Upekkhanti sabbāni, sissakhedabhayā mayā.**

33. Nanu yamakaṃ nāma kavīnaṃ sāmattiyaṃ visesasūcakanti tattha taṃ sopayogaṃ, paheḷikā ca sopayogā kīḷāvinodane sambādhaṭṭhānamantane parabyāmoḥane [[paramabyāmoḥane \(ka.\)](#), [kābyādāsa 3.97](#)] ca, tasmā tattha kathamupekkhā bhavatoti āha “**yamaka**”ntiādi. **Taṃ** yathāvuttam **yamakaṇca** sukaradukkarappabhedam. **Paheḷikā** pana pubbācariyehi soḷasa niddiṭṭhā samāgatāvañcitādikā. Tatthidaṃ lakkhaṇam –

Samāgatā nāma siyā, guḷhatthā padasandhinā;
Vañcitāññattha ruḷhena, yattha saddena vañcanā.

Ukkantātibyavahita-ppayogā mohakārinī;
Siyā **pamussitā** yassā, dubbodhatthā padāvali.

Samānarūpā’mukhyatthā-ropāhitapadā siyā;
Pharusā paccayādīhi, jātasaddā kathañcipi.

Saṅkhyātā nāma saṅkhyānaṃ, yattha byāmoḥakāraṇam;
Aññathā’bhāsate yattha, vākyattho sā **pakappitā**.

Sā **nāmantarikā** yassā, nāme nānatthakappanā;
Nibhūtā’vaṭṭhitaññatthā, tulyatthasutihetuto.

Samānasaddā sā iṭṭha-saddapariyāyasādhitā;
Sammulhā mūḷhatāyeva, niddiṭṭhatthāpi sādhuḥkaṃ.

Yassā sambandhabāhulyā, nāmaṃ sā **pārihārikī**;
Ekacchannā bhava byañjā-dheyyaṃ nissayagopanā.

Sā bhava **ubhayacchannā**, yassā ubhayagopanā;
Samkiṇṇā nāma sā yassā, nānalakkhaṇasaṅkaroti.

Dosattepi cesam sabbesaṃ ukkantādisu dosabhāve nāropitabbā. Esā hi [[manasoti \(ka.\)](#)] “bahugūṇe paṇamati”ccādinā [[subodhālaṅkāra 44 gāthā](#)] vākyasaṃkiṇṇanāmena na vuttā, pakappitā ca saṃsayadosaparīhārena “yāte dutiyaṃ nilaya”nti [[subodhālaṅkāra 112 gāthā](#)] ādinā niddiṭṭhā.

“Pabhavā’nataṃvittiṇṇā, tavā’ṇā mahatī sati;
Cīrāya jayataṃ nātha, pahutaphalasādhanī”’ti.

Ayaṃ **samāgatā**.

“Bhaddamevo’paseveyya, vidhūtamadakibbisam;
Sampāpaye puraṃ khemaṃ, sa danto’ttanisevina”’nti.

Ayaṃ **vañcitā**.

Pamussitādayo tu lakkhaṇānusārena, tatthodāharaṇānusārena ca veditabbā.

Evaṃ pubbācariyehi parikappitā paheḷikā ceti etāni **sabbāni ekantena** niyamaṇa **na madhurāni** attharasassa vā saddarasassa vā kassaci abhāvena assāditabbāni na hontīti iminā kāraṇena **sissānamuppanno khedoyeva bhayaṃ** tato tesam khedato vā uppannabhayato mayā upekkhiyantīti sambandhanīyaṃ.

33. Evaṃ sukaradukkaravasena duvidhattam vatvā kavīnaṃ sāmattiyaṃ appakāsane sappayojanayamakānaṇca, kīḷāvinodane sambādhaṭṭhānasammantane parabyāmoḥane cāti imesu sappayojanānaṇca paheḷikānamavacane kāraṇam niddisati “**yamaka**”miccādinā. **Taṃ yamakaṃ**

yathāvuttam sukara dukkarādibhedam yamakajātāñca **paheli** ca pubbācariyehi niddiṭṭhā samāgabhādikā pahelikā ca **iti** imāni **sabbāni ekantamadhurāni** na iti assādetabbassa attharasassa, saddarasassa vā niyamato abhāvā ekantena amadhurāni, **iti** iminā kāraṇena ca **sissakhedabhayā** sissānaṃ asahanasaṅkhātāya asahanena jātāya vā bhūtiyā ca mayā upekkhīyanti. Sissānaṃ khedoyeva bhayaṃ, sissakhedato uppannaṃ vā bhayaṃ, tatoti viggaho.

Ettha pahelikā evaṃ daṭṭhabbā –

Samāgatā ca vañcitu-kkantā pamussitāpi ca;
Samānarūpā pharusā, saṅkhyātā ca pakappitā.

Athopi nāmantarikā, nibhūtā ca pahelikā;
Atho samānasaddā ca, sammulhā pārihārikī;
Ekacchannobhayacchannā, saṃkiṇṇāti ca soḷasāti.

Tatridaṃ lakkhaṇaṃ –

Samāgatā nāma siyā, gulhatthā padasandhinā;
Vañcitāññattha ruḷhena, yattha saddena vañcanā.

Ukkantātibyavahita-ppayogā mohakārinī;
Siyā **pamussitā** yassā, dubbodhatthā padāvali.

Samānarūpā’mukhyatthā-ropāhitapadā siyā;
Pharusā paccayādīhi, jātasaddā kathañcipi.

Saṅkhyātā nāma saṅkhyānaṃ, yattha byāmohakāraṇaṃ;
Aññatthā’bhāsate yattha, vākyattho sā **pakappitā**.

Sā **nāmantarikā** yassā, nāme nānatthakappanā;
Nibhūtā’vaṭṭhitaññatthā, tulyatthasutihetuto.

Samānasaddā sā iṭṭha-saddapariyāyasādhitā;
Sammulhā mulhatāyeva, niddiṭṭhatthāpi sādhuḷkaṃ.

Yassā sambandhabāhulyā, nāmaṃ sā **pārihārikī**;
Ekacchannā bhava byañjā-dheyyaṃ nissayagopanā.

Sā bhava **ubhayacchannā**, yassā ubhayagopanā;
Saṃkiṇṇā nāma sā yassā, nānalakkhaṇasaṅkaroti.

Ayaṃ panettha attho – **padasandhinā** padānaṃ sandhānato **gulhatthā** apākaṭatthā **samāgatā** nāma siyā. **Gulhatthā**ti pasiddhānuvādena apasiddhā samāgatā vidhīyate. Ito parampi anuvādānuvādyabhāvo evaṃ veditabbo. **Yattha** pahelikāyaṃ **aññattha ruḷhena saddena** aññasmiṃ atthe pasiddhena ruḷhisaddena vañcanā **vañcitā** nāma siyā.

Atibyavahitappayogā atisayena antaritapayujjāmānapadayuttā tatoyeva **mohakārinī** sammohakārikā pahelikā **ukkantā** nāma. **Yassā** pahelikāya **padāvali** padapanti **dubbodhatthā** duranubodhābhidheyyā, sā **pamussitā** nāma.

Amukhyatthāropāhitapadā appadhānatthe mukhyatthapakāsakasaddānaṃ kiñci sadhammaṃ nissāya āropanato upaṭṭhitapadayuttā **samānarūpā** nāma siyā. **Paccayādīhi** paccayādesādīhi **kathañcipi** yena kenaci pakārena **jātasaddā** nipphannaṃ **pharusā** nāma.

Yattha yassaṃ pahaḷikāyaṃ **saṅkhyānaṃ** gaṇanaṃ vuttamaṃ byāmahakāraṇaṃ hoti, sā pahaḷikā **saṅkhyātā nāma** siyā. **Yattha** yassaṃ pahaḷikāyaṃ **vākyattho** samudāyattho **aññathā** aññena pakārena **ābhāsate** viññāyate, **sā pakappitā** nāma.

Yassā pahaḷikāya **nāme** payuttābhidhāne **nānatthakappanā** vividhābhidheyyakappanā sambhavati, **sā** pahaḷikā **nāmantarikā** nāma. **Tulyatthasutihetuto** samānatthasaddānaṃ payogahetuyā **avaṭṭhitaññathā** paṭiṭṭhitaaññathā hoti, **sā nibhūtā** nāma.

Yā pahaḷikā **iṭṭhasaddapariyāyasādhitā** icchitatthasaddassa vevacanehi nipphādītā hoti, **sā samānasaddā** nāma. Sādhukaṃ **niddiṭṭhatthāpi** dassitaatthayuttāpiyā **mūḷhatāyeva** sammohabhāvatthaṃ eva bhavati, **sā sammulhā** nāma.

Yassā pahaḷikāya viracane **nāmaṃ** dassiyamānaṃ nāmaṃ **sambandhabāhulyā** sambandhassa bahulabhāvato bhavati, **sā pārihārikī** nāma. **Yassā ādheyyaṃ byañja** abhibyañjiya pakāsetvā **nissayagopanā** ādhāragutti bhavati, **sā ekacchannā** nāma.

Yassā payoge **ubhayagopanā** ubhinnaṃādhārādheyyānaṃ gopanā bhavati, **sā ubhayacchannā** nāma. **Yassā nānālakkhaṇasaṅkaro** samāgatādīnānāvīdhalakkhaṇānaṃ saṅkaro hoti, **sā samkiṇṇā** nāma siyā.

Idāni samāgatādīnaṃ lakkhiyaṃ kamena evaṃ ñātabbaṃ –

‘Pabhavā’ natavittiṇṇā, tavā’ ṇā mahatī satī;
Cīrāya jayataṃ nātha, pahutaphalasādhinī’ ti.

Ayaṃ **samāgatā**.

Nātha tava pabhavato paṭṭhāya **nataṃvittiṇṇā** oṇatavasena patthaṭā, evaṃ satī nadī viya dissati. **Pabhava** pakaṭṭhatta sobhāvanta. Bho **nātha tava** tuyhaṃ **mahatī satī** mahantī samānā **āṇā ānatavittiṇṇā** attani natesu janesu patthaṭā **pahutaphalasādhinī** bahulatthanipphādanī **cīrāya** cirakālaṃ **jayataṃ** ukkaṃsabhāvena pavattatu. Ettha pabhavaānataitisandhinā attho gulho.

‘Bhaddamevo’ paseveyya, vidhūtamadakibbisam;
Sampāpaye puram khemaṃ, sa danto’ ttanisevita’ nti.

Ayaṃ **vañcitā**.

Vidhūtamadakibbisam vināsitamadadosam **bhaddameva** mandapiya [pindapissa (ka.)] – bhaddajātikesu hatthīsu bhaddajātikahatthimeva upaseveyyāti vuttaṃ viya dissati. **Bhaddameva** uttamapurisameva seveyyāti attho. Sevanaṃ kimatthanti ce? Hatthipakkhe **danto** sikkhito **so** hatthi **attanisevitaṃ** attānaṃ bhajitaṃ janaṃ **khemaṃ** nibbhayaṃ **puram** nagaraṃ sampāpeti. Purisapakkhe pana **danto** damito **so** ariyapuggalo **attanisevitaṃ** attānamupasevitaṃ janaṃ **khemaṃ** niddukkhaṃ **puram** nibbānapuram pāpeti. Ettha kavicchitauttamattathato aññena hatthiatthe ruḷhena saddena vañcanā nāma.

‘Bahugūṇe paṇamati, dujjanānaṃpyayaṃ jano;
Hitam pamudito niccam, sugataṃ samanussara’ nti.

Ayaṃ **ukkantā**. Imassattho upari āgamissati.

Byākiṇṇadosatte satipi pahaḷikāruḷhattā eṣā iṭṭhā. Vuttañhi ‘‘pahaḷikāyamāruḷhā, na hi dutṭhā kiliṭṭhatā’’ ti. Iha sambandhīpadānaṃ aṭṭhānaṭṭhāpanena byavahitattaṃ hoti.

‘‘Mukhaphullaṃ giṅgamakaṃ, niyuruggatthanunnataṃ;

Paṭaccarī varam poso, bhīruyā dhārayantiyā’’ti.

Ayaṃ pamussitā.

Mukhaphullaṃ tilakādīṃ **giṅgamakaṃ** evaṃnāmakam pasādhanam **niyuruggatthanunnataṃ** niyuraṃ valayaṃ, uggatthanam payodharapaṭaṃ, unnataṃ nalāṭapaṭādikaṃ, mukhato unnatābharaṇaṅca **dhārayantiyā bhīruyā** itthiyā **paṭaccarī** jñṇavatthanivāsī **poso** puriso **varam** uttamo. Ettha bahupayogarahitehi saddehi racitattā atthassa duravabodhatā.

‘‘Nava’ggaratanāna’smiṃ, dissanti ratanākare;
Purisānettha aṭṭhannaṃ, aṭṭhā’sādhāraṇā’ para’’nti.

Ayaṃ samānarūpā.

Asmiṃ ratanākare aggaratanāni nava dissanti, **ettha** imesu ratanesu **aṭṭha** ratanāni aṭṭhannaṃ purisānaṃ asādhāraṇāni, **aparam** ratanaṃ sādharmaṇaṃ. Imāni nava lokuttarāni cittikatādiatthena ‘‘ratanāni’’ti ca tappabhavo sammāsambuddho ‘‘ākaro’’ti ca kappitoti amukhyatthesu ratanādisaddānamāropanaṃ hoti.

‘‘Vindanti devagandhabbā, himavantamahātale;
Rasavante sare satta, na nāgāpi uposathā’’ti.

Ayaṃ pharusā.

Himavantamahātale himālayassa matthake **rasavante** sodake **satta sare** anotattādi ke devagandhabbā **vindanti** sevanti, uposathā nāgāpi na vindanti. Ayamaparatto. Himavantamahātale candaraṃsiyutte mahāpāsādātale **devagandhabbā** kīḷamānā gandhabbā **rasavante** madhuragaṇayutte **satta sare** vīṇāya chajjādike satta sare vindanti, **nāgāpi** ariyāpi **uposathāpi** upavutthāpi **na vindanti** nānubhavanti. Ettha dibbantīti **devā**. Uposatho etesamatthīti **uposathāti** viggaho. Lakkhaṇakkamato pasiddhapacurapayogato aññadatthā yena kenaci lesena paccayādīnaṃ jātasaddassa atthitā.

‘‘Gītasadde sarā dve dve, dve chajjaññatra chassarā;
Pañcavaṇṇaṃ yathā cakkhu, chabbaṇṇā nāsikā tathā’’ti.

Ayaṃ saṅkhyātā.

Gītasadde sarā dve honti, **chajja’ññatra** chajjato aññatra chajjaṃ vajjetvā usabho gandhāro majjhimo pañcama dhevato nisādoti. Ettha yugaḷato dve dve **chassarā** chasaravanto. Yathā cakkhu pañcavaṇṇaṃ hoti, **tathā** evaṃ nāsikā chabbaṇṇā hoti, gītasadde ikāraakārasaradvayasabbhāvato ca chajjaṃ ṭhapetvā usabhādīsu sarānaṃ tividdhattā ca ‘‘cakkhū’’ti sarabyañjanavasena pañcavaṇṇānaṃ sabbhāvato ca ‘‘nāsikā’’ti channaṃ sabbhāvato ca evaṃ vuttaṃ. Ettha vuttasaṅkhyāgītādisaddasanniṭṭhānato sammohakārīni hoti.

‘‘Pātu vo udito rājā, sirimā rattamaṇḍalo;
Sakantigahanakkhatta-saṅghayutto sulakkhaṇo’’ti.

Ayaṃ pakappitā.

Sirimā sirimanto **rattamaṇḍalo** anurattajanapadamaṇḍalo, anurattaamaccamaṇḍalo vā **sakantigahanakkhattasaṅghayutto** sakassa attano ante samīpe gahanehi aviraḷehi khattasaṅghehi khattiyasamūhehi yutto saṃyutto **sulakkhaṇo** pasatthapurisalakhaṇo **udito** pasiddho **rājā** narindo **vo** tumhe **pātu** rakkhatūti ayaṃ anadhippetattho. **Sirimā** ‘‘lakkhiyā vasaṭṭhānattā’’ti vuttattā

sirimanto **rattamaṇḍalo** uggamane rattamaṇḍalo **sakantigahanakkhattasaṅghayutto** kantisahitehi gahanakkhattatāragañehi yutto **sulakkhaṇo** suṭṭhu sasalakkhaṇo **udito** uggato **rājā** cando **vo** tumhe **pātūti** ubhayapakkhassa sādharmaṇaguṇaguṇīpadapariggahena idha vākyatthassa aññathā dissamānatā hoti.

“Vuccatā’do isitye’ko, sumahantopakāravā;
Sanātano ca na isi, na sakhā na sanātano”’ti.

Ayaṃ **nāmantarikā**.

Eko **ādo** pubbe “isī”’ti vuccati, **sumahantopakāravā** atimahantopakārasamannāgato **sanātano** **ca** sassato ca hoti, tathāpi **na isi** isi nāma na hoti, **na sakhā** mittopi na hoti, **na sanātano** sassatopi na hoti, ayaṃ gamyamānattho. **Sumahā** atimahanto eko **ādo** nāmādīmhi isīti vuccati, **anto** majjhe **pakāravā pa-**kārena samannāgato, **sanātano ca** sassato ca hoti, isipi nāma na hoti, mittopi na hoti, so **nātano** tanaiti akkharadvayarahito **na** hoti. Ādimajjhānaṃ vuttattā **anteti** ñāyati, “**isipatanavihāro**”’ti gahetabbaṃ. Tattha isipatananāmena isiādīnaṃ gamyamānatthattā nānatthakappanā hoti.

“Dhāvantaṃ udayā atthaṃ, muhuttaṃ na nivattati;
Na candamaṇḍalaṃ etaṃ, nāpi ādiccamaṇḍala”’nti.

Ayaṃ **nibhūtā**.

Udayā udayato pabhuti **atthaṃ** yāva atthaṃ **dhāvantaṃ** javantaṃ **muhuttaṃ** muhuttakālaṃ **na nivattati** na punāvattati. Etaṃ candamaṇḍalampi na hoti, ādiccamaṇḍalampi na hoti. **Udayā** paṭisandhito **atthaṃ** yāvacuti. **Dhāvantaṃ** āyukiccato āyucandādīnamatthānaṃ, tappakāsakasaddānañca tulyattā ettha patiṭṭhitacandādiatthantarānaṃ sambhavo.

“Devīṃ kittimahīnāmaṃ, kaḷāratthavhayaṃ puriṃ;
Hitvā na sari so dhīro, karontopyu’yyamavhaya”’nti [[karontomuttamavhayanti \(ka.\)](#)].

Ayaṃ **samānasaddā**.

Kittimahīnāmaṃ kittimahīnaṃ dvinnaṃ nāmena samannāgataṃ **devīṃ** aggamahesiṃ **kaḷāratthavhayaṃ puriṃ** kaḷāraatthānaṃ dvinnaṃ nāmena samannāgataṃ puriṃ nagarañca so dhīro **hitvā** paricajjivā **uyyamavhayaṃ** uyyamanāmena samannāgataṃ karonto api **na sari** sampattiṃ nānusari, yasodharādeviñca kapilavatthupuriñca hitvā vīriyasaṅkhātapadhānaṃ karonto mahāsatto sampattiṃ na sari, etthābhimatayasodharādisaddānaṃ pariyāyehi **kittimahī**saddādīhi racitatā.

“Catuddisāmukhā bandhā, cattāro sindhavā sayam;
Paribhuñjanti nikkhittaṃ, tiṇaṃ majjhe yathāsukha”’nti.

Ayaṃ **sammulhā**.

Sindhavā cattāro assā **catuddisāmukhā** yathā catuddisāsammukhā honti, tathā **bandhā** majjhe nikkhittaṃ tiṇaṃ sayam yathāsukhaṃ paribhuñjanti, aññamaññaṃ piṭṭhiṃ katvā bandhā viya khāyati, te pana sammukhaṃ katvā bandhā honti. Ettha “catuddisāmukhābandhā”’ti niddiṭṭhattā piṭṭhiṃ katvā bandhāti sammulhatā hoti.

“Jano jīvanajānanda-karabandhussa bhāsitaṃ;
Sakkarontova pappoti, puññārikkhayagocare”’ti.

Ayaṃ **pārihārikī**.

Jīvanajānandakarabandhussa jīvanato udakato jātānaṃ padumānaṃ ānandakarassa sūriyassa bandhussa sammāsambuddhassa **bhāsitaṃ** vacanaṃ **sakkaronto** pūjento jano **puññārikkhayagocare** puññānaṃ paṭipakkhattā puññārisankhātānaṃ akusalānaṃ khayassa nimittabhūtaṃ nibbānaṃ ārammaṇaṃ katvā uppanne maggaphale **pappoti** pāpuṇāti. Ettha jīvanajānaṃ ānandakarassa bandhusseti ca, puññārīnaṃ khayanimittaṃ ārammaṇaṃ katvā pavatteti ca iminā buddho maggaphalā ca pārampariyena sambandhena vuttāti sambandhānaṃ bāhullabhāvo.

“Na gaṇhāti mahantampi, saddaṃ na ca vibhūsaṇaṃ;
Catuppadassa kassāpi, kaṇṇoyaṃ na kilāphalo”ti.

Ayaṃ **ekacchannā**.

Kassāpi catuppadassa kaṇṇo mahantampi saddaṃ na gaṇhāti, ārammaṇaṃ na karoti, vibhūsaṇampi na gaṇhāti. Tathāpi ayaṃ kaṇṇo aphalo na kila, saphalato nipphalo na hoti kira. Assakaṇṇo rukkho. Ettha kaṇṇoti ādheyyaṃ katvā tadādharassa avacanato nissayagutti.

“Alaṅkaronto bhuvanaṃ, sassiriko sadevakaṃ;
Kasmiṃ sañjātasamvaddho, ko kena nupalimpati”ti.

Ayaṃ **ubhayacchannā**.

Sassiriko sadevakaṃ bhuvanaṃ alaṅkarontoti buddho viya khāyati. **Bhuvanaṃ** bhuvanaṃ saṅkhātānaṃ **kaṃ** jalaṃ sadā eva alaṅkaronto **sassiriko** lakkhiyasamannāgato **kasmiṃ** jale sañjātasamvaddho **ko** kataro **kena** jalena **na upalimpati** na limpanti. Padumoti visajjanaṃ. Padumo hi puṇṇapūṃsakaliṅgo. Iha jalapadumānaṃ dvinnampi chādītattā ubhayacchannā nāma.

“Ādo soyeva yo ante, majjhimassādi majjhimo;
Siddhantādīsu vattantaṃ, asaṅkhatapadaṃ vadā”ti.

Ayaṃ **samkiṇṇā**.

Ante avasāne yo hoti, ādopi soyeva hoti, majjhimassa ādibhūto majjhimo eva hoti, **siddhaṃ** nipphannaṃ **tādīsu** ariyesu vattantaṃ asaṅkhatapadaṃ **vada** kathehīti ayamaparatto. **Ādo** ādimhi **soyeva** sakāro eva **ante** pariyoṣāne **yo** yakāroyeva, **majjhimo** majjhimavaṇṇo **majjhimassa** saddassa **ādi** makāro, **siddhantādīsu** matasamayakālādīsu vattantaṃ vācakabhāvena pavattantaṃ **asaṅkhatapadaṃ** saṅkhatato aññattā asaṅkhatabhūtaṃ paññattiṃ **vada** kathehīti. Samayasaddo hi nāmapaññatti. Ettha **siddhanta**saddena **ādi**saddassa saṅgahitattā tādīattho labbhatīti atthassa guḷhatāya samāgatālakkhaṇena ca “so”ti “yo”ti “asaṅkhatapada”nti aññattharuḷhasaddena vañcitattā vañcitālakkhaṇena ca **samayasadde** nānatthakappanato nāmantarikālakkhaṇena cāti tīhipi lakkhaṇehi missitoti. Sesesupi samkiṇṇattaṃ evameva veditabbaṃ. Tattha tattha vuttalakkhaṇānusāreṇeva samāgatādīnaṃ anvatthasaññatā veditabbā.

34. **Desakālakālōka-nāyāgamavirodhi yaṃ; Taṃ virodhipadaṃ ce'ta-mudāharaṇato phuṭaṃ.**

34. “**Desi**”ccādi. **Deso** thalajaladesādi. **Kālo** rattindivo. **Kalā** naccagītādayo. **Loko** carācarabhūtapavatti. **Nāyo** yutti. **Āgamo** idha buddhavacanaṃ. Aññattha tu sutidhammasaṃhitā, te ca. Tehi virodho assa atthīti **desa...pe... virodhi**. Yanti anuvadītvā. **Taṃ virodhipadanti** vidhiyate. **Etañca** padaṃ **udāharaṇato** lakkhiyato **phuṭaṃ** pākāṭaṃ. Yato jalajādīnaṃ thalādīsu pātubhāvādi, ratyādīsu sambhavantānaṃ kusumādīnaṃ divādīsu sambhavo ca, “naccagītādicatusaṭṭhiyā kalāsu bhinnachajjo nāma sattasaro”tiādīnā kalāsathābhīhitalakkhaṇātikamavirodho ca, “aggitālo, nissāro khadiro”tiādīnā lokasīmātikamo ca, vuttāyapā’naruppattasamuppattiyā middhassa rūpabhāvāpādanādīnāyavirodho ca, yathāsakamāgamena virodho ca sukkena ca sakkā pākāṭattā viññātuṃ, tato sabbametaṃ nodāhaṇanti adhippāyo.

34. Evaṃ yamakapaheḷikānamadassane kāraṇaṃ vatvā idāni uddesakkamena sampattavirodhidosāṃ “**desakāli**”ccādinā vadati. **Yaṃ** padaṃ **deso** thalajalapabbatādi. **Kālo** rattindivo hemantādivasena tividho, vasantādivasena chabbidho. **Kalā** naccagītādicatusaṭṭhi. **Loko** thāvarajaṅgamabhūtapavattisaṅkhāto. **Ñāyo** yutti. **Āgamo** iha buddhavacanaṃ, aññattha pana sutidhammasaṃhito ca. Tehi virodho assa atthīti **desa...pe... virodhi. Taṃ virodhipadaṃ** nāma. **Etam** virodhipadaṃ **udāharaṇato** lakkhiyato **phuṭam** pariyyattaṃ. Vassikajātisumanādīnaṃ jalajādibhāvo ca, padumakumudādīnaṃ thalajādibhāvo ca, rattiādīsu labbhamānānaṃ kumudādīnaṃ divādīsu sambhavo ca, naccagītādicatusaṭṭhiyā kalāsu “chajjo usabho gandhāro majjhimo pañcama dhevato nisādo”ti dassitasattasarānamekadesassa chajjassa bhinnasattasaro chajjo nāmāti samudāyavasena vohāraṇādīhi sathhāgatataṃ, lakkhaṇātikkaṃmaṅca, “aggi sītaḷo, candanaṃ uṇṇaṃ, khadirarukkho nissāro, eraṇḍo sasāro” iccādinā lokamariyādātikkamo ca, middhassa arūpabhāvupapattiyā vuttāyapi rūpabhāvasādhanasadisayuttivirodhikathanaṅca, yathāsakamāgamamatikkamma kathanaṅcāti sabbesaṃ viruddhasabhāvassa pākāṭṭā udāharaṇaṃ na dassayissāmāti adhippāyo. Imesameva desādivirodhīnamaviruddhattaṃ ettheva virodhipadadosaparīhāre “bodhisattappabhāvenā”ticcādinā dissati. **Desa...pe... gamehi virodho, so** assa atthīti **desa...pe... virodhi. Nīndāyaṃ ayamassatthīti vivacchitā.**

35. **Ya’dappatīta’mānīya, vattabbaṃ neyyamāhu taṃ;
Yathā sabbāpi dhavalā, disā rocanti rattiyaṃ.**

35. “**Ya**”miccādi. **Appatītaṃ** saddato, atthato vā anadhigataṃ nahyaññathāvagama ganthantarābhāvato. Vakkhati hi “**dullabhāvagatī sadda-sāmatthiyavilaṅghinī**”ti. **Yaṃ** kiñci padaṃ samānīya ānetvā vattabbaṃ, taṃ neyyamāhu. **Yathetyudāharati. Sabbāpi sakalāpi disā** pubbadisādayo dasa disā **rattiyaṃ** rajanyaṃ **dhavalā** ujjalā **rocanti** dippantīti ettake niddiṭṭhe candamarīcino ettha neyyattaṃ.

35. Idāni neyyadosamudāharati “**ya**”miccādinā. **Yaṃ** padaṃ **appatītaṃ** padantarena, tenābhīhitatthena vā “imassatthoya”miti aviññātaṃ ānīya vattabbaṃ, tatoyeva padantaramānīya vattabbaṃ hoti, **taṃ neyyamāhu** “neyyadoso”ti porāṇā āhu. **Yathā** tatthodāharaṇamīdisaṃ “sabbāpi dhavalā disā rocanti rattiya”nti. **Sabbāpi disā** pubbadakkiṇṇādayo dasa disā **dhavalā** setā **rattiyaṃ** rajanyaṃ **rocanti** dippanti. Ettha disāya visesaṃ dhavalaguṇaṃ kelāsakūṭasudhābhitticandaraṃsiādīsu kuto sañjātamiti anicchitattā aññanivattanatthaṃ candakiraṇādīvācakapadaṃ ānetvā dhavalatā imineti vattabbattā **dhavala** padaṃ neyyadosena duṭṭhaṃ hoti. Patītaṃ viññātaṃ, na patītaṃ **appatītaṃ**. Ettha akāro pasajjapaṭisedhe.

36. **Nedisā bahu maññanti, sabbe sabbattha viññuno;
Dullabhā’vagatī sadda-sāmatthiyavilaṅghinī.**

36. **Appatītaṃ** nicchanti viññūti dassetumāha “**ne**”tiādi. **Īdisāṃ** anantare vuttappakāraṃ neyyaṃ sabbepi **viññuno** ñeyyavidū **sabbattha** gajjādike **na bahu maññanti** na sambhāventi nappayujjanti. Kiṃ na bahumaññantīti ce āha “**dullabhā**”tiādi. Tathā hi **avagatī** atthāvagama **saddaṃ** vācakaṃ, **sāmatthiyaṅca** ñāyaṃ **vilaṅghayati** cajati anupadassanatoti **saddasāmatthiyavilaṅghinī dullabhā na** labhyate. Ñāyopattho vā saddopattho vā yottho na hoti. So nappatīyate yathā manasi avaṭṭhitamattenāti attho. Tasmā saddato, atthato vā patītabbamaneyyaṃ, tabbiparītaṃ neyyanti viññeyyaṃ.

36. Imaṃ **appatīta** padaṃ viññūhi nābhīmatanti dassento āha “**nedisa**”miccādi. **Īdisāṃ** yathāvuttappakāraṃ neyyaṃ **sabbe viññuno sabbattha** gajjapajjādike **na bahu maññanti** na sambhāventi nappayojenti. **Avagatī** atthāvabodho **saddasāmatthiyavilaṅghinī** saddasaṅkhātavācakaṅca **sāmatthiyasaṅkhātāñāyaṅca** atikkamma pavattinī **dullabhā** tādīsapayogābhāvato **dullabhā** hoti. Yo attho saddāgato, ñāyāgato vā na hoti, so kattuno manasi patīṭṭhitamattena patīto na hotīti taṃ padaṃ neyyadosamīti sabbe kavīno pariharantīti adhippāyo. Bahumānaṃ karontīti vākye bahumaññantīti nāmadhātu. **Saddasāmatthiyaṃ vīlaṅghayati sīlenāti saddasāmatthiyavilaṅghinī.**

37. **Siyā visesanāpekkham,
Yaṃ taṃ patvā visesanam;
Sāttakam taṃ yathā taṃ so,
Bhiyyo passati cakkhunā.**

37. “Siyā”iccādi. **Yaṃ** padaṃ visesanam patvā atthena saha vattatīti **sāttakam**. Nibbisesanantu vuttatthameva hoti. **Taṃ visesanāpekkham** siyā. “**Taṃ yathe**”tyādinā udāharati. “Passatī”ti vutte “cakkhunā”ti labbhateva.

37. “Siyā”miccādi. **Yaṃ** padaṃ visesanam patvā **sāttakam** atthasahitam, tadabhāve niratthakam hoti, **taṃ visesanāpekkham** nāma siyā. **Taṃ yathā** tassodāharaṇamevaṃ “taṃ so bhiyyo passati cakkhunā”ti. **So** puriso **taṃ** purisaṃ **bhiyyo** yebhuyasā cakkhunā passati. Ettha “passatī”ti vutteveva “cakkhunā”ti ñāyati. **Cakkhunā**ti visesyapadaṃ visesanam laddhāva sāttakam hoti. Visese apekkhā assāti ca, saha atthena vattamānaṃ sāttakamiti ca samāso.

38. **Hīnaṃ kare visesyam yaṃ, taṃ hīnattham bhava yathā;
Nippabhīkatakajjoto, samudeti divākaro.**

38. “Hīna”miccādi. **Yaṃ** visesanapadaṃ **visesyam** visesitabbaṃ **hīnaṃ** lāmakam **kare** kareyya, **taṃ** visesanapadaṃ **hīnattham** hīno attho yassa taṃ hīnattham nāma bhaveyya. “**Yathā**”ityādinā udāharati. Nippabhīkato kajjoto yena so **divākaro** pabhākaro **samudeti** upagacchatīti. Ettha kajjotappabhāpahaṇe na thuti divākarassāti.

38. “Hīnaṃ kare”ccādi. **Yaṃ** padaṃ visesyam hīnaṃ karoti, taṃ hīnattham bhava. Yathā tatthodāharaṇamevaṃ “nippabhīkatakajjoto, samudeti divākaro”ti. Pabhārahitakatā kajjotā yena so **divākaro** sūriyo **samudeti** uggacchati. “Nippabhīkatakajjoto”ti iminā visesanena lāmakālokaladdhayuttassa kajjopanakassa abhibhavanappakāsanam sahasaramsino nindāyeva, na thutīti visesyam hīnattham hoti. Hīno attho yasseti ca, natthi pabhā etesanti ca, nippabhā katāti ca, nippabhīkatā kajjotā yenāti ca viggaho.

39. **Pādapūraṇamattam yaṃ, anattamiti taṃ matam;
Yathā hi vande buddhassa, pādapaṅkeruhampica.**

39. **Hi api** casaddānaṃ pādapūraṇamattattā anattakattam. Visesanavisesyapadadoso.

39. “Pādapūraṇi”ccādi. **Yaṃ** padaṃ **pādapūraṇamattam** catutthamsasaṅkhātassa pādassa pūraṇamattameva hoti, **taṃ anattamiti matam** ñātam. **Yathā**saddo vuttattho. **Buddhassa pādapaṅkeruham** pādambujam vandeti. Ettha **hi apicāti** imesaṃ samattanādiatthesu appavattito kevalam pādapūraṇamattato anattakattam. **Mattasaddo** avadhāraṇe. Visesanavisesyapadadoso.

Padadosaniddesavaṇṇanā niṭṭhitā.

Vākyadosaniddesavaṇṇanā

40. **Saddato atthato vuttam, yattha bhiyyopi vuccati;
Tamekattham yathā’bhāti, vāridovārido ayam.**

40. “Saddato”iccādi. **Saddato** vācakena tasmimyevatthe tasseva saddassa puna payogato **atthato** abhidheyyena pubbapaṭipādikasseva vatthussāvisesena puna paṭipādanato **vuttam** payuttam yaṃ padattharūpaṃ **yattha** yasmim vākye **bhiyyopi vuccati** punapi payujjate, tamekatthanti anuvaditvā “**yathe**”ccādinā vidhīyate. Vāriṃ dadātīti **vārido**. **Ayam vārido** meghe **ābhāti** dippatīti. Jaladānamattāpekkhāya idaṃ saddato ekattham.

40. Idāni uddiṭṭhakkamena vākyadosam niddisati “**saddato**”ccādinā. **Saddato** vācakena

atthato abhidheyyena **vuttaṃ** payuttaṃ yaṃ padattharūpaṃ **yattha** yasmiṃ vākye **bhiyyopi** punapi **vuccati** yujjate, **taṃ** vākyāṃ **ekatthaṃ** nāma doso. Udāharaṇaṃ “**yathi**”ccādi. **Vārido** jaladāyako **ayaṃ vārido** megho **ābhāti** dippatī. Sampattisādhakaṃ “jaladāyako”ccādivisesanaṃ vinā jaladānamattassa vuttattā saddato ekatthaṃ nāma hoti.

Yathā ca

**41. Titthiyaṅkurabījāni, jahaṃ diṭṭhigatāni’ha;
Pasādeti pasanne so, mahāmuni mahājane.**

41. Titthiyasaṅkhātānaṃ aṅkurānaṃ **bījāni** uppattihetubhūtāni **diṭṭhigatāni** dvāsaṭṭhi diṭṭhiyo **jahaṃ** jahanto dūrīkaronto **so mahāmuni** sammāsambuddho **iha** loke attani **pasanne** pasādabahule mahājane pasādetīti aparamudāharaṇaṃ. Pasādasāṅkhātassa atthassa “**pasanne pasādetī**”ti vuttattā idamatthato ekatthaṃ.

41. “**Titthiyi**”ccādi. So mahāmuni **titthiyaṅkurabījāni** titthiyasaṅkhātānaṃ aṅkurānaṃ uppattikāraṇabhūtāni **diṭṭhigatāni** sassatādibhedabhinnā dvāsaṭṭhidiṭṭhiyo **jahaṃ** jahanto apanento **iha** loke **pasanne** attani pasanne **mahājane** pasādeti. **Pasannasaddena** vuttappasādasāṅkhātassa atthassa **pasādetīti** kriyāpadenapi vuttattā sadde bhinnepi atthato ekanti atthato ekatthassudāharaṇaṃ. Titthiyā eva aṅkurāni, tesāṃ bījāni, diṭṭhīsu gatāni, diṭṭhiyo eva gatānīti vā viggaho.

**42. Āraddhakkamavicchedā, bhaggarīti bhave yathā;
Kāpi paññā, kopi guṇo, pakatīpi aho tava.**

42. **Āraddho** vattumupakkamanto, **kamo** vacanapaṭipāṭi. Tassa **vicchedo** bhaṅgo, tato. “**Yathe**”tiādīnā udāharati. Avuttassapi pasādavasā ajjhāhāroti. Mahāmuni **tava** te **paññā kāpi** sātīsayattā aniddhāritāṃ sabhāvavisesā kāciyeva, aho pavattamānāyapi vasabhāvassāniddhāritattā acchariyanti attho. Ettha **kāpi kopīti** sabbanāmapadakkamassa **pakatīti** ettha vicchinnattā bhaggarīti.

42. “**Āraddhakkami**”ccādi. **Āraddhakkamavicchedā** vatthumāraddhapadakkamassa vicchedahetu **bhaggarīti bhave** bhaggarītivākyadoso bhavati. Udāharati “**yathi**”ccādi. Mahāmuni **tava** tuyhaṃ **paññā** sātīsayabhūtā paññā **kāpi** vacanavisayātikkantattā kāpiyeva. **Guṇo** sīlasamādhiādīnāñāsādhāraṇaguṇasamūho **kopi** pamāṇapariggahassa kenaci lesenapi kattumasakkuṇeyyattā kopiyeva. **Pakatīpi** acinteyyabhūtā pakatīpi evameva **aho** vijjamānānaṃyeva paññādīnaṃ sabhāvāvabodhassa dukkaratā acchariyā. **Kāpi kopīti** padakkamassa “**pakatī**”ti ettha suññattā rītibhaṅgo. Āraddhoyeva kamo, tassa vicchedo, bhaggā rīti assa, ettha vāti viggaho.

**43. Padānaṃ dubbinnikkhepā, byāmoho yattha jāyati;
Taṃ byākiṇṇanti viññeyyaṃ, tadudāharaṇaṃ yathā.**

43. “**Padāna**”miccādi. **Yattha** yasmiṃ vākye **padānaṃ** syādyantākhyātīkānaṃ **dubbinnikkhepā** duṭṭhapanato **byāmoho** saṃmulhata **jāyati** uppajjati, **taṃ** vākyāṃ byākiṇṇanti **viññeyyaṃ** ñātābbaṃ. **Tassa** byākiṇṇassa **udāharaṇaṃ** lakkhiyaṃ “**yathe**”ti dasseti. Yathā idaṃ, tathā aññampīti attho.

43. “**Padāni**”ccādi. **Padānaṃ** syādyantatyādyantapadānaṃ **dubbinnikkhepā** duṭṭhapanato **yattha** vākye **byāmoho** saṃmoho jāyati, **taṃ** byākiṇṇadosoti viññeyyaṃ. **Tadudāharaṇaṃ** tassa byākiṇṇadosassa lakkhiyaṃ **yathā** iminā vakkhamānanayena.

**44. Bahugūṇe paṇamati, dujjanānaṃ pyayaṃ jano;
Hitāṃ pamudito niccaṃ, sugataṃ samanussaraṃ.**

44. Bahuanantattā bahubhūte guṇe sīlādike **samanussaraṃ** sammadeva uṭṭhāya samuṭṭhāya

anussaranto guṇavisayasatiṃ paccupaṭṭhāpentō teneva kāraṇena **pamudito** haṭṭhapahaṭṭho **ayaṃ jano** sabbopi loko **dujjanānaṃ** sujanetarānampi devadattādīnaṃ **niccaṃ** kālaṃ hitaṃ **sugataṃ** sammāsambuddhaṃ **paṇamaṭi** namassatīti ayaṃ attho kavivañcīto. Tattha “bahugūṇe paṇamaṭi” tyādi byavahitapadappayogā moho jāyatīti byākiṇṇaṃ.

44. “**Bahugūṇe**” ccādi. **Bahugūṇe** anantattā bahubhūte sīlasamādhiādiguṇe **samanussaraṃ** visesato anussaranto **pamudito** tatoyeva pahaṭṭho ayaṃ jano sattanikāyo **dujjanānampi** asappurisānampi **niccaṃ** satataṃ **hitaṃ** mittabhūtaṃ **sugataṃ** sabbaññuṃ **paṇamaṭi** vandati. Ettha padānaṃ aṭṭhānapayogato byākiṇṇattaṃ padatthānusāreṇeva gamyate.

45. **Visiṭṭhavacanā’petam, gāmmaṃ’tya’bhimataṃ yathā;
Kaṇṇe kāmayaṃānaṃ maṃ, na kāmayaṃsi kiṃ nvi’daṃ.**

45. Visiṭṭhassa kassaci atthassa vacanato kathanato **apetaṃ** pariccattaṃ. **Kaṇṇe**ityāmantanaṃ. Ahaṃ taṃ icchāmi, tādisaṃ maṃ tvaṃ kasmā nicchasi, idaṃ kiṃ nu iti gāmikajanavacanattā “**kaṇṇi**” ccādikāṃ gāmmaṃ.

45. “**Visiṭṭhe**” ccādi. **Visiṭṭhavacanāpetam** piyabhūtena uttivisesena visesitabbassa kathanato pariḥīnaṃ vākyam “gāmmadosa” nti kavīhi abhimataṃ. Udāharati “**yathi**” ccādi. **Kaṇṇe** he kaṇṇe **kāmayaṃānaṃ maṃ** tuvaṃ icchayaṃānaṃ maṃ **na kāmayaṃsi** tvaṃ na icchasi, idaṃ kiṃ nu. Īdise icchāvighāte vuccamāne evaṃ—

“Yācanā madīyā tava kāraṇāyaṃ,
Dine dine nipphalataṃ upeti;
Dakkho sadā mānimānabhaṅge,
Sa manmathonyatra gato mato nu” iti viya.

Piyatthassa kathanābhāvato “kaṇṇe” tyādikāṃ vacanaṃ milakkhukānaṃ vacanattā **gāmmaṃ**. Ettha **kaṇṇāsaddo** dasavassikāya vattatīti niyamo natthi. Visiṭṭhassa atthassa vacanato apetaṃ vākyam.

46. **Padasandhānato kiñci, duppatītikaraṃ bhava;
Tampi gāmmaṃtya’bhimataṃ, yathā yābhavato piyā.**

46. “**Pade**” ccādi. **Padasandhānato** pubbāparānaṃ padānaṃ sandhivasena yaṃ **kiñci** vākyam duṭṭhu asutisubhagaṃ patītimavabodhaṃ karotīti karaṃ bhava, **tampi** yathāvuttaṃ gāmmantaṃ abhimataṃ. **Yathā**tyudāharati. Bhavato **yā** kāci vanitā **piyā** hotīti ekottho. **Yabha** methune. Yabhanam yābho. So vijjate yassa so **yābhavā**. Tassa **yābhavato piyā**ityapi bhavati.

46. “**Padasandhāni**” ccādi. **Kiñci** vākyam **padasandhānato** pubbāparapadānaṃ ghaṭanato **duppatītikaraṃ bhava** asabbhabhūtaduṭṭhatthassa pakāsako hoti, **tampi gāmmanti** yathāvuttagāmmadosena dūsitanti [**duppasitanti** (ka.)] sabbehi kavīhi **abhimataṃ** ñātaṃ. **Yathā**ti udāharati. **Bhavato** bhavantassa **yā** kāci itthi **piyā** bhavatīti ayaṃ kavinā icchitatho. **Yābhavato** methunavantassa piyātipi attho. “**Yabha** methune” ti hi dhātu. Yabhanam yābho, so assa atthīti **yābhavā**, tassa yābhavatoti gahite asotabbattā duppatītikaratā. Duṭṭhāyeva patīti avabodho, taṃ karotīti viggaho.

47. **Vuttesu sūcite ṭhāne, padacchedo bhava yati;
Yaṃ tāya hīnaṃ taṃ vuttaṃ, yatihīnanti sā pana.**

47. “**Vuttessi**” ccādi. **Vuttesu** chandosatthapariniiddiṭṭhesu anuṭṭhubhādīsu **sūcite** ṭhāne “ethayati” ti chandovicītiyā pakāsitaṭṭhāne padānaṃ syādyantānaṃ chedo vicchīti vibhāgo anuvādo yaṃ yati bhaveti vidhīyati. **Tāya** yatiyā **hīnaṃ** pariḥīnaṃ viruddhaṃ **yaṃ** vākyam, taṃ **yatihīnanti** vuttaṃ, “yamaṃ virāmo **yati**, sā hīnā etthā” ti katvā. **Panāti** visese, **sā** yati panāti sambandho.

47. “**Vuttessa**”ccādi. **Vuttessu** chandosatthe niddiṭṭhaanuttṭhubhādīsu **sūcite ṭhāne** “ayametta yati”’ti pakāsīte ṭhāne **padacchedo** syādyantatyādyantādīnaṃ padānaṃ vicchedo yati nāma bhava, **tāya** yatiyā **yaṃ** vākyam **hīnaṃ** abhimataṭṭhāne vaṇṇavicchedena pariḥīnaṃ, **taṃ** vākyam **yatiḥīnanti** yatiḥīnadoseṇa duṭṭhanti viññūhi vuttaṃ.

48. **Yati sabbattha pādante, vuttaḍḍhe ca visesato; Pubbāparānekavaṇṇa-padamajjhepi katthaci.**

48. “**Yati**”ccādi. **Sabbattha pādante** sabbasmiṃ catutthaṃsasaṅkhātānaṃ gāthāpādānaṃ ante avasāne ca **visesato** visesena ekantena **vuttaḍḍhe ca** vuttānaṃ pādadvayasaṅkhāte ḍḍhe ca, tadavasāne cāti adhippāyo. “Siyā”’ti seso. Nanu “padacchedo”’ti vuttattā padamajjhe yati na hotevāti ceti āha “**pubba**”’ccādi. **Katthaci** kismiṅci ṭhāne, na sabbattha. Pubbāparānekavaṇṇapadamajjhepi yatīti sambandho. Pubbe ca apare ca **pubbāpare**. Aneke vaṇṇā **anekavaṇṇā**. Pubbāpare anekavaṇṇā yassa taṃ tathā. Tañca taṃ padañca, tassa majjhepi.

48. Idāni yatimhi labbhamānaṃ sabbavisayaṃ dasseti “**yati**”ccādinā. Sā pana yati **sabbattha pādante** catutthaṃsasaṅkhātāgāthāpādānaṃ ante ca **visesato** niyamato **vuttaḍḍhe** ca vuttānaṃ pādadvayasaṅkhāte ḍḍhe ca, tadavasāne cāti adhippāyo. **Katthaci** kismiṅci ṭhāne **pubbāparānekavaṇṇapadamajjhepi** pubbāparabhūtaanekavaṇṇasamannāgatapadānaṃ majjhe ca siyā. Padacchedassa “yati”’ti vuttattā padamajjhe na hotīti saṅkāpariharaṇatthaṃ “pubbāparānekavaṇṇapadamajjhe”’ti vuttaṃ. Ettha pādanto, vuttaḍḍho, padamajjhañca yatiṭṭhānanti. Padamajjheveva labbhamānā yati katthaci hoti, dvakkharatyakkharapadamajjhe pana na hoti.

Tatthodāharaṇapaccudāharaṇāni yathā –

49. **Taṃ name sirasā cāmī-karavaṇṇaṃ tathāgataṃ; Sakalāpi disā siñca-tīva soṇṇarasehiyo.**

49. Udāharīyatīti **udāharaṇaṃ**. Paṭipakkhamudāharaṇaṃ **paccudāharaṇaṃ**. Cāmīkarasseva suvaṇṇassa viya vaṇṇo yassa taṃ tathāgataṃ sirasā namāmi. Kīdisaṃ? **Yo** tathāgato **sakalāpi disā** sabbāyeva dasa disā **soṇṇarasehi** cāmīkaravaṇṇattā rasehi suvaṇṇarasehi **siñcatīva** siñcatīti maññe, **taṃ** tathāgatanti apekkhate. Ettha pubbapādante vuttaḍḍhe ca niyatā yati. **Cāmīkarasaddo** cettha caturakkharo. Tattha **cāmīti** pubbabhāgo, **karaiti** paro. Ettha pubbāparānekavaṇṇapadamajjhe yati. **Siñcatīti** ettha pana pubbāparānekavaṇṇapadamajjhataḥbhāvā **siñcaityatra** yati duṭṭhāti. Idam paccudāharaṇaṃ.

49. **Tattha** pādantavuttaḍḍhesu yatiyā pākaṭṭā **tasmīṃ** padamajjhe yatiyā **udāharaṇapaccudāharaṇāni** iṭṭhodāharaṇapaṭipakkhodāharaṇāni yathā. “**Taṃ name**”ccādi. **Yo** tathāgato sakalāpi disā **soṇṇarasehi** suvaṇṇarasadhārāhi **siñcatīva** siñcati maññe, **ivasaddo** vitakke. **Cāmīkaravaṇṇaṃ** suvaṇṇavaṇṇasadisachavivaṇṇaṃ **taṃ** tathāgataṃ sirasā name. Ettha “cāmīkaravaṇṇa”’nti yatiyā **cāmīti** akkharadvayamatikkamma ṭhitattā antepi **karaiti** akkharadvayenānūnattā padacchedassa pubbāparavaṇṇānamanekattamitiṭṭhodāharaṇaṃ. **Siñcatīti** pade **siñcāti** vaṇṇadvayamatikkamma yatiyā dissamānattepi **tiiti** parabhāge ekavaṇṇattā anekavaṇṇābhāvoti paccudāharaṇaṃ. Ettha anekavaṇṇattaṃ padavaseneva ñātabbaṃ. Cāmīkarassa vaṇṇo viya vaṇṇo yassa sotī viggaho.

50. **Saro sandhimhi pubbanto, viya lope vibhattiyā; Aññathā tva’ññathā tattha, yādesādi parādi’va.**

50. “**Saro**”ccādi. Vibhattiyā **lope** sati **sandhimhi** saṃhitāyaṃ katāyaṃ **saro** parapadādibhūto **pubbanto viya** pubbapadassa antabhūto yo saro, so viya hoti, anekavaṇṇattābhāvepi tato vihīyatīyā nevatthi bhaṅgoti adhippāyo. **Aññathā tu** vibhattiyā alope tu sati saṃhitāyaṃ katāyaṃ pubbapadantabhūto saro ce, **aññathā** aññena pakārena hoti, parapadassādisaro viya hotīti attho. Taṃ vibhattiyā saddhiṃ vihāya katayatiyā natthi bhaṅgoti adhippāyo. **Tattha** tassaṃ yatiyaṃ **yādesādi**

ivaññādīnaṃ kātabbo **yakārādesādi parādīva** parapadassa ādisaro viya hoti. Katayādesādisahitaṃ byañjanaṃ vihāya katāya yatiyā natthi bhaṅgoti adhippāyo.

50. Idāni heṭṭhā vuttassa viruddhattepi yatibhaṅgābhāvaṃ dassento āha “**saro**”ccādi. Vibhattiyā lope sandhimhi sati **saro** sandhisaro **pubbanto viya** pubbapadassa anto viya hoti, **aññathā tu** vibhattiyā alope saṃhitāyaṃ katāyaṃ aññathā hoti, pubbapadantabhūto saro parapadassa ādisaro viya hoti. **Tattha** yatiyaṃ **yādesādi** ivaññādīnaṃ kattabbayakārādesādi **parādīva** parapadassa ādisaro viya hoti, pubbantasadisasaramatikkamitvāpi parapadādisarasadisavañṇamāgamma taṃ anatikkamitvāpi parapadādisarasadisayādesādimatikkamitvāpi yatiyā payuttāya sati anekavañṇattābhāvepi yatibhaṅgo na hotīti adhippāyo. Pubbassa antoti ca, yo ca so ādeso ca, so ādi yassa makārādinoti ca, parassa ādīti ca vākyam.

**51. Cādi pubbapadantāva, niccaṃ pubbapadassitā;
Pādayo nicasambandhā, parādīva parena tu.**

51. Niccaṃ anavarataṃ pubbapadaṃ sitā nissitā **cādi cakārādayo** nipātā pubbassa padassa antā avayavā viya hontī, te anto katvā yati kātābbāti adhippāyo. **Parena** parapadena **niccasambandhā** satatayogino, **tusaddo aṭṭhānappayutto, pādayo tu parādīva** parapadassa ādī avayavā viya hontī, taṃ vihāya pubbapadante yati kātābbāti adhippāyo.

51. “Cādi”ccādi. **Niccaṃ** satataṃ **pubbapadassitā** pubbapadaṃ nissāya pavattā **cādi cakārādinipātā pubbapadantāva** pubbapadassa antā avayavā viya hontī, **parena** parapadena **niccasambandhā** nirantarayogino **pādayo tu pādiupasaggā** pana **parādīva** parapadassa ādī avayavāviya hontī. **Cādayo āgamma** te bahi katvāpi **pādayo āgamma** te anto katvāpi pavatto virāmo yatibhaṅgoti adhippāyo. Coādi yesanti ca, pubbapadaṃ sitāti ca, po ādi yesanti ca, niccaṃ sambandhāti ca viggaho. Ettha ca tagguṇasaṃviññānattā cakārapakārādīnampi pariggaho.

Sabbatthodāharaṇāni yathā

**52. Name taṃ sirasā sabbo-pamāṭitaṃ tathāgataṃ;
Yassa lokaggataṃ patta-sso’pamā na hi yujjati.**

**53. Munindaṃ taṃ sadā vandā-mya’nantamati’muttamam;
Yassa paññā ca mettā ca, nissimāti vijambhati.**

52-53. Sabbatthāti pubbantasadisādīsu. “**Nameta**”ntiādigāthādvaye padattho pākaṭo, adhippāyo tu yato lokaggataṃ patto, tato sabbopamāṭito, yato paññāmettā loke nirantaramiva vattanti, tato anantamati, uttamo cāti. Ettha “**sabbā upamā**”ti samāsaṃ katvā vibhattilope saṃhitāyañca katāyaṃ parapadādiukāro pubbapadantabbakāraṭṭhaakāro viya hotīti **sabbo** iccatra pādantayati. **Pattassopamā** iccatra yakārādesassa parādisadisabhāvo viya hoti, vibhattiyā alope saṃhitāyaṃ katāyaṃ **savibhattiyā akāro** parapadādi **ukāro** viya hotīti taṃvibhattiyā pasiddhaṃ vihāya **pattaiccatra** pādantayati. Tathā **vandāmyanantaiccatra yakārādesassa** parādisadisabhāvo vihītoti **myasaddaṃ** vajjetvā **vandāiccatra** pādantayati. Pubbapadassitānaṃ **cādīnaṃ** pubbapadantasadisatā vuttāti **mettā cāti** **casaddato** yati, aparapadasambandhā **pādayo** parapadādisadisā hontīti **nissimāti** ettha **nisaddaṃ** vihāya tato ādimhi yati.

52-53. Sabbattha yathāvuttapubbantasadisasarādīsu pañcasu udāharaṇāniyathā. “**Name ta**”miccādi, lokaggataṃ pattassa **yassa** buddhassa **upamā na hi yujjati** sakalapadatthānaṃ atikkamma ṭhitattā na hi yujjati. Sabbopamāṭitaṃ taṃ tathāgataṃ sirasā **name** namāmi. **Sabboti** ettha okārassa pubbapadantasarasadisattā tato parāya yatiyā ca **ssopamāti** parapadādisadisam vañṇamanatikkamma ṭhitāya yatiyā ca udāharaṇaṃ.

“**Muninde**”ccādi. **Yassa** sambuddhassa paññā ca mettā **canissimā**

anantasattaanantañeyyavisayakaraṇato sīmārahitā ativijambhati. **Anantamatim** udayabbayasambhavepi ñeyyassānantattā visayimhi visayavohārena anantapaññāya samannāgataṃ **uttamaṃ** tato eva pavaraṃ taṃ munindaṃ sadā vandāmi, **yā**desassa parādisadisattā tamanāgama yati bhavati. **Mettācanissimāti** ettha **cādīnaṃ** pubbapadantasadisattāca **pādīnaṃ** parapadādisadisattā ca “**cā**”ti “**nī**”ti imesampi yati bhavati.

Cādipādīsu paccudāharaṇāni yathā

**54. Mahāmettā mahāpaññā, ca yattha paramodayā;
Paṇamāmi jinaṃ taṃ pa-varaṃ varaguṇālayaṃ.**

54. “**Mahā**”iccādi. **Yatthā**ti yasmim jine. **Paramodayā**ti mahāmettādayo ukkaṭṭhābhivuddhiyo. Tato yeva varaguṇālayaṃ, teneva **pavaraṃ** uttamaṃ taṃ jinanti sambandho. Ettha pubbapadanissitaṃ cakāraṃ parapadādībhūtaṃ katvā tato pubbe katā yati ca, parapadādisambandhapakāraṃ pubbapadantabhūtaṃ katvā pakārato paraṃ katā yati ca viruddhāti ubhayattha paccudāharaṇaṃ.

54. Cādipādīsu visayabhūtesu paccudāharaṇaṃ yathā. “**Mahāmetti**”ccādi. **Yattha** yasmim jine mahāmettā ca mahāpaññā ca imā **paramodayā** ukkaṭṭhābhivuddhiyo honti. **Varaguṇālayaṃ** uttaguṇākaraṃ **pavaraṃ** tato yeva uttamaṃ taṃ jinaṃ paṇamāmi. Ettha cakāraṃ parapadādīṃ katvā pakāraṃ pubbapadantaṃ katvā yatiyā pavattattā “ca yattha, taṃ pā”tidvayamapi paccudāharaṇaṃ.

**55. Padatthakkamato muttaṃ, kamaccutamidaṃ yathā;
Khettaṃ vā dehi gāmaṃ vā, desaṃ vā mama sobhanaṃ.**

55. “**Pada**”iccādi. Padānaṃ atthakkamato **muttaṃ** gaḷitaṃ kamaccutamidanti vidhīyate. **Khettaṃ vā** iccādinā arucitoyaṃ yācanakkamo vattuno aviññutaṃ gameti. Yo hi khetampi dātumaṃ nicchati, kathaṃ so gāmādikamaṃ dassatīti.

55. “**Padatthi**”ccādi. **Padatthakkamato** padānaṃ atthakkamato **muttaṃ** gaḷitaṃ **idaṃ** vākyaṃ kamaccutaṃ nāma. Udāharati “**yathi**”ccādi. Mama sobhanaṃ khettaṃ vā gāmaṃ vā desaṃ vā janapadaṃ vā dehi. Ettha **khetta**miccādi yācanakkamo vattuno aviññubhāvaṃ vinā ucitapadatthakkamaṃ nappakāseti, tathā hi khettamapi dātumanicchanto gāmanigamajanapadādīṃ kathaṃ dassatīti kamahāni.

**56. Lokiyattha’matikkantaṃ, ativuttaṃ mataṃ yathā;
Atisambādha’mākāsa-metissā thanajambhane [thanajumbhane (sī.).]**

56. “**Loki**”ccādi. Loke vidito lokiyo, taṃ **lokiyattha**mabhidheyyaṃ **atikkantaṃ** ananuvuttaṃ yaṃ taṃ ativuttaṃ matanti vidhīyate. **Yathetyā**dīnā udāharati. **Etissā** vanitāya **thanānaṃ** payodharānaṃ **jambhane** byāpane **ākāsaṃ** gaganamaṃ **atisambādhaṃ** accantappakaṃ.

56. “**Lokiyatthi**”ccādi. **Lokiyatthaṃ** loke pasiddhamabhidheyyaṃ **atikkantaṃ** kathanākārena atikkamitaṃ vākyaṃ ativuttamiti mataṃ. Udāharati “**yathi**”ccādi. **Etissā thanajambhane** thanānaṃ vijambhane ākāsaṃ **atisambādhaṃ** anokāsaṃ. Ettha payodharānaṃ mahantattaṃ vadāmāti loke mahantanti pasiddhaṃ gaganamapi atikkantattā vākyaativuttadosena dūsitamaṃ.

**57. Samudāyatthato’petamaṃ, taṃ apetatthakaṃ yathā;
Gāviputto balībaddho, tiṇaṃ khādī pivī jalaṃ.**

57. “**Samudāyi**”ccādi. **Samudāyassa** pakaraṇato padasandhino vākyaassa **attho** abhidheyyaṃ aṅgaṅgibhūtaṃ kriyākārasambandhīvisesalakkaṇaṃ saṃvohārikaṃ, tato **apetaṃ** apagataṃ

suññaṃ, vinā [na (ka.)] padatthamattena tassa katthaci byabhicārābhāvato etādisaṃ yaṃ tamapetattakanti vidhi. Na hi “gāviputto” ccādīsu samudāyattho sambhavati.

57. “**Samudāyi**” ccādi. **Samudāyatthato** visesanavisesyabhūtakriyākāraśambandhehi yuttavākyasaṅkhātāpadasamudāyassa sambandhapadattā vohārānurūpaatthato **apetaṃ** apagataṃ, avayavatthamattassa vā sabbattha labbhamānattā samudāyatthato suññaṃ, **taṃ** vākyam **apetatthakaṃ** nāma. **Yathiccādinā** udāharati “gāviputto balībaddho usabho tiṇaṃ khādi, jalaṃ pīvi” ti. Ettha avayavatthamattena vinā samudāyena gamyamānassa kassaci visesatthassa abhāvā samudāyatthato apagataṃ nāma hoti.

58. **Bandhe pharusatā yattha, taṃ bandhapharusam yathā;**
Kharā khilā parikkhīṇā, khetto khittam phalati’lam.

58. “**Bandhe**” ccādi. **Kharā**iccādikam bandhapharusam sutisubhagattābhāvato **kharā** kakkasā **khilā** khāṇukādayo **parikkhīṇā** khayam pattā yato, tasmā **khetto** kedāre **khittam** vuttam **alamaccantaṃ phalati** nipphajjati. vākyadoso.

58. “**Bandhe**” ccādi. **Bandhe** bandhasarīre **pharusatā** sutisukhatābhāvato pharusabhāvo **yattha** vākye bhavati, **taṃ** vākyam **bandhapharusam** nāma hoti. **Yathā**ti udāharati. **Kharā** kakkasā **khilā** khāṇukādayo **parikkhīṇā** yasmā khīṇā honti, tasmā khetto **khittam** vuttam bījam **alam** atisayena **phalati** nipphajjati.

Vākyadosaniddesavaṇṇanā niṭṭhitā.

Vākyatthadosaniddesavaṇṇanā

59. **Ñeyyam lakkhaṇamanvattha-vasenā’pakkamādīnaṃ;**
Udāharaṇametesaṃ, dāni sandassayāmya’ham.

59. “**Ñeyya**” miccādi. Apakkamādīnaṃ yathāuddiṭṭhānaṃ lakkhīyati udāharaṇamanenāti atthena **lakkhaṇam anvatthavasena** apagato kamo yattha taṃ apakkamantiādīnā atthānugamanavasena **ñeyyam** viññātabbaṃ. **Idāni** vākyadose niddisitvā avasarappatte imasmiṃ kāle **etesam** apakkamādīnaṃ **udāharaṇam** lakkhiyaṃ ahaṃ **sandassayāmi** pakāsessāmi.

59. Idāni uddiṭṭhānukkamena apakkamādiatthadosāni vibhāveti “**ñeyya**” miccādinā. **Apakkamādīnaṃ** apakkamocityahīnādīnaṃ **lakkhaṇam** apakkamādivisayabuddhiyā aviparītavuttīyā pavattikāraṇam **anvatthavasena** apagato kamo yatthiccādivacanatthānugatañāṇavasena **ñeyyam** ñātabbaṃ, viṣuṃ lakkhaṇam na vadāmāti vuttam hoti. Idāni ahaṃ **etesam** apakkamādīnaṃ **udāharaṇam** lakkhiyaṃ sandassayāmi. Atthānugatamanvattham anvatthassa ñāṇassa vasoti viggaho.

Tatthāpakkamaṃ yathā

60. **Bhāvanādānasīlāni, sammā sampādītāni’ha;**
Bhogasaggādīnibbāna-sādhanāni na saṃsayo.

60. “**Bhāvanā**” iccādi. **Sammā** alobhādīhetusampattiyā sakkaccaṃ **sampādītāni** nipphādītāni. Ettha bhogasaggādīnibbānaṃ hetavo yathākkamaṃ dānasīlabhāvanāyo, na tu bhāvanādānasīlāni.

60. **Tattha** tesu apakkamādīsu **apakkamaṃ yathā** apakkamassodāharaṇamevaṃ. **Ocityahīnaṃ yathā**tyādīsipi evamattho veditabbo. “**Bhāvani**” ccādi. **Iha** imasmiṃ attabhāve **sammā sampādītāni** alobhādīhetusampattiyā sakkaccaṃ sampādītāni rāsikatāni bhāvanādānasīlāni **bhogasaggādīnibbānasādhanāni** upabhogaparibhogāni, sagguppattiyāyūārogyādīni, nibbānañceti etesaṃ sādhakāni. **Na saṃsayo** sadisavisadisavipākadāne saṃsayo nāma natthi. Ettha

bhogasagganibbānānaṃ hetubhūtā pana kamato dānasīlabhāvanāyo bhavantīti phalakkamassa hetukkamaṃ viruddhamiti kamāpetam nāma hoti.

Ocityahīnaṃ yathā

**61. Pūjanīyataro loke, aha'meko nirantaram;
Mayekasmiṃ guṇā sabbe, yato samuditā ahuṃ.**

61. “Pūjanīyi”ccādi. Yato yasmā kāraṇā sabbe guṇā sīlādayo ekasmiṃ kevale mayi eva samuditā rāsibhūtā ahuṃ ahesuṃ, tasmā kāraṇā imasmiṃ sattaloke eko kevalo ahameva nirantaram satataṃ pūjanīyataro atisayena pujjoti. Evamattapasamsanamarucitaṃ sappurisassa.

61. “Pūjanīyatare”ccādi. Yato yasmā sabbe guṇā sīlādayo ekasmiṃ mayi adutiye mayi eva samuditā rāsibhūtā ahuṃ ahesuṃ, tasmā loke sattaloke eko adutiyo ahameva nirantaram satataṃ pūjanīyataro atisayena pūjanīyo. Evaṃ attappasamsanato ucitatāya parihānīti ocityahīnaṃ nāma.

Yathā ca

**62. Yācitoḥaṃ kathaṃ nāma, na dajjāmyapi jīvitam;
Tathāpi puttadānena, vedhate hadayaṃ mama.**

62. “Yācito”iccādi. Ettha “yadi yāciṃsu, jīvitampi yācakānaṃ dajjāmī”ti dassitodāratāyānucitaṃ puttadāne hadayapavedhanakathanaṃ vessantarassa yajjevamavoca.

62. Yathā ca, evampi ocityahīnassa udāharaṇaṃ daṭṭhabbaṃ “yācito”ccādi. Yācito yācakehi yācito ahaṃ jīvitamapi kathaṃ nāma na dajjāmi, tathāpi evaṃ dānājjhāsaye satipi puttadānena mama hadayaṃ vedhate kampate. Ettha vessantarassa “yadi yāceyyuṃ, jīvitamapi yācakānaṃ dajjāmī”ti katapaṭiññāya puttadānena hadayakampanassa kathanam cāgātisayayogasaṅkhātaudāraguṇassa ananucchavikanti ocityahīnaṃ.

Bhaggarīti yathā

**63. Itthīnaṃ dujjanānañca, vissāso nopapajjate;
Vise siṅgimhi nadiyaṃ, roge rājakulamhī ca.**

63. “Itthīna”miccādi. Nopapajjate na yujjati. Ettha sambandhe chaṭṭhiyā pariccāgena viseiccādinā ādhāre sattamīniddeso attharītiyā bhaṅgo. Ādo majjhe ca cakārapariccāgā saddarītiyā bhaṅgo, rītīnaṃ anantattā bhaṅgāpyanantā. Udāharaṇaṃ tu disāmatam.

63. “Itthīna”miccādi. Itthīnañca dujjanānañca vissāso saḥavāsādīhi vissāso nopapajjate anattasamsayānivattikāraṇattā na yujjati. Vise garaḷe ca siṅgimhi siṅgavati mahiṃ sādo ca nadiyañca roge vaḍḍhamānake roge ca rājakulamhi ca vadhabandhanādikārike rājakule ca vissāso nopapajjate. Ettha ādo sambandhe chaṭṭhiyā ārabhitvā tam pahāya sattamiyā vuttattā attharīti ca, ādimajjesu casaddapariccāgato saddarīti ca bhinnā. Casaddam payuñjantena ādo eva vā ante eva vā paccekam vā yojetabbaṃ hoti. Īdiso payogo rītibhaṅgo nāma hoti. Rītīnaṃ bahuttā rītibhaṅgadosāpi bahuvadhā. Idaṃ pana mukhamattanidassanaṃ.

Sasamsayaṃ yathā

**64. Munindacandimāloka-rasalolavilocano;
Jano'vakkantapantho'va, gopadassanapīṇito.**

64. “Munindi”ccādi. Candimā viya candimā, munindoyeva candimā, tassa ālokanam dassanaṃ, āloko pakāso vā, tasmim raso anurāgo, tena lolāni capalāni locanāni akkhīni yassa so

jano **avakkanto** okkanto pavittho **pantho** maggo yena avakkantapantho eva **gunnaṃ** ramsīnaṃ, iṭṭhatthanipphattisūcakabhāvena **gopadatthassa** vā padassanena **pīṇito** muditoti ettha gorūpassa padassanenātipi viññāyatīti sandeho.

64. “Munindi”ccādi. **Munindacandimālokarasalolavilocano** munindasaṅkhātassa candimassa āloke dassane pātubhāve vā rasena ālayena cañcalanetto jano **avakkantapantho**va otiṇṇamaggo buddhassa dassanattāya maggamotiṇṇoti adhippāyo. **Gopadassanapīṇito** gosāṅkhātaramsipadassanena, abhimaṅgalasammatagopadassanena vā santuṭṭho hoti. Ettha gopadassanenāti ca atthassa gamyamanattā viññātuṃ saṃsayo uppajjatīti **sasamsayaṃ** nāma. Avakkanto pantho yenāti ca, gunnaṃ ramsīnaṃ, gāvassa vā padassananti ca, gopadassanena pīṇitoti ca viggaho.

**65. Vākyatthato duppatīti-karaṃ gāmmaṃ mataṃ yathā;
Poso vīriyavāso’yaṃ, paraṃ hantvāna vissami.**

65. “Vākya”iccādi. **Paraṃ** sattum **hantvāna** paharitvā **vīriyavā** sūro **soyaṃ** **poso** puriso **vissami** vissattho. Ayamatto tāva na duppatīto. **Paraṃ** accantaṃ hantvāna **vīriyavā** ucitasambhavo soyaṃ **poso** vissamīti duppatītoyamattho.

65. Anvatthavasena lakkhaṇassa apākaṭattā salakkhaṇaṃ lakkhiyamudāharati **“vākyatthato”**ccādinā. Vākyatthato duppatītikaraṃ viruddhappakāsakaṃ gāmmanti mataṃ. **Yathā**ti udāharati. **Paraṃ** sattum **hantvāna** māretvāna **vīriyavā** sūro so ayaṃ **poso** **vissami** vigataparissamo ahosi, ayamatto iṭṭho. **Paraṃ** atisayena **hantvāna** vītikkamaṃ katvā **vīriyavā** upacitasambhavo upacitasukko so ayaṃ puriso vāyāmena **vissami** vigatavāyāmo ahosīti. Imassatthassa asabbhārahattā gāmmattaṃ. Vīriyaṃ ussāho sambhavo vā assa atthīti viggaho.

**66. Duṭṭhālaṅkaraṇaṃ tetam, yatthālaṅkāradūsaṇaṃ;
Tassālaṅkāraniddese, rūpamāvībhavissati.**

66. “Duṭṭhā”iccādi. **Yattha** yasmim vākye alaṅkāraṇaṃ **dūsaṇaṃ** vikaṭatā, etantu **duṭṭhālaṅkaraṇaṃ** duṭṭhālaṅkaraṇaṃ nāma, **tassa** duṭṭhālaṅkāraṇassa **rūpaṃ** sarūpaṃ **alaṅkāraniddese** taṃnāmake paricchede **āvībhavissati** pakāsissati, tattheva taṃ dassayissamīti adhippāyo.

66. “Duṭṭhālaṅkari”ccādi. **Yattha** vākye **alaṅkāradūsaṇaṃ** alaṅkāraṇaṃ virodho hoti, **etaṃ** vākyatthanissitaṃ **etaṃ** vākyam **duṭṭhālaṅkaraṇaṃ** duṭṭhālaṅkāro nāma, **tassa** duṭṭhālaṅkaraṇadosopalakkhitavākyassa **rūpaṃ** sarūpaṃ lakkhiyam **alaṅkāraniddese** alaṅkāraṇaṃ nidassanattānabhūte paricchede **āvībhavissati**. Ettha vuttepī puna tathāpi vattabbaṃ siyāti na vuttanti adhippāyo. Uddese “duṭṭhālaṅkari”ti vatvā idāni “duṭṭhālaṅkaraṇa”nti vacanaṃ **alaṅkati alaṅkaraṇaalaṅkārasaddānaṃ** tulyatthattā na virujjhati.

**67. Kato’tra saṅkhepanayā mayā’yaṃ,
Dosānamesam pavaro vibhāgo;
Eso’va’laṃ bodhayitum kavīnaṃ,
Tamatti ce khedakaraṃ parampi.**

Iti saṅgharakkhitamahāsānipādaviracite subodhālaṅkāre

Dosāvabodho nāma

Paṭhamo paricchedo.

67. Evaṃ “sodāharaṇametesam, lakkhaṇaṃ kathayāmyaha”nti katapaṭiññānurūpaṃ paṭipajja dāni **“katotri”**ccādinā nikkhipanayaṃ saṅkhipati. **Atra** imasmim adhikāre, paricchede vā **esam**

yathāvuttānaṃ **dosānaṃ** padadosādīnaṃ **pavaro** uttamo **vibhāgo** vibhajānaṃ **saṅkhepanayā** saṅkhepakkamena, na vitthārato, yato aparisaṅkhyeyyānaṃ natthi pariyanto mayā **kato** niṭṭhāpito. Nanu “saṅkhepanayā”ti vuttattā purātanehi [**purātarehi (ka.)**] dīpitā santi bahū dosā, te pariccattā siyunti? Ettha vuccate, vitthārakkamassa anadhippetattā “saṅkhepanayā”ti vuttaṃ, na pana sabbathā pariccāgena. Tathā hi–

“Nihantu soyaṃ jalitaṃ, pataṅgo aripāvaka”ntiādīnaṃ

Akkhamatthantarādikaṃ viruddhatthantarānugatanti ca. Ettha hi **pataṅgasaddena** jotirīṅgaṇasaṅkhātamatthantaramasamatthamicchitathe “vacanti gaṇḍā”tyevamādikaṃ amaṅgalaapayuttapadādikaṃ kiliṭṭhe antogadhanti ca.

Gajahesādi sambandhadūsitaṃ lokavirodhi, sogatāgamādīsu pasiddhaṃ rūpakkhandhādikamaññatra vuttaṃ appatītaṃ nāma. Idaṃ āgamavirodhiiti, sambandhadūsitappatītādikaṃ virodhimhi pavitṭhanti ca, ānetabbahetuttā hetvapekkhaṃ neyyato na byatiriccatīti ca.

“Devo voharatu klesāṃ, rāhukhinno divākaro”

Iccādikaṃ asāmatthyābhidheyādikaṃ ocityahīne saṅgahitanti ca. Jigucchāsabbhasamsūcakaatthantarakaṅca gāmmaṃ duppatītikare saṅgayhatīti ca. () [**(duruccāraṇaṃ)?**] Sabandhapharusameveti ca.

Ettha pana ocityahīnaduppatītikarānaṃ vākyatthadosattepi phandhapharusassa ca vākyadosatte padapadatthānaṃ dosato vākyameva duṭṭhaṃ siyā, vākyāṅca padehi viriccate, pade duṭṭhe vākyattho ca duṭṭho siyā. Padadosato vākyavākyatthānaṃ nānābhāvābhāvāñāpanatthaṃ asāmatthyābhidheyādikaṃ padaṃ ocityahīnādivākyatthadosādīsu anto kathitaṃ. Tathā hi purātanehi viruddhatthantarādīhi padehi viracitaṃ vākyāṃ viruddhantiādīnā bahūni duṭṭhāni vākyāni dassitāni. “Harisamānayī”ti ettha **hapubbaṃ** risa’ mānayīti icchitattā pari bhaṭṭhaṃ **bhaṭṭhaṃ**. Nānatthamappasiddhehi yuttaṃ **gulhaṃ**, yathā “sakko sahasagū”ti. Iti bhaṭṭhaguḷhatthādayo pasādālaṅkāraviruddhāti ca.

Vākyepi **visandhikamihānupayogīti** ca, vākyantaropagataṃ vākyāṃ **vākyagabbhaṃ**, vākyantarapadasammissaṃ “apāthyameso dissati, vejjāṃ khādatyanārata”miccādikaṃ **vākyasaṃkiṇṇāṅca** byākiṇṇe samohitanti ca.

“Kācuyyāne mayā diṭṭhā, vallarī pañcapallavā;
Pallave pallave mudhā, yassā kusumamañcarī”ti.

Idamavācakaṃ paheḷikāya pamussitāsannissitanti ca, tattha ca kavinā **uyyānasaddena** gehaṃ, latāvācinā **vallarīsaddena** aṅganā, **pallavasaddena** karacaraṇadasanacchadā, **mañcarīsaddena** nakhasobhā dantakantiyo ca vattumicchitā, vākyatthepe paduminīnaṃ rattiyaṃunniddatādikaṃ **viruddhaṃ** virodhinilīnanti ca nātyanuññātā, na tu sabbathā pariccāgena. **Esova** evaṃ yathāvuttanayena niṭṭhāpito ayaṃ saṅkhepanayo eva **kavīnaṃ** paṇḍitajanānaṃ **khedakaraṃ** “kathaṃ nāma bandhepīdisaṃ sati santi”ti evamāsuhānopajanaṃ paraṃ padadose asādhusandiddhapariyāya ñeyyaappatītatthaappayojaka dubbodhadesiyādikaṃ, vākyadose adhikaūnabhaggacchandādikaṃ, vākyatthadose upakkamopasaṃhāravisaṃceti iccevamādikamaparampi dūsaṇaṃ **atthi ce** yadi bhavēya, **tampi bodhayitumavagametuṃ alaṃ** samatthaṃ yathāvuttadosānusārena buddhimantehi sakkā ūhitunti.

Evam vadato ca ganthakārassāyamadhīpāyo – ye dosā vibhāgaso na vuttā, te mayā ganthagāravabhayā saṅkhepitā, lakkhaṇato tu saṅgahitā. Na hi tesamantaṃ ko jahāpeti.

Tattha saddasatthaviruddhamasādhū. Yaṃ kriyādinimittamupādāya atthantarepi vattate, taṃ

saññābhāveneva payuttaṃ sandiddhaṃ, yathā “ravimhihimahā”ti, idaṃ pana visesanatthe sādhu hoti. Pasiddhasaññāsaddassa pariyāyantarena parikkappitapadaṃ **pariyāyañeyyaṃ**, yathā “vaḷavāmukhene”ti ettha “assavanitānana” iti. Yaṃ accantābyabhicārībhāvena visesyassa guṇaṃ vadati, taṃ appatītatthaṃ, yathā “kaṇhamasī”ti. Adhigatatthānupayogaṃ **appayojakaṃ**, yathā “atiphenilaṃ sāgaramalaṅghī”ti. “Manuññaddhanayo pāde, khādayo kani bhanti te” iccādiko **dubbodho**, kani kaññe khādayo gaggharikā. “Ime lāvaṇyatallā te, gallā lolavilocane”iccādiko **desiyo**, tallo jalāsavayiseso, gallo kapolo. “Saggasevīnaṃ ripūnamitthīnamakaṅkaṇo pāṇi. Nettamanañjana”ntiādikaṃ **adhikaṃ**. “Akaṅkaṇo pāṇi”tiādinaṃ vedhabyassa gammamānattā “saggasevīna”nti adhikanti. Yattha vattabbassa ūnatā, taṃ **ūnaṃ**, yathā “tilokatilakaṃ muni”ntiādi. Ettha “vandāmī”ti ūnaṃ, chandobhaṅgānviṭaṃ vaco **bhaggacchandaṃ** pākaṭaṃ. Ārambhāvasānena visamaṃ **upakkamopasaṃhāravisamaṃ**, taṃ pana āradhakkamapariccāgenāparena nikkhipanaṃ veditabbam.

Iti subodhālaṅkāre mahāsāmināmikāṭikāyaṃ

Dosāvabodhaparicchedo.

67. Evaṃ “sodāharaṇametesam, lakkhaṇaṃ kathayāmyaha”nti katapaṭiññānurūpaṃ sampādetvā idāni “**katotre**”ccādinā nigamento dose saṅkhipati. **Atra** imasmiṃ adhikāre, paricchede vā **esaṃ dosānaṃ** yathāvuttapadadosādīnaṃ **pavaro** lakkhaṇāvirodhalakkhiyato uttamo **vibhāgo** asaṅkarato vibhajaṇaṃ **saṅkhepanayā** vitthārāpaniyasaṅkhepakkena mayā **kato** vutto **esova** yathāvutto eso saṅkhepakkaṃ eva **kavīnaṃ** viracayantānaṃ **khedakaraṃ** bandhasarīre **īdisaṃ** īdisappayogaṃ kathaṃ nāma karomīti evaṃ pavattakhedamuppādayantaṃ **parampi** asādhusandiddhādi aññaṃpi dūsanamatthi ce, **taṃ** sabbaṃ **bodhayitum** bodhetum **alam** samattho hoti. Niyati avuttopi attho etenāti ca, saṅkhepo ca so nayo cāti viggaho.

Ihānididdiṭṭhaṃ

“Nihantu soyaṃ jalitaṃ, pataṅgo aripāvaka”ntiādikaṃ

Akkhamatthantarādikaṃ viruddhatthantare anupatattā na vuttaṃ, ettha sūriyavācako **pataṅgasaddo** jotirīṅgaṇavācakopi hotīti vattumicchitaamittaggināse asamatthaññattho hoti.

“Vacanti gaṇḍi”ccādikaṃ āgame appasiddhaṃ lakkhaṇamattena sādhiyaṃ. **Appayuttapadādi** doso kilīṭṭhapadadose antogadho hotīti na vutto.

Gajahesāturaṅgakoñcanādādisambandhadūsitaṅca. Jināgamādīsu pasiddharūpakkhādhādikamaññatra payuttamappatītanāmātīdaṃ dvayaṃ yathākkamaṃ lokavirodhamāgamavirodhaṅca hotīti virodhipade antogadhaṃ hoti. **Hetvapekkhaṃ** ānetabbahetuttā neyye antogadhanti na vuttaṃ.

“Devo voharatu klesaṃ, rāhukhinno divākaro”

Iccādikaṃ **asamatthābhīdhāyiccādi** ocityahīne antogadhanti na vuttaṃ. Ettha divākaro sayam rāhugahito aññesaṃ kilesāpanayane asamattho tasmaṃsamatthiyaṃ visesanabhūtena “rāhukhinno”ti padena ñāyati.

Jigucchāvamaṅgalaasabbhānaṃ tiṇṇamaññatrassa jotakaṃ vācakaṃ vā atthantaraṃ vā gāmmaṃ duppatītikarattā vākyatthagāmmadoseyeva antogadhanti na vuttaṃ.

Duruccāraṇabhūtalakkhaṇaṃ kaṭṭhaṃ bandhapharusato abyatirittanti na vuttanti.

“Harisamānāyī”ti vattabbe hapubbaṃ risaṃ mānāyiccādikaṃ icchitathato paribhaṭṭhattā **bhaṭṭhaṅca** “sakko sahasagū”iccādikaṃ apasiddhavisaye pariyuttagūḷhañceti ime atthagūḷhādayo pasādālaṅkāraviruddhattā pasādaguṇādānena pariccattāti na vuttaṃ. Ettha hi sahasaṃ gāvo cakkhūni assāti sahasagūti sakkassa nāmaṃ guḷhaṃ nāma hoti.

Vākyadosepi **visandhivākyam** idha anupayogittā na vuttam. Vākyamajjhapatitavākyayuttam vākyagabbhañca, vākyantarapadasammissam.

“Apāthyameso dissati, vejjam khādatyanāratam”

Iccādikaṃ **vākyasaṃkiṇṇa**ñca byākiṇṇe antogadhanti na vuttam. Ettha **eso** bhisakko **anāratam** niccam **apāthyam** rogassa ahitam **dissati** vadati. **Eso** rogī **anāratam** satatam **apāthyam** ahitam khādati. **Vejjam** bhisakkaṃ **dissati** kujjhati. Evaṃ anekavākyehipi sandhivākyam saṃkiṇṇam nāma.

“Kācuyyāne mayā diṭṭhā, vallaṛī pañcapallavā;
Pallave pallave mudhā, yassā kusumamañcarī”ti.

Idamavācakaṃ pāheḷikāsu pamussitāsannissitamiti na vuttam. Nanu cettha attanā pāheḷikāya adassitattā avācakassa pamussitāya antogadhakaraṇam asiddhena asiddhasādhananti? Nayidamevaṃ, “upekkhiyanti sabbāni, sissakhedabhayā mayā”ti ca upari kiliṭṭhapadosaparihāre “pāheḷikāyamāruḷhā, na hi duṭṭhā kiliṭṭhatā”ti ceti iminā purātanehi niddiṭṭhasoḷasapāheḷikāyopi dassitāti siddhena asiddhasādhanam hoti. Tattha kavinā **uyyānasaddena** gehaṇca latāpariyāyavallaṛīsaddena aṅganā **ca pallavasaddena** karacaraṇādharā **ca mañcarīsaddena** nakhadantakantiyo **ca** vattumicchitā.

Vākyatthadosepi paduminīnaṃ rattiyam pabujjhanādikaṃ **viruddham** virodhipadeyeva antogadhattā na vuttanti dassetuṃ “**katotra saṅkhepanayā**”ti vuttam, na pana tesam sabbathā pariccattattāti. Ettha ocityahīnaduppatītikarānaṃ dvinnam vākyatthadosatte sati bandhapharusassa vākyadosatte sati virodhino padadosatte **sati** “asamatthābhidhāyi”ādipadam, “jigucchādittayapakāsakā”dipadam, kaṭṭhapadam, paduminīnaṃ rattiyam phullatādi [dunniddatādi (ka.)] vākyatthañceti ime cattāro dosā bhinnajātikesu ocityādīsu katham saṅgahitāti? Saccam, tathāpi padānaṃ duṭṭhatte sati vākyavākyatthānamaduṭṭhatā nāma natthīti padadosena sandhivākyavākyatthadosānamanaññattam sissānaṃ ñāpanattham padadosādikaṃ vākyatthadosādīsu saṅgahitanti veditabbam. Imināyeva purātanehi viruddhatthantarādipadehi vicaritam vākyam viruddhantiadinā duṭṭhāni bahūni vākyāni dassitānti daṭṭhabbam.

Imāyeva [imissāyeva (ka.)] gāthāya “tamatthi ce khedakaram parampī”ti ettha **parasaddenaasādhusandiddhapariyāyañeyyāppatītatthaappayojaka-** dubbodhadesiyādipadadose ca adhikaūnabhaggacchandādivākyadose ca upakkamopasamhāravisamasānkhāte vākyatthadose ca pariggaṇhāti. Ettha saddasatthaviruddhamasādhu nāma. Kriyānipphattikāraṇamupādāya atthantare pavattanāmaṃ visesanatthena vinā saññābhājane payuttam **sandiddham** nāma, yathā “ravimhi himahā”ti. Ettha himahā ravīti visesane kate doso natthi. Pasiddhasaññāsaddassa pariyāyanāmena kappitapadam **pariyāyañeyyam** nāma, yathā “vaḷavāmukhassa assavanitānana”nti. Atisayā vinā bhāvitatthena visesyassa guṇavācakaṃ padam **appatītattham** nāma, yathā “kaṇhamasī”ti. Adhigatattānupayogipadam **appayojakam** nāma, yathā “atiphenilaṃ sāgaramalaṅghī”ti. Appasiddhavacanaṃ **dubbodham** nāma, yathā–

“Manuññaddhanayo pāde, khādayo kani bhanti te”ti.

Kani he kaññe **te** tavapāde **manuññaddhanayo** manoharasaddasamannāgatā **khādayo** gaggharikā **bhanti** dibbantīti. Kismiñci deseyeva siddhanāmaṃ **desiyam** nāma. Yathā–

“Ime lāvaṇyatallā te, gallā lolavilocane”ti.

He lolavilocane **te** tava ime **gallā** kapolā **lāvaṇyatallā** manuññatallā jalāsavayavisesā bhavanti. Kenaci lesena pakāsītamattamupādāya payuttam **madhikam** nāma. Yathā–

“Tvayi rājati rājinda, ripūnaṃ saggasevinaṃ;
Thīnaṃ akaṅkaṇo pāṇi, siyā nettamañjana”nti.

Ettha “akaṅkaṇo pāṇi, nettamaṇaṅjana”nti imināyevathīnaṃ vidhavattaṃ gamyamānaṃ hotīti tappakāsanatthaṃ payuttaṃ “saggasevina”nti idaṃ adhikaṃ nāma. Vattabbayuttato ūnaṃ vākyam **ūnaṃ** nāma. “Tilokatilakaṃ muni”nti ettha “vandāmī”ti vattabbassa avuttattā ūnaṃ. Chandohānisamyuttaṃ **bhaggacchandaṃ** nāma. Idaṃ tesam tesam chandānaṃ akkharagaṇanaṭo ūnādhikavasena pākaṭaṃ hoti. Ādyantato visamaṃ **upakkamopasamhāraṇisaṃ** nāma. Idaṃ āradhakkamaṃ pariccajitvā kamantarena niyamanti veditabbaṃ.

Iti subodhālāṅkāraṇissaye

Paṭhamaṃ paricchedo.

2. Dosaparihārāvabodhaparicchedavaṇṇanā

68. **Kadāci kavikosallā, virodho sakalopya’yaṃ;
Dosasaṅkhyamatikkamma, guṇavīthiṃ vigāhate.**

69. **Tena vuttavirodhāna-mavirodho yathā siyā;
Tathā dosaparihārā-vabodho dāni nīyate.**

68-69. Icevaṃ dosavibhāgaṃ paricchijja idāni yathāvuttadosaparihārakkamamupadisitumāha “**kadāci**”tyādi. Sakalopi ayaṃ **virodho** viruddhatthantarādikato na koci eko eva dosesu, dosānaṃ vā **saṅkhyam** gaṇanaṃ dosabhāvaṃ **atikkamma** paricchijja **guṇānaṃ vīthiṃ** padaviṃ guṇasabhāvataṃ **vigāhate** abbhupagacchati **kadāci**, na sabbadā. Kavino payujjakassa kosallā tādīsavisayapariggahalakkhaṇaneṭupaññakāraṇā, na tu yathā tathā ceti. “**Tene**”ccādi. Yenevaṃ, **tena** kāraṇena vuttānaṃ viruddhatthantarādīnaṃ virodhānaṃ **yathā** yena pakārena **avirodho** niddosatā **siyā** bhaveyya, **tathā** tena pakārena dosānaṃ **parihāro** dūrīkaraṇaṃ avabujjhati ñāyati etenāti avabodho, tassa avabodho, tannāmiko paricchedo idāni **nīyate** ānīyate vuccateti attho.

68-69. Evaṃ dosavibhāgaṃ paricchinditvā idāni yathāvuttadosānaṃ parihāratthamārabhanto “**kadāci**”tyādimāha. Sakalopi ayaṃ **virodho** padadosādiko **dosasaṅkhyam** dosānaṃ, dosesu vā gaṇanaṃ dosabhāvaṃ atikkamma kadāci **kavikosallā** kavino byākaraṇābhīdhānachandoalāṅkātiādīsū paricayalakkhaṇena paññāpāṭavena yato **guṇavīthiṃ** guṇapadaviṃ kevalaṃ guṇasabhāvaṃ **vigāhate** abbhupagacchati, **tena** kāraṇena **vuttavirodhānaṃ** yathāvuttapadadosādivirodhānaṃ **avirodho** aviruddhatā **yathā siyā** yena pakārena bhaveyya, **tathā** tena pakārena **dosaparihārāvabodho** yathāvuttapadadosādisambandhino pariharaṇakkamassa avabodhakāraṇatā tannāmikaparicchedo **idāni** laddhāvasare **nīyate** vuccate. Yathāvuttadosā kavīsāmatthiyena niddosattaṃ bhajanti, tassa sāmattiyaṃ upadesaṃ dassāmāti adhippāyo.

Padadosaparihāravaṇṇanā

Tattha viruddhatthantarassa parihāro yathā –

70. **Vindantaṃ pākasālīnaṃ, sālīnaṃ dassanā sukhaṃ;
Taṃ kathaṃ nāma megho’yaṃ, visado sukhaye jaṇaṃ.**

70. “**Vindanta**”miccādi. **Pākena** pariṇatabhāvena **sālīnaṃ** yuttānaṃ, manuññānaṃ vā **sālīnaṃ** rattasālīdīnaṃ sālījātīnaṃ dassanā **sukhaṃ** cetasiṅkaṃ somanassaṃ vindantaṃ taṃ jaṇaṃ **visado** ayaṃ megho ambudo kathaṃ nāma sukhayeti. Ettha tādīsassa jaṇassa asukhappadānaṃ garaḷassa meghassānurūpanti viruddhatthantarātā parihaṭā.

70. Tattha viruddhatthantarassa parihāro yathā evaṃ. “**Vindanti**”ccādi. **Pākasālīnaṃ** pariṇāmena yuttānaṃ, manuññānaṃ vā **sālīnaṃ** rattasālīdīnaṃ **dassanā** dassanahetu **sukhaṃ** cetasiṅkasomanassaṃ **vindantaṃ** anubhontaṃ **taṃ jaṇaṃ** taṃ kassakajanaṃ **visado** jaladāyako ayaṃ megho kathaṃ nāma sukhaye, na sukhayateva. Tādīsassa jaṇassa dukkhadānaṃ

garaḷadāyakassa meghassāpi anurūpamiti viruddhaññattho apanīto hoti. Pākena sālinoti viggaho. Sukhaṃ karotīti sukhayeti nāmadhātu.

Yathā vā –

71. **Vināyakopi nāgosi,
Gotamopi mahāmati;
Paṇītopi rasāpeto,
Cittā me sāmi te gati.**

71. “**Vināyakopi**”ccādi. **Vīnaṃ** pakkhīnaṃ nāyako, garuḷo, satte vinetīti **vināyako**, vuddho, bhagavā ca. Tattha yadā vināyako garuḷo, tadā tu nāgo pannagosīti viruddhaṃ, pakkhantare tvaviruddhaṃ bhagavato āgussa rāgādino abhāvato. Imesaṃ gunnaṃ atisayena go **gotamo** hīnapasu, gotamavaṃsāvatiṇṇattā **gotamo** bhagavā ca. Hīnapasu ca tvaṃ mahāmati asīti viruddhaṃ accantahīnapasuno mahatiyā paññāya abhāvato. Pakkhantare tu na byāghāto. Paṇīto madhuro raso, uttamo ca sugato. Tattha madhurarasato apeto apagatosīti virujjhati, bhagavato tu rasehi siṅgārādīhi apetoti yujjati. **Me** mama. **Sāmīti** āmantanaṃ. **Te** tava **gati** pavatti **cittā** abbhutaṃ. Ettha viruddhatthantaraṃ virodhālaṅkāraṃ silāghanīyanti tena taṃ parihaṭaṃ.

71. **Yathā vā** uttadosassa parihāro īdiso vā. “**Vināyako**”ccādi. He **sāmi** tvaṃ **vināyakopi** garuḷopi **nāgosi** pannago asi. No ce, **vināyakopi** satte vinento eva **nāgosi** nikkilesa asi. **Gotamopi** pasutamopi **mahāmati** mahāpaññavāsī. No ce, **gotamopi** gottato gotamoyeva **mahāmati** mahāpaññavāsī. **Paṇītopi** madhuropi **rasāpeto** madhurarasato apagatosi. No ce, **paṇītopi** uttamo eva **rasāpeto** siṅgārādirasato apagatosi. **Te** tuyhaṃ **gati** pavatti **me** mayhaṃ **cittā** acchariyā. Ettha garuḷassa nāgattañca pasutamassa paññavantattañca paṇītassa nirasattañca viruddhaṃ, tathāpi aññapakkhassa aviruddhattā viruddhatthantaradoso pasatthena viruddhālaṅkārena nirākato. **Vīnaṃ** pakkhīnaṃ nāyako, garuḷo. Satte vinetīti **vināyako**, buddho. Natthi āgu [ago (ka.)] etassāti **nāgo**, buddho. Gunnamatisayena gotamo, pasu. Mahatī mati assāti **mahāmati**, buddho. Padhānattaṃ nīto **paṇīto**, madhuro raso. Rasato apetoti **rasāpeto**, buddhoti viggaho.

Ajhatthassa yathā –

72. **Kathaṃ tādiguṇābhāve,
Lokaṃ toseti dujjano;
Obhāsītāsesadiso,
Khajjoto nāma kiṃ bhava.**

72. “**Katha**”miccādi. Dujjano tādino guṇā lokaṃ toseti, tādīnaṃ guṇānaṃ attani abhāve sati **lokaṃ** sattalokaṃ kathaṃ toseti, na tosetīti attho. Vuttamevatthantarena sādheti “khajjoto nāma obhāsītā dīpitā asesadisā yena tathāvidho kiṃ bhava, na bhavye tādino guṇassa abhāvato”ti. Ettha khajjotassa adhikatthabhāvena sito obhāsītāsesadisattadoso “kathaṃ tādiguṇābhāve”tiādivacobhaṅgiyā parihaṭo.

72. **Ajhatthassa yathā**ti ettha parihāro ajjhāhāro, evamuparipi. “**Kathi**”ccādi. **Dujjano** guṇahīnajano **tādiguṇābhāve** santosajananakāraṇānaṃ tādīsānaṃ silādiguṇānaṃ attani avijjamānante sati **lokaṃ** sattalokaṃ kathaṃ toseti, na tosetiyeva, tathā hi khajjoto nāma obhāsītāsesadiso kiṃ bhava, na bhavatyeva. Ettha khajjotassa sakaladisobhāsanasaṅkhātamadhikatthadoso “kathaṃ tādiguṇābhāve”ccādivākyalīlaya nirākato. Tādī ca te guṇā ceti viggaho.

73. **Pahelīkāyamāruḷhā, na hi duṭṭhā kiliṭṭhatā;
Piyā sukhā’liṅgitaṃ ka-māliṅgati nu no iti.**

73. “**Pahelīkāyaṃ**”iccādi. **Kiliṭṭhatā** kiliṭṭhapadadoso pahelīkāya visaye āruḷhā sahī **na hi** no duṭṭho siyā. Kīdisīti āha “**piye**”ccādi. **Itīti** nidassane. **Piyā** vallabhāya **āliṅgitaṃ kaṃ** janaṃ

sukhaṃ kāyikaṃ cetasikañca **no āliṅgati** na saṃyujjati nu. **Nuiti** parivitaṅke nipāto. Ettha **piyāti** kiliṭṭhaṃ pahaḷikāya samāropena parihaṭaṃ.

73. “**Pahelike**”ccādi. **Kiliṭṭhatā** kiliṭṭhapadadosasaṅkhātā pahaḷikāyaṃ visaye āruḷhā ce, **na hi duṭṭhā** duṭṭhā na hoti. Kimudāharaṇaṃ? Piyā sukhāliṅgitaṃ kamāliṅgati nu no iti, **itisaddassa** nidassanattattā sesaudāharaṇānametamupalakkhaṇanti nītabbaṃ. No ce, evaṃpakārānamudāharaṇānamapariggahetabbattā **itisaddo** pakāratthoti. **Piyā** vallabhāya **āliṅgitaṃ** upaguhitaṃ **kaṃ** nāma janaṃ **sukhaṃ** kāyikamānasikaṃ **no āliṅgati nu**, āliṅgatevāti. Ettha **piyāti** kiliṭṭhapadaṃ pahaḷikāyamāropanena nirākataṃ hoti.

74. **Yamake no payojeyya, kiliṭṭhapada’micchite;**
Tato yamaka’maññaṃ tu, sabbametaṃmayāṃ viya.

74. “**Yamake**”ccādi. **Tato aññanti** icchitayamakato aññaṃ. **Tuiti** visesajotako. **Etammaṃ** viyāti etena kiliṭṭhapadena nibbattaṃ viya.

74. “**Yamake**”ccādi. Kiliṭṭhapadaṃ icchite yamake iṭṭhayamake no payojeyya nappayujjeyya, **tato** iṭṭhayamakato aññaṃ sabbam yamakaṃ pana **etammaṃ viya** iminā kiliṭṭhapadadosena kataṃ viya hoti. Ettha iṭṭhayamakaṃ vuttanayena nītabbaṃ, etena nibbattaṃ etammaṃyanti viggaho.

Desavirodhino yathā –

75. **Bodhisattappabhāvena, thalepi jalajānya’huṃ;**
Nudantāni’va sucirā-vāsaklesaṃ tahim jale.

75. “**Bodhisatte**”ccādi. **Bodhisattassa** māyādeviyā sutassa vakkhamānassa visesassa taduppannadine sambhavā **pabhāvena** puññappabhāvato **jalajāni** ambujāni thalepi **ahuṃ** ahesuṃ acintanīyattā puññappabhāvassa. Kiṃ pana vāpyādīsu kiṃ karontāva **tahim** tasmiñca jale **suciraṃ** sabbadāva āvasanamāvāso tena jāto kleso taṃ **nudantāniva** dūrato jahantānivetī. Acintanīyattā puññappabhāvassa īdisampi acchariyamahosīti na desavirodho.

75. **Bodhisattappabhāvena** bodhisattassa acinteyyānubhāvena **jalajāni** jalajasadisattā tannāmakāni padumakeravādīni **tahim jale** visayattena pasiddhe tasmiṃ uduke **sucirāvāsaklesaṃ** aticiraṃ nivāsato jātaāyāsaṃ **nudantāni iva** cajantāni iva thalepi **ahuṃ** ahesuṃ, vāpiādīsu kā kathā. Ettha jalajānaṃ thaluppattikathanasaṅkhātāṃ desavirodhaṃ acinteyyapuññappabhāvena īdisānaṃ acchariyānaṃ pātubhāvato “**bodhisattappabhāvenā**”ti iminā nirākaroti. Bodhiyaṃ catumaggapaññāyaṃ sattoti ca, tassa pabhāvoti ca, suciraṃ āvāsoti ca, tena bhūto klesoti ca vākyam.

Kālavirodhino yathā –

76. **Mahānubhāvapisuno, munino mandamāruto;**
Sabbotukamaṃ vāyi, dhunanto kusumaṃ samaṃ.

76. “**Mahā**”iccādi. **Mando** mudubhūto māruto ayaṃ **sabbotukaṃ** sabbesu utūsu pupphanakaṃ **kusumaṃ** pupphaṃ **samaṃ** ekato katvā **dhunanto** vikiranto **munino** munisadisattā bhavissantamunibhāvena ca bodhisattassa, muninoyeva vā sammāsambodhisamadhiḡamasamaye mahānubhāvassa **pisuno** sūcako **vāyi** pavāyatīti. Ettha yadyapekadā sabbotukāsambhavo nānautūsu nānākusumassa sambhavā, tathāpi bhagavato mahānubhāvapisunamīdisamekapadikaṃ sambhavatīti kālavirodho iminā parihaṭo.

76. “**Mahānubhāve**”ccādi. Ayaṃ **mandamāruto** acaṇḍasamīraṇo **sabbotukaṃ** vasantādīsu sabbautūsu vikasantaṃ **kusumaṃ** pupphajātaṃ **samaṃ** ekato katvā **dhunanto** kampaṇto **munino** ekantabhāvittā munisaṅkhātassa bodhisattassa, sammāsambodhisamadhiḡamasamaye bhūtattā munino sabbaññuno vā **mahānubhāvapisuno** mahantaṃ puññappabhāvaṃ pakāsento **vāyi**

sampavāyīti. Ettha nānākāle sambhavantānampi kusumānaṃ ekakāle sambhavassa kālavirodhattepi bhagavato puññānubhāvo tādīsamacchariyamekakkhaṇe janetuṃ samatthoti kālavirodhaṃ “mahānubhāvapisuno”ti iminā nirākaroti. Mahānubhāvassa, mahānubhāvaṃ vā piṣunoti vākyam.

Kalāvirodhino yathā –

**77. Nimuggamanaso buddha-guṇe pañcasikhassapi;
Tantissaravirodho so, na sampīneti kaṃ janam.**

77. “**Nimuggi**”ccādi. Buddhassa **guṇe** sīlādike aparimāṇe nimuggaṃ ogāḷhaṃ manam cittaṃ yassa tassa **pañcasikhassa** gandhabbadevaputtassapi vīṇāya tantiyā sarō kiriyākālamānalakkhaṇavilambitadutamajjhabhedabhinno chajjādiko tassa virodho kalāsathapariniddiṭṭhakamavesamaṃ kaṃ janam na sampīneti, pīnetiyeva. Sammāsambuddhassa lokiyaguṇānubandhabuddhīnaṃ vikkhepappavattipi tathāvidhaṃ pīnetīti. “Buddhaguṇe nimuggamanaso”ti iminā kalāvirodho parihaṭo.

77. “**Nimuggi**”ccādi. **Buddhaguṇe** sabbaññuno vimhayajanakasīlādiguṇasambhāre **nimuggamanaso** otiṇṇacittassa **pañcasikhassapi** gandhabbadevaputtassāpi so **tantissaravirodho** vīṇāya tantiyā ghaṭṭanakiriyā, addhamattikādīkālo, hatthādīnaṃ sannivesalakkhaṇo mānoti imehi tīhi lakkhaṇehi yuttassa mandasīghamajjhimappamāṇehi bhinnassa chajjādisattasarassa kalāsathāgatakkamassa vināsasaṅkhāto virodho **kaṃ janam na sampīneti**, sampīneti eva. Ettha akantiyā kāraṇabhūto kalāsathāgatakkamabhaṅgo lokuttarabuddhaguṇānugatabuddhiyā jātoti so bhaṅgo “nimuggamanaso buddhaguṇe”ti vuttattā pītiyā kāraṇameveti na virodho. Nimuggo mano assāti ca, tantiyā saroti ca, tesam virodhoti ca vākyam.

Lokavirodhino yathā –

**78. Gaṇaye cakkavāḷam so, candanāyapi sītaḷam;
Sambodhisattahadayo, padittaṅgārapūritam.**

78. “**Gaṇaye**”ccādi. Candanāya api sītaḷam **gaṇaye** cintesi. Kintaṃ? Padittaṅgārapūritam cakkavāḷam. Ko so? **Sambodhiyam** sabbaññutaññāṇe **sattam** paribaddham **hadayam** cittaṃ yassa so. Sabbaññutaññāṇānubandhabuddhino hi tādīso manobandhoti na lokavirodho.

78. “**Gaṇaye**”ccādi. **Sambodhisattahadayo** sabbaññutaññāṇe āsattacitto so bodhisatto **padittaṅgārapūritam** ādittaṅgārehi paripuṇṇam **cakkavāḷam** cakkavāḷagabbham **candanāyapi** candanato api **sītaḷam** atisītaḷam katvā **gaṇaye** cinteyyāti. Itṭhatthaluddhassa cittappavattiyā īdisattā aggino candanatopi adhikasītattakappanā “candanam sītaḷam, aggi uṇho”ti pavattalokasīmāya viruddhā na hoti. Sambodhiyam sattahadayaṃ yasseti ca, padittāni āṅgārānīti ca, tehi pūritanti ca viggaho.

Ñāyavirodhino yathā –

**79. Pariccattabhavopi tva-mupanītabhavo asi;
Acintyaguṇasārāya, namo te munipuṅgava.**

79. “**Pariccate**”ccādi. **Munipuṅgava** munīnaṃ uttama pariccatto viṣaṭṭho bhavo sugatiduggatisaṅkhāto yenāti **pariccattabhavopi** tvaṃ upanīto ānīto pavattito bhavo vuḍḍhi yenāti **upanītabhavo** asi. Tasmā kāraṇā acintyaguṇasārāya te namo atthūti seso. Īdisaṃ na ñāyaviruddhamevaṃvidhattā munipuṅgavassa.

79. “**Pariccate**”ccādi. **Munipuṅgava** muniseṭṭha tvaṃ **pariccattabhavopi** apanītasugatiduggatibhavopi **upanītabhavo** lokassānītaabhiyuddhiko **asi** bhavasi,

acintyaguṇasārāya tato eva cintāvisayātikkantasāraguṇassa **te** tuyhaṃ namo atthūti sabbākārato bhavassa pariccattatā attani avijjamānaṃ sugatibhavaṃ lokassa detīti etaṃ ñāyāgatam na hotīti paṭibhāti, tathāpi ca sabbaññūnaṃ pavatti idīsāyevāti ñāyavirodho nirākato. Acintyā guṇasārā yasminti viggaho.

Āgamavirodhino yathā –

**80. Nevālapati kenāpi, vacīviññattito yati;
Sampajānamusāvādā, phuseyyāpattidukkaṭaṃ.**

80. “Neve”tiādi. Yatīti bhikkhu **kenāpi** saha **nevālapati** na vadatyeva, tathāpi **vacīviññattito** copanavācāsaṅkhātena vacīviññattihetunā pavattito sampajānantassa musāvādato kāraṇā **āpattidukkaṭaṃ** “sampajānamusāvādassa hotī”ti vuttadukkaṭāpatti **phuseyya** āpajjatīti. Ettha anālapato vacīviññattiyā kathaṃ musāvādoto abhidhammāpannavirodho natthi, aparavacanatthe tvīdiso virujjhatīti.

80. “Nevi”ccādi. **Yati** samaṇo **kenāpi** kenaci saddhiṃ **nevālapati** no bhāsati, tathāpi **vacīviññattito** copanavācāsaṅkhātaviññattikāraṇā pavattanato **sampajānamusāvādā** sampajānantassa musābhaṇanato **āpattidukkaṭaṃ** dukkaṭāpattiṃ **phuseyya** āpajjeyyāti. Ettha anālapantassa vacīviññattito musāvādo kathaṃ sambhavatīti abhidhammāpannavirodho, “santiṃ āpattiṃ nāvikareyya, sampajānamusāvādā’ssa hotī”ti nidānuddese niddiṭṭhavadvāre akiriyasamuṭṭhānā dukkaṭāpatti hotīti āgamavirodho nirākato. Musābhaṇanaṃ vinā āpatti kathaṃ bhavatīti? Yathā kāle avassamānameghato sañjātadubbhikkhaṃ “meghakataṃ dubbhikkha”nti vattabbaṃ hoti, evaṃ kathetabbakāle akathanato sañjātā vacīdvāre akiriyasamuṭṭhānā dukkaṭāpattipi tato sañjātāti vattabbā hoti. Sampajānantassa musāvādoto ca, āpattiyeva dukkaṭanti ca vākyam.

Neyyassa yathā –

**81. Marīcicandanālepa-lābhā sītamarīcino [sītamarīcino (sī.)];
Imā sabbāpi dhavalā, disā rocanti nibbharam.**

81. “Marīci”tyādi. **Sītamarīcino** candassa **marīciyo** dīdhitiyo eva candanaṃ, tassa **ālepo** upadeho, tassa lābhena imā sabbāpi disā **nibbharamatisayaṃ dhavalā** setā rocantīti natthettha neyyatā marīciyā saddopāttatthāya tu.

81. “Marīci”ccādi. **Sītamarīcino** candassa **marīcicandanālepalābhā** marīcisaṅkhātacandanālepassa paṭilābhato imā sabbāpi disā **nibbharamatisayaṃ dhavalā** setā **rocanti** dibbantīti. Disānaṃ dhavalakāraṇassa “marīcicandanālepalābhā sītamarīcino”ti vuttattā neyyadoso na paṭiṭṭhāti, candanamiva candanaṃ, marīciyoyeva candanamiti ca, tassa ālepoti ca, tassa lābhoti ca viggaho.

Yathā vā –

**81. Manonurañjano māra-ṅganāsīṅgāravibbhamo;
Jinenā’samanuññāto, mārasa hadayānalo.**

82. “Mano”ccādi. Manam passantānamanussarantānañca cittaṃ anurañjetīti **manonurañjano**, māraṅganānaṃ siṅgārakato **vibbhamo** vilāso jinenā **asamanuññāto** abbhupagato **mārasa** vasavattino **hadayānalo** hadayaggi jāto. Soko cettha analatthe niruppito tassa tādisatthānavattanato, kāraṇantupacārenāti. Ettha yajjapi māraṅganāparājayo na saddopāttattho, tathāpi “siṅgāravibbhamo mārasa hadayaggi”ti vutte sāmattiya māraṅganāparājayo gamyate, tathāvidhassa mārasokassa māraṅganāparājayābyabhicārato. Nevedisassa neyyatā, vaṅkavuttīdisī guṇoyeva bandhassa.

82. Vattabbassa ñāyopāttattā neyyadosaparihāratthamudāharati “**mano**”ccādi.

Manonurañjano dassanasavanānussaraṇaṃ karontānaṃ janānaṃ cittaṃattani anurañjanto **māraṅganāsiṅgāravibbhamo** māravadhūnaṃ ratikīlāhetubhūtakāmapatthanāsankhātasiṅgārena katalīlā **jinena** jitapañcamārena satthunā **asamanuññāto** anabbhupagato asampañcchito **mārassa** vasavattino **hadayānalo** hadayaggi ahoṣīti. Analattena kappitakāriyabhūto soko māraṅganāsiṅgāravibbhamasañkhātākāraṇena saddhiṃ abhedakappanāya [analattakappanāya (ka.)] “guḷo semhaṃ, tipusaṃ jaro”tiādīsu viya tulyādhikāraṇabhāvena vutto hoti. Ettha kiñcāpi māraṅganānaṃ parājayaavācako saddo natthi, tathāpi “siṅgāravibbhamo māraṇa hadayānalo”ti vutte māraṅganāparājayaṃ vinā tādisasokuppattikāraṇassa anadhigatattā aññathānupapattilakkhaṇasāmatthiyena tāsāṃ parājayo pakāsito hotīti īdisavañkavuttīyā bandhaguṇattā neyyadoso nirākato hotīti. Mano anurañjetīti ca, māraṅganānaṃ siṅgāroti ca, tena kato vibbhamoti ca vākyam.

Visesanāpekkhassa yathā –

**83. Apayātāparādhampi, ayaṃ verī janaṃ jano;
Kodhapāṭalabhūtena, bhiyyo passati cakkhunā.**

83. “Apayāte”ccādi. Ayaṃ verī jano apayātāparādhampi jananti sambandho. Apayāto apagato aparādhō yassa taṃ, kodhena pāṭalabhūtena setarattena. Iminā visesanāpekkhadoso parihaṭo.

83. “Apayāti”ccādi. Ayaṃ verī jano **apayātāparādhampi** apagatāparādhampi janaṃ **kodhapāṭalabhūtena** kodhena bhūtasetalohitavaṇṇayuttana cakkhunā **bhiyyo** yebhuyyena passatīti. “Passatī”ti vacanassa vijjamānattepi “cakkhunā”ti visesyavacanam “kodhapāṭalabhūtenā”ti visesanassa labbhamānattā sātthakaṃ hotīti visesanāpekkhadoso nirākatoti. Apayāto apagato aparādhō asmāti ca, kodhena pāṭalabhūtanti ca viggaho.

Hīnatthassa yathā –

**84. Appakānampi pāpānaṃ,
Pabhāvaṃ nāsaye budho;
Api nippabhatānīta-
Khajjoto hoti bhāṇumā.**

84. “Appakāna”miccādi. **Budho** paṇḍitaposso appakānaṃ pāpānampi kimutamadhikānaṃ **pabhāvaṃ** ānubhāvaṃ **nāsaye** appavattim pāpeyya. Taṃ atthantaranyāsenā sādheti. **Bhāṇumā** sūriyo nippabhatam ānīto khajjoto yena tathāvidho api hoti. “Mandappabho aya”nti jotiriṅgaṇampi nopekkhati cakkavāḷakuhārānucaritamahānubhāvopīti. Ettha **apītyādinā** vacobhaṅgiyā hīnatthadoso parihaṭo.

84. “Appakāni”ccādi. **Budho** paññavā **appakānampi** atimandānampi **pāpānaṃ** akusalānaṃ **pabhāvaṃ** vipākadānasāmatthiyasāñkhātānubhāvaṃ **nāsaye** ahoṣikammaṭāpādanena nāseyya, bahūnaṃ pāpānaṃ vattabbameva natthi. Tamatthamatthantaranyāsālānkārena samattheti **apiccādi**. **Bhāṇumā** sūriyo **nippabhatānītakhajjoto api** nippabhatamāpāditajotiriṅgaṇehi samannāgatopi hotīti. Hīnapabhāvo hoti khajjopanake pahāya attano ālokaṃ karonto na hotīti adhippāyo. Ettha **api nippabhatī**ccādivacanavilāsavasena hīnapakkhaṃ gahetvāpi sūriyaudārattasseva positattā “nippabhatānītakhajjoto”ti visesanapadaṃ hīnatthadosaṃ na nissayati. Natthi pabhā yesanti ca, tesam bhāvoti ca, taṃ ānītā khajjotā yeneti ca viggaho.

Anatthassa yathā –

**85. Na pādapūraṇatthāya, padaṃ yojeyya katthaci;
Yathā vande munindassa, pādapañkeruhaṃ varaṃ.**

85. “Na pāde”ccādi. Ettha **vandeiccādo** heṭṭhā viya pādapūraṇassa kassaci abhāvena

anattābhāvo.

85. “Na pādi”ccādi. Pādapūraṇatthāya gāthāpādānaṃ pūraṇasaṅkhātāpayojanatthāya **padam** nāmādikaṃ katthaci na yojeyya viññūti, **yathā** niratthakapadāyojane udāharaṇamevaṃ “munindassa varam pādapaṅkeruham vande”ti. Heṭṭhā duṭṭhodāharaṇe viya pādapūraṇattham kassaci padassa ayojitattā sātthakapadehi niratthakadoso nirākatoti. Mudunimmalasobhādisādhāraṇaguṇayogato paṅkeruhasadisam upacārato paṅkeruham nāma. Pādameva paṅkeruhanti viggaho. visesanavisesyapadosaparihāro.

**86. Bhayakodhapasamsādi-
Viseso tādiso yadi;
Vattum kāmiyate doso,
Na tatthe’katthatākato.**

86. “Bhaye”ccādi. **Bhaya**ñca cittutrāso **kodho** ca doso **pasamsā** ca thuti, tā ādi yassa turitādino so tādiso viseso yadi vattum **kāmiyate** icchīyate, **tattha** tasmim bhayādivisese visaye ekatthatāya ekatthabhāvena kato doso natthi.

86. Idāni vākyadosaparihāratthamārabhati “**bhayakodhe**”ccādi. Bhayakodhapasamsādi cittutrāsapāṭighathutiādīhi samannāgato tādiso viseso vattum **yadi kāmiyate** ce viññūhi icchīyate, **tattha** bhayakodhādi ke visese **ekatthatākato** ekatthabhāvena kato **doso** vākyadoso na bhavati. Bhayādivisese vattumicchite pubbuccāritapadassa punuccāraṇe ekatthadoso na hotīti adhippāyo. Bhayañca kodho ca pasamsā cāti ca, tā ādi yassa turitakotūhalaaccharāhāsasokapasādasāṅkhātassa atthavisesasseti ca viggaho. Tagguṇasamviññānaññāpadatthasamāsattā bhayādīsu kathitamapi gahetvā punappunaṃ kathanamavirodham. Eko attho yesam padādīnaṃ te ekatthā, tesam bhāvo ekatthatā, tāya katoti viggaho.

Yathā –

**87. Sappo sappo ayam handa, nivattatu bhavam tato;
Yadi jīvitukāmo’si, katham tamupasappasi.**

87. “Yathe”tyudāharati “**sappo**”iccādi. “Ayam sappo sappo”ti bhayenāmeḍitaṃ **handāti** khede **tato** tamhā ṭhānā, sappato vā **bhavam** bhavanto **nivattatu** gatamaggābhimukho āvattatu. **Tam** ṭhānaṃ, sappam vā. Natthettha ekatthatādosso bhayenāmeḍitappayogato.

87. “Sappo”ccādi. **Handa** naṭṭho vata, ayam sappo sappo bhavam **tato** ṭhānato, sappato vā **nivattatu** āvattatu yadi jīvitukāmo asi, **tam** ṭhānaṃ, sappam vā **kathamupasappasi** kathamupagacchasīti. Bhaye āmeḍitavacanattā ekatthatādosso natthi, jīvitukāmosīti ettha bindulopo.

Padadosaparihāravaṇṇanā niṭṭhitā.

Vākyadosaparihāravaṇṇanā

Bhaggarītino yathā –

**88. Yo koci rūpātisayo,
Kanti kāpi manoharā;
Vilāsātisayo kopi,
Aho buddhamahodayo.**

88. “Yo”iccādi. **Rūpassa** anubyañjanehi anubyañjitabāttiṃsavaraपुरisalakkhaṇopasobhitassa byāmapabhāketumālāvīrajitassa **atisayo** ādhikam vācāgocarabhāvātikkamena avacanīyattā yo kociyeva. Mano anekalokassa cittaṃ haratīti **manoharā** cittaṃavaharantī **kanti** sobhā **kāpi**

avacanapathā kāpiyeva. **Vilāsassa** gatyādino **atisayo** vacanapathātikkanto kopiyeva, tasmā buddhassa mahanto udayo abhivuḍḍhi aho abbhutoti. Ettha kiṃsaddenāraddhā rīti na katthaci bhaggā.

88. “Yo koci”ccādi. **Rūpātisayo** suppaḥiṭṭhitapādatādidvattiṃsapurisalakkhaṇehi sobhitassa cittaṅgulitādiasītianubyañjanehi alaṅkatassa byāmapabhāketumālāhi ujjalassa rūpakāyassa ādhikyaṃ **yo kociyeva** manogocarabhāvaṃ vinā vacanavisayātikkantattā yo kociyeva. **Manoharā** lokassa cittaṃ harantī **kanti** sobhā **kāpiyeva** vacīvisayātikkantattā kāpiyeva. **Vilāsātisayo** visayabhūtapiyabhāvasaṅkhātassa gamanādivilāsassa ādhikyampi **kopiyeva** vuttakāraṇenevakopiyeva. Tato **buddhamahodayo** buddhassa mahābhivuddhisāṅkhāto udayo **aho** acchariyoti. Ettha sabbanāmikena **kiṃ** saddena vattumāraddhakkamo na katthaci bhinnoti bhaggarītidoso natthīti.

**89. Abyāmohakaraṃ bandhaṃ, abyākiṇṇaṃ manoharaṃ;
Adūrapadavinyāsaṃ, pasamsanti kavissarā.**

89. “Abyāmoha”iccādi. Natthi dūramesanti adūrāni, tāniyeva padāni, tesam **vinyāso** yāthāvato ṭhapanam yassa taṃ. Tatoyeva abyākiṇṇo asammisso ca. So abyākiṇṇatāya eva manoharo cāti **abyākiṇṇaṃ manoharaṃ**. Teneva “āyameṭṭha attho ayaṃ vā”ti evaṃ byāmohaṃ na karotīti **abyāmohakaro**, taṃ. Pasādālaṅkāraṅkitaṃ **bandhaṃ**. Kavīnaṃ issarā padhānā. Ye kaniṭṭhaṅguligaṇaṇāniṭṭhā, te **pasamsanti** thuvanti tādisabandhaguṇassātisayapasamsārāhabhāvena.

89. “Abyāmohe”ccādi. **Adūrapadavinyāsaṃ** nāmādi padānaṃ vohārakāle adūrasambandho yathā siyā, tathā paṭipāṭiyā padaṭṭhapanena samannāgataṃ **abyākiṇṇaṃ**, tatoyeva aññasambandhīpadehi asammissaṃ **manoharaṃ**, tatoyeva viññūnaṃ cittaṃārādhentaṃ **abyāmohakaraṃ** “imassattho imassattho eso eso vā”ti saṃsayamanuppādentam **bandhaṃ** pasādālaṅkārasaṃyuttaṃ bandhanaṃ **kavissarā** kavīnaṃ padhānā paṇḍibhajanā, kaniṭṭhaṅguliyaṃ gaṇitabbā aggakavinoti adhippāyo. **Pasamsanti** thomentī. Byāmohaṃ na karotīti abyāmohakaro. Vi ākiṇṇo byākiṇṇo, na byākiṇṇo **abyākiṇṇo**. Natthi dūraṃ yesaṃ, tāniyeva padāni, tesam **vinyāso** ṭhapanam yassa bandhassāti viggaho.

Yathā –

**90. Nīluppalābhaṃ nayanam,
Bandhukaruciro’dharo;
Nāsā hemaṅkuso tena,
Jinoyam piyadassano.**

90. “Yathe”tyudāharati “**nīluppalābha**”miccādi. Yassa jinassa **nayanam** nettaṃ **nīluppalābham** indīvaradvayanībham, **adharo** adharoṭṭho **bandhukamiva** bandhukakusumamiva **ruciro** kanto, **nāsā** nāsikā sayam **hemaṅkuso** suvaṇṇaṅkusoyeva, **tena** kāraṇena ayaṃ jino piyam madhuraṃ dassanamassāti **piyadassano**. Īdiso na byākiṇṇadoso, abyākiṇṇo pasādoyevāti.

90. Idāni byākiṇṇadosaparihāraṃ pariharati “**nīluppali**”ccādinā. **Nayanam** yassa nettayugaḷam **nīluppalābham** nīluppaladalasadiṣam, **adharo** adharoṭṭho **bandhukaruciro** bandhukapupphamiva manuṅṅo, **nāsā** nāsikā **hemaṅkuso** suvaṇṇaṅkusoyeva, **tena** kāraṇena ayaṃ jino **piyadassano** manuṅṅadassano hotīti. Ettha pasādālaṅkārena yuttattā na byākiṇṇadoso. **Ābhāsaddo nibhāsaddo** viya ivattho. No ce, **pabhāpariyāyo** vā hoti. Bandhukamiva ruciroti ca, piyam dassanam yasseti ca viggaho. Iha dassanassa kattubhūtasādhujanasambandhattepi visayatteneva jinasambandho hotīti añṅapadatthena tathāgato gahitoti.

**91. Samatikkantagāmmatta-kantavācābhisaṅkhatam;
Bandhanaṃ rasahetuttā, gāmmattaṃ ativattati.**

91. “**Samatikkanti**”ccādi. Sammā atikkantaṃ niggataṃ. Gāmmassa bhāvo **gāmmattaṃ**. Yāsaṃ **kantānaṃ** madhurānaṃ vācānaṃ tāhi abhisankhataṃ racitaṃ bandhanaṃ **rasassa** mādhuriyassa **hetuttā** kāraṇabhāvena **gāmmattaṃ** yathāvuttaṃ **ativattati** atikkamati.

91. “**Samati**”ccādi. **Samatikkantaḡāmmattakantavācābhisaṅkhataṃ** visesato atikkantaḡāmmabhāvāhi kantavācāhi racitaṃ **bandhanaṃ** muttakādibandhanaṃ **rasahetuttā** paṇḍitānaṃ pītirasassa kāraṇattā yathāvuttagāmmadosaṃ **ativattati** atikkamma pavattatīti. Sammā atikkantaṃ gāmmattaṃ yāsaṃ, tāhiyeva kantavācāhi abhisankhatanti ca, rasassa hetu, tassa bhāvoti ca viggaho.

Yathā –

92. **Dunoti kāmacaṇḍālo,**
So maṃ sadaya niddayo;
Īdisaṃ byasanāpannaṃ,
Sukhīpi kīmupekkhase.

92. “**Yathe**”tyudāharati. Kāmāturā kāci vanitā attano piyaṃ patiṃ viravati “**dunoti**”ccādinā. Dayāya saha pavattīti **sadayaiti** anunayavasena piyassa āmantanaṃ, sānunayāmantanañhi tatonuggahābhikaṅkhāyamaccantamucitaṃ, so kāmo kandappo eva caṇḍālo akaṇḍo vā asayhopatāpāvahattā. Kāme caṇḍālattāropanaṅca ucitameva yatoneka kayiramānamasahanamupatāpamasahamānā taṃ paribhavantaṃ vippalapati, **niddayo** nikkaruṇo, idamapi ucitamupatāpe nikkaruṇānaṃ tādisī gatīti. **Maṃ dunoti** adhikamupatāpeti niddayattā, na bhavantaṃ, teneva bhavaṃ sukhī. Iminā aññāsattataṃ tassa dīpeti. Yadi nāññāsattosi, nāhamekākinī bhavāmi. Asahāyānañhi paṭisattavo honti. Ekākittāyevāhamappaṭisaraṇattānena dusāmīti [**duññāmīti** (?)] tava kāmaṃ tvaṃ sukhī hosi. Saññānaṃ tādisī vuttīti evaṃ sukhīpi tvaṃ īdisaṃ byasanamāpannaṃ **kīṃ** kasmā upekkhase. Evamayāṃ vaṅkavuttīyā attano, taṃ visayamanubhavantaṃ ca vimukhattaṃ nidassetīīdisaṃ na gāmmaṃ.

92. Gāmmadosaparihāre lakkhiyaṃ dasseti “**dunoti**”ccādi. Kāmataṅhābhībhūtā aṅganā attano vallabhaṃ nissāya evaṃ vilapati “**sadaya** he kāruṅika **so kāmacaṇḍālo** so anaṅganīco **niddayo** nikkāruṅiko **maṃ dunoti** pīleti, **sukhīpi** mama viya anāthabhāvābhāvato sukhitopi tvaṃ īdisaṃ **byasanāpannaṃ** evaṃ kāmacaṇḍālena akāruṇena kataasayhasantāpasaṅkhātabyasanamanuppattaṃ **maṃ kīmupekkhase** kasmā udāsīnosī”ti. Attano dukkhāturattā dukkhadūrīkaraṇaṃ kāruṅikānaṃyeva visayanti “**sadaye**”ti anunayavasena āmantanucitaṃ attano dukkhāturataṃ posetuṃ pīlākārake kāme caṇḍālattāropanaṅca niddayattakathanaṅca ucitameva attani upekkhakattā. **Sukhīpīti** iminā tassa paravisayāsattatāya aticāraṃ abbhupagameti. Evaṃ vaṅkavuttīyā attano vallabhe sānurāgattaṅca attani tassa tadabhāvattaṅca dassetīti. “Kaññe kāmāyamaṇaṃ maṃ, na kāmāyasi kīṃnvida”nti ettha viya iha gāmmadoso natthīti gāmmadosaparihāramidaṃ. Kāmoyeva caṇḍālo kāmacaṇḍālo, saha dayāya yo vattatīti ca, natthi dayā asseti ca, sukhamassa atthīti ca viggaho. **Apisaddo** akkhame.

93. **Yatihīnaparihāro, na pune’dāni nīyate;**
Yato na savanubbegaṃ, heṭṭhā yetāṃ vicāritaṃ.

93. “**Yati**”ccādi. **Vicāritanti** “taṃ name sirasā cāmī-karavaṇṇaṃ tathāgata”ntiādinā heṭṭhā pakāsītanti attho.

93. “**Yatihīni**”ccādi. **Yato** yasmā **savanubbegaṃ** “dosānamuddesakkamena dosaparihārakkamo na vutto”ti evaṃ viññūnamuppajjamānaṃ imassa ganthassa savanāsahanaṃ natthi, tato **yatihīnaparihāro** yatihīnadosassa pariharaṇavasena pavattamudāharaṇaṃ idāni puna **na nīyate** nāharīyateti. Iminādhigatamādo vuttatthameva samattheti. **Heṭṭhā yetāṃ vicāritanti** evaṃ yatihīnadosapariharaṇaṃ heṭṭhā anantaraparichede vicāritaṃ “taṃ name sirasā cāmī-karavaṇṇaṃ tathāgata”ntiādinā pakāsītanti. Ādo yatihīnadosapātubhāveveyeva parihārakkamassāpi dassitattā ihādassanepi ganthassa unatā natthīti adhippāyo. Yati hīnā ettheti ca, tassa parihāroti ca, savane

ubbeganti ca viggaho.

Kamaccutassa yathā –

**94. Udāracarito'si tvam, tenevā'rādhanā tvayi;
Desam vā dehi gāmaṃ vā, khettaṃ vā mama sobhanaṃ.**

94. “Udāra”iccādi. Udāraṃ udārattaṃ cāgātisayasambandhato caritaṃ atiguṇapavatti yassāti viggaho. Ettha ucitattā desādīnaṃ yācanakkamassa kamaccutassa parihāroyaṃ.

94. “Udāri”ccādi. Tvam puññavanta **udāracaritosi** cāgātisayayogato visāradapavattiyuttosi, **teneva** tena kāraṇeneva **ārādhanā** mama yācanā tvayi hoti. **Desam** vājanapadaṃ vā, no ce, **gāmaṃ** vā saṃvasathaṃ vā, no ce, sobhanaṃ **khettaṃ** vā kedāraṃ vā mama dehīti anupubbaṃ hīnapadatthayācanā dāyakassa dānassāpi yācakassa icchitatthapaṭilābhassāpi anurūpattā kamaccutadosamapaneti. Udāraṃ caritaṃ assāti viggaho.

Ativuttassa yathā –

**95. Munindacandasambhūta-
Yasorāsimarīcinaṃ;
Sakalopya'yamākāso,
Nā'vakāso vijambhane.**

95. “Muninda”iccādi. Munindoyeva cando, tato sambhūtā pātubhūtā, yasorāsī eva marīciyo, tāsam. Ayaṃ sakalo ākāsopi gaganameva, na tasseko padeso. **Vijambhane** byāpane nāvakāso tādisattā tāsam marīcinanti nātivuttaṃ.

95. “Munindi”ccādi. **Munindacandasambhūtayasorāsimarīcinaṃ** munindasaṅkhātacandato pātubhūtānaṃ kittisamūhasaṅkhātākiraṇānaṃ **vijambhane** byāpane ayaṃ sakalopi ākāso **nāvakāso** na okāso hotīti. Hetuphalādiekekakāraṇenāpi appameyyānaṃ sabbaññuṇaṇaṃ pavattiyā appameyyasāmaññabhūtākāsassa niravakāsassa iva kathanamucitanti ativuttadoso iha na bhavati. Cando iva cando, munindo eva cando, tato sambhūtānaṃyeva yasānaṃ rāsī ca tā marīciyo cāti viggaho.

**96. Vākyam byāpannacittānaṃ, apetatthaṃ aninditaṃ;
Tenu'mmattādikānaṃ taṃ, vacanā'ññatra dussati.**

96. “Vākya”miccādi. Byāpannaṃ natthaṃ ayathāpavattaṃ cittaṃ yesaṃ, tesaṃ. **Vākyam** vākyalakkhaṇopetaṃ. Apeto apagato suñño attho abhidheyyaṃ saṃvohārikaṃ yassa, taṃ. **Aninditaṃ** ahīlitaṃ. **Tena** yathāvuttena kāraṇena. **Taṃ** vākyam **ummatto** dhātukkhobhādīnā khittacitto, so ādi yesaṃ bālādīnaṃ tesaṃ **vacanā** asaṅgatāya vācāya **aññatra** aññasmim abyāpannacittavisaye **dussati** duṭṭhaṃ jāyate, ummattādīnaṃyeva tathāvidhāya vācāya ucitattāti.

96. “Vākya”miccādi. **Byāpannacittānaṃ** viruddhabhāvamāpannacittānaṃ **vākyam** syādyantatyādyantapadasamudāyarūpaṃ vākyam **apetatthaṃ** apagatasamudāyatthaṃ **aninditaṃ** viññūhi garahitaṃ na hoti, **tena** kāraṇena **ummattādikānaṃ** ummattavedanaṭṭādīnaṃ **vacanāññatra** vacanaṃ vinā anumattādivacane **taṃ** samudāyatthasambandharahitaṃ vacanaṃ **dussati** dosaduṭṭhaṃ hoti. Byāpannaṃ cittaṃ yesanti ca, apeto attho assāti ca, ummatto ādi yesanti ca viggaho.

Yathā –

**97. Samuddo piyate so'ya-maha'majja jarāturo;
Ime gajjanti jīmūtā, sakkasse'rāvaṇo piyo.**

97. “**Yathe**”tyudāharati “**samuddo**”iccādi. Na hettha “samuddo pīyate”iccādinō padasamudāyassa koci eko attho gayhati, yo so bandhattho siyā. Avayavattā eva tu ayosalākākappapaṭibhantīti īdisamapetatthamaninditaṃ viññeyyaṃ byāpannacittānaṃ.

97. “**Samuddo**”ccādi. So ayaṃ samuddo pīyate yena kenaci pīyate, ahaṃ aḷḷa **jarāturo** jararogābhībhūto, ime **jīmūtā** meghā **gajjanti** thanayanti. Sakkassa erāvaṇo piyoti. Idaṃ ninditāninditānaṃ dvinnamudāharaṇaṃ. Idaṃ vākyāṃ avayavattamantarena samudāyato gamyamānatthassābhāvā apetatthāṃ nāma hoti. Īdisaṃ vākyāṃ ummattakādīhi vuttamappītikaraṃ na hoti, aññehi vuttaṃ pana kaṇṇe ayosalākā viya appītikaraṃ. Jarāya āturoti vākyāṃ.

98. **Sukhumālāvirodhitta-dittabhāvappabhāvitāṃ;
Bandhanaṃ bandhapharusa-dosaṃ saṃdūsayeyya taṃ.**

98. “**Sukhumālā**”ccādi. Na virujjhati sīlenāti avirodhī, tassa bhāvo avirodhittaṃ. Sukhumālassa avirodhittaṃ yassa so dittabhāvo, tena **pabhāvitāṃ** vaḍḍhitaṃ saṃyuttaṃ **taṃ** bandhanaṃ bandhapharusadosaṃ **saṃdūsayeyya** nāsayeti attho.

98. “**Sukhumālā**”ccādi. **Sukhumālāvirodhittadittabhāvappabhāvitāṃ** “**aniṭṭhurakkharappāye**”ccādinā vuccamānasukhumālagaṇassa aviruddhabhāvasamannāgatena vaṇṇānaṃ aññamaññasaṅgabhilakkhaṇena **dittabhāvena** piyabhāvena anubrūhitaṃ **taṃ** bandhanaṃ **bandhapharusadosaṃ** bandhapharusasaṅkhātadosaṃ **saṃdūsayeyya** nāseyya, **taṃ** bandhapharusadosanti vā sambandhoti. Na virujjhati sīlenāti avirodhī, tassa bhāvoti ca, sukhumālassa avirodhittaṃ yassāti ca, soyeva dītassa bhāvoti ca, tena pabhāvitanti ca vākyāṃ.

Yathā –

99. **Passantā rūpavibhavaṃ, suṇantā madhuraṃ girāṃ;
Caranti sādḥū sambuddha-kāle keḷiparammukhā.**

99. “**Yathe**”tyudāharati “**passantā**”iccādi. Keḷiyā kīḷāya parammukhā vigatacchandā carantīti sambandho.

99. “**Passante**”ccādi. **Sādḥū** sajjanā **sambuddhakāle** sambuddhassa dharamānakāle **rūpavibhavaṃ** tassa rūpasampattiṃ **passantā** cakkhuṃ santappetvā oloketā **madhuraṃ girāṃ** tasseva bhagavato aṭṭhaṅgasamannāgataṃ madhuravacanaṃ suṇantā **keḷiparammukhā** kīḷāya vimukhā kīḷābhiratirahitā **caranti** gacchanti pavattantīti. Kevalaṃ pharusasithilavaṇṇehi vinā sukhuccāraṇīyavaṇṇehi sambhūtasukhumālagaṇāvirodhaaññamaññasaṅgatavaṇṇavisadappavattagaṇayuttattā ettha bandhapharusadoso natthi. Keḷiyā parāni parivattitāni mukhāni etesanti viggaho. Ettha **kāloti** kiriya. Sā ca atthato tadākārappavattasambandhoyeva. Loko pana viṣuṃ eko padatthoyevāti voharati. vākyadosaparihāro.

Vākyadosaparihāravaṇṇanā niṭṭhitā.

Vākyatthadosaparihāravaṇṇanā

Apakkamassa yathā –

100. **Bhāvanādānasilāni, sammā sampādītāni’ha;
Nibbānabhogasaggādi-sādhanāni na saṃsayo.**

100. “**Bhāvanā**”iccādi. Ettha bhāvanādīni niddisitvā yathākkamaṃ nibbānādīnaṃ niddesena apakkamadoso parihaṭo.

100. “Bhāvane”ccādi. **Iha** manussaloke **sammā sampādītāni** kammaphalaṃ saddahitvā yathāvidhi sampādītāni attano santāne pavattāpitāni bhāvanādānasīlāni **nibbānabhogasaggādisādhanāni** yathākkamaṃ nibbānaupabhogaparibhogasampattisagguppattiādīnaṃ hetubhāvena sādhakāni honti, ettha sādhanena saṃsayo hotīti. Iha bhāvanādayo uddisitvā uddesakkamaṃ anatikkamma nibbānādīnamanuddesassa katattā apakkamavākyatthadosassa okāso na hoti.

101. Uddiṭṭhavisayo koci [kopi (ka. sī.)], viseso tādiso yadi; Anuddiṭṭhesu [anuddiṭṭhesu (?)] neva’tthi, doso kamavilaṅghane.

101. “Uddiṭṭhe”ccādi. Uddiṭṭhā paṭhamamaṃ yuttā atthā visayo gocaro yassa uddesānuddesasambandhavijānanalakkhaṇassa visesassa so tādiso koci viseso **anuddiṭṭhesu** yathākkamamuddesakamānamatikkena puna atthantaraniṣsayena parāmaṭṭhesu yadi bhaveyya, **kamassa** yathoddiṭṭhesu anukkamassa **vilaṅghane** atikkame doso nevatti.

101. “Uddiṭṭhe”ccādi. **Uddiṭṭhavisayo** paṭhamamaṃ payuttatthavisayo tādiso **koci viseso** uddesānuddesānaṃ “idamassa pubbakathanaṃ, idamassa pacchākaṭhana”nti evamaññaṃ aṅgamaññaṃpekkhalakkhaṇasambandhaparijānanalakkhaṇo viseso **anuddiṭṭhesu** atthantaramaṃ nissāya puna vuttesu yadi “bhaveyyā”ti seso. **Kamavilaṅghane** uddesānuddesānaṃ kamātikkame **doso** satthaññaṃ sutikāle asahanakāraṇaṃ nevattīti. Uddiṭṭhā paṭhamuccarītā atthā visayo gocaro asseti ca, kamassa vilaṅghananti ca vākyamaṃ.

Yathā –

102. Kusalākusalaṃ abyā-kata’miccesu pacchimaṃ; Abyākataṃ pākadaṃ na, pākadaṃ paṭhamadvayaṃ.

102. “Yathe”tyudāharati **“kusale”**ccādi. **Kusalaṃ** kāmāvacarādikamekavīsatividham, **akusalaṃ** dvādasavidham, **abyākataṃ** vipākakriyāsaṅkhātami **etesu** tīsu **pacchimaṃ** abyākataṃ, pākamaṃ vipākamaṃ dadātīti **pākadaṃ**. **Neti** nipātapadaṃ. **Paṭhamadvayaṃ** kusalākusalaṃ pākamaṃ dadātīti **pākadanti**. Ettha apākadattaṃ abyākatasseva, pākadattaṃ tesameva dvinnanti viseso daṭṭhabbo.

102. “Kusale”ccādi. **Kusalaṃ** kāmāvacarādiekavīsatikusalaṃ **akusalaṃ** dvādasavidham akusalaṃ **abyākataṃ** vipākakriyārūpanibbānavasena catubbidhamabyākataṃ **iccesu** evametesu tīsu **pacchimaṃ** uddesakkamena pacchimamabyākataṃ **pākadaṃ na** vipākadāyakaṃ na hoti, **paṭhamadvayaṃ** kusalākusalaṃ **pākadaṃ** yathāsakaṃ vipākadāyakaṃ hotīti. “Yathāsaṅkhyamanudeso samāna”nti [pāṇini 1.3.10 suttamidaṃ. **anudissate iti anudeso, pacchā uccārīto iccattho “samānaṃ”iti sambandhechaṭṭhī (katvabodhinī)**] vuttattā uddiṭṭhehi samānamanuddiṭṭhānameva samasaṅkhyāya labbhamānattā saṅkhyāyānatikkamo hoti. Ettha pana kusalādisabhāvato tividhattepi vipākadānādānavasena duvidhakusalākusalādivisayabhūtavisesassa pavattiyā vatticchāto paṭhamamaṃ vattabbataṃ vinā kamena nissayanaṃ nāma natthīti apakkamadoso na hotīti.

103. Saguṇānā’vikaraṇe, kāraṇe sati tādise; Ocikyahīnatāpatti, natthi bhūtatthasaṃsino.

103. “Saguṇāna”miccādi. Sotūnaṃ attatthanipphādanādike tādise **kāraṇe** hetumhi sati **bhūtaṃ** yathāpavattaṃ **atthaṃ** attano caritalakkhaṇaṃ **saṃsino** vadantassa sassa attano, sānaṃ vā guṇānaṃ **āvikaṇe** adhikārasena “pūjanīyataro loke”iccādikathane ocikyahīnatāya **āpatti** pāpuṇanaṃ sambhavo natthi.

103. “Saguṇi”ccādi. **Tādise kāraṇe sati** sotūnaṃ attatthanipphādanādike tādise hetumhi vijjamaṇe **bhūtatthasaṃsino** attani vijjamaṇakāyādisaṃvaralakkhaṇaguṇasaṅkhātamatthaṃ “pūjanīyataro loke ahameko”iccādinā tādīsāvasare vadantassa **saguṇānaṃ** sassa attano, sānaṃ vā

sakānaṃ guṇānaṃ **āvikaṛaṇe** pākaṭīkaṛaṇe **ocityahīnatāpatti** ocityahīnasāṅkhātadosassāpatti natthīti. **Sasaddassa** attaattaniyavācakkattā sassa attano guṇā se ca te guṇā ceti vā viggaho. Bhūtoyeva attho, taṃ saṃsati vadati sīlenāti viggaho.

**104. Ocityaṃ nāma viññeyyaṃ, loke vikhyātamādarā;
Tattho'padesapabhavā, sujanā kavipuṅgavā.**

104. “Ocitya”miccādi. **Loke** sattaloke **vikhyātaṃ** pasiddhaṃ ābālayanāṃ [[ābālayanāṃ \(ka.\)](#)] yathāsakamanurūpaṃ vijānānato **ocityaṃ** ucitabhāvo nāmeti pasiddhiyaṃ **ādarā** ādarena ussāhena tato paramādarāṇīyassābhāvato, na hi anucitaṃ kiñci kenāpyādarāṇīyaṃ sabbathā anassādanīyattā, viññeyyaṃ “sotūna”nti seso. **Tattha** tasmim ocitye **upadesassa** paṭhamuccāraṇassa uggaṇhāpanavasena pavattassa **pabhavā** uppattiṭṭhānabhūtā **sujanā** suṭṭhujanā **kavipuṅgavā** uttamā, [[kaviuttamā \(?\)](#)] kaviseṭṭhāti vuttam hoti.

104. “Ocitye”ccādi. **Loke** sattaloke **vikhyātaṃ** ābālapasiddhaṃ ocityaṃ nāma **ādarā** gāravena **viññeyyaṃ** viññūhi ñātabbaṃ hoti, **tattha** ocityavisaye **upadesapabhavā** paṭhamuccāraṇassa uppattiṭṭhānabhūtā **sujanā** sādhujanabhūtā **kavipuṅgavā** uttamakavayo bhavantīti, pasiddhaocityapadena yuttattā ettha **nāmasaddo** pasiddhiyaṃ. Upadesassa pabhavāti ca, pumāno ca te gāvo ceti ca, kavīnaṃ puṅgavāti ca vākyam.

**105. Viññāto cityavibhavo-
Cityahīnaṃ parihare;
Tato'cityassa sampose,
Rasaposo siyā kate.**

105. “Viññāta”miccādi. Viññāto avabuddho yathāvuttakavivarapasādā ocityameva **vibhavo** sampatti yena so ocityahīnaṃ nāma dūsaṇaṃ **parihare** parivajjeyya. **Tato** tasmā parihārato hetuto ocityassa **sampose** suṭṭhu vaḍḍhibhāve vaḍḍhane kate **rasassa** assāditabbatāsāṅkhātassa mādhuriyassa samposo **siyā** bhaveyya.

105. “Viññāte”ccādi. **Viññāto cityavibhavo** tādisakavīnāmanuggahena viññāto cityasāṅkhātasampattisamannāgato kavi **ocityahīnaṃ** nāma dūsaṇaṃ **parihare** nirākareyya, **tato** dosaparihārato ocityassa **sampose** upabrūhane kate sati **rasaposo** mādhuriyasāṅkhatassa assādetabbassa pūraṇaṃ **siyā** bhaveyyāti. Ocityameva vibhavoti ca, viññāto ocityavibhavo yenetī ca, rasassa poso puṭṭhabhāvo [[vuddhabhāvo \(ka.\)](#)] posetabbabhāvoti ca vākyam.

Yathā –

**106. Yo mārasenamāsanna-māsannavijayussavo;
Tiṇāyapi na maññittha, so vo detu jayaṃ jino.**

106. “Yathe”tyudāharati “yo”iccādi. **Vijayo** parābhibhavo āsanno vijayo eva **ussavo** abbhudayo nippaṭipakkhā pavatti yassa ediso yo **āsannaṃ** attano samīpamupagataṃ mārasenaṃ **tiṇāyapi na maññittha** tiṇampi na maññittha, tiṇatopi hīnaṃ maññittha, **so jino** māraji **vo** tumhākaṃ jayaṃ **detūti** vidadhātu. Ettha jayāsīsanā “jino”ti accantamucitaṃ, yo ajini pañcamāreti jino parābhibhavekaraso, tassa paresaṃ vijayappadāne sāmattiye kayogo siyāti. “Mārasenamāsannaṃ tiṇāyapi na maññittha”ti idaṃ panettha atisamucitaṃ yato samīpamupagatampi tādisaṃ mārasenaṃ tiṇatopi hīnaṃ maññi, tenassa paresaṃ vijayappadānekarasatā visesato yuttāti.

106. Iha satthe sabbattha saṅkhepakkamamicchantopi ācariyo ocityaṃ nāma ādarena saggarūhi uggaṇhitvā payujjitabbamiccevaṃ vitthārena sisse anusāsītva idāni ocityahīnapariharaṇatthaṃ “**yo mārasenamāsanne**”ccādinā lakkhiyamudāharati. **Āsannavijayussavo** adūrasattuvijayasāṅkhātaussavo, atha vā accāsannaṃ paṭipakkhāviraḥappavattisaṅkhātaabhivuddhiyā

samannāgato yo jino **āsannaṃ** anekappakārabhiṃsanakarūpena attano samīpamāgataṃ **mārasenaṃ** mārabalaṃ **tiṇāyapi** tiṇalavaṃ katvāpi **na maññittha** sallakkhaṇaṃ nākāsi, **so jino** so jitapañcamāro **vo** tumhākaṃ jayaṃ detūti. Ettha yo pañcamāre jitattā jino nāma hoti, so parābhībhavane asahāyakkiccatā paresaṃ jayadāne sāmattihiyayuttoti “jayaṃ detū” ti kataṃ jayāsīsanamatiucitaṃ hoti, jayadāne sāmattihiyasēva posakattā. “Mārasenamāsannaṃ tiṇāyapi na maññitthā” ti idaṃ vattabbameva natthīti. Evaṃ accantaucitapayogena ocityahīnadoso nirākatoti. Vijayo eva ussavo, āsanno vijayussavo yasseti viggaho.

**107. Āraddhakattukammādi-kamātikkamalaṅghane;
Bhaggarītivirodho’yaṃ, gatim na kvāpi vindati.**

107. “**Āraddha**”iccādi. Kattā ca kammañca tāni ādīni yesaṃ karaṇādīnaṃ **āraddhāni** vattuṃ paṭṭhapitāni kattukammādīni tesāṃ kamo tassa **atikkamo** pariccāgo tassa laṅghane sati, vattumāraddhakattukammādikamānatikkameti vuttaṃ hoti. Ayaṃ yathāvutto bhaggarītivirodho **kvāpi** katthacipi thāne **gatim na vindati** patiṭṭhaṃ na labhate.

107. “**Āraddhi**”ccādi. **Āraddhakattukammādikamātikkamalaṅghane** vattumāraddhakattukammādīnaṃ kamapariccāgassātikkame ayaṃ yathāvuttabhaggarītivirodho **kvāpi** katthacipi thāne **gatim** patiṭṭhaṃ **na vindati** na labhateti. Āraddhāni ca tāni kattukammādīni yesaṃ karaṇādīnaṃ tesāṃ kamassa atikkamo tassa laṅghananti viggaho.

Yathā –

**108. Sujanaññāna’mitthīnaṃ, vissāso no’papajjate;
Visassa siṅgino roga-nadīrājakulassa ca.**

**109. Bhesajje vihite suddha-buddhādiratanattaye;
Pasāda’mācare niccaṃ, sajjane saguṇepi ca.**

108-109. Ettha ca “sujana” miccādike “bhesajje”iccādike ca gāthādvaye chaṭṭhiyā, sattamiyā ca apariccāgena nātharītiyā bhaṅgo, **cakārassekassa** katattā na saddarītiyā bhaṅgo. Bahūnamatthānañhi samuccayatthaṃ vākye eko vā cakāro kātabbo paṭipadaṃ vā.

108. “**Sujane**”ccādi. **Sujanaññānaṃ** sajjanehi aññesaṃ dujjanānañca itthīnañca **visassa** jīvitaharaṇasamatthassa **siṅgino** viṣānavato ca roganadīrājakulassa ca **vissāso** saṃsaggo **na upapajjate** kiñcikāle virujjanato na yujjateti. Ettha āraddhassa chaṭṭhantakkamassa sabbattha apariccāgato attharītibhaṅgo ca, yuttaṭṭhāne ekasseva cakārasa yuttattā saddarītibhaṅgo ca natthi. **Casaddassa** anekatthasamuccayattā “sujanaññānañcā”tiādimhi vā, iha vuttaniyāmena avasāne vā, sabbattha vā yojanamarahati.

109. “**Bhesajje**”ccādigāthāyampi eseva nayo sattamīmattameva viseso. **Vihite** pathye **bhesajje** osadhe ca suddhabuddhādiratanattaye ca **sajjane** sādhujaṇe ca **api** punapi **saguṇe** vijjamānaguṇe ca **pasādaṃ** attano cittapasādaṃ **niccaṃ** satataṃ **ācare** sappuriso kareyya seveyyāti.

Sasaṃsayassa yathā –

**110. Munindacandimāloka-
Rasalolavilocano;
Jano’vakkantapantho’va,
Raṃsidassanapīṇito.**

110. “**Muninde**”ccādi. Ettha **raṃsisaddo** sasaṃsayāṃ pariharati.

110. Sasaṃsayaparihāralakkhiyabhūtā “**munindi**”ccādigāthā anantaraparicchede vuttatthāva.

Raṃsisaddoyeva hi viśeso, ettha **raṃsisaddena** suṇantānaṃ uppajjamānasamṣayena saṃsaṃsayabhūtaṃ bandhadosaṃmohatīti.

**111. Saṃsayāyeva yaṃ kiñci, yadi kīḷādihetunā;
Payujjate na doso’va, saṃsaṃsayasamappito.**

111. “**Saṃsaye**”ccādi. **Kīḷādīti** ādisaddena ākiṇṇasammantanādiṃ saṅgaṇhāti, kīḷādihetunā yaṃ kiñci saṃsayāyeva yadi payujjateti sambandho.

111. “**Saṃsayāyeye**”ccādi. **Kīḷādihetunā** kīḷāsambādhasammantanādikāraṇena **yaṃ kiñci** saṃsayuppādanasamattamaṃ yaṃ kiñci padaṃ **saṃsayāya eva** sotūnaṃ uppajjamānasamṣayatthameva **yadi payujjate** tasmim bandhane vattārehi payujjate ce, **saṃsaṃsayasamappito** saṃsaṃsayadosasahito bandho **na dosova** aduṭṭhovāti. Saṃsaṃsayena samappitoti viggaho.

Yathā –

**112. Yāte dutiyaṃnilayaṃ, gurumhi sakagehato;
Pāpuṇeyyāma niyatam, sukha’majjhayanādinā.**

112. “**Yāte**”ccādi. **Gurumhi** ajjhāpake **sakagehato** attano mūlanilayato **dutiyaṃ nilayaṃ** dutiyaṃ gharaṃ yāte sati **niyatamekanta**majjhayanādinā sukhaṃ pāpuṇeyyāmāti ayamanicchitatto. **Gurumhi** surācariye [suraccācariye (ka.)] **sakagehato** attano jātārāsito **dutiyaṃ nilayaṃ** dutiyaṃ rāsīm yāte sati niyatamajjhayanādinā sukhaṃ pāpuṇeyyāmāti ayamettha icchitatto.

112. “**Yāte**”ccādi. **Gurumhi** ācariye **sakagehato** attano vāsāgārato **dutiyaṃ nilayaṃ** dutiyaṃ gharaṃyāte sati, ayamanicchitatto. **Gurumhi** surācariye **sakagehato** attano jātārāsito **dutiyaṃ nilayaṃ** dutiyaṃ rāsīm **yāte** gate sati anukūlātā **niyatamekanta**na **ajjhayanādinā** uggahaṇādinā **sukhaṃ** mānasikasukhaṃ, no ce sukhakāraṇaṃ ganthaparisaṃmattim pāpuṇeyyāmāti. Ubhayapakkhassāpi aparatthe attho sādharmaṇo hoti. Ettha **ajjhayanāsaddasannidhānena** payutta**gurusaddassa** ācariyatthavācakattepi icchitattagopanattamaṃ payuttatā aduṭṭhoti.

**113. Subhagā bhaginī sā’yaṃ, etassi’ccevamādikaṃ;
Na “gāmma”miti niddiṭṭham, kavīhi sakalehipi.**

113. “**Subhagā**”iccādi. **Icevamādikaṃ** bhaginīccevamādikaṃ.

113. “**Subhage**”ccādi. **Etassa** purisassa sā ayaṃ bhaginī **subhagā** sundarāti icevamādikaṃ sakalehi kavīhi api **na gāmmamiti** gāmmadosena na duṭṭhamiti niddiṭṭhanti. Subhaṃ sundarabhāvaṃ gatāti “subhagā”ti aggahetvā bahubbīhisamāse kate labbhamānatthassa asabbhābhāvepi kavīnaṃ cittakhedam na janetīti adhippāyo. Iti evaṃ ayaṃ pakāro ādi assa īdisassa vākyassāti vākyam.

**114. Duṭṭhālaṅkāravigame, sobhanālaṅkatikkamo;
Alaṅkāraparicchede, āvibhāvaṃ gamissati.**

114. “**Duṭṭha**”iccādi. Duṭṭhālaṅkāraṃsa dosadūsitassa alaṅkāraṃsa **vigame** apagame sati.

114. “**Duṭṭhi**”ccādi. **Duṭṭhālaṅkāravigame** dosaduṭṭhassa alaṅkāraṃsa apagame sati **sobhanālaṅkatikkamo** pasatthānamalaṅkāraṃsa pavattiākāro **alaṅkāraparicchede** alaṅkārapakāsakattā tannāmake paricchede **āvibhāvaṃ** pakāsattaṃ **gamissati** pāpuṇissatīti. Paricchijjatīti paricchedo. Alaṅkārapakāsakattā tadatthena alaṅkāro ca so paricchedo ceti viggaho.

115. Dose parīharitumesa varo’padeso,

**Satthantarānusaraṇena kato mayevaṃ;
Viññāyi'maṃ guruvarāna'dhikappasādā,
Dose paraṃ parihareyya yasobhilāsī.**

Iti saṅgharakkhitamahāsāmpādaviracite

Subodhālānkāre

Dosaparihārāvabodho nāma

Dutiyo paricchedo.

115. “Dose”iccādi. Dose yathāvutte padadosādike **pariharitum** pariccajitum eso **varo** uttamo upadeso satthantarānaṃ bahūnaṃ **anusaraṇena** anugamena [anupagamena (ka.)] mayā evaṃ **kato** nipphādito, **imaṃ** upadesaṃ guruvarānaṃ **adhikappasādā** mahatā pasādēna na appakena, tathāvidhena tādissa mahato atthassa apasijjhanato, **viññāya** jānitvā ādarato kareyya **dose** yathāvutte dose **yaso** parisuddhabandhanaṃ kriyālakkaṇato ekantena kittihetuttā, taṃsabbhāvā kitti vā, taṃ abhilaṣati sīleneti **yasobhilāsī paraṃ** accantameva **parihareyya** dūrato kareyya.

Iti subodhālānkāre mahāsāmināmikāyaṃ ṭikāyaṃ

Dosaparihārāvabodhaparicchedo dutiyo.

115. “Dose”ccādi. Dose yathāvuttapadosādike **pariharitumapanetum** **varo** uttamo **eso** upadeso **satthantarānusaraṇena** bahūnaṃ bāhirasatthānaṃ anussatiyā mayā evaṃ anantaruddiṭṭhakkamena **kato** viracito, **imaṃ** upadesaṃ guruvarānaṃ **adhikappasādā** adhikappasādēna **viññāya** sabhāvato ṇatvā **yasobhilāsī** yasapaṭilābhakāraṇattā kāraṇe kāriyopacāreṇa dosāpagamena parisuddhabandhanaṃ vā tādīsabandhanahetu uppajjamānakittiṃ vā icchanto paññavā **dose** yathāvuttadose **paraṃ** atisayena **parihareyya** dūrato kareyyāti. Ettha pubbaddhena dosaparihāraparicchedassa pasatthabhāvo dassito, aparaddhena sissajanānusāsanam dassitaṃ hoti. Tathā pubbaddhena karuṇāpubbaṅgamaṃ paññākkiccaṃ dassitaṃ, aparaddhena paññāpubbaṅgamaṃ karuṇākkiccaṃ dassitaṃ. Tathā pubbaddhena atthitasampatti, aparaddhena parahitasampatti dassitāti. Evamanekākāradīpikāya imāya gāthāya paricchedaṃ nigameti. Aññe sathā **satthantarā**, **antarasaddo** hi **aññasadda**pariyāyo. Yathā “gāmantaraṃ na gaccheyyā”ti. Yasam abhilaṣati sīlenāti vākyam.

Iti subodhālānkāranissaye

Dutiyo paricchedo.

3. Guṇāvabodhapariccheda

Anusandhivaṇṇanā

**116. Sambhavanti guṇā yasmā,
Dosāne'va'matikkame;
Dassessaṃ te tato dāni,
Sadde sambhūsayanti ye.**

116. Evaṃ dosaparihāropadesaṃ dassetvā idāni dosaparihārā samupagataṃ upadassitumadhikāraṃ viracayanto āha “**sambhavanti**”iccādi. **Dosānaṃ** yathāvuttānaṃ padadosādīnaṃ **evaṃ** yathāvuttanayena atikkame sati **guṇā** dhammā saddālānkārasabhāvā pasādādayo **yasmā** kāraṇā **sambhavanti** sijjhanti, tañca “pasādo kiliṭṭhādīnaṃ vajjanā sambhavati”tyādīnā yathāyogaṃ viññeyyaṃ, **tato** tasmā kāraṇā **ye** guṇā sadde **sambhūsayanti**

alañkaronti, **te** saddālañkārasañkhāte guṇe idāni **dassessam** upadisissāmi.

116. Evaṃ dosaparihārapavesopāyaṃ dassetvā idāni yathāvuttadosānaṃ parihārena “bandhanissitagunā ete”ti dassetuṃ pubbāparaparichedānaṃ sambandhaṃ ghaṭento “**sambhavanti**”ccādigāthamāha. **Dosānaṃ** niddiṭṭhapadadosādīnaṃ **evaṃ** anantaraparichede niddiṭṭhakkamena atikkame sati **guṇā** pasādādisaddālañkārasañkhātā pasādādayo saddadhammā yasmā sambhavanti, tato **ye** saddadhammā sadde **sambhūsayanti** sajjanti, **te** saddadhamme **dassessam** pakāsissāmi. Ettha kiliṭṭhadosa byākīṇṇadosaparihārehi pasādālañkāro sijjhati, sesāpi yathālābhato ñātabbā.

Saddālañkārauddesavaṇṇanā

117. **Pasādo’jo madhuratā,
Samatā sukhumālatā;
Silesa’dāratā kanti,
Atthabyattisamādhayo.**

117. Idāni te vibhajati “**pasādo**”iccādinā pasatthi **pasādo** pakāsattatā, **ojo** samāsavuttibāhullaṃ atthapāriṇatyañca, **madhuratā** saddānaṃ rasavantatā, **samatā** pajjāpekkhāya catunnaṃ pādānamekajātiyasambandhatā, gajjāpekkhāya tu padānaṃ, **sukhumālatā** aphaṇasakkharabāhullaṃ, silesanaṃ **silesa** bandhagāraṃ, **udāratā** ukkaṃsatā kenaci atthena sanāthatā viṣiṭṭhavisesanayuttatā ca, **kanti** sabbalokamanoharatā, **atthabyatti** siddhena ñāyena vā abhidheyassa gahaṇaṃ, **samādhī** lokappatītyanusāriamukhyatthata, tesu ojaudāratā saddatthagunā, samādhī atthaguno, atthānugāmīttā ettha saddānaṃ, aññe tu saddagunāva.

117. Idāni “**pasādojo**”iccādinā te saddālañkāre kamena vibhajitū uddisati. **Pasādo** pasannaphalīkāvali attani āvunitarattakambalasuttamiva saddānaṃ atthassa pasādanasañkhāto pasādālañkāro ca, **ojo** samāsavuttibāhulyaatthapāriṇatyañcañkhato saddatthānaṃ guṇo ca, **madhuratā** saddānaṃ rasavantabhāvasañkhātakaṇṇamadhuratā ca, **samatā** pajje pādassa sutito sadisatā ca, gajje padānaṃ tatheva sadisatāti evaṃ pādānaṃ padānañca tulyagunatā ca, **sukhumālatā** vaṇṇānaṃ atīphaṇasaatisithilabhāvaṃ vinā samappamāṇamuduguno ca, **silesa** ṭhānakaraṇādisambhūtasabhāgavaṇṇasutīhi acchiddaguruguno ca, **udāratā** ukkaṭṭhena kenaci atthena bandhassa sajjitabhāvo ca, viṣiṭṭhavisesanapadena yuttatā ca, **kanti** sabbesaṃ piyagunatā ca, **atthabyatti** icchitathassa siddhena vā nyāyena vā supākāṭabhāvo ca, **samādhayo** lokappatītanatikkantaaññadhammāropanena amukhyatthata cāti ime saddatthagunā dasa honti. “Samādhayo”ti tasseva bahuttaṃ dīpeti, imesu dasasu ojadāratāti dve saddatthagunā, samādhī atthaguno pariyañena tadatthajotakasaddagunopi, sesā satta saddagunā eva, ete sabbepi alañkaronti bandhamañenāti vākyena **alañkāra** nāma.

Saddālañkārapayojanavaṇṇanā

118. **Guṇhe’tehi sampanno, bandho kavimanoharo;
Sampādayati kattūnaṃ, kittimaccantanimmalaṃ.**

118. “**Guṇehi**”ccādi. **Etehi**eva vuttehi dasahi **guṇehi** dhammehi saddālañkārasabbhāvehi **sampanno** yutto samiddho vā kavīnaṃ mano harati savase vattetīti **kavimanoharo** kavīhadayañhilādakārī bandho **kattūnaṃ** bandhantānaṃ kavīnaṃ **accantanimmalaṃ** atīsaṃparisuddhaṃ agunalesenāpa’nālimpattā **kittim** guṇaghoṣaṃ **sampādayati** nipphādeti.

118. “**Guṇe**”ccādi. **Etehi guṇehi** imehi saddālañkārasañkhātadasavidhasaddadhammehi **sampanno** samannāgato samiddho vā **bandho** pajjādibandho **kavimanoharo** attano niravajjattā kavīnaṃ cittaṃ pīṇento **kattūnaṃ** racayantānaṃ **accantanimmalaṃ** appakadosenāpi asammissattā atīsaṃparisuddhaṃ **kittim** bandhanavisayabhūtasorāsīm **sampādayati** nipphādetīti. Iminā karaṇena bandhassa yathāvuttadasavidhagunapariggaho saussāhaṃ kātābhoti adhippāyo. Mano haratīti

manoharo, kavīnaṃ manoharo **kavimanoharoti** viggaho.

Saddālaṅkāraniddesaṃ

119. Adūrāhitasambandha-subhagā yā padāvali; Supasiddhābhidheyyā'yam, pasādam janaye yathā.

119. Idāni yathoddesānamesam niddesam sodāharaṇam karonto āha “**adūra**”iccādi. **Adūre** āsanne adūrena vā adūrāhitakriyākattukammādipadavasena **āhito** ṭhapito kato **sambandho** anvayo, tena **subhagā** manoharā **supasiddho** suppakāso sugammo **abhidheyyo** attho yassā sāti tathā, na tu bhāvattho tassa sabhāvagambhīrattā. Vuttañhi –

“Kavīna'dhippāya'masaddagocaram,
Pade phurantaṃ mudukamhi kevalam;
Visanti bhāvāvagamā katassamā,
Pakāsayantī'katiyo tu tādisā'ti.

Tādisā yā **padāvali** padapanti ayam **pasādam** tannāmakam guṇam **janaye** uppādayati. **Yathāti** tamudāharati.

119. Idāni uddesakkamena etesam saddālaṅkāradīnaṃ niddesam sodāharaṇam dassento āha “**adūrāhite**”ccādi. **Adūre** āsannapadese tadupacārena āsanne vā **āhito** kriyāya, laddhakriyāyogakattukammādipadānaṃ vasena ca kato, no ce vinyāsavasena ṭhapito vā **sambandho** icchitatthapatītikkamena aññamaññāpekkhalakkhaṇakriyākārakayogo tena **subhagā** manoharā, **supasiddho** pasiddhatthavisaye saddapayogato atipākaṭo **abhidheyyo** saddattho yassā sā ayam **padāvali** padapanti **pasādam** pasādanāmakam guṇam **janaye** uppādayati. **Yathāti** lakkhiyam dasseti. Adūre āhitoti vā, upacaritattā adūro ca so āhito cāti vā, so ca so sambandho ceti ca, tena subhagāti ca, **su** atisayena pasiddhoti ca, so abhidheyyo asseti ca vākyam. Ettha supasiddho nāma saddattho, adhippāyattho pana pakatigambhīro. Vuttañhi –

“Kavīna'dhippāya'masaddagocaram,
Pade phurantaṃ mudukamhi kevalam;
Visanti bhāvāvagamā katassamā,
Pakāsayantī'katiyo tu tādisā'ti.

Tassattho – **asaddagocaram** saddassa avisayam hutvā mudukamhi pade **kevalam** visum **phurantaṃ** cāpentaṃ **kavīnadhippāyam** kavīnamajjhāsayaṃ **katassamā** saddatthavisaye kataparicayā paṇḍitā **bhāvāvagamā** padatthāvabodhena **visanti** pavisanti, tādisā **ākatiyo** tu saddasaddatthānaṃ ākāra **pakāsayanti** adhippāyattham jotenti.

120. Alaṅkarontā vadanam, munino'dhararamsiyo; Sobhante'ruṇaramsi'va, sampatantā'mbujodare.

120. “**Alaṅkarontā**”iccādi. **Munino** sammāsambuddhassa **vananam** sabhāvamadhurapakatimukham **alaṅkarontā** sajjantā sobhayamānā adharānaṃ **ramsiyo** supakkabimbaphalopamaoṭṭhayugaḷavinissaṭabāhutarakanticchitābhā muninoti viññāyati sutattā. **Ambujodare** tā kālopanatapupphakāsaramaṇīye padumabbhantare **sampatantā** pavattamānā **aruṇaramsiya** bālasūriyaramsiyo viya **sobhante** virājanti.

120. “**Alaṅkaronte**”ccādi. **Munino** vadanam pakatisundaramukham alaṅkarontā sajjantā **adhararamsiyo** tasseva munino oṭṭhadvayato nikkhantakantisamūhā **ambujodare** vikasanānurūpakālābhimukhe padumagabbhe upaḍḍhavikasitetti vuttam hoti. **Sampatantā** pavattamānā **aruṇaramsiya** bālasūriyaramsiya **sobhante** dibbantīti. Ettha adūrasambandham pasiddhatthañca nissāya pasādaguṇo pākaṭo. Adhararamsiṇam munisambandho

sutānumitasambandhesu sutasambandhassa balavattā [sutānumitesu sutasambandho balavā (paribhāsendusere 112)], kākakkhigoḷakanayena vā labbhatīti. Adhare raṃsīti ca, ambujassa udaranti ca vākyam.

**121. Ojo samāsabāhulya-
Meso gajjassa jīvitam;
Pajjepya'nākulo so'yam,
Kanto kāmīyate yathā.**

121. “Ojo”iccādi. Samāsassa ekatthavuttiyā **bāhulyam** bhīyyobhāvo ityanuvaditvā puna ojo vidhīyate, **eso** ojo samāsabāhullalakkhaṇo **gajjassa** vuttirūpassa **jīvitam** hadayam sāraṃ tappadhānattā gajjassa, na pajjassa, **soyam** ojo **anākulo** agahano atoyeva **kanto** hadayaṅgamo, **pajjepi** na kevalam gajje **kāmīyate** payujjate. **Yathetyudāharati.**

121. Idāni ojaguṇam dasseti “**ojo**”ccādinā. Ojo nāma **samāsabāhulyam** bhinnatthesu pavattasaddānam ekatthapavattilakkhaṇassa samāsassa bahulatā, **eso** ojo **gajjassa** gajjabandhassa **jīvitam** hadayam, jīvitasīsenā hadayasāṅkhatam cittam vuttanti vedītabbam. **So ayam** ojo **anākulo** nibyākulo **kanto** tatoyeva viññūnam piyabhūto **pajjepi** pajjabandhepi **kāmīyate** kavīhi payujjateti. Bahulassa bhāvo **bāhulyam**, samāsassa **bāhulyanti** viggaho. Gajjabandhādīkārassābhāvā pajjavīsayaṇassa ojaguṇassa lakkhiyam dasseti “**yathe**”ccādinā.

**122. Munindamandasañjāta-hāsacandanalimpitā;
Pallavā dhavalā tasse-vekonā'dharapallavo.**

122. “Muninda”iccādi. Munindassa **mandam** īsakam **sañjāto** pavatto taṃsabhāvattā bhagavato hāsassa [yasassa (ka.)] **hāso** hasitam sova candanamiva **candanam** dhavalattarūpattā, tena **limpitā** upadehitā **pallavā** sabbāni kilasayāni “idameve”ti niyamābhāvato, **dhavalā** pakativāṇṇapariccāgena sukkā ahesuṃ gāhāpitattā saguṇassa tādisavisiṭṭhassa paṭilābhato, evam santepi **tassa** munindasseva **eko** aññassa tādisassābhāvā **adharapallavo na dhavalo** dhavalo nāhosi. Accāsannadesiyopi bahumantabbo'ya'massānubhāvoti.

“Pemāvabandhahadaye sadaye jinasmiṃ,
Tasmiṃ nu kiṃ kumatayo bhavatha'ppasannā;
Kiṃ tena vo **na** vihitam hita'muggadugga-
Saṃsārasāgarasamuttaraṇāvāsānam”.

Iccaparamudāharaṇam. Evametādiso anākulo kanto ojo jānitabboti. Nanu ca **ya-tasaddānam** nicco sambandho, tasmā katham “tasseveko nādhārapallavo”ti ettha **yasaddābhāvoti**? Saccam, kintu pakkantavisayo, tathā pasiddhavisayo, anubhūtavīsayo ca **tasaddo yasaddam** nāpekkhate. Yathā –

“Savāsane kilese so, eko sabbe nighātiya;
Ahu susuddhasantāno, pūjānañca sadāraho”.

Iccādi. Ettha buddho “buddhānussatimādito”ti **pakkanto.**

Pasiddhavisayo yathā –

“Aggiṃ pakkhanda' atha vā, 'pabbataggā pate'ti vā;
Yadi vakkhati kattabbam, ñātakārīhi so jino”.

Iccādi.

Anubhūtavīsayo yathā –

“Atītaṃ nānusocāmi, nappajappāma’nāgataṃ;
Paccuppannaena yāpemi, tena vaṇṇo pasīdati”.

Iccādi.

Yasaddo tuttaravākyatṭho pubbavākye **tasaddameva** gamayati. Yathā –

“Bodhiṃ namāmi natibhājanamacculāraṃ,
Puññākaraṃ bhuvanamaṇḍalasotthibhūtaṃ;
Yo cakkhusotasatigocarataṃ sameto,
Dosāridappamathane’karaso budhānaṃ”.

Iccādi.

Pubbavākyopātto tu **yasaddo** uttaravākye **tasaddopādānaṃ** vinā sākaṅkhe vākyassa ūnattaṃ janeti. Ettha pakkantavisayo **tasaddo**.

122. Munindassa **mandaṃ** īsakaṃ **sañjāto** pavatto **hāso**eva sitaṃ candanacuṇṇamiva tena **limpitā** ālepitā **pallavā** rukkhalatādīnaṃ pakatirattāni kisalayāni **dhavalā** saguṇapariccāgena setā ahesuṃ, tathāpi **tasseva** tathāgatassa **eko** atulo asahāyo vā **adharapallavo** dantāvaraṇasaṅkhātappallavo **na** raṃsisamaṣaṭṭhopi samīpaṭṭhopi **dhavalo** seto nāhosi. Evamettha agahanasamāsabhūlyamaṃ dīpitaṃ hoti.

“Pemāvabandhahadaye sadaye jinasmim,
Tasmim nu kim kumatayo bhavatha’ppasannā;
Kim tena vo na vihitam hita’ muggadugga-
Saṃsārasāgarasamuttaraṇāvasāna’nti.

Aparamudāharaṇaṃ. Tassattho – **kumatayo** he aññāṇā! **Pemāvabandhahadaye** sabbesu tumhesu niccaṃ pavattitadāḥapemānubandhacitte **sadaye** tatoyeva dayāsahite **tasmim jinasmim** visayabhūte **kim nu** kasmā appasannā bhavatha, tathā hi **vo** tumhākaṃ **tena** jinena **uggo** dāruṇo ca, **duggo** gantumasakkuṇeyyo ca, soyeva saṃsārasāgaro tassa samuttaraṇaṃ pariyantappattiyeva **avasānaṃ** yassa taṃ **na vihitam** akataṃ **hitam** vuddhi nāma kim hoti, na hoteva. Etthāpi samāsassa pākaṭṭā ojo guṇo kanto hotīti.

Nanu **ya-tasaddānaṃ** nicasambandhoti kathaṃ “tasseveko”ti ca “tasmim nu kim kumatayo”ti ca iccādīsu heṭṭhā vuttayasaddo natthīti? Saccaṃ, tathāpi pakkantatthavisayo, pasiddhatthavisayo, anubhūtatthavisayo vā **tasaddo yasaddaṃ** nāpekkhati. Tathā hi –

“Savāsane kilese so, eko sabbe nighātiya;
Ahu susuddhasantāno, pūjānaṅca sadāraho”ti.

Evamādīsu “so”ti niddiṭṭhata **tasaddo** “buddhānussatimādito”ti ettha atītena buddhasaddena vacanīyavisayo hoti.

“Aggiṃ pakkhanda’ athavā, ‘pabbataggā pate’ti vā;
Yadi vakkhati kattabbaṃ, ñātakārīhi so jino”ti.

Evamādīsu **tasaddo** ñātakārīhi kattabbattā pasiddhabuddhapadatthavisayo.

“Atītaṃ nānusocāmi, nappajappāma’nāgataṃ;
Paccuppannaena yāpemi, tena vaṇṇo pasīdati”ti.

Evamādīsu **tasaddo** ananusocananappajappanayāpanasaṅkhātavijānanavasena anubhūtatthavisayo,

tasmā tīsupi t̄hānesu **tasaddo yasaddaṃ** nāpekkhate. Ettha pana pakkantavisayo **tasaddo** adhippeto. Apica uttaravākye t̄hito **yasaddo** pubbavākye **tasadde** asatipi tameva dīpeti. Tathā hi –

Bodhiṃ namāmi natibhājanamacculāraṃ,
Puññākaraṃ bhuvanamaṇḍalasotthibhūtaṃ;
Yo cakkhusotasatigocarataṃ sameto,
Dosāridappamathane'karaso budhānanti.

Yo budhānaṃ cakkhusotasatīnaṃ **gocarataṃ** visayabhāvaṃ **sameto** patto, tesamyeva **dosārīnaṃ** kilesapaccatthikānaṃ **dappamathane** dappamaddane **ekaraso** padhānakicco samiddhivanto vā hoti, taṃ bodhiṃ namāmīti sambandho. Pubbavākye payojito **yasaddo** uttaravākye **tasaddopādāne** asati saṃsayamuppādayamāno vākyassa ūnattaṃ karoti. Udāharaṇaṃ pana pākaṭaṃ.

**123. Padābhidheyvisayaṃ,
Samāsabyāsasambhavaṃ;
Yaṃ pāriṇatyam hoti'ha,
Sopi ojova taṃ yathā.**

123. “Padi”ccādi. Padassa **abhidheyyo** attho so visayo yassa. Yattha pacurasaddābhidheyyo attho saṃkhittapadehi vuccate, so **samāso**. Yatthappakehi padehi abhidheyyattho pacurapadehi vuccate, so **byāso**. Tato samāsabyāsatō sambhavo yassa. Taṃ tathāvidhaṃ yaṃ **pāriṇatyam** pariṇatabhāvo hotīti anuvaditvā sopi **iha** sasatthe **ojovāti** vidhīyate. **Taṃ yathetyubhayampi** udāharati.

123. “Pade”ccādi. **Padānaṃ** bahūnaṃ appakānaṃ vā padānaṃ **abhidheyvisayaṃ** vitthārasaṃkhittatthavisayavantaṃ **samāsabyāsasambhavaṃ** yathākkamaṃ saṅkhepavithhāradvayena nipphannaṃ nipphattivantaṃ vā **yaṃ pāriṇatyam** kattūnaṃ ganthavisaye pariṇatippakāsako yo saddadhammo atthadhammo hoti, saddaḡuṇo atthagūṇoti vuttaṃ hoti, sopi **iha** subodhālaṅkāre **ojo** nāma saddaḡuṇo atthagūṇo. **Taṃ yathāti** dvīsu lakkhiyaṃ dasseti, padānaṃ abhidheyyo visayo yassa pāriṇatyasseti ca, samāso ca byāso cāti ca, tato sambhavanti ca, tato sambhavo assāti ca, pariṇatassa kattuno ganthassa eva vā bhāvoti ca viggaho. Kattu pāriṇatyapakke tappakāsakaganthassa tadatthena pāriṇatyam siddhaṃ.

**124. Jotayitvāna saddhammaṃ,
Santāretvā sadevake;
Jalivā aggikhandho'va,
Nibbuto so sasāvako.**

124. “Jotayitvāne”ccādi. Iminā heṭṭhā pacurapadābhīhito buddhavaṃso saṅkheparūpena vutto.

124. “Jotayi”ccādi. So tathāgato **saddhammaṃ** sapariyattikaṃ navalokuttarasaddhammaṃ **jotayitvāna** ñāṇālokena obhāsetvā **sadevake** satte **santāretvā** saṃsārasāgarapariyantamupanetvā **aggikhandhova** mahātejena aggikkhandho viya **jalivā** anaññasādhāraṇarūpakāyasampattiyā pajjalitvā ante **sasāvako** sāvakehi saha **nibbuto** khandhapariniḃbānena pariniḃbutoti. Iminā sakalabuddhavaṃse bahūhi padehi vuttattho saṅkhepakkamena vutto. Sataṃ dhammo, santo saṃvijjamaṇo vā dhammoti ca, saha devehi vattamānāti ca, saha sāvakehi vattamānoti ca viggaho.

**125. Matthakaṭṭhī matassāpi, rajobhāvaṃ vajantu me;
Yato puññena te senti [sentu (ka.)], jenapādambujadvaye.**

125. “Matthakaṭṭhī”iccādi. **Matassāpi** maraṇamāpanassāpi me **matthake** muddhani aṭṭhī **rajobhāvaṃ** dhūlittaṃ **vajantu** pāpuṇantu. Kasmāti ce? **Yato** yasmā kāraṇā **puññena** kusalena kammena hetunā **te** rajā jinassa ime **jenā**, pādā, teyeva ambujāniva ambujāni, tesam dvaye **senti**

pavattanti, tathā hotu vā mā vā, paṇatigedheneva vadati. Ettha “kathamahaṃ bhagavato pāde niccaṃ sirasā paṇamāmi” tyadhippāyo vitthārena vutto.

125. “Matthaki”ccādi, matassāpi **me** mayhaṃ **matthakaṭṭhī** muddhani aṭṭhīni **rajabhāvaṃ** atisukhumarajattaṃ **vajantu** pāpuṇantu. Kasmā āsīsanam karotīti ce? **Yato** yasmā kāraṇā **puñña** mayhaṃ tathāvidhena kusalakammena hetunā **te** rajā **jenapādambujadvaye** jinapaṭibaddhacaraṇapadumayugaḷe **sentī** pavattanti, buddhassa siripāde kiñcīpi rajojallaṃ na upalimpateva, tathāpi vandanābhilāsena evaṃ vuttaṃ. Ettha “kathamahaṃ bhagavato siripāde muddhanā niccaṃ paṇamāmi” tyabhiḷaso vitthārena vutto. Matthake aṭṭhīti ca, rajaso bhāvoti ca, jinassa imeti ca, jenā ca te pādā ceti ca, teyeva ambujānīti ca, tesam dvayanti ca viggaho.

126. Iccatra niccaṃpaṇati-gedho sādhu padissati;
Jāyate’yaṃ guṇo tikkha-pañña’ mabhiyogato.

126. Byāsattamevassa vivarati “**iccatrī**”ccādinā. Icevaṃ **atra** gāthāyaṃ **paṇatiyaṃ** paṇāme **gedho** adhiyacchando **sādhu** sundaraṃ **padissati** viññāyate, **ayaṃ** yathāvutto ojo **guṇo** pariṇatabhāvasaṅkhāto **tikkhapaññaṇam** sātīyamatīnaṃ evaṃ santepi **abhiyogato** punappunappavattitaparicayabalena **jāyate** uppajjati.

126. Idāni samkhittassatthassa vitthārena pakāsītabhāvaṃ “**iccatra**”ccādinā niddisati. **Iti** iminā anantaragāthāyaṃ vuttakkamena **atra** imissaṃ gāthāyaṃ **niccaṃpaṇatigedho** nirantarapaṇāme adhiyacchando **sādhu** vibhūto vibhūtaṃ vā **padissati** paññāyati, **ayaṃ guṇo** yathāvutto ayaṃ pariṇatabhāvasaṅkhāto ojo nāma saddatthagūṇo **tikkhapaññaṇam** sukhumabuddhimantānaṃ **abhiyogato** ganthavisayabhūtena nirantarābhyāseneva **jāyate** sijjhati, vattu pāriṇatyeneva bhavanato yesaṃ kesañci yena kenaci pakārena na sijjhatīti. Niccaṃ pavattā paṇatīti ca, tassaṃ gedhoti ca, tikkhā pañña yesanti ca, abhi punappunam yogo yuñjananti ca viggaho.

127. Madhurattaṃ padāsatti-ranuppāsavasā dvidhā;
Siyā samasuti pubbā, vaṇṇāvutti paro yathā.

127. Mādhuriyamavadhārayamāha “**madhuratta**”miccādi. Savanīyattena manoharattaṃ **madhurattaṃ**. Taṃ **padāni** vākyālaṅkāraṇi samānāni uttaruttarehi, tesam **āsatti** ṭhānādināyathākathañci samasutīnaṃ āsannatā **padāsatti**, paṭhamappayuttassakkharassa pacchā pāso pakkhepo **anuppāso**, padāsatti ca anuppāso ca, tesam vasena dvidhā hoti. “Kīdisā te”ti āha “**siyā**”tiādi. **Pubbā** paṭhamābhīhitā padāsatti **samā** yena kenaci ṭhānamattāsaṃyogādinā padantarena **suti** vaṇṇo yassā sā siyā bhavēyya, **paro** pacchimo anuppāso tu **vaṇṇassa** sarabyañjalakkhaṇassa **āvutti** punappunuccāraṇam siyāti. Evaṃ katthaci bandhe samānapadāsatti katthaci anuppāso katthaci tadubhayaṃ, dvayena rahito viraso bandho nassādīyate kavīhi, tādissaṃ madhurattaṃ duvidham paṭipajjitabbaṃ, silesasamatānvitantuccantameva ramaṇīyaṃ siyāti lakkhaṇam dassetvā “**yathe**”ti lakkhiyamubhayatthodāharati “yade”ccādinā, “munīndi”ccādinā ca.

127. Idāni madhuraguṇam dasseti “**madhuri**”ccādinā. **Madhurattaṃ** savanīyabhāvato manoharattaṃ madhuraguṇam, **padānaṃ** vākyāvayavasāṅkhātānaṃ syādyantādīnaṃ uparūparipadehi samānānaṃ **āsatti** ṭhānakaraṇādinā yena kenaci pakārena aññaṃaññaṃ āsannatā, **anuppāso** pubbuccāritavaṇṇānaṃ puna pakkhipanañcāti dvinnam **vasā** vibhāgena dvidhā hoti. Tattha **pubbā** padāsatti samasuti siyā, pubbāparavaṇṇānaṃ ṭhānamattākaraṇādīhi āsannasutisaṅkhatavaṇṇāvutti hoti, **paro** anuppāso pana vaṇṇāvutti sarabyañjanasabhāvānaṃ pubbuccāritavaṇṇānaṃ punappunuccāraṇam siyāti. **Yathāti** dvīsu udāharaṇamādisati. Evaṃ katthaci bandhe padāsatti katthaci anuppāso katthaci tadubhayaṃ, dvīhi vinimutto pana bandho viññūhi assādanīyo na hoti. Upari vakkhamānāhi silesasamatāhi yuttaṃ madhurattaṃ pana visesato assādanīyaṃ hotīti. Madhurassa bandhassa bhāvoti ca, padānaṃ āsattīti ca, anu pacchā pāso pakkhepoti ca, padāsatti ca anuppāso cāti ca, tesam vaso bhedoti ca, samā suti vaṇṇo yassāti ca, vaṇṇassa āvuttīti ca viggaho.

**128. Yadā eso’bhisambodhiṃ,
Sampatto munipuṅgavo;
Tadā pabhuti dhammassa,
Loke jāto mahussavo.**

128. Eso munipuṅgavo **yadā** yato pabhuti **abhisambodhiṃ** sabbaññutaññāṇaṃ **sampatto** samadhigato, **tadā pabhuti** tato ārabha **dhammassa** catusatipaṭṭhānādibhedassa sattatiṃsabodhipakkhiyasankhātassa **mahussavo** mahanto abbhudayo nippaṭipakkhā pavatti **loke** tividhe **jāto** ahoṣīti. Iha kvaci dīghatākataṃ sadisattaṃ, kvaci ṭhānakataṃ, kvaci saṃyogakataṃ, kvaci aññathā, tenāha “siyā samasuti pubbā”ti.

128. “**Yadi**”ccādi. Eso munipuṅgavo **yadā abhisambodhiṃ** sabbaññutaṃ **sampatto** sasantāne uppādanavasena sampāpuṇi, **tadā pabhuti** tato paṭṭhāya **dhammassa** kāyānupassanāsatiṃpaṭṭhānādipabhedassa sattatiṃsabodhipakkhiyadhammassa **mahussavo** mahābhivuddhi **loke** kāmādilokattaye jātoti. Iha “**yadā eso**”ti dīghakālavasena āsannatā, “**ya e**”ti ṭhānavasena āsannatā, “**abhisambodhiṃ sampatto**”ti saṃyogavasena āsannatā, “**bhi dhi**”nti dhanitato āsannatāti iccādinā padāsatti daṭṭhabbā. Abhisambujjhati etāyāti ca, pumā ca so goceti ca, munīnaṃ puṅgavoti ca, mahanto ca so ussavo cāti ca viggaho.

**129. Munindamandahāsā te, kundasandohavibbhamā;
Disanta’manudhāvanti, hasantā candakantiyo.**

129. **Kundānaṃ** kusumānaṃ **sandoho** samūho, tassa vibbhamo yesaṃ te, munindassa **mandahāsā** manuññā hasitāni candassa **kantiyo** sobhāyo **hasantā** viḍambayantā disanta**manudhāvanti** anuvicaranti. Iccatra **nakārasahitassa dakārassa, takārassa** cānuvattanaṃ.

“Indanīladaladvanda-sundaraṃ sirimandiraṃ;
Munindanayanadvandaṃ, vindati’ndīvarajjutim’”.

Iccaparamudāharaṇaṃ.

129. “**Munindi**”ccādi. **Kundasandohavibbhamā** supupphitakundakusumarāsisadisalīlāvantā te **munindamandahāsā** buddhassa manuññā hasitā **candakantiyo** nimmalacandakiraṇe **hasantā** nindantā **disantaṃ** taṃ taṃ disaṃ, disāpariyantaṃ vā **anudhāvanti** vidhāvanti. Ettha **nakārasahitadakarassa, nakārasahitadakarassa** ca āvutti daṭṭhabbā. Mandā ca te hāsā ceti ca, munindassa mandahāsāti ca, kundānaṃ sandohoti ca, tassa vibbhamo yesanti ca, disāyeva disantaṃ, disānaṃ vā antanti ca viggaho.

“Indanīladaladvanda-sundaraṃ sirimandiraṃ;
Munindanayanadvandaṃ, vindati’ndīvarajjuti’”nti.

Idampi **nakārasahitadakaravaṇṇāvuttīyā** aparamudāharaṇaṃ.

Tattha **indanīladaladvandasundaraṃ** indanīlamaṇisakalikāyugaḷamiva manoharaṃ **sirimandiraṃ** tatoyeva sobhāya nivāsaṭṭhānabhūtaṃ munindanayanadvandaṃ **indīvarajjutim** nīluppalakantiṃ **vindati** anubhoti, indīvarajjutisamānāti adhippāyo.

**130. Sabbakomalavaṇṇehi, nā’nuppāso pasamsiyo;
Yathā’yaṃ mālatīmālā, linalolālimālinī.**

130. Yehi kehici āvuttito anuppāsoti ce? Netyāha “**sabba**”iccādi. Sabbehi **komalehi** sukumārehi **vaṇṇehi** akkharehi anuppāso **na pasamsiyo** silāghañīyo na hoti silesavirodhittā. “**Yathe**”ti taṃ udāharati. **Ayaṃ mālatīmālā** jātikusumadāmaṃ **linānaṃ** byādhitānaṃ **lolānaṃ** kusumarasārabha lolupānaṃ **alīnaṃ** bhamarānaṃ **mālā** panti sā assā atthīti linalolālimālinī.

130. Vuttānuppāsopi sabbakomalavaṇṇehi viracito na pasamsiyoti dassetuṃ “**sabbakomalavaṇṇehī**”tiādīmāha. **Sabbakomalavaṇṇehi** sabbehi sukumārakkharehi kato **anuppāso** vaṇṇāvuttīlakkaṇo **na pasamsiyo** silesālaṅkāviruddhattā pasattho na hoti. “**Yathā**”ti tamudāharati. **Ayaṃ mālatīmālā** esā jātisumanamālikā **linānaṃ** byāvaṭṭānaṃ patantānaṃ **lolānaṃ** gandhaluddhānaṃ **alīnaṃ** bhamarānaṃ **mālinī** pantiyuttāti. Ettha **lakārasseva** punappunappayogena komalavaṇṇāvuttī. Mālatīnaṃ mālatī ca, lolā ca te alayo cāti ca, linā ca te lolālayo cāti ca, tesam mālatī ca, sā assa atthīti ca viggaho.

131. **Mudūhi vā kevalehi,**
Kevalehi phuṭehi vā;
Missehi vā tidhā hoti,
Vaṇṇehi samatā yathā.

131. Samataṃ sambhāveti “**mudūhi**”ccādinā. **Kevalehi** kevalaphuṭādibhāvāpavattehi sakalehi **mudūhi** catūsūpi pādesu sajjātiyehi asithilakomalehi vā **kakārādīhi** vā sithilakomalassa silesapaṭipakkhattā **kevalehi phuṭehi vā** adhimattasutīhi **bhakārādīhi** [**rāgādīhi (ka.)**] vā akicchavacanīye kicchavacanīyassa sukhumālāvīpariyayattā **missehi** vā majjhimasutīhi mudubhūtasamṣaṭṭhehi vā **vaṇṇehi** akkharehi karaṇabhūtehi samatā tidhā hoti gajje pajje vā. “**Yathe**”ti tividhamudāharati.

131. Idāni samataṃ vibhāvetuṃ “**mudūhi**”ccādimāha. **Kevalehi** phuṭamissehi aññattā sakalehi **mudūhi** sithilakomalehi vaṇṇehi **kakārādīhi** vā **kevalehi phuṭehi** kevalakomalavaṇṇarahitattā sakalehi akicchuccāraṇīyehi adhimattasutīhi **bhakārādīhi** vaṇṇehi vā **missehi** yathāvuttamuduphuṭasamṣehi vaṇṇehi vā karaṇabhūtehi samatā gajje vā pajje vā tidhā hotīti. Yadi sithilakomalavaṇṇehi vicaritaṃ silesālaṅkārasa, kicchuccāraṇīyehi phuṭavaṇṇehi kataṃ sukhumālālaṅkārasa ca virujjhatīti. “**Yathā**”ti tividhamudāharati.

Kevalamudusamatā

132. **Kokilālāpasamvādī,**
Munindālāpavibbhamo;
Hadayaṅgamataṃ yāti,
Sataṃ deti ca nibbutiṃ.

132. “**Kokile**”ccādi. **Kokilānaṃ** karavīkasakuṇānaṃ **ālāpo** kūjitaṃ, taṃ samvadati pakāsati sīlenāti **kokilālāpasamvādī**, taṃsadisoti attho, munindassa **ālāpo** visaṭṭhādiatṭhaṅgiko saro tassa **vibbhamo** vilāso **sataṃ** sappurisānaṃ **hadayaṅgamataṃ** manonusaritaṃ madhurabhāvaṃ yāti, **nibbutiṃ** nibbānaṅca tesam deti.

132. “**Kokili**”ccādi. **Kokilānaṃ** karavīkasakuṇānaṃ **ālāpaṃ** nādalīlaṃ **samvādī** pakāsanāsīlo, taṃsadisoti adhippāyo, **munindassa** sabbaññuno **ālāpassa** visaṭṭhādiatṭhaṅgikanādassa **vibbhamo** vilāso **sataṃ** sappurisānaṃ **hadayaṅgamataṃ** cittārādhitabhāvaṃ **yāti** ca, **nibbutiṃ** sutasambandhena tesamyeva sādhuṇaṃ nibbānaṃ **deti ca** dentopi hotīti. Ettha **kokilālāpasaddena** nissite nissayavohārena līlā gahitā.

Kevalaphuṭasamatā

133. **Sambhāvanīyasambhāvaṃ,**
Bhagavantaṃ bhavantaṃ;
Bhavantasādhanākaṅkhī,
Ko na sambhāvaye vibhuṃ.

133. “**Sambhāvanīye**”ccādi. **Sambhāvanīyo** ādaraṇīyo. Sadevake loke santo sobhano bhāvo adhippāyo yassa taṃ. Bhavantaṃ nibbānaṃ gatoti **bhavantaṃ**, taṃ vibhuṃ. **Bhagavantaṃ**

sammāsambuddhaṃ. Bhavassa saṃsārassa anto avasānaṃ nibbānaṃ, tassa sādhanam sampādanamākaṅkhati sīlenāti **bhavantasādhanākaṅkhī, ko** nāma saṃsāravattijano. **Na sambhāvaye** ādaraṃ na kareyya, karotyevāti attho.

133. “Sambhāvanīyi”ccādi. **Sambhāvanīyasambhāvaṃ** sadevakena lokena ādaraṇīyasobhanādhippāyaṃ **bhavantaḡuṃ** bhavassa antasaṅkhātaṃ nibbānaṃ gataṃ **vibhuṃ** pabhuṃ **bhagavantaṃ** sammāsambuddhaṃ **bhavantasādhanākaṅkhī** nibbānasādhanābhilāsī **ko** katamo saṃsāravattijano **na sambhāvaye** ādaraṃ na kareyya, karotyeva. Santo ca so bhāvo cāti ca, sambhāvanīyo sambhāvo yasseti ca, bhavassa antanti ca, bhavantaṃ gatoti ca, tassa sādhananti ca, taṃ ākaṅkhati sīlenāti ca viggaho.

Missakasamatā

134. Laddhacandanasaṃsagga-sugandhimalayānilo; Manda’māyāti bhītova, munindamukhamārutā.

134. “Laddhi”ccādi. Laddho candanatarūnaṃ saṃsaggo paricayo tena sobhano gandho assāti **sugandhī** surabhi malayānilodakkhiṇapavamāno munindassa mukhamārutā bhītova tādisamuduttasītalattasugandhasampattiyā attano dūratarattā **āyāti** anuvattati. **Mandanti** āgamanakriyāvisesanaṃ.

134. “Laddhi”ccādi. **Laddhacandanasaṃsaggasugandhimalayānilo** paṭiladdhacandanatarusārasamavāyena sobhanagandhasamannāgato malayadesato āgacchamānamāluto **munindamukhamārutā** buddhassa mukhasurabhivāsitaṃ pavanato **bhīto iva** tādisamudusurabhisītalattassa attani asambhavato bhītova **mandaṃ** saṅikaṃ **yāti** abhimukhametīti. Candanānaṃ saṃsaggoti ca, laddho ca so candanasāṃsaggoti ca, sobhano gandho yassāti ca, laddhacandanasaṃsaggena sugandhīti ca, malayato āgato aniloti ca, munindamukhato nikkhanto mārutoti ca viggaho. **Mandanti** kriyāvisesanaṃ. Ettha tividhasamatāyaṃ “kokilālapasaṃvādi”ccāditividhalakkhiyassāpi “mudūhi vā kevalehi”ccādinā dassitalakkhaṇattayena tulyatā supākaṭāvāti.

135. Anīṭṭhurakkharappāyā, sabbakomalanissaṭā; Kicchamuccāraṇāpeta-byañjanā sukhumālatā.

135. Sukhumālatā kathīyati “**anīṭṭhurakkhare**”ccādinā. **Anīṭṭhurāni** aphaṃsāni **akkharāni** vaṇṇāni **pāyāni** bahūni yassā sā tathā, “niṭṭhurāni appakāni”ti **pāyaggahaṇena** sūcitaṃ, tatoyeva **sabbehi** kevalehi **komalehi** sithilehi laghūhi akkharehi **nissaṭā** niggaṭā **kicchena** dukkhena uccāraṇā tato apetaṇi apagataṇi byañjanāni yassā sāti anuvaditvā sukhumālatā vidhīyate.

135. Idāni sukhumālatam dasseti “**anīṭṭhure**”ccādinā. **Anīṭṭhurakkharappāyā** akakkasavaṇṇabahulā **sabbakomalanissaṭā** anīṭṭhurakkharānaṃ yebhuyyaggahaṇatoyeva sakalasithilavaṇṇavirahitā **kicchamuccāraṇāpetabyañjanā** dukkhuccāraṇīyavaṇṇehi vigataakkharasamannāgatā sukhumālatā nāmāti. Anīṭṭhurāni akkharāni pāyāni bahūni yassanti ca, sabbe ca te komalā ceti ca, tehi nissaṭāti ca, kicchena uccāraṇāti ca, tehi apetaṇīti ca, tāni byañjanāni yassāti ca viggaho. Niggahītāgamo.

136. Passantā rūpavibhavaṃ, suṇantā madhuraṃ giram; Caranti sādhu sambuddha-kāle keḷiparammukhā.

136. Udāharati “**passantā**”iccādi. **Rūpavibhavaṃ** rūpasampattim passantā madhuraṃ **giram** vācam suṇantā sādhuvo **keḷiparammukhā** kīḷāya nicchantā carantīti sambandho. Katthāti āha “**sambuddhakāle**”ti.

136. “Passanti”ccādinā lakkhiyamudāharati, taṃ vuttatthameva.

vidhīyate. “**Taṃ yathe**” tyudāharati. Yathā ayaṃ silesa, tathā aññopi tādiso datṭhabbo, na tvayameveti “**taṃ yathā**” saddassattho.

140. Idāni silesaṃ niddisati “**siliṭṭhe**” ccādinā. **Siliṭṭhapadasaṃsaggaramaṇiyaguṇālayo** ṭhānakaraṇādīhi āsannaṇaṇānaṃ vinyāsaṃhetu aññamaññanissitānaṃ padānaṃ samavāyena manuññaguṇassa pavattiṭṭhānabhūto **sabandhagāravo** bandhagāravasaṅkhātāracanāya asithilabhāvena saha pavatto **so ayaṃ** bandho silesa nāmāti. Silesa nāma bandhagāravo, tappaṭipādakabandhopyettha silesoti vuccati. Siliṭṭhā ca te padā ceti ca, tesāṃ saṃsaggoti ca, tena ramaṇiyoti ca, so eva guṇoti ca, tassa ālayoti ca, bandhassa guruno bhāvoti ca, tena saha pavattatīti ca vākyam. Taṃ yathā “**bālindu**”iccādi.

**141. Bālindivibbhamacchedi-nakharāvalikantibhi;
Sā munindapadambhoja-kanti vo valitā’vataṃ.**

141. “**Bālindu**”iccādi. Bālinduno pañcamī [**pañcamīcandassa (?)**] pañcadasakalassa vibbhamo manoharattaṃ, taṃ chindati sīlenāti **bālindivibbhamacchediyo** pañcamīcandassa kalāsannibhānaṃ **nakharānaṃ** nakhānaṃ āvaliyo tāsāṃ **kantibhi** sobhāhi saha **valitā** saṃyuttā sā, munindassa padāniyeva ambhojāni padumāni tesāṃ kanti. **Vo** tumhe sāmāññena vadati. **Avataṃ** pālayatu.

141. Bālindu...pe... kantibhi
taruṇacandavilāsavināsanasabhāvasamannāgatanakhapantisobhāhi saha **valitā** saṃyuttā **sā munindapadambhojakanti** sā sambuddhapādapadumasobhā **vo** tumhe **avataṃ** rakkhatūti. Bālo ca so indu cāti ca, tassa vibbhamoti ca, taṃ chindati sīlenāti ca, nakhānaṃ āvaliyoti ca, tāsāṃ kantīti ca, bālindivibbhamacchediyo ca tā nakharāvalikantiyo cāti ca, munindassa padānīti ca, tāniyeva ambhojānīti ca, tesāṃ kantīti ca viggaho.

**142. Ukkamsavanto yo koci,
Guṇo yadi patīyate;
Udāro’yaṃ bhava tena,
Sanāthā bandhapaddhati.**

142. Udārattamavadhārayamāha “**ukkaṃsavanto**”iccādi. **Yo koci** “idameve”ti niyamābhāvā **guṇo** cāgāṭisayādiko **ukkaṃsavanto** adhimatto yadi **patīyate** viññāyate bandheti viññāyati “bandhapaddhatī”ti vakkhamānattā, ayaṃ udāro bhaveti vidhi. Udāroyaṃ hotu, kiṃ tato siyāti āha “**teni**”ccādi. **Tena** ukkaṃsavatā guṇena **bandhapaddhati** racanakkamo nāthabhūtena udāraguṇena saha vattatīti **sanāthā**, sampadāvāti [**sampadāvātīti (?)**] vuttaṃ hoti.

142. Idāni udārattamuddisati “**ukkaṃse**”ccādinā. **Ukkaṃsavanto** atisayavā **yokoci guṇo** cāgāṭisayādiko saddāvaliyā paṭipādāniyo ānubhāvo **yadi patīyate** sace kathamaci bandhe viññāyate, **ayaṃ** yathāvuttaguṇo **udāro** nāma bhava. Tena kiṃ payojananti ce? **Bandhabandhati** padāvali **tena** ukkaṃsavatā guṇena **sanāthā** sappatiṭṭhā hoti. Ukkaṃso assa atthīti ca, nāthena saha vattatīti ca, bandhassa paddhatīti ca viggaho.

**143. Pādambhojarajolitta-gattā yetava gotama;
Aho te jantavo yanti, sabbathā nirajattanaṃ.**

143. Tamudāharati “**pāde**”ccādinā. **Gotamāti** bhagavantam gottena ālapati. **Tava** bhagavato pādambhojānaṃ rajāni reṇavo, tehi **littāni** upadehitāni gattāni yesanti viggaho. **Ye** janā te jantavo sabbappakārena rajolavenāpyanupalittattā rajehi kilesasaṅkhātehi niggatā nirajā, tesāṃ bhāvo **nirajattanaṃ** nikkilesabhāvaṃ **yanti** pāpuṇanti. **Aho** acchariyaṃ yato rajasā littā nāma saṃkiliṭṭhāyeva siyuṃ, bhavaṃ pana pādarajasā vilepane jane niraje karoti. Acchariyaṃ bhavato idanti attho.

143. Idāni udāharati “**pādambhoje**”ccādinā. Bho gotama **ye** sattā **tava** tuyhaṃ

pādambhojarajolittagattā pādapadumareṇulittamatthakanalāṭādisarīrāvayavayuttā te **jantavo** sattā **sabbathā** kilesasankhātarajojallehi anupalittattā sabbappakārena **nirajattanam** vigatakilesarajobhāvaṃ **yanti** pāpuṇanti, **aho** acchariyaṃ. Rajolittā nāma saṃkiliṭṭhā siyuṃ, tvaṃ pana pādarajasā upalittepi satte niraje karosīti bhāvo. Iha bhagavato ukkaṃsaguṇo dīpito hoti. Pādāniyeva ambhojānīti ca, tesam rajānīti ca, tehi littāni gattāni yesanti ca, rajehi kilesehi niggatāti ca, tesam bhāvoti ca vākyam.

**144. Evaṃ jinānubhāvassa, samukkaṃso'tradissati;
Paññavā vidhinā'nena, cintaye paramīdisaṃ.**

144. Ko panettha ukkaṃsavanto guṇo yena bandho sanātho siyāti ce? Āha “**eva**”miccādi. **Evamiti jinānubhāvassa** sammāsambuddhapabhāvassa **samukkaṃso** atisayo **dissati** padissate **atra** bandhe, tasmā **jinānubhāvena** ukkaṃsavatā guṇena bandho sanātho siyāti. Pakāramimamaññatrapiatidisanto āha “**paññavā**”tiādi. **Paññavā** paññāsampanno **anena vidhinā** iminā pakārena **edisam** evarūpaṃ **param** aññaṃ **cintaye** vitakkeyya.

144. Idāni yathāvuttaguṇanidassanañca sissānusāsanañca dasseti “**eva**”miccādinā. **Atra** imissaṃ anantaragāthāyaṃ **evaṃ** yathāvuttakkamena **jinānubhāvassa** tathāgatappabhāvassa **samukkaṃso** ādhikkaṃ **dissati** padissate, tasmā jinānubhāvāsankhātena ukkaṃsavatā guṇena bandho sanātho bhavēyya. **Paññavā** pasatthaññāvanto **anena vidhinā** iminā kamena īdisaṃ **param** aññaṃ **cintaye** kappeyya.

**145. Udāro sopi viññeyyo,
Yaṃ pasatthavisesanaṃ;
Yathā kīlāsaro līlā-
Hāsa [hāso (ka.)] hemaṅgadādayo.**

145. Aparamudārappakāraṃ dassetumāha “**udāro**”iccādi. Yaṃ **pasattham** silāghanīyaṃ visesanaṃ upādiyati, **sopi** na pana yathāvuttova udāro viññeyyo. “**Yathe**”tyudāharati. Kīlāya kīlātham saro, līlāya yutto hāso, hemaṃ hemamayamaṅgadanti samāso, taṃ ādi yesanti bāhirattho. **Ādisaddena** kusumadāmaṇimekhalādīnaṃ saṅgaho. Ayaṃ tu bandhapharusagāmmapariccāgā sambhavati.

145. Aññaṃapi udāraṃ dasseti “**udāro**”ccādinā. Yaṃ **pasatthavisesanaṃ** pasamsanīyavisesanaṃ hoti, sopi udāroti viññeyyo. “**Yathā**”ti tamudāharati. **Kīlāsaro** kīlāya kato saro. **Līlāhāso** līlāya yutto hāso. **Hemaṅgadādayo** suvaṇṇakeyūrāiccādayoti. Kīlāthāya saroti ca, līlāya yutto hāsoti ca, hemaṃ hemamayaṃ aṅgadanti ca, līlāhāso ca hemaṅgadañcāti ca, tāni ādīni yesaṃ kusumadāmaṇimekhalādīnanti ca viggaho. Ayamudāro bandhapharusagāmmādidosapariccāgena sijjhati.

**146. Lokiyatthānatikkantā,
Kantā sabbajanānapi;
Kanti nāmā'tivuttassa,
Vuttā sā parihārato.**

Yathā “muninda”iccādi.

146. Kantiṃ kathayati “**lokiyi**”ccādinā. Loke vidito **lokiyo**, taṃ lokiyaṃ **attham** abhidheyyaṃ **anatikkantā** anatītā sabbesaṃ kavīnamitaresaṃ vā janānaṃ eva **kantā** manoharā kanti nāmāti vuccati. Ayaṃ pana saddaguṇo ativuttassa vākyadosassa pariccāgena sambhavati. Tenāha “**ativuttassā**”tiādi. Udāharaṇattho heṭṭhā vuttoyeva.

146. Idāni kantiṃ dasseti “**lokiyi**”ccādinā. **Lokiyatthānatikkantā** loke pasiddhasaddatthamanatikkantā **sabbajanānaṃ** sakalakavīnaṃ **kantā** manuññā **kanti nāma**

vuccate, sã **ativuttassa** ativuttadosassa **parihārato vuttā** dosaparihāraparicchede kathitā hoti. Ativuttadosaparihārato eva kantiyā siddhattā tassa lakkhiyo eva etissā hotīti adhippāyo. Loke viditoti ca, so ca so attho ceti ca viggaho. “**Yathā**”ti kantiyā udāharaṇaṃ dasseti “**muninda**”iccādi. Taṃ vuttameva.

**147. Atthabyattā’bhidheyassā-
Neyyatā saddato’tthato;
Sā’yam tadubhayā neyya-
Parihāre padassitā.**

Yathā “marīci”ccādi ca, “manonurañjano”ccādi ca.

147. Atthabyattiṃ byañjayati “**atthabyattābhidheyyi**”ccādinā. **Abhidheyyassa** sambandhaatthassa saddato **atthato** vā sāmattiyaṭo vā **aneyyatā** patīti aññathā vagamo gatyantarābhāvā, yato vuttaṃ “dullabhāvagatī sadda-sāmattiyaṭavilaṅghinī”ti. Tamanuvaditvā atthabyatti vidhīyate. Sā pana byākiṇṇaneyyādidosavajjanāya jāyate. Tadubhayā jātā **sāyam** aneyyatā neyyaparihāre **padassitā** pakāsītā. Paṭhamadutiyodāharaṇassattho vutto.

147. Idāni atthabyattiṃ dasseti “**atthabyatti**”ccādinā. **Abhidheyyassa** atthassa saddato **atthato** atthasāmattiyaṭo ca **aneyyatā** tattheva vijjamānattā saddassa atthassa vā āharitvā vattabbassa abhāvo **atthabyatti** nāma, **tadubhayā** tehi dvīhi jātā **sā ayam** aneyyatāsankhatā atthabyatti **neyyaparihāre** neyyadosaparihārapadese **padassitā** pakāsītāti. “Dullabhāvagatī sadda-sāmattiyaṭavilaṅghinī”ti vuttattā atthapatīti pana vinā saddaṅca sāmattiyaṅca aññathānupalabbhatīti iha “saddato atthato”ti vuttaṃ. Atthassa byatti patīti ca, natthi neyyam āharitabbaṃ assa abhidheyassāti ca, tassa bhāvoti ca, te ca te ubho saddatthā cāti ca, te avayavā etissāti ca, neyyassa parihāroti ca vākyam. Idāni “**yathe**”ccādinā dvippakārāya atthabyattiyā yathākkamaṃ udāharaṇamanussāreti “**mari**”ccādigāthādvayena, taṃ heṭṭhā vuttameva.

Puna atthena yathā –

**148. Sabhāvāmalatā dhīra,
Mudhā pādanakhesu te;
Yato te’vanatānanta-
Molicchāyā jahanti no.**

148. Puna dutiye tu **dhīrāti** āmantanaṃ. **Te** tava pādanakhesu **sabhāvāmalatā** pakatiparisuddhatā **mudhā** tucchā. Kasmāti ce? **Yato** yasmā kāraṇā **te** pādanakhā **avanatassa** sannatassa **anantassa** nāgarājassa **moḷino** kirīṭassa **avanatānaṃ** vā naramarānaṃ **anantānaṃ** moḷīnaṃ **chāyā** chaviyo **no jahanti na** pariccajanti, sañchaviyo pana jahantīti. Ettha nakhesu sañchavittā pādanakhasa moḷīnaṃ nirantarappaṇāmābyabhicārānaramarādīnaṃ bhagavato pādāravindavandanaṃ sāmattiyaṭa phutaṃ gamyate.

148. “**Puna atthena yathā sabhāvi**”ccādi. Dhīra **te** tava pādanakhesu **sabhāvāmalatā** pakatiparisuddhatā **mudhā** tucchā. Kasmāti ce? **Yato** yasmā **te** caraṇanakhā **avanatānantamoḷicchāyā** pādānatassa anantanāgarājassa kirīṭassa sambandhinī, avanatānaṃ vā anantānaṃ devamanussānaṃ moḷīnaṃ chāyā kantiyo **no jahanti na** vijahanti, pakativannaṃ pahāya kirīṭakantisadisā te honti, tasmā ettha candakiraṇasannibhānaṃ nakharaṃsīnaṃ samīpe moḷīnaṃ nakharaṃsīhi amadditasakakantiyuttabhāvamāpajjanaṃ tādisānaṃ nirantarappaṇāmābhāvābhāvato khattiyādīnaṃ munindapādāravindadvande nirantarappaṇāmo sāmattiyaṭa vibhūtaṃ gamyate. Sassa bhāvoti ca, tena amalāti ca, tesam bhāvoti ca, paṭhamapakke avanato ca so ananto cāti ca, tassa moḷīti ca, tassa chāyāyoti ca, dutiyapakke anantā ca te moḷī ceti ca, avanatānaṃ anantamoḷīti ca, tesam chāyāyoti ca vākyam.

**149. “Bandhasāro”ti maññanti, yaṃ samaggāpi viññuno;
Dassanāvasaraṃ patto, samādhi nāma’yam guṇo.**

149. Samādhiphalaṃ kiccāha “**bandhe**”ccādi. Yanti yaṃ samādhiṃ **bandhassa** gajjapajjamissabhāvassa **sāroti** sabbassa jīvitam tapparāyattā bandhassa **samaggāpi viñño** sabbepi kavino **maññanti** cintenti jānanti, yaṃ **samādhi nāma** samādhikhyo guṇo **dassane** pakāsane **avasaram** okāsaṃ anottarattā parassa sampatto uddiṭṭhānukkamenāti.

149. Idāni samādhayo niddisati “**bandhi**”ccādinā. **Samaggā api viñño** sabbepi kavayo yaṃ samādhiṃ “**bandhasāro**”ti pajjagajjavimissasaṅkhātassa bandhassa jīvitamiti maññanti, yaṃ samādhi nāma guṇo **dassanāvasaram patto** uddiṭṭhānukkamena dassanokāsaṃ patto hoti. Bandhassa sāroti ca, dassane avasaranti ca, taṃ pattoti ca viggaho.

150. **Aññadhammo tato’ññattha,**
Lokasīmānurodhato;
Sammā ādhīyate’cce’so,
Samādhīti niruccati.

150. Kathamayaṃ saddavohāro bandhe “samādhi”ti vuccatīyāha “**aññe**”ccādi. **Aññassa** vatthuno pakatāpekkhāya **dhammo** guṇo pasiddho, **tato** tasmā mukhyavisayā **aññattha** amukhye visaye **lokasīmānurodhato** lokappatīyanuvattanena **sammā** sādhu lokasīmānuvattanameveha sādhattam **ādhīyate** āropyate, **iti** iminā kāraṇena **eso** evaṃvidho dhammo “**samādhi**”ti **niruccatī**tidha sammā ādhīyatīti evaṃ nīharitvā vuccatīti attho.

150. “Samādhi”ti yaṃ vohāro bandhavisaye katham pavattatīti āsaṅkāyaṃ paṭhamam nibbacaṇam dassetuṃ āha “**aññi**”ccādi. Yasmā **aññadhammo** samādhānassa visayabhūtaamukhyato aññassa mukhyavatthuno pasiddhaguṇo, **tato** mukhyavisayato **aññattha** amukhyavisaye **lokasīmānurodhato** lokavohāramariyādāvirodhabhāvena lokappatīyanuvattaneneva sammā **ādhīyati** ṭhapīyati, **iti** iminā kāraṇena **eso** yathāvuttaguṇo “**samādhi**”ti **niruccati** vuccatīti. Aññassa dhammoti ca, lokassa sīmāti ca, tassā anurodhoti ca viggaho.

Samādhiuddesa

151. **Apāṇe pāṇinaṃ dhammo, sammā ādhīyate kvaci;**
Nirūpe rūpayuttassa, nirase sarasassa ca.

152. **Adrave dravayuttassa, akattaripi kattutā;**
Kaṭhinassa’sarīrepi, rūpaṃ tesam kamā siyā.

151-152. Samādhānavisayamāha “**apāṇe**”iccādi. **Kvaci** ṭhāne **pāṇinaṃ** pāṇavantānaṃ padatthānaṃ **dhammo** guṇo **apāṇe** pāṇavirahite vatthuni **sammā** lokapatīyanuvattanena **ādhīyate** āropyate, evamuparipi yathānurūpaṃ. **Nirūpeti** rūpavirahite vatthuni, **kvacīti** sabbattha anuvattati. **Asarīre** aghane asaṃhate vatthuni **kaṭhinassa** daḷhassa, **tesam** yathāvuttānaṃ samādhīnaṃ **rūpaṃ** udāharaṇam **kamā** uddiṭṭhānukkamena.

151-152. Uddese “samādhayo”ti bahuvacanena niddiṭṭhānaṃ samādhīnaṃ visayamupadasseti “**apāṇe**”ccādinā. **Kvaci** kismiñci ṭhāne **pāṇinaṃ dhammo** indriyabaddhānaṃ guṇo **apāṇe** pāṇarahitavatthumhi **sammā** lokapatītianusārena **ādhīyate** āropyate, kvaci **rūpayuttassa** rūpavantavatthuno dhammo **nirūpe** rūparahitavatthumhi, kvaci **sarasassa** rasavantassa vatthuno dhammo **nirase** rasarahite ca, kvaci **dravayuttassa** dravavantavatthuno dhammo **adrave** dravarahite ca, kvaci **kattutā** kattuguṇo **akattaripi**, kvaci **kaṭhinassa** thaddhassa vatthuno dhammo **asarīrepi** sarīrarahitepi sammā ādhīyate. **Tesam** channaṃ samādhīnaṃ **rūpaṃ** udāharaṇam **kamā** “apāṇe pāṇina”nti uddiṭṭhānukkamena **siyā** bhavyeyyāti. Na santi pāṇā asseti ca, rūpā niggatoti ca, rūpena yuttoti ca, rasā niggatoti ca, rasena saha vattamānoti ca, dravāaññoti ca, dravena dravabhāvena yuttoti ca, kattuto aññoti ca, kattuno bhāvoti ca, natthi sarīraṃ assāti ca viggaho.

Samādhiniddesa

Apāṇe pāṇinaṃ dhammo

**153. Uṇṇāpuṇṇindunā nātha, divāpi saha saṅgamā;
Viniddā sampamodanti, maññe kumudinī tava.**

153. “Uṇṇā”iccādi. Nāthāti lokattayekapaṭisaraṇabhūtātāya bhagavantam ālapati. Tava uṇṇāromadhātusaṅkhātena puṇṇindunā **saha saṅgamā** saṃyogena **kumudinī** kumudiniyo kumudākarā divāpi **viniddā** vigatasoppā **sampamodanti maññe** suṭṭhuyeva pamodantīti parikkappemīti. Ettha pāṇidhammassa suratarūpassa saṅgamassa viniddāya sampiṇanassa ca apāṇini āropitapumbhāve uṇṇāpuṇṇindumhi, tathā āropitaitthibhāvāsu kumudinīsu lokasīmānurodhena samādhānato soyaṃ pasiddho dhammo “samādhī”ti vuccati. Tadabhidhāyī saddo ca upacārato atthānugāmīti saddikavohāraṃ dasseti, evamuparipi yathāyogaṃ.

153. Tesu pāṇidhammasamādhino udāharaṇamādisati “**uṇṇā**”iccādinā. Nātha **tava** tuyhaṃ **uṇṇāpuṇṇindunā** uṇṇāromamaṇḍalasaṅkhātapuṇṇacandena **saha saṅgamā** aññamaññasamavāyahetunā **kumudinī** keravākarasaṅkhātā kumudiniyo divāpi **viniddā** vikasitā **sampamodanti maññe** atisantuṭṭhā hontīti kappemīti indusampamodo **sahasaddena** ñāyate. Ettha pāṇidhammasaṅkhāto suratasāṅgamo ca niddāpagamo ca sampamodanañcāti tiṇṇaṃ uṇṇāpuṇṇindukumudinīsaṅkhātesu apāṇesu lokavohārānatikkamma buddhiyā āropanena pāṇidhammato pasiddhā tayo atthā idha samādhayo nāma, tappaṭipādakaganthopi atthānugāmīti tadupacārena samādhīti daṭṭhabbo. Puṇṇo ca so indu ceti ca, uṇṇā eva puṇṇindu cāti ca, vigatā niddā yehīti ca viggaho.

Nirūpe rūpayuttassa

**154. Dayārasesu mujjantā, janā’matarasesvi’va;
Sukhitā hatadosā te, nātha pādambujānatā.**

154. “Dayā”iccādi. Nātha te pādambujesu ānatā paṇāmavasena **janā** tilokakuharapavattino sattā **amatarasesviva** piyūsarasesu viya **dayārasesu** karuṇārasesu guṇesu. “Siṅgārādo vise vīriye, guṇe rāge drave raso”ti [amarakosa 3.3.226] hi nighaṇṭu. **Mujjantā** nimujjamānā **hatā** naṭṭhā **dosā** vātādayo amatapakkhe, aññattha tu **hatā** naṭṭhā **dosā** rāgādayo yesanti viggaho, tatoyeva **sukhitā** sukhaṃ kāyikacetasisukhaṃ itā pattā gatāti attho.

154. Idāni rūpadhammasamādhino udāharaṇaṃ uddisati “**dayā**”iccādinā. Nātha **te** tava **pādambujānatā** caraṇapadume paṇatā **janā** devamanussā **amatarasesu iva** sudhājalesu viya **dayārasesu** anaññasādhāraṇakarūṇāguṇesu **mujjantā** nimujjamānā **hatadosā** vinaṭṭhavātāpittādayo vinaṭṭharāgādidosā vā **sukhitā** tatoyeva ajarāmarasaṅkhātasukhaṃ itā pattāti. Ettha rūpayuttajale labbhamānaṃ mujjanaṃ nirūpe dayāguṇe āropitaṃ hoti. Dayā eva rasā guṇāti ca, amatā eva rasāti ca, hatā vātādayo rāgādayo vā dosā yesanti ca, pādāni eva ambujānīti ca, tesu ānatāti ca viggaho.

“Siṅgārādo vise vīriye, guṇe rāge draveraso”ti [amarakosa 3.3.226] ettha **rasasaddo** guṇajalesu vattati.

Nirase sarasassa

**155. Madhurepi guṇe dhīra, nappasīdanti ye tava;
Kīdisīmanaso vutti, tesam khāraguṇānabho [he (sī.)].**

155. “Madhure”ccādi. Dhiyā īratīti **dhīro**, bho dhīra tava **madhurepi** manoharepi **guṇe** karuṇādike **ye nappasīdanti** pasādaṃ na karonti, **khāraguṇānaṃ** amadhuraguṇānaṃ **tesam** janānaṃ **manaso vutti** cittappavatti **kīdisīti** kimiva dissati, na viññāyate “īdisī”ti. Yato tādisaguṇāvabodhaparammukhā mohandhakārasambandhitāti.

155. Idāni sarasadhammasamādhino udāharaṇamuddisati “**madhuri**”ccādinā. Bho **dhīra tava** te **madhure api guṇe** pakatisundare karuṇāpaññāguṇepi **ye** hīnādhimuttikā janā nappasīdanti, **khāraguṇānaṃ** amadhuraguṇānaṃ **tesaṃ** janānaṃ **manaso vutti** cittappavatti **kīdisī** kathaṃ ruhati. Dhiyā īrati pavattatīti ca, kā viya sā dissatīti ca, khārā guṇā yesanti ca viggaho. Ettha samādhī nāma rasahīne āropitarasayuttadhammabhūtaṃ madhurakhāraguṇadvayaṃ.

Adrave dravayuttassa

**156. Sabbatthasiddha cūḷaka-putapeyyā mahāguṇā;
Disā samantā dhāvanti, kundasobhāsālakkhaṇā.**

156. “**Sabbatthasiddhi**”ccādi. Sabbatthasiddhassa mahāmunino cūḷakapuṭena **peyyā** pātabbā **kundasobhāsālakkhaṇā** kundakusumassa sobhāsavantā jutivijambhino **mahāguṇā samantā** parito **disā** disantāni dhāvanti.

156. Idāni dravayuttasamādhino udāharaṇamuddisati “**sabbatthi**”ccādinā. **Sabbatthasiddha** sabbakicce parinipphanna, nipphannehi sabbatthehi vā samannāgata he tathāgata **tava cūḷakapuṭapeyyā** cūḷakapuṭena pātabbā **kundasobhāsālakkhaṇā** kundasobhāhi samānalakkhaṇā kundasobhāsadisā vā **mahāguṇā** saṅkhyāmahantattā ānubhāvamahantattā vā mahantā vā arahattādayo guṇā **samantā** samantato **disā** dasadisāsu dhāvanti. Ettha dravayuttaguṇabhūto cūḷakapuṭapeyyabhāvo dravarahite guṇe āropito samādhī nāma hoti. Sabbe ca te atthā ceti ca, te siddhā yasseti ca, cūḷakameva puṭamīti ca, tena peyyāti ca, mahantā ca te guṇā ceti ca, kundānaṃ sobhāti ca, tāhi samānaṃ lakkhaṇaṃ yesanti ca viggaho.

Akattari kattutā

**157. Mārāribalavissatthā, kuṇṭhā nānāvidhā’yudhā;
Lajjamānā’aññavesena, jina pādānatā tava.**

157. “**Mārā**”iccādi. Māroyeva ari sattūti **mārāri**, tena, **balena** attano sattiya, tassa vā **balena** senāya **vissatthā** abhimukhaṃ chaḍḍitā **nānāvidhā** anekappakārā **āyudhā** bhindivāḷādayo **kuṇṭhā** [bheṇḍivāḷādayo (ka.)] pariccattatikhiṇabhāvā tāyeva kuṇṭhabhāvappattiyā **lajjamānā** “lokappatītānubhāvānamamhākampi evarūpaṃ jāta”nti lajjantā **aññavesena** “kathaṃ nāma pare amhe na jāneyyu”nti attano āvudhavesaṃ parivattitvā kusumavesena, **jināti** āmantanaṃ, tava **pādānatā** pādesu sannatā.

157. Idāni kattudhammasamādhino udāharaṇamuddisati “**mārāri**”ccādinā. He **jina mārāribalavissatthā** mārasattunā attano sattiya **vissatthā**, mārāriṇo vā senāya **vissatthā** abhimukhe pātītā **nānāvidhāyudhā** anekappakārabhindivāḷausattitomarādayo āvudhā **kuṇṭhā** atikhiṇā **lajjamānā** “kasmā evaṃ lokapasiddhānubhāvānamamhākampi īdisaṃ vippakāramahosī”ti lajjantā **aññavesena** “kathamamhe pare na jāneyyu”nti āvudhavesaṃ hitvā tadaññabhūtena pupphavesena tava **pādānatā** pādasamīpe natā ahesunti. Ettha kattudhammabhūtaṃ lajjanañca aññavesena parivattanañca ānatañceti ime lajjanādīnaṃ akattubhūtesu visayesu āropitā samādhayo nāma honti. Māro eva arīti ca, balena **vissatthāti** ca, mārāriṇā **balavissatthāti** ca mārāriṇo **balam** senāti ca, tena **vissatthāti** ca, **nānā** anekavidhā **pakārā** yesanti ca, **aññesaṃ** vesoti ca, **añño** ca so veso cāti ca, pādesu ānatāti ca viggaho.

Kaṭṭhinassa asarīre

**158. Munindabhāṇumā kālo-
Dito bodhodayācale;
Saddhammaraṃsinā bhāti,
Indamandhatamaṃ paraṃ.**

158. “**Muninda**”iccādi. **Bodho** sabbaññutaññāṇasadiso soyeva vā **udayācalo** udayapabbato tasmim **kāle** rattipariyante abhinikkhantasamaye **udito** pātubhūto **munindo** munindasadiso soyeva vā **bhānumā** sūriyo **andhatamaṃ** andhakāraṃ mohaṃ vā **paraṃ** accantameva **saddhammaraṃsinā** saddhammasadisena saddhammasaṅkhatena vā raṃsinā **bhindaṃ** padāleno **bhāti** sobhatīti.

158. Idāni kaṭṭhinadhammasamādhino udāharaṇamuddisati “**munindi**”ccādinā. **Bodhodayācale** sabbaññutaññāṇasadise sabbaññutaññāṇasaṅkhāte vā udayapabbate **kālodito** rattikkhaye māraparājitasamaye vā udito pātubhūto **munindabhānumā** munindasadiso munindoyeva vā sūriyo **andhatamaṃ** pakatighanandhakāraṃ bahalamohandhakāraṃ **saddhammaraṃsinā** saddhammasadisena saddhammabhūtena vā kiraṇena **paramatisayena** **bhindaṃ** padāleno **bhāti** sobhatīti. Ettha thaddhadhammabhūtaṃ bhedanaṃ asarīrabhūte andhakāre buddhiyā āropitaṃ samādhi nāma hoti. Munīnaṃ indoti ca, soyeva bhānumāti ca, bodho eva udayācaloti ca, saddhammo eva raṃsīti ca viggaho.

159. **Vamanuggiranādye’taṃ, guṇavutyapariccutaṃ;**
Atisundaramaññaṃ tu, kāmaṃ vindati gāmmataṃ.

159. Koci dhammo amukhyavisaye bandhe sobhate, na mukhyavisayeti dassanto āha “**vamanaṃ**”iccādi. Vamanañca uggiranañca, **ādisaddena** virecanādipariggaho. **Etaṃ** yathāvuttaṃ **guṇā** padhānetarā pasiddhavisayā visayantarapariggahalakkhaṇā **vutti** payogarūpā, tato **apariccutaṃ** aparigāḷitaṃ santaṃ amukhyabhūtaṃ **atisundaraṃ** accantamanoharamalaṅkārārūpattā, **aññaṃ tu** itaraṃ pana mukhyanti vuttaṃ hoti. **Kāmaṃ** ekantena **gāmmataṃ** asabbhasabhāvaṃ bandhe tassānucitabhāvato **vindati** paṭilabhati pasavatīti attho.

159. Idāni imesuyeva pāṇidhammādīsu koci dhammo amukhyavisaye payutto pasattho, mukhyavisaye payutto apasatthoti dassento “**vamanuggi**”ccādimāha. **Etaṃ vamanuggiranādi** vamanuggiranavirecanādikaṃ **guṇavutyapariccutaṃ** amukhyapayogato agaḷitaṃ amukhyabhūtaṃ **atisundaraṃ** sabbesaṃ atipiyaṃ hoti, **aññaṃ tu** uttato byatirekaṃ mukhyavisaye payuttaṃ vamanuggiranādikaṃ pana **kāmaṃ** ekantena **gāmmataṃ** sabhāvaappiyagāmmadosataṃ **vindati** sevati. Vamanañca uggiranañceti ca, tāni ādīni yasseti ca, guṇā appadhānā vuttīti ca, tato apariccutanti ca viggaho.

160. **Kantīnaṃ vamanabyājā, munipādanakhāvali;**
Candakantī pivantīva, nippabhaṃ taṃ karontiyo.

160. Udāharati “**kantīna**”miccādi. **Munino** sammāsambuddhassa pādanakhānaṃ **āvali** seṇiyo **kantīnaṃ** attano niranaraṃ nissaraṅtīnaṃ sobhāvisesānaṃ **vamanabyājā** uggiranalesena **candakantī** candacchaviyo sabbattha patthaṭṭā **pivantīva** pānaṃ karontīti takkemi. Kīdisī viyāti parikkappanābījamāha “**nippabha**”ntiādi. **Taṃ** candaṃ **nippabhaṃ** pabhāviraḥitaṃ **karontiyo** vidahamānā. Idañhi kappanābījaṃ yato nakhasobhāliṅganena candassa sobhāvato nippabhataṃ passivā mahattañca tassā nakhāvaliyo candakantī pivantīti parikkappeti kantīnañca vamanabyājaṃ.

160. Iṭṭhavisaye payuttavamanuggiranādīnamudāharaṇamuddisati “**kantīna**”miccādinā. **Munipādanakhāvali** munipādanakhasēṇiyo **kantīnaṃ** attano candamarīcisadisasobhānaṃ **vamanabyājā** uggiranalesena **taṃ** nimmalacandaṃ **nippabhaṃ karontiyo** attano sabbattha patthaṭṭā nippabhaṃ karontiyo **candakantī** candaraṃsiyo pivanti maññe. Nakharaṃsīnaṃ sabbattha patthaṭṭā sappabhassāpi candassa nippabhatañca nakharaṃsīnaṃ adhikattañca disvā candakantī pivanti iveti nakhāvalīnaṃ candakantīpivanañca sakakantivamañca pakati na hoti, byājamīti kavinā parikkappitaṃ hoti. Ettha bhattasīthādīmukhyavisayato aññakantisāṅkhataamukhyavisaye payuttaṃ vamaṇaṃ guṇavuttīti ñātabbaṃ. Vamanameva byājamīti ca, munino pādāti ca, tesu nakhāti ca, tesāṃ āvaliyoti ca, candassa kantiyoti ca, niggato pabhāhīti ca viggaho.

161. **Acittakattukaṃ rujha-miccevaṃ guṇakamma taṃ [guṇakammaṃ (sī.);**

Sacittakattukaṃ pe'taṃ, guṇakammaṃ yadu'ttamaṃ.

161. Yathāvuttaṃ nigameti “**acitta**”iccādinā. Icevaṃ acitto kattā yassa taṃ **acittakattukaṃ**. Guṇo kammaṃ yassa taṃ **guṇakammaṃ**. Tañca vamaṇādi **rujhamatimanoharaṃ** bhavati bandhocittatā. Nakhāvaliyo hi acittakattāro, kantiyo guṇakammanti vamanamatrāṭisundaraṃ. Nedameva rujhanti āha “**sacitta**”iccādi. **Etam** vamaṇādikaṃ sacittakattukampi yadiguṇakammaṃ, **uttamaṃ** seṭṭhaṃ bandhocittatā.

161. Anantarodāharaṇassa pasatthattañca kammani guṇe sati sacittakattukavamaṇādikañca iṭṭhamiti dassento “**acittakattuka**”miccādimāha. **Icevaṃ** iminā pakārena **acittakattukaṃ** nakhāvalisaṅkhātaaviññānakakattuvantaṃ **guṇakammaṃ** nakhakantisaṅkhātaappadhānakammavantaṃ vamaṇādikaṃ **rujham** racanāya ucittatā rucijanakaṃ hoti, **etaṃ** vamaṇādikaṃ **sacittakattukampi** saviññānakakattuvantampi **yadi guṇakammaṃ** amukhyakammaṃ ce, **uttamaṃ** visiṭṭhameva, “kantīna”nti bhāvasambandhe chaṭṭhiyā satipi vamaṇakriyāya kammattaṃ nātivattati. Natthi cittaṃ yesanti ca, acittā kattāro yassāti ca, guṇo kammaṃ yasseti ca, saha cittaṃ vattamānoti ca vākyam. **Iti** nidassane **evaṃ** pakāre nipāto, atha vā vacanavacanīyānaṃ [**vacanavacanīyādīnaṃ (ka.)**] nigamārambhe nipātasamudāyo.

162. Uggirantova sa sneha-rasaṃ jinavaro jane; Bhāsanto madhuraṃ dhammaṃ, kaṃ na sampīṇaye jaṇaṃ.

162. Tadudāharati “**uggirantovā**”tiādinā. **So** jinavaro **jane** sakalasattanikāye **sneharasaṃ** attano pemaṇākhātaṃ anurāgaṃ **uggirantova** vamaṇto viya **madhuraṃ** atipaṇītaṃ dhammaṃ bhāsanto **kaṃ jaṇaṃ na sampīṇaye**, sabbameva sampīṇeti. Ettha jinavaro kattā sacitto, sneharaso guṇakammaṃ.

162. Idāni sacittakattupakkhe udāharaṇamuddisati “**uggiranto**”ccādinā. **So** jinavaro **jane** sakalasattanikāye **sneharasaṃ** attano pemaṇākhātaanurāgaṃ **uggiranto iva** vamaṇto viya **madhuraṃ** ādikalyāṇādibhāvena paṇītaṃ **dhammaṃ** saddhammaṃ **bhāsanto** desento yathāsayaṃ vadanto **kaṃ jaṇaṃ** kīdisaṃ puggalaṃ **na sampīṇaye**, pīṇeti evāti. Ettha uggiranaṃ jinavarasaṅkhatasacittakattuvantampi sneharasasaṅkhātamukhyakammayuttatā pasatthaṃ hoti. Sneho eva raso anurāgoti viggaho.

163. Yo saddasatthakusalo kusalo nighaṇṭu- Chandoalaṅkatisu niccakatābhīyogo; So'yaṃ kavittavikalopi kavīsu saṅkhya- Mogayha vindati hi kitti'mamandarūpaṃ.

Iti saṅgharakkhitamahāsānipādaviracite

Subodhālaṅkāre

Guṇāvabodho nāma tatiyo paricchedo.

163. Ganthantarāhitavāsanāya, tadanubandhapaṭibhāne cāvijjamānēpi sutena abhiyogabalena kavītā kitti ca tadanugatā samupalabbhatīti samanūsāsati “**yo**”iccādinā. **Saddasatthe** byākaraṇe kismiñci “idameve”ti niyamābhāvā **kusalo** cheko **nighaṇṭumhi** abhidhānasatthe ca **chandasi** vuttijātippapañcapakāsakachandovicittisatthe ca **alaṅkatisu** alaṅkārasatthe ca kusalo na kevalaṃ saddasattheyeva, atha ca pana **niccamaṇavarataṃ** divā ca ratta ca kato **abhiyogo** vāyāmo racanāvisaye yassa soyaṃ **kavittavikalopi** bandhakaraṇasaṅkhātakaviguṇaparīhīnopi **kavīsu** kaviguṇopetesu **saṅkhyaṃ** gaṇanaṃ **ogayha** paṭilabhitvā **amandarūpaṃ** atibahuṃ **kittiṃ** parisuddhabandharacanālakkhaṇaṃ tappabhavaṃ khyātaṃ **vindati** paṭilabhatevāti.

Iti subodhālaṅkāre mahāsāmināmikāyaṃ

Subodhālaṅkāraṭīkāyaṃ

Guṇāvabodhaparicchedo tatiyo.

163. Idāni uddesakkamena saddālaṅkāre niddisitvā byākaraṇanighaṇṭuchandoparivārite imasmim̐ nirantarābhiyogo ihalokiyādīmahantayasassa kāraṇamiti sissānāmanusāsanto “yo **saddasatthakusalo**”ccādimāha. Yo theranavamajjhimesu koci **saddasatthakusalo** saddānusāsanabyākaraṇavisaye pakatipaccayādivibhāgakappanāya cheko **nighaṇṭuchandoalaṅkatīsu** abhidhānachandoalaṅkārasatthesupi **kusalo** taṃtaṃvibhāgabuddhīnaṃ paṭipādanena cheko **niccakatābhiyogo** dhāraṇāmanasikāravasena niccaṃ katussāho hoti. So **ayaṃ** appamādī **kavittavikalopi** pakatisiddhakabbaracanaguṇarahitopi **kavīsu saṅkhyāṃ** kabbakattūsu gaṇanaṃ **ogayha** kabbakaraṇaṭīkāraṇādīpakārena ogāhetvā taṃ gaṇanaṃ pāpuṇitvā **amandarūpaṃ** anappakasabhāvaṃ atibahuṃ **kittim̐** niddosaṃ sattharacanalakkhaṇaṃ puññasāñcayāṃ, tappabhavaṃ pasiddhim̐ vā **vindati** labhatevāti. Yathāvuttasatthesu abhiyogo bandhassa ekantakāraṇameva. Vuttaṃ hi—

“Sābhāvikī ca paṭibhā,
Sutañca bahunimmalaṃ;
Amando cābhiyogo’yaṃ,
Hetu hoti’ha bandhane”ti [kābyādāsa 1.103].

Tattha **sābhāvikī** sabhāvasiddhā **paṭibhā ca** paññā ca **bahu nimmalaṃ** anappakaṃ nijjaṭaṃ **sutañca amando abhiyogo** ca anappako abhyāso ceti ayameso sabbopi **iha bandhane** imissaṃ kabbaracanāyaṃ **hetu hoti** kāraṇaṃ bhavatīti. Sadde sāsati ettha etenāti imasmim̐ atthe tappaccayañca **tassa thādesañca** katvā saddasatthanti nītabbaṃ, saddasatthe kusaloti ca, nighaṇṭu ca chando ca alaṅkati alaṅkārañceti ca viggaho, ettha **alaṅkatisaddo** satthāpekkhāya napuṃsako hoti, niccaṃ kato abhiyogo asseti ca, kavino bhāvoti ca, tena vikaloti ca, amandaṃ rūpaṃ sabhāvo yasseti ca vākyāṃ.

Iti subodhālaṅkāranissaye

Tatiyo paricchedo.

4. Atthālaṅkāravabodhapariccheda

164. Atthālaṅkārasahitā, **saguṇā bandhapaddhati**;
Accantakantā kantāva [yatoaccantakantāva (ka.)], **vuccantete tato’dhunā**.

164. Evaṃ saddālaṅkāre paricchijja sampatyatthālaṅkāraṃ bodhayitumāha “**atthālaṅkāra**”iccādi. **Saguṇā** yathāvuttehi pasādādīhi saddaguṇehi **sahitā bandhapaddhati** kabbaracanaṃ. Alaṅkāraṇīyati kantiṃ nīyati bandho etehi sarīramiva hārādīhīti alaṅkāra, tehi atthālaṅkārehi jātyādīlakkhaṇehi **sahitā** saṃyuttā satī **saguṇā** patibbatādiguṇopetā **atthena** dhanena **alaṅkārena** ābharaṇena **sahitā** yuttā **kantāva** aṅganā viya. Yato **accantakantā** atisayamaṇīyā siyā, **tato** tena kāraṇena ye atthālaṅkāra avasaraṃ pattā, te **adhunā** idāni **vuccante** kathīyanti.

164. Evaṃ saddālaṅkāravibhāgaṃ dassetvā idāni tannissayaṃyeva atthālaṅkārabandhamārabhanto “**atthālaṅkāri**”ccādimāha. **Saguṇā** yathāvuttapasādādisaddaguṇayuttā **bandhapaddhati** pajjagajjādīpabhedā racanāvali **atthālaṅkārasahitā** sabhāvavuttivaṅkavuttisaṅkhātena atthālaṅkārena saṃyuttā **saguṇā atthālaṅkārasahitā kantā iva** patibbatādīhi guṇehi yuttā suvaṇṇarajatamaṇimuttādīdhanehi gīveyyakaṭakanūpurādīhi ābharaṇehi ca yuttā aṅganāva **accantakantā** yato atisayena ramaṇīyā, **tato** tasmā **te** atthālaṅkāra **adhunā** dāni vuccante. Alaṅkāraṇīyati bandhaṃ sarīraṃ vā etehīti ca, atthassa alaṅkāraṇīyati ca, tehi **sahitā**ti ca, guṇehi saha vattatīti ca, bandhassa paddhatīti ca, accantaṃ atisayena kantāti ca viggaho.

**165. Sabhāvavaṅkavuttīnaṃ, bhedaṃ dvidhā alaṃkriyā;
Paṭhamā tattha vatthūnaṃ, nānāvattthāvibhāvinī.**

165. Katippabhedā te iccāha “sabhāva”iccādi. Sabhāvavutti vaṅkavuttīti imesaṃ **bhedā** pabhedena **alaṃkriyā** atthālaṅkāradvīdhādvippakārā. Tesu sabhāvavutti kīdisīti āha “**paṭhamā**”tiādi. **Tattha** tāsū **paṭhamā** sabhāvavutti **vatthūnaṃ** padatthānaṃ jātiguṇakriyādabbasabhāvānaṃ **nānā** vicittā, na dvekāva **avatthā** avasarā vibhāvinī pakāsikā viññeyyā. Jātyādīnaṃ padatthānaṃ yathāsabhāvamanekappakāraṃ sammadeva vivaraṇṭī sabhāvaṃ padatthānaṃ vicittaṃ vadatīti sabhāvavutti nāmāti adhippāyo, sāva jātiyā padatthasarūpassa tathātathapaṭipādakattena vuttiyā [dattiyā (ka.)] jātipi vuccati.

165. Pasatthālaṅkāra [pasatthālaṅkāra (ka.)] pabhedato ettakāti dassento “**sabhāvi**”ccādimāha. **Alaṃkriyā** atthālaṅkāraṃ sabhāvavaṅkavuttīnaṃ **bhedā** pabhedato **dvidhā** dvippakārā honti. **Tattha** tāsudvīsu **paṭhamā** sabhāvavutti **vatthūnaṃ** jātiguṇakriyādabbalakkhaṇānaṃ padatthānaṃ **nānāvattthāvibhāvinī** anekappakārasa pakāsini hoti. Ettha jātyādīnaṃ padatthānaṃ anekappakārasabhāvapakāsini sabhāvavutti nāma. Esāva jāti guṇādicatubbidhapadatthānaṃ sarūpasāṅkhātājātiyā tehi ākārehi paṭipādanato upacārato jāti nāma hoti. Jātyādipadatthānaṃyeva yathāsabhāvaṃ hitvā vatthuparikappitaatisayopamārūpakādisarūpasāṅkhātānaṃ vaṅkasabhāvaṃ pakāsenti vaṅkavutti nāma. Yabhāvo ca vaṅko cāti ca, tesāṃ vuttīti ca, alaṃkaronti etāhīti ca, nānā anekā ca sā avatthā cāti ca vākyāṃ.

Yathā –

**166. Līlāvikaṅtisubhago,
Disāthiravilokano;
Bodhisattaṅkuro bhāsaṃ,
Viroci vācamāsabhiṃ.**

166. “**Yathe**”ti taṃ udāharati. **Līlāya** vilāsena vihitāya **vikantiyā** gamanena sattapadavītiḥārasāṅkhātēna **subhago** sundaro **disāsu** dasasu **thiramacalaṃ** vilokanaṃ yassa so **bodhisattaṅkuro** tadahujāto mahābodhisatto **āsabhiṃ vācam** “**aggohamasmi**”tiādīkamuttamaṃ nibbhayavacanaṃ **bhāsaṃ** vadanto **viroci** vīsesena ramaṇīyattaṃ patto. Ayaṃ sabhāvavutti. Evaṃ jātisabhāvavutyādayopi parikappanīyā.

166. Idāni sabhāvavuttīyā udāharaṇaṃ āha “**yathā – līlāvikaṅti**”ccādi. **Līlāvikaṅtisubhago** vilāsagamānaṃ sattapadavītiḥāreṇa sundaro **disāthiravilokano** dasadisāsu acalaolokano **bodhisattaṅkuro** mahābodhisattaṅkuro **āsabhiṃ vācam** “**aggohamasmi**”tiādīnā abhītavacanaṃ **bhāsaṃ** vadanto **viroci** asobhīti. Iha bodhisattasāṅkhātassa dabbassa līlāvikaṅtidisāthiravilokanavaconicchāraṇasāṅkhātānaṃ avatthānaṃ pakāsītattā dabbasabhāvavuttīti ṇātābbā. Esāyeva dabbagatagatyādivicitrasarūpaṃ alaṅkaraṇato alaṅkāro nāma, dabbagatagatyādayo pana alaṃkiriyaṃnāntā alaṃkiriyaṃ nāma. Jātiguṇakriyāsabhāvavuttīyopi evameva daṭṭhabbā. Līlāya yuttā vikantīti ca, tāya subhagoti ca, disāsu thiraṃ vilokanaṃ yasseti ca, bodhiyā paññāya sattoti ca, soyeva aṅkuroti ca, usabhassa bhāvoti ca vākyāṃ. Usabhassa bhāvasāṅkhātā akampaṇīyā ṭhiti āsabhaṃ nāma, akampabhāvato tena samāpi vācā upacārato āsabhi nāma hoti.

**167. Vutti vatthusabhāvassa, yā’ññathā sā parābhava;
Tassā’nantavikappattā, hoti bījopadassanaṃ.**

167. Dutiyamāha “**vutti**”ccādinā. **Vatthuno** jātyādirūpassa padatthassa **sabhāvo** yassaṃ avatthāyaṃ yādisaṃ rūpaṃ tassa aññathābhāvena tassa rūpassa tathetaṃ dabbāpanena **vutti** vacanaṃ. **Parā bhava** aññā vaṅkavutti nāma siyā. Kiṃ sā sākallena vattaṃ sakkāti āha “**tassā**”iccādi. **Tassā** vaṅkavuttīyā **anantavikappattā** aparimitabhedakattā **bījassa** kāraṇattā sakalabyattīyāpisāmaññarūpassa yato pare vicittālaṅkāraṃ pasavanti, **upadassanaṃ** kathaṇaṃ hoti niravasesābhīdhānaṃ kenāpyasakkuṇeyyattā.

167. Idāni vaṅkavuttiṃ dasseti “**vutti**”ccādinā. **Vatthusabhāvassa** jātyādipadatthasambandhino tāsu tāsu avatthāsu yo sabhāvo vijjati, tassa sabhāvassa **aññathā** vijjamānākāraṃ hitvā vattuparikappitena atisayaupamārūpakādiaññapakārena **yā vutti** yaṃ kathanam atthi, **sā parābhava** sabhāvavuttito aññā vaṅkavutti nāma siyā. **Tassā** vaṅkavuttiyā **anantavikappattā** appamāṇapakkhattā kathanena parisamāpetuṃ asakkuṇeyyattā nayato tassa anantapakkhassa pariggahaṇattham **bījopadassanam** kāraṇamattassa nidassanam hoti. Vakkhamānabhedato ekamekampī attanā sadisaṃ anantabhedapariggahajānanattham pahotīti adhippāyo. Vatthūnaṃ sabhāvoti ca, anantā vikappā yassa sabhāvasseti ca, tassa bhāvoti ca, bījassa upadassananti ca viggaho.

Vaṅkavuttiatthālaṅkārauddesavaṇṇanā

168. **Tatthā’**tisayaupamā-
Rūpakāvuttidīpakam;
Akkhepo’tthantaranyāso,
Byatireko vibhāvanā.
169. **Hetukkamo piyataram,** **samāsaparikappanā;**
Samāhitam pariyaṅga-vuttibyājopavaṇṇanam.
170. **Visesa ruḷhāhaṅkāra,**
Silesu tulyayogitā;
Nidassanam mahantattam,
Vañcanā’ppakatatthuti.
171. **Ekāvali aññamaññam,** **sahavutti virodhitā;**
Parivuttibbhamobhāvo, **missa’māsī rasī iti.**
172. **Ete bheda samuddiṭṭhā,** **bhāvo jīvitamuccate;**
Vaṅkavuttisu poseti, **silesu tu sirim param.**

168-172. Yathoddesaṃ niddisitukāmo uddisati “**tatthe**”ccādi. **Tatthāti** tassaṃ vaṅkavuttiyaṃ “ete bheda samuddiṭṭhā”ti iminā sambandho. **Samuddiṭṭhāti** saṅkhepanayena vuttā. Atisayo upamā rūpakam āvutti dīpakaṅca, **samāso** samāsavutti parikappanā ca, viseso ruḷhāhaṅkāro ca, **jīvitamuccateti** tadabhāve bandhassa chavasseva heyyattā vuttam, silesu tu **vaṅkavuttisu param sirim** kantiṃ poseti taṃ pūreti āvahaṭīti.

168-172. Bhedavantānaṃ padatthānaṃ sabhāvakathanam uddesakkamena pākaṭam hotīti vattamānehi alaṅkārehi uddisanto “**tatthātisaya...pe... rasī**”ti gāthācatukkamāha. Tattha **tatthāti** tissaṃ vaṅkavuttiyaṃ **iti** evaṃ **ete** pañcatimsa **bheda samuddiṭṭhā** saṅkhepena vuttāti. Etesaṃ pana padānaṃ attho niddese āvibhavissati. Iminā bhāvo ca silesu ca atippasatthoti dīpeti. **Bhāvo** bhāvālaṅkāro **jīvitam** bandhassa paṇabhūtoti vuccate, bhāvarahitassa bandhassa chavasarīrassa viya anupādeyyattā, **silesu tu** silesālaṅkāro pana **vaṅkavuttisu** atisayopamādivaṅkavuttisu **paramukkaṃsabhūtam sirim** sobham **poseti** pūreti.

Niddesavaṇṇanā

173. **Pakāsikā visesassa,**
Siyā’tisayavutti yā;
Lokātikkantavisayā,
Lokiyāti ca sā dvidhā.

173. Tatthātisayavuttīnaṃ tāva niddisanto āha “**pakāsikā**”iccādi. **Visesassa** vatthugatassātimattassa pakāsikāyāti anuvaditvā sā atisayavutti siyāti vidhiyate, atisayassa vatthuno

ukkamsassa paṭipādikā vutti **atisayavutti**. Sā ca duvidhāti āha “**loka**”iccādi. Lokam lokappatītiṃ atikkanto visayo gocharo yassā sā **lokātikkantavisayā** ca loke bhavā lokaḥhitimanatikkantattāti **lokiyā** cāti atisayavutti **dvidhā** dvippakārā bhavati.

173. Idāni uddesakkamena atisayavuttiṃ dasseti “**pakāsi**”ccādinā. **Visesassa** jātyādipadattagataadhikavisesassa **yā** vutti pakāsikā, sā atisayavutti nāma siyā, **sā** atisayavutti **lokātikkantavisayā** ca jātyādipadattānaṃ yathāsabhāvasaṅkhatalokaḥhityātikkantavisayattā lokātikkanta visayāti ca **lokiyāti** ca yathāvuttalokamanatikkamma pavattanato lokiyāti cevaṃ **dvidhā** dvippakārā honti. Vadatīti vutti, atisayassa vuttīti ca, lokam atikkanto visayo etissāti ca, loke bhavāti ca viggaho. “Visesassa pakāsikā”ti pasiddhaguṇānuvādena sā atisayavutti siyāti apasiddham atisayavuttividhānaṃ karoti, yathā “yo kuṇḍalī, so devadatto”ti. Anuvādakaanuvādanīyabhedo uparipyevameva datṭhabbo.

174. **Lokiyātisayasse’te,
Bhedā ye jātiādayo;
Paṭipādīyate tva’jja,
Lokātikkantagocarā.**

174. Ayaṃ dvippakārā atisayavutti sabhāvavutyādīhi bhinnāti ce? Āha “**loka**”iccādi. **Jātiādayo** yato padatthassa vicittam sarūpam vadatīti vicittasarūpapaṭipādikā sabhāvavuttiṃ alaṅkāro, alaṅkāriyam tu vatthumattam, tato sabhāvavutyādayo **ye bheda** visesā, **ete** lokiyātisayassa bheda, yathā sarīre yaṃ sahaṃ sundarattam, tassa posakāpi muttāvalippabhuti alaṅkaroti vuccati, evaṃ bandhopyalaṅkāriyatthunimittam dhammattam yāya ukkamsiyati, sā ukkamsoti vuccati. Sā ca vutti **alaṅkārasaddena** vuccate. Sā pana atisayavuttiyeva. Tenevāha “**lokiyātisayassete, bheda ye jātiādayo**”ti. Yato evaṃ, tato lokātikkantavisayā ca visum dassanīyāti āha “**paṭi**”tiādi. **Tusaddo** bhede. **Ajja tu** idāni pana lokātikkantagocarā paṭipādīyateti sambandho.

174. Idāni eṣā dvippakārāpi atisayavuttisabhāvavutyādīhi anaññāti dassetuṃ “**lokiye**”ccādimāha. **Jātiādayo** jātiguṇādipadattagataviccittasarūpassa pakāsanato nissayavohārena “jātyādayo”ti niddiṭṭhā jātisabhāvavuttiguṇasabhāvavutyādayo **ye bheda** visesā, **ete** **lokiyātisayassa** lokiyātisayavuttiyāyeva **bheda** avayavā. Tattha lokiyātisayavutti nāma jātisabhāvavuttiguṇasabhāvavutyādayoyevāti. Esāyeva vicitrarūpapaṭipādikā ukkamsāti ca vuccati. Evaṃ lokiyātisayavuttiyā “līlāvikantisubhago”ti udāharaṇassa gamyamānattā vakkhamānaṃ paṭijānāti “**paṭipādīyate**”ccādinā. **Ajja tu** idāni pana **lokātikkantagocarā** atisayavutti **paṭipādīyate** udāharaṇato nipphādīyati. Loke bhavoti ca, tassa atisayo ādhikkamiti ca vākyam.

175. **Pivanti dehakantī ye,
Nettañjalipuṭena te;
Nā’laṃ hantum jine’sam tvaṃ,
Taṇhaṃ taṇhāharopi kiṃ.**

175. Tamudāharati “**pivanti**”ccādinā. Jina te **dehakantī** sarīrasobhāyo **ye janā** **nettañjalipuṭena** attano nayanadvandasaṅkhātena añjalipuṭena pivanti, **esam** janānaṃ **taṇham** pipāsam lobhameva vā harati anupatati [apanayati (?)]. **Taṇhāharopi** samāno tvaṃ **hantum** nivattitum **kiṃ nālam** kasmā asamatthosī. Taṇhāharā nāma taṇhameva nudanti. Atra hanantāmapiha sampanudati lokaḥhitim atikkamma dehakantiyā bahuttanadhammo vutto.

175. Idāni paṭiññātānusārena paṭipādeti “**pivanti**”ccādinā. Bho **jina te** tuyhaṃ **dehakantī** sarīrasobhāyo **ye janā** **nettañjalipuṭena** nettasaṅkhātena hatthapuṭena pivanti, **esam** sādhujanānaṃ **taṇham** pipāsam lobhameva vā **taṇhāharopi** tvaṃ sabbesam taṇhāvināsakopi **hantum** nivāretum **kiṃ nālam** kasmā asamatthosīti. Ettha pivanaṃ nāma pipāsam vinetīti lokasabhāvo. Taṇham hantum nālamiti lokasabhāvatikkantattho. Kantīnaṃ adhikapiyatā atisayadhammo, tassa vutti pana taṇham hantum nālamiti lokātikkantaattham visayam katvā pavatto hoti. Sā pana kathetumicchitam kantīnaṃ adhikapiyatam taṇhāhanane asamattham vatvā dīpetīti vaṅkavutti nāma. Vuccamānaṃ upamārūpakādīnampi vaṅkavuttitā icchitathassa pakārantarena pakāsanatoyeva.

Yathā nāma sarīrasahajaṃ pīnattādisundarattaṃ uddīpanākārena t̥hitā kaṭakaṇḥīsahārādayo alaṅkāra nāma bhavanti, evaṃ bandhasarīrasaṅkhāte alaṅkaraṇīyavatthumhi vijjamaṇātipiyatādimeva uddīpetvā alaṅkurumānā “taṅhāharosi tvaṃ esaṃ kanti pivantānaṃ taṅhaṃ hantum nāla” miti vācābhaṅgī alaṅkāro nāma. Alaṅkāriyaṃ nāma alaṅkātabbakantīpiyatāya bahuttanti. Uttaripi alaṅkāraalaṅkāriyavibhāgo ca anurūpato yojanakkamo ca evameva daṭṭhabbo. Dehe kantīti ca, añjalīyeva puṭoti ca, nettāniyeva añjalipuṭoti ca, taṅhaṃ haratīti ca viggaho.

**176. Upamānopameyyānaṃ, sadhammattaṃ siyo’pamā;
Saddatthagammā vākyattha-visayāti ca sā tidhā.**

176. Upamaṃ niddisati “**upamāne**”ccādinā. Upamīyate anenāti upamānaṃ, padumādīkavatthu. Padumādīko tu saddo upamānavācako. Upamīyatīti upameyyaṃ, mukhādīkavatthu. Mukhādīko saddo tu upameyyavācako. Tesam upamānopameyyānaṃ padumādīmukhādīvatthūnaṃ. **Sadhammattanti** samāno dhammo kantimantatā yassa so sadhammo, tassa bhāvo sadhammasaddassa pavattinimittasamānena dhammena saha sambandho **sadhammattaṃ** upamānopameyyapatiṭṭhitam upamā siyā, upamīyati yathāvutto sambandhoti katvā. Sā panālaṅkāriyassa dhammassātisayapatiṭṭhitāpadanappakāro. Katividhā sāti āha “**sadda**”iccādi. Saddo ca attho ca, tehi gammā patīyamānā **saddatthagammā**. **Vākyam** padasamudāyo. Tassa attho visayo gocaro yassā **vākyatthavisayāti** ca **sā** upamā **tividhā** saddagammatthagammavākyatthavisayāti tidhā hoti.

176. Idāni upamālaṅkāraṃ niddisati “**upamāno**”ccādinā. **Upamānopameyyānaṃ** candanīluppadalābhādīnaṃ ānananayanādīnaṃ padatthānaṃ **sadhammattaṃ** kantimantatāpīnatādītulyadhammasambandho upamā nāma siyā, **sā** alaṅkaraṇīyavatthuno ādhikkapaṭipādanappakāra upamā **saddatthagammā** saddagammattha ca atthagammā ca vākyatthavisayā ca, **iti** evaṃ **tidhā** tippakāra hoti. Ettha upamānopameyyabhūtānaṃ candānanādīpadatthānaṃ sadhammasaṅkhato aññamaññātulyakantimantatāpīnatādīdhammayogo padatthānaṃ upamatthassa patiṭṭhitattā upaṭṭhānatāya upamā nāma hoti, tannissayacandādayo pana nissitavohārena upamā nāma hoti, upamāabhūtacandādiatthapaṭipādakako **candimā**disaddopi tadatthena upamā nāma hoti, upameyyupameyyanissayatappaṭipādakānampi upameyyabhāvo evameva daṭṭhabbo. Upamīyate anenāti upamānanti katvā candādi upamānaṃ vuccati, upamīyatīti upameyyaṃ, ānanādi, upamānaṃca upameyyaṅcāti ca, samāno ca so dhammo ceti ca, tassa bhāvoti ca, saddo ca attho cāti ca, tehi gammāti ca, vākyassa atthoti ca, so visayo yassā upamāyāti ca vākyam.

**177. Samāsapaccayevādī, saddā tesam vasā tidhā;
Saddagammattha samāsenā, munindo candimānāno.**

177. Tattha saddagammatthapi tidhā siyāti dassetumāha “**samāsa**”iccādi. Samāso ca paccayo ca ivādī ca, te saddā nāma, **saddasaddena** samāsādayo vattumadhippetāti attho. **Tesam** samāsādīnaṃ vasā saddagammattha tidhā hoti samāsasaddagammattha paccayasaddagammattha ivādisaddagammatthi, **samāsenā** samāsasaddena gammā upamā vuccatīti seso. Udāharati “**munindo candimānāno**”ti, candimā viya rucirāmānaṃ mukhaṃ yassa so **candimānāno**. Ettha ca candimāṃ upamānaṃ, ānaṃ upameyyaṃ, rucirattaṃ dhammo, candimānanānaṃ samānadhammasambandhijotako **viyasaddo**, tesu sādharāṇadhammavācakassa **viyasaddassa** copamājotakassāppayogo samāseneva vuttattā, ettha pana **viyasaddo** **candimā**saddena upamānavācakena sambandhamupagato candagatameva sadisattaṃ vadati, mukhagataṃ pana sāmattihiyā padīyate, evamīdisaṃ daṭṭhabbaṃ.

177. Tesu yathāvuttesu saddagammattha tividhattam dassetum āha “**samāse**”ccādi. **Samāsapaccayevādī** samāso, āyādīpaccayā, ivādayo ca saddā nāma, **tesam** samāsādīnaṃ **vasā** bhedenā **saddagammattha tidhā** samāsasaddagammattha paccayasaddagammattha ivādisaddagammatthi tividhā hoti. **Samāsenā** samāsasaddena gammopamā vuccati “**munindo candimānāno**”ti. **Munindo** sammāsambuddho **candimānāno** candasamānāmanoharamukhamaṇḍalena yutto hoti, samāso ca paccayo ca ivaiti idaṃ ādi yesam vādīnanti ca, saddena gammāti ca, munīnaṃ indoti ca, candimā viya ruciraṃ ānaṃ mukhaṃ yasseti ca viggaho. Ettha “candimā”ti upamānaṃ, “ānana”nti

upameyyaṃ, rucirattaṃ upamānopameyyānaṃ sādharmaṇadhammo, “viyā”ti saddo candānanānaṃ dvinnāṃ ānagatarucirattaṃ cande ca, candagatarucirattaṃ ānane ca atthīti samānadhammasambandhaṃ joteti, iha sādharmaṇadhammavācākassa **rucirasaddassa**, tulyadhammasaṅkhātopamājotakassa **viyasaddassa** ca appayogo tesāṃ atthānaṃ samāsenā vuttatā. Ettha upamānavācakena **candimāsaddena** yutto **viya** saddo candagatasadisattaṃ joteti, mukhagatasadisattaṃ pana sāmattiyaṃ patīyate. Tathā hi mukhaṃ candasamānamāgacchantaṃ candassa mukhasadisattaṃ vinā na bhavati aññathānupapatti sāmattiyaṃ.

**178. Āyādi paccayā tehi, vadanāṃ paṅkajāyate;
Munindanayanadvandaṃ, nīluppaladalīyati.**

178. Idāni paccayasaddagammaṃ dasseti “**āyādi**”ccādinā. **Āyādi** **āyāyaka**paccayādayo **paccayā** paccayasaddā nāma, **tehi** paccayasaddehi gammā upamā vuccati. Udāharati “**vadana**”miccādi. Paṅkajamiva ruciramācarati **paṅkajāyate**. Etthāpi paṅkajamupamānaṃ, ācaraṇakriyāya kattubhūtaṃ ānānamupameyyaṃ, rucirattaṃ sadhammo, paṅkajānānaṃ samānadhammasambandhājotako **ivasaddo**. Tatha **rucira** **ivasaddānaṃ** pubbe viyāppayogo paccayena vuttatāti sabbattha viññeyyaṃ. Evamupariipi.

178. Idāni paccayasaddagammopamaṃ nidasseti “**āyādi**”ccādinā. **Āyādi** “āya iya ka”itiādayo **paccayā** paccayasaddā nāma, **tehi** paccayasaddehi gammopamā vuccati “**vadanāṃ...pe... dalīyati**”ti. **Vadanāṃ** mukhaṃ **paṅkajāyate** padumamiva ruciraṃ ācarati. **Munindanayanadvandaṃ** sabbañño nettayugaḷaṃ **nīluppaladalīyati** nīluppalapattamiva ruciramācarati. Āyo ādi yesaṃ iyaṇanti ca, paṅkajamiva ruciramācarati pavattatīti ca, munindassa nayanadvandamiti ca, nīluppalassa dalamiti ca, tamiva ruciramācaratīti ca vākyam. Ettha “paṅkaja”miti ca “nīluppala”miti ca upamānaṃ, ācaraṇakriyāya kattubhūtaṃ vadanāṃ nayanadvandaṃca upameyyaṃ, rucirattaṃ upamānopameyyānaṃ sadhammo, upamānopameyyānaṃ samānadhammajotako **ivasaddo**, tesāṃ atthānaṃ paccayena vuttatā tesamappayogo. Evarūpesu aññesupi evameva vedītabbo.

**179. Ivādī iva vā tulya-samāna nibha sannibhā;
Yathāsāṅkāsa tulita-ppakāsa patirūpakā.**

**180. Sarīsarikkha saṃvādī, virodhī sadisā viya;
Paṭipakkhapaccanīka-sapakkho’pamito’pamā.**

**181. Paṭibimba paṭicchanna-sarūpa sama sammitā;
Savaṇṇā’bhā paṭinidhi, sadhammādi salakkhaṇā.**

**182. Jayatya’kkosati hasati, patigajjati dūbhati;
Usūyatya’vajānāti, nindati’ssati rundhati.**

**183. Tassa coreti sobhaggaṃ, tassa kantiṃ vilumpati;
Tena saddhiṃ vivadati, tulyaṃ tenādhirohati.**

**184. Kacchaṃvigāhate tassa, tamanvetya’nubandhati;
Taṃsīlaṃ, taṃ nisedheti, tassa cānukaroti’me.**

179-184. **Ivādī** ivādayo nāma imeti sambandho. Ivo ca vā ca tulyo ca samāno ca nibho ca sannibho cāti dvande **iva...pe... sannibhā**. Saddamapekkhiya pullīngatā. Evamupariipi yathāyogaṃ. “Sadhammādi”ti **ādisaddena** sādharmaṇasacchāyādināṃ pariggaho. Jayaticcādisu kammaṃ.

179- 184. **Ivādisaddagammopamādhikāre** paṭhamaṃ tāva “ivādayo nāma ete”ti dasseti “**ivādī**”ccādinā. **Ivādī**ti padassa chaṭṭhamagāthāya **imeti** iminā sambandho, **tassa cāti** **casaddaṃ** yujjanatthāne yojetvā **sannibhā cāti**ādayo yojetabbā. “Sadhammādi”ti **ādisaddena** sādharmaṇasacchāyādayo gahitā. **Nindati** **issatī**ti padacchedo, **ime** dvepaññaṃ ivādayo nāma. “Jayati

akkosati hasati’’iccādikam taṃtaṃkriyāpadasaṅkhataanukāriyānaṃ anukaraṇanti katvā dvandoyeva, “sandhisamāsā addhassā’’ti [[sandhisamāso tadaddhassāti \(ka.\)](#)] vuttattā sandhisamāsānaṃ gāthaddhassa vinā ubhayaddhamajjhe alabbhanato **dūbhatipadato** pubbeyeveva samāso kātabbo, no ce, asamāsoti gaḥetabbo. **Tassa coreti sobhaggamiccādikampi** vākyaṇukaraṇanti katvā tattha samāso, vākye kevalapadānīti vā gaḥetabbo. Imesaṃ sabbesampi **iva** saddapariyāyattā sadisatthāti sabbattha bhāvattho, avayavattho pana pākaṭṭoyeva.

**185. Upamānopameyyānaṃ, sadhammattaṃ vibhāvīhi;
Imehi upamābheda, keci niyyanti sampati.**

185. Ivādīnaṃ viniyogavisayaṃ dassetvā upamābhedaṃ dassetuṃ paṭijānāti “**upamāna**’’iccādi. **Kecīti** iminā aperiyaṇtattamesaṃ [[aperiyaṇtapabhedam \(ka.\)](#)] dasseti. Tathā ca vakkhati “pariyanto vikappāna’’ntiādi. **Niyyanti** udāhariyanti.

185. Idāni ivādisaddagammopamaṃ dassetuṃ paṭijānāti “**upamāno**’’ccādinā. Upamānopameyyānaṃ **sadhammattaṃ** samānadhammasambandho. **Vibhāvīhi** pakāsakehi. **Imehi** ivādīhi saddehi jānitabbā keci upamābheda aperiyaṇtattā **sampati** dāni laddhāvasare **niyyanti** udāharaṇamattena paṭipādīyanti.

**186. Vikāsipadumaṃ ’vā’-ti-sundaraṃ sugatānaṃ;
Iti dhammopamā nāma, tulyadhammanidassanā.**

186. “**Vikāsi**’’ccādi. **Sugatānaṃ** munindassa vadaṇaṃ **atisundaraṃ** accantaramaṇīyaṃ. Kimiva? **Vikāsipadumaṃva** pabujjhamānapadumaṃviya. **Iti** ayamevaṃvidhā dhammopamā nāma hoti. Kasmā? Ānapadumānaṃ samānassa dhammassa guṇassa sundarassa lakkhaṇassa nidassanā sundarattanti paṭipādanato.

186. Udāharaṇamāha “**vikāsi**’’ccādinā. **Sugatānaṃ** bhagavato mukhaṃ **vikāsipadumaṃva** bujjhamānapaṅkajamiva atisundaraṃ hoti. **Iti** īdisā upamā **tulyadhammanidassanā** atisundaramiti samānaguṇadassanena **dhammopamā** nāma hoti. Padumānanānaṃ sādharmaṇaguṇassa pakāsanaṇato atisundaramiti tulyadhammo nāma hoti. Ettha padumagatatulyadhammasambandhasaṅkhātāya upamāya **ivasaddena** jotiyamānattepi atisundaranti vuttattā yathāvuttopamāya dhammena yuttattā dhammopamā nāma hotīti adhippāyo.

**187. Dhammahīnā mukha’mbhoja-sadisam munino iti;
Viparītopamā tulya-mānana’mbujaṃ tava.**

187. “**Dhamma**’’iccādi. **Munino** sammāsambuddhassa mukhaṃ **ambhojena** padumena **sadisam** samānaṃ. **Iti** ayaṃ dhammahīnopamā nāma sundarasāṅkhātassa guṇassa aniddiṭṭhattā, sā tu atthavasā gamyate. Kathamaññathā yujjati? Ettha pana **sadisasaddo** upameyyassa mukhassa visesaṇanti mukhagatameva sadisattaṃ vadati, ambhojagataṃ tu sāmattihiyā gamyate. Evamīdisaṃ ñeyyaṃ. “**Viparīte**’’ccādi. Munīti gamyate sutattā, bho muni tava **ānanena** mukhena ambujaṃ tulyanti ayaṃ viparītopamā. Dhammahīnattepi pasiddhivipariyayenābhīhitattā tannāmeneva vuttā. Evamuparipi.

187. “**Dhammahīne**’’ccādi. “Mukhambhojasadisam munino’’tyayaṃ upamā. **Dhammahīnā** tulyadhammapakāsaka**sundarā**disaddahīnattā dhammahīnā nāma. Vācakābhāve tulyadhammo kathaṃ paṭiyatīti ce? Munino **mukhaṃ** vadaṇaṃ **ambhojasadisam** padumasadisamiti. Ettha mukhassa ambhojasamānattaṃ mukhambhojānaṃ sādharmaṇadhamme asati kathaṃ bhavati? Aññathānupapattilakkhaṇasāmattihiyāti, **ivapariyāyo** **sadisasaddo** mukhassa visesaṇaṃ yasmā hoti, tasmā mukhagatasadisattaṃ vadati, ambhojagatasadisattaṃ pana sāmattihiyā eva viññāyate. He muni **tava** tuyhaṃ ānanena ambhojaṃ **tulyaṃ** samānanti ayaṃ viparītopamā. “Ambujena ānanam tulya’’nti lokappasiddhiyā vipariyayena “ānanena ambujaṃ tulya’’nti vuttattā dhammahīnatte satipi viparītopamā nāma hoti. “Sutānumitesu sutasambandho balavā’’ti [[paribhāsendusekhara 112](#)] vuttattā ettha “muni’’ti avijjamānepi pubbaddhe “munino’’ti sutattā labbhamāno “tavā’’ti

tumhasaddasannidhānena āmantanattho viññāyati. Ettha **ivapariyāyo tulyasaddo** ambujavisesanabhūto ambujagatasadisattaṃ vadati, ānanagatasadisattañca ambujānanānaṃ sādharmaṇadhammo ca sāmattiyaṃ nāyaticcādikam vuttanayena ñātabbaṃ. Uparipi pākāṭaṭṭhānaṃ yathārahaṃ yojetabbaṃ.

**188. Tavānana’miva’mbhojaṃ, ambhoja’miva te mukhaṃ;
Aññamaññopamā sā’yam, aññamaññopamānato.**

188. “Tava”ccādi. **Aññamaññopamānato**ti aññamaññassa mukhassa ambhojassa ca aññamaññena taṃdvayena upamānato.

188. “Tavānani”ccādi. “Ambhojaṃ tavānanamiva, te mukhaṃ ambhojamivā”ti ayamupamā. **Aññamaññopamānato** aññamaññassa upamānattā aññamaññopamā nāma hoti. Aññamaññassa upamāti ca, aññamaññassa upamānanti ca viggaho. Viggahadvayepi pubbavibhattilopo. Sabbādīnaṃ byatihāralakkhaṇena uttaravibhattilopo. Samāsalakkaṇena aññatthassa apekkhāsiddhattā mukhāpekkhāya aññaṃ ambhojañca, ambhojāpekkhāya aññaṃ mukhañca kamena upameyyā nāma. Ambhojāpekkhāya aññaṃ mukhañca, mukhāpekkhāya aññaṃ ambhojañca upamānaṃ nāma.

**189. Yadi kiñci bhava’mbhojaṃ,
Locanabbhamuvibbhamam;
Dhāretuṃ mukhasobham taṃ,
Tave’ti abbhutopamā.**

189. “Yadi”ccādi. Locanāni ca bhamuyo ca, tāsam vibbhamo yasmiṃ, taṃ, tādīsamambhojaṃ **kiñci** kimapi yadi bhava. **Tamīdisamambhojaṃ tava mukhasobham** vadanakantiṃ dhāretuṃ nisijjhate. Kiṃ nvacchariyamīdisanti abbhutattavibhāvanena vadanamambujenopamīyatīti ayamabbhutopamā ñātabbāti.

189. “Yadi”ccādi. **Locanabbhamuvibbhamam** locanabhamūnaṃ līlavantaṃ **kiñci ambhojaṃ** kiñci acchariyam padumaṃ **yadi bhava** ce siyā, **tamambhojaṃ tava mukhasobham** vadanakantiṃ dhāretuṃ samattho hoti. **Iti** īdisī upamā **abbhutopamā** abbhutadhammapakāsakattā abbhutopamā nāma. Ettha avijjamānopi vijjamānattena parikappito padumagato locanabbhamuvibbhamasambandho ambhojavisesanena “locanabbhamuvibbhama”nti iminā jotito. Tasmā ambhojaṃ locanabbhamuvibbhamasambandhasaṅkhataupamāya jotakattā nissitavohārena upamā, mukhaṃ upameyyanti mukhagato locanabbhamuvibbhamasambandho yadi mukhe na bhaveyya, tādīsam mukhasobham dhāretuṃ kathaṃ samatthoti sāmattiyaṃ nāyati. Locanabbhamuvibbhamasaṅkhātasādhāraṇadhammo pana “locanāni ca bhamuyo ceti ca, tāsam vibbhamo yasmi”nti ca viggāhe nipphanna bhinnādhikaraṇaāññapadatthasamāsenā guṇibhūtassapi gahitattā viññāyati [[gahaṇassa viññāyamānattā \(ka.\)](#)].

**190. Sugandhi sobhasambandhi, sisiraṃsuvirodhi ca;
Mukhaṃ tava’mbujaṃve’ti, sā silesopamā matā.**

190. “Sugandhi”ccādi. Tava mukhaṃ ambhojamiva **sisiraṃsunocandassa virodhi** paccanīkam, mukhaṃ taṃsamānakantittā ambujañca tadudaye saṅkocabhajanato. **Sobhasambandhi** kantiyuttaṃ, mukhamambujañca. Sugandho assa atthīti **sugandhi** ca dvayamapīti evaṃ silesapariggahena mukhambujānaṃ upamāyogato **sā** yathāvuttā silesopamā matā.

190. “Sugandhi”ccādi. Tava mukhaṃ ambhojamiva **sisiraṃsuvirodhi** candassa viruddham hoti tulyattā. Padumaṃ pana candodayena attano saṅkocanattā tassa viruddham hoti. **Sobhasambandhi** ca anaññasādhāraṇamukhagatakantisambandhayuttañca hoti. Padumaṃ pana padumagatakantisambandhinā yuttaṃ hoti. **Sugandhi** ca catujjātisugandhavahanato [[...vamanato \(ka.\)](#)] sugandhi ca hoti. Ambujaṃ pana padumasugandheneva yuttaṃ hoti. **Iti** īdisī upamā **silesopamā** ekapadātihitabhayattalakkhaṇena silesavasena vuttattā silesopamā nāma hoti. Sisirā sītālā aṃsu kanti asseti ca, tassa virujjhati sīleneti ca, paccayasāmattiya vasena dvinnaṃ dvinnaṃ

atthānaṃ labbhanato silissati aparopi attho ettha alaṅkāreti ca, silesavasena vuttā upamāti ca viggaho. Ettha sugandho ca sotasambandho ca sisiraṃsuvirodhittañceti ime upamānopameyyānamambujamukhānaṃ tulyadhammo, tesu ambujagatatulyadhammasambandho sadhammattā upamā nāma hoti, sā ambujasambandhinā **ivasaddena** jotitā, mukhagatatulyadhammo pana assatthitassīlatthe katapaccaye satipi sāmattihiyāyeva gamyate.

**191. Sarūpasaddavāccattā, sā santānopamā yathā;
Bālā’vu’yyānamālā’yaṃ, sālakānanasobhini.**

191. “Sarūpa”iccādi. Ayamuyyānamālā **bālāva** itthi viya. Kathaṃ? **Sālakānanasobhini** bālā tāva sahalakena kesasannivesavisesena vattate sālakamānaṃ tena sobhate. **Sālakānanasobhini** uyyānamālāpi sālānaṃ rukkhavisesānaṃ kānanena gahanena sobhate, evarūpā **sā** tādisi santānopamā ākhyāyate, kasmā? Silesopamattasabhāvepi **sarūpena** sadisena **saddena** “sālakānanasobhini”’tvevaṃvidhena saddasantānena visesabhūtena **vāccattā** pakāsiyattā tassāti gamyate. **Yatheti** nidassane.

191. “Sarūpe”ccādi. **Sarūpasaddavāccattā** tulyasutiyā acchinnasambandhavacanamālāya vuccamānattā **sā** upamā santānopamā nāma hoti, silesatte satipi katasamāsehi padasantānehi vuccamānattā santānopamā nāma hotīti adhippāyo. “**Yathe**”ti udāharati. **Ayaṃ uyyānamālā** eṣā uyyānapanti **sālakānanasobhini** alakasaṅkhātakesasannivesasahitena mukhena sobhamānā **bālāva** aṅganā iva **sālakānanasobhini** sālavanehi sobhamānā hoti. Upamānopameyyānaṃ samānaṃ rūpaṃ yesanti ca, sarūpā ca te saddā ceti ca, tehi vāccā upamāti ca, tassā bhāvoti ca, santānena yuttā upamāti ca, uyyānānaṃ mālāti ca, saha alakena vattamānanti ca, taṅca taṃ ānanañcāti ca, tena sobhati sīlenāti ca, sālānaṃ kānananti ca, tena sobhati sīlenāti ca vākyam.

**192. Khayī cando bahurajaṃ, padumaṃ tehi te mukhaṃ;
Samānampi samukkaṃsi-tya’yaṃ nindopamā matā.**

192. “Khayī”iccādi. Cando **khayī** khayō accayo yasseti, padumaṃ **bahurajaṃ** bahūni rajāni parāgāvayavā yasminti, **tehi** evaṃbhūtehi candapadumehi kantiādinaṃ **samānampi** sadisampi santam tava mukhaṃ **samukkaṃsi** paramukkaṃsavantaṃ, **khayasaddassa** ca rajassa ca dosepi vattanato, saddacchalena khayassa dosarūpassa bahurajattassa ca tatthābhāvatoti. **Iti** evarūpā ayaṃ nindopamā matā ninditena candādinā khayassopamitattā.

192. “Khayī”ccādi. **Cando khayī** pāṭipadato paṭṭhāya dine dine ekamekāya kalāya sūriyassa āsannahetu khīyanasabhāvayutto hoti, **padumaṃ bahurajaṃ** bahureṇusamannāgataṃ hoti, **tehi** candapadumehi **samānampi** kantisugandhādīhi sadisampi **te mukhaṃ** tavānaṃ **samukkaṃsi** **khayarajasaddehi** dosassāpi vāccattā saddacchalehi gamyamānassa tādisassa dosassa mukhe avijjāmānattā adhikukkaṃsaguṇavantaṃ hoti, **iti** īdisi **ayaṃ** upamā nindopamā ninditānaṃ candapadumānaṃ mukhassa upamitāti nindopamā nāma hoti, mukhavisesanena **ivasaddapariyāyena** **samānasaddena** mukhagatasadhammo jotito hoti, upamāsaṅkhatacandapadumagatasadhammopi dvīsu tulyadhammopi sāmattihiyā gamyate, **apisaddo** cettha vattabbantarasamuccaye, samukkaṃsoti vattabbantaro.

**193. Asamattho mukheni’ndu, jina te paṭigajjitum;
Jaḷo kalaṅkī’ti ayaṃ, paṭisedhopamā siyā.**

193. “Asamattho”iccādi. Jina te mukhena **jaḷo** sīto akusalo ca kalaṅko migalañchanalakkhaṇo doso assa atthīti **kalaṅkī**. Saddacchalena dosakathanam. Tādiso **indu** cando **paṭigajjitum** vivaditum asamattho, mukhantu visadaṃ alaṅkatañceti kathamanenāyaṃ sadisoti nisedhadvārena sadhammatāva gammate, ayaṃ paṭisedhopamā siyā.

193. “Asamattho”ccādi. He **jina te** tuyhaṃ mukhena **paṭigajjitum** vivaditum **jaḷo** sītalo avisado **kalaṅkī** sasalakkhaṇo vā sadoso vā **indu** cando asamattho hotīti, **ayaṃ** edisi upamā paṭisedhopamā nāma. Kalaṅko assa atthīti vākyam. Ettha visadena kalaṅkarahitena mukhena sītalo

avisado sadoso cando samāno bhavitumasamatthoti evaṃ paṭisedhadvayena indamukhasaṅkhātānaṃ upamānopameyyānaṃ tulyadhammasambandhassa pakāsitattā satipi nindopamābhāve paṭisedhopamā nāma hotīti adhippāyo. “Paṭigajjitu”nti idaṃ candassa visesanattā candagatasadhammaṃ joteti.

**194. Kacchaṃ candāravindānaṃ, atikkamma mukhaṃ tava;
Attanāva samaṃ jāta-mitya’sādhāraṇopamā.**

194. “**Kaccha**”miccādi. Candassa aravindassa ca **kacchaṃ** padaviṃ atikkamma avatthariya tesa’ mavakaṃsato [[avatthuyatesamaṃsato \(ka.\)](#)], tava mukhaṃ attano sarūpeneva samaṃ jātamiti evarūpā asādhāraṇatābhidhānena sadisattapaṭītiyā asādhāraṇopameti nigadyate.

194. “**Kaccha**”miccādi. He muni tava mukhaṃ **candāravindānaṃ** lokapūjitānaṃ sasiambujānaṃ **kacchaṃ** padaviṃ avatthaṃ vā atikkamma attano atulyattena attanā eva samānattavatthuno abhāvā samaṃ jātā, **iti** īdisā upamā **asādhāraṇopamā** atulyadhammabhāvassa pakāsanato asādhāraṇopamā nāma hoti. Iha upamābhūtānaṃ candāravindānaṃ mukhassa hīnabhāvapaṭipādanadvārena candāravindehi mukhaṃ tulyanti paññāpanato candāravindā asādhāraṇopamā nāma hoti. **Samasaddo** mukhagatassa sādhāraṇadhammaṃ joteti. Sesāṃ suviññeyyaṃ.

**195. Sabbambhojappabhāsāro, rāsibhūto katthaci;
Tavā’nanam vibhātīti, hotā’bhūtopamā ayaṃ.**

195. “**Sabba**”iccādi. **Katthaci** ekaṭṭhāne rāsibhūto sabbesamambhojānaṃ pabhāsārova tavānanam vibhātīti evambhūtā ayaṃ abhūtopamā hoti.

195. “**Sabba**”miccādi. **Katthaci** ṭhāne rāsibhūto **sabbambhojappabhāsārova** sakalapadumānaṃ uttamakantipuñjo viya tavānanam **vibhātī** visesena pabhātī, **iti** īdisī upamā **abhūtopamā** avijjamānavatthuno upamitattā abhūtopamā nāma hoti. Arāsi rāsibhūtoti viggaho. Etha yojanāvibhūto tādisapabhāsārābhāvato avijjamānatthena parikkappito.

**196. Paṭiyate’tthagammā tu, saddasāmatthiyā kvaci;
Samāsapaccayevādi-saddayogaṃ vinā api.**

196. Atthagammopamaṃ dasseti “**paṭiyate**”iccādi. **Atthagammā** tu’pamā **kvaci** kismiñci ṭhāne samāsādisaddānaṃ yogaṃ vinā api saddānaṃ payogavisesādigāḷhena aññathānupapattilakkhaṇena sāmattiyena paṭiyate.

196. Tividhaṃ saddagammopamaṃ dassetvā idāni atthagammopamaṃ dasseti “**paṭiyate**”tyādinā. **Atthagammā tu** atthagammopamā pana **kvaci** ṭhāne samāsapaccayevādisaddayogaṃ **vināpi** tesāṃ saddānaṃ sambandhaṃ hitvāpi **saddasāmatthiyā** sambandhe payuttāvasesasaddānaṃ atthasattiyā paṭiyate. Saddānaṃ sāmattiyanti viggaho.

**197. Bhiṅgāne’māni cakkhūni, nā’mbujaṃ mukha’mevi’daṃ;
Subyattasadisattena, sā sarūpopamā matā.**

197. Udāharati “**bhiṅge**”ccādinā. Na bhiṅgā ete, kiñcarahi cakkhūnimāni, nambujametā, kintu mukhamevidanti evarūpā sā sarūpopamā matā bhiṅgādīnamaviparītasarūpassa dīpanato. Tenāha “**subyatte**”tyādi. **Subyattena** bhiṅgacakkhūnaṃ ambujamukhānañca paripphuṭena **sadisattena** cañcalattakantyaḍilakkhaṇena tenevābhedasāṅkāpubbameva vivecitaṃ aññatra cakkhādīsū yaṃ bhiṅgādīññānamuppannaṃ, tassa paccakkhānato upamājotakānamivādīnamabhāvepi bhiṅgalocanādīnaṃ sadisattaṃ paṭiyate sāmattiyato. Evamuparipi yathāyogaṃ.

197. Idāni udāharaṇamāharati “**bhīṅgāni**”ccādinā. Imāni **bhīṅgāni** bhamarā na bhavanti, kiñcarahi cakkhūni. Ambujam na idaṃ padumaṃ na hoti, kintu mukhamevāti. Īdisī sā upamā **subyattasadisattena** supākaṭena bhīṅgalocanānaṃ ambujamukhānaṃca tulyabhāvena sarūpopamā nāma hoti. Ettha samāsapaccayaivādisaddapayogābhāvepi “bhīṅgānemāni cakkhūni”ccādinā cakkhumukhesu bhīṅgaambujanti viparītapavattabuddhiṃ paṭisedhetvā cakkhumukhavidhānato cañcalattakantimattādīsu subyattaṃ tulyattaṃ vinā cakkhumukhesu bhīṅgambujabuddhiṃ kīdisamuppajjatīti aññathānupapattilakkhaṇasāmatthiyā upamānabhūtānaṃ bhīṅgambujānaṃ upameyyabhūtānaṃ cakkhumukhānaṃca sadisattaṃ ñāyati. Suṭṭhu byattaṃ pākaṭanti ca, taṅca taṃ sadisattañcāti ca, samānaṃ rūpaṃ sabhāvo yassā upamāyāti ca, sā ca sā upamā cāti ca vākyam.

**198. Mayeva mukhasobhā’sse-tyala’mindu vikatthanā;
Yato’mbujepisā’tthīti, parikappopamā ayaṃ.**

198. “**Mayevi**”ccādi. **Indu** canda, **assa** munino **mukhasobhā** vadanajuti **mayeva**, nāññatrāti evarūpā **vikatthanā** atthapasamsanena **alamiti** paṭisedho. Kimiti? **Yato** yasmā kāraṇā sā mukhasobhā ambujepi na kevalamindumhi **atthi**, no natthīti asatopi tathā vikatthanassa parikappanato vadanamindunopamīyatīti evarūpā ayaṃ parikappopamā.

198. “**Maye**”ccādi. He indu **assa** imassa lokasāmīno **mukhasobhā** vadanakanti ekake mayi eva, īdisī vikatthanā attasilāghena **alam** nippayojanaṃ. Kasmāti ce? **Yato sā** mukhasobhā ambujepi atthi, tasmāti. **Iti** īdisā ayaṃ upamā parikappopamā nāma hoti. **Yatoti** aniyamaniddiṭṭhakāraṇaṃ pana ambujepi sā atthīti dassiyamānaṃ padumepi tassa atthittameva. Parikappanāya vuttā upamāti viggaho. Idha candassa avijjānānavikatthanassa vijjānānattena parikappanato sadhammajotakasaddantare asatipi upamānabhūtainduno ca upameyyabhūtamukhassa ca sadisattaṃ imesaṃ dvinnam sadisattaṃ vinā vattuno tādisakappanā kathaṃ hotīti imāya atthasattiyā gamyate.

**199. Kiṃ vā’mbuja’ntobhantāli,
Kiṃ lolanayanaṃ mukhaṃ;
Mama dolāyate citta-
Micca’yaṃ saṃsayopamā.**

199. “**Kiṃ vā**”iccādi. Anto bhantā alī bhamarā yasmim, tamīdisamambujam kiṃ vā. Lolāni capalāni nayanāni yasmim, tādisaṃ vā. Jina tavedaṃ mukhaṃ kinti mama cittaṃ **dolāyate** dolevācarati. Evaṃ pakkhadvayapariggahena saṃsayatīti attho. **Iccayamīdisī** saṃsayavesena ambujamukhānamopamāvagamā saṃsayopamā.

199. “**Kiṃ vā’mbuje**”ccādi. **Antobhantāli** abbhantare bhamamānabhamaravantaṃ ambujam kiṃ vā, tuyhaṃ **lolanayanaṃ** cañcalanettaṃ mukhaṃ kiṃ vāti mama cittaṃ **dolāyate** ubhayasambhamajananato dolā viya hoti. **Iti ayaṃ** evarūpā upamā **saṃsayopamā** dvinnam sadisattassa saṃsayena pakāsītattā saṃsayopamā nāma hoti. Anto bhantā alī yasminti ca, lolāni nayanāni yasminti ca, dolā viya ācaratīti ca, saṃsayena vuttā upamāti ca viggaho. Ihāpi sadhammapakāsake saddantare asatipi yathāvuttavisesanadvayena visiṭṭhānaṃ dvinnam ambujamukhānaṃ saṃsayanimitte tulyatte asati kathaṃ saṃsayo uppajjatīti iminā sāmattiyeneva tulyadhammasambandho gamyate.

**200. Kiñci vatthum padassetvā,
Sadhammassā’bhidhānato;
Sāmyappatītisabbhāvā,
Pativatthūpamā yathā.**

200. “**Kiñci**”iccādi. **Kiñci vatthumicchitaṃ** sambuddhādikaṃ upadassetvā **sadhammassa** tena vatthunā kenaci ākārena sadisassa aññassa vatthuno abhidhānato **sāmyassa** tesam dvinnam sadisattassa **patītiyā** avasāyassa **sambhāvā** vijjānānattena pativatthūpamā vuccate. Pativatthunā tathāvidhenādhiगतassa vatthuno tulyatā paṭipādītā. **Yathetyudāharati.**

200. “**Kiñci**”ccādi. **Kiñci vatthumicchitaṃ jinādikiñcipadatthaṃ upadassetvā** paṭhamam nidassetvā **sadhammassa** paṭipādanīyaatthena saha kiñci ākārena sadisabhāvassa kassaci vatthuno **abhidhānato** kathanato **sāmyappatītisabbhāvā** sadisatāsambandhino pariṇānassa vijjānānattā **pativatthūpamā** vatthuno upaṭṭhitassa jinādipadatthassa tulyatthapakāsanato nāmena pativatthūpamā nāma. Samāno dhammo yassa vā pārijātādino iti ca, samānānaṃ tulyānaṃ upamānopameyyānaṃ bhāvoti ca, sāmyassa patīti ca, sāmyappatītiyā sabbhāvoti ca, pativatthunā vuttā upamāti ca vākyam. **Yathāti** udāharati.

**201. Janesu jāyamānesu,
Ne’kopi jinasādiso;
Dutiyo nanu nattheva,
Pārijātassa pādapo.**

201. “**Janesu**”ccādi. Jāyamānesu janesu majjhe ekopi jano guṇavā **jinasādiso** sammāsambuddhasamāno na vijjātītyekaṃ tāva vatthu upadassitaṃ, **dutiyo** iccādi pativatthūpamadassanaṃ, **nanū**tyanumatīyaṃ, **pārijātassa** dibbarukkhavisesassa **dutiyo** samāno pādapo nattheva. Pārijātoyeva rukkhajātīsu uttamo, tathā jino janesūti.

201. “**Janesu**”ccādi. Jāyamānesu janesu ekopi **jinasādiso** sambuddhasādiso natthi, **pārijātassa** rukkhassa **dutiyo** tena samo dutiyo **pādapo** rukkho natthi eva nanu, **nanū**ti anuññāyaṃ. Tena sabbaññuno aññena atulyabhāvaṃ anujānāti. Iha pārijātarukkhassa aññehi rukkhehi uttamattañca buddhassa aññesu sattesu uttamattañcāti idaṃ dvayaṃ upamānopameyyabhūtānaṃ dvinnāṃ vatthūnaṃ sāmyaṃ nāma, etaṃ sāmyaṃ vuttatthassa samatthanavasena pativatthubhūtapārijātassa rukkhehi asamānattakathaneneva jotitaṃ hoti.

**202. Vākyattheneva vākyattho,
Yadi kocyu’pamīyate;
Ivayuttaviyuttattā,
Sā vākyatthopamā dvidhā.**

202. Vākyatthavisayopamaṃ dasseti “**vākyatthenevi**”ccādinā. **Vākyattho** kriyākārasambandhaviseso, teneva, na padatthamattena **vākyattho** vuttalakkaṇo **koci** vattumicchito koci yadi **upamīyate** sadiso kathyate, sā vākyatthopamā dvidhā bhijjate. Kathaṃ? Yuttā ca viyuttā ca **yuttaviyuttā**, **ivena** atthaniddesoyaṃ yuttaviyuttā upamā, tassā bhāvā kāraṇā dvidhāti adhikataṃ.

202. Idāni vākyatthavisayopamaṃ dasseti “**vākyatthe**”ccādinā. **Vākyattheneva** kriyākārasambandhavisesañkhatasamudāyabhūtena vākyatthena **koci** vattumicchito yo koci **vākyattho** vuttalakkaṇo yadi **upamīyate** sadisabhāvena kathīyate, **sā** upamā **vākyatthopamā** nāma hoti. **Ivayuttaviyuttattā** **ivayuttaviyuttavasena** **dvidhā** dvippakārā. Ettha “**ivā**”ti **ivādī**namatthassa gahitattā **ivasaddopi** tappariyāyasaddāpi gayhante.

Ivayutta

**203. Jino saṃklesatattānaṃ,
Āvibhūto janāna’yaṃ;
Ghammasantāpatattānaṃ,
Ghammakāle’mbudo viya.**

203. Udāharati “**jino**”iccādi. Saṃkleshehi dasavidhehi **tattānaṃ** santāpaṃ anuppattānaṃ janānaṃ ayaṃ **jino** sammāsambuddho **āvibhūto** katakiccattā sammāsambodhādhiḡamena loke pātubhūto. Ekaṃ tāva vākyamupameyyabhūtaṃ. Kimivetyāha “**ghamme**”ccādi. Ghammasantāpena tattānaṃ janānaṃ **ghammakāle** gimhānasamaye **ambudo** megho viyāti dutiyavākyamupamānabhūtamityayamivayuttā vākyatthopamā. Ettha pubbuttaravākyatthānaṃ vīsesyavīsesanabhāvo ekavākyatthattāva veditabbo. Evamuparipi.

203. Udāharati “**jino**”ccādinā. **Ayaṃ jino** eso jitapañcamāro sathā **saṃklesatattānaṃ** anekappakāra kilesasantāpatattānaṃ janānaṃ **āvibhūto** katakicco hutvā sabbaññutaññādhigamena loke upaṭṭhito. Kena santattassa kassaci kimiveti ce? Ghammasantāpatattānaṃ janānaṃ **ghammakāle** gimhasamaye **ambudoviya** megho iva. Iha uttaravākyattho bhedakattā visesanaṃ hoti, pubbavākyattho pana bhedyattā viseso hoti. Evaṃ vākyabhede satipi vākyattho ekoveti daṭṭhabbo. Evamuttaratrāpi. Uttaravākye ivasaddo tasmimyeva guṇaguṇīpadatthānaṃ sadisattaṃ dīpeti, pubbavākye guṇaguṇīnaṃ sadisattaṃ pana uttaravākyatthassa pubbavākyena samānattaṃ vinā aññathānupapattiyā nāyati. Saṃklesehi tattāti ca, ghammo eva santāpoti ca, tena tattāti ca, ghammo eva kāloti ca vākyam.

Ivaviyutta

**204. Munindānana’ mābhāti, vilāsekamanoharaṃ;
Uddhaṃ samuggatassāpi, kiṃ te canda vijambhanā.**

204. Dutiyamāha “**muninda**”iccādinā. Vilāsena **ekamatulyaṃ** manoharaṃ dutiyassa tādisassābhāvato munindānanaṃ **ābhāti** atisayena sobhateti ekaṃ tāva vākyamupameyyabhūtaṃ. Bho **canda uddhaṃ** gaganatalaṃ **samuggatassāpi** abbhuṭṭhitassāpi **te** tava **vijambhanā** sāhaṃkāraparibbhamanena **kiṃ payojanaṃ** na kiṃpi, taṃsadisasobhāsampattiyābhāvato. Asadisattaṃ munindānanaṃ tassa tatopi uddhamuggacchato vilāsamattameva [\[piyāsamattameva \(ka.\)\]](#) phalasaṃbhavatoti dutiyavākyamupamānabhūtaṃ. Tathā hettha sabbathā sadisatāpatītiyā kariyamānānamuggamanavijambhanaṃ paṭikkhepena kathañcipi mukhacandānaṃ sādhammapatīti upamāvagamoti ayamivaviyuttavākyatthopamā.

204. Idāni ivaviyuttavākyatthopamāyeva udāharati “**munindānani**”ccādinā. **Vilāsekamanoharaṃ** līlāya atulyaṃ tatoyeva manoharaṃ **munindānanaṃ** sabbaññuno vadanaṃ **ābhāti** atidibbati, tasmā he **canda uddhaṃ** uccaṃ nabhaṃ samuggatassāpi **te** tuyhaṃ **vijambhanā** ahaṃkārena paribbhamanena kiṃ payojanaṃ. Iha pubbavākyatthassa uttaravākyattho ivaviyuttupamā nāma hoti. Tathā hi “sabbathā mukhena sadiso bhavāmī”ti mānaṃ karontassa candassa gaganatalārohopi vijambhanañceti imesaṃ dvinnaṃ paṭikkhepena mukhacandānaṃ vilāsekamanoharattaṃ kantimattasaṅkhātasadisattaṃ ivādīnamabhāvepi viññāyatīti katvā uttaravākyattho pubbavākyatthassa upamā ca visesanañca hoti. Vilāsena ekamatulyanti ca, tañca taṃ manoharañcāti ca viggaho. **Apisaddo** sambhāvanattho.

**205. Samubbejeti dhīmantam, bhinnaliṅgādikaṃ tu yaṃ;
Upamādūsanāya’la-metaṃ katthaci taṃ yathā.**

205. Dosapariçchede duṭṭhālaṅkatītimupamālaṅkāradūsaṃ dassetumāha “**samubbejeti**”ccādi. Yaṃ bhinnaliṅgādikaṃ tu, **ādisaddena** bhinnavacanahīnatāadhikatādīnaṃ pariggaho. **Tusaddo** atthajotako, tathāpīti attho. **Dhīmantam** medhāviṃ **samubbejeti** na pīneti, **etaṃ** bhinnaliṅgādikaṃ **katthaci** na sabbattha **upamādūsanāya** virodhatthaṃ **alam** samatthaṃ. “**Taṃ yathe**”ti udāharati.

205. Dosapariçchede dosānāmanuddesāvasāne niddiṭṭhāya duṭṭhālaṅkatīyā dassetabbaudāharaṇe

—
“Duṭṭhālaṅkaraṇaṃ tetam, yatthālaṅkāradūsaṃ;
Tassālaṅkāraniddese, rūpamāvibhavissatī”ti.

Katapaṭiññānusārena idāni dassetumāha “**samubbejeti**”ccādi. **Yaṃ bhinnaliṅgādikaṃ tu** vakkhamānaṃ yaṃ bhinnaliṅgavacanādikaṃ pana **dhīmantam** paññavantaṃ kaviṃ **samubbejeti** “evaṃ nāma vattabbaṃ siyā”ti ubbegaṃ janeti, **etaṃ** bhinnaliṅgādikaṃ **upamādūsanāya** yathāvuttaupamāvināsanatthaṃ **katthaci** “itthivāyaṃ jano yāti”iccādivattabbavisayato aññattha **alam** samatthaṃ. “**Taṃ yathā**”ti udāharati. Bhinnaṃ visadisañca taṃ liṅgañceti ca, taṃ ādi yassa visadisavacanādinoti ca, upamāya dūsanamīti ca vākyam.

**206. Haṃsīvā'yaṃ sasī bhinna-
Liṅgā'kāsaṃ sarāniva;
Vijātivacanā hīnā,
Sā'va bhatto bhaṭo'dhipe.**

206. “**Haṃsīvāya**”nti ayam **sasī** cando **haṃsīva** haṃsīsadiso. **Bhinnaliṅgā** bhinnaliṅgopamā. “**Ākāsaṃ sarānīvā**”ti **vijātivacanā** visadisavacanopamā. “**Bhaṭo adhipe** sāmini sāva bhatto”ti **hīnā** hīnopamā kukkurassa hīnena jātyādinā adhikassa upamittā.

206. “**Haṃsi**”ccādi. Ayam **sasī** cando **haṃsī iva** haṃsidhenūva hoti. Iccādikopamā **bhinnaliṅgā** upameyyato bhinnaliṅgattā bhinnaliṅgopamā nāma hoti. **Ākāsaṃ** nabhaṃ sarānivāti ayam **vijātivacanā** upameyyena visadisavacanattā vijātivacanopamā nāma hoti. **Adhipe** sāmini **bhaṭo** sevako **sāva** sunakho iva bhattoti ayam **hīnā** jātihīnena sunakhena uttamassa purisassa upamittā hīnopamā nāma hoti. Bhinnaṃ liṅgametissāti ca, vividhā jāti sabhāvo asseti ca, vijāti vacanaṃ assā upamāyāti ca viggaho.

**207. Khajjoto bhānumālīva,
Vibhātīyadhikopamā;
Aphuṭṭhatthā balambhodhi,
Sāgaro viya saṃkhubhi.**

207. “**Khajjoto**”iccādi. Khajjoto **bhānumālīva** sūriyo viya vibhātīyadhikopamā adhikena hīnassa upamittā. **Balambhodhi** senāsāgaro sāgaro viya saṃkhubhīti aphuṭṭhatthopamā “**balambhodhi**”ti rūpakena senāya mahantattāvagamato puna “**sāgaro viyā**”ti upamāya kassaci visesatthassa asaṃphuṭṭhattā.

207. “**Khajjoto**”ccādi. “**Khajjoto bhānumālīva vibhātī**”ti ayam **adhikopamā** adhikāya upamāya upamittā adhikopamā nāma hoti. “**Balambhodhi** senāsamuddo sāgaro viya saṃkhubhī”ti ayam **aphuṭṭhatthā** senāya mahattaṃ “**balambhodhi**”ti tirobhūtaupamāyeva avagataṃ, tasmā puna “**sāgaro viyā**”ti upamāya phusitabbatthassābhāvā aphuṭṭhatthopamā nāma hoti. Aphuṭṭho attho etissāti ca, balaṃ eva ambhodhīti ca vākyam.

**208. Cande kalaṅko bhiṅgove-
Tyu'pamāpekkhinī ayam;
Khaṇḍitā keravākāro,
Sakalaṅko nisākaro.**

208. “**Cande**”iccādi. Kalaṅko bhiṅgo viyātyayamupamā “**cande kusumagacchasadise**” ityupamantaramapekkhateti yato cande bhiṅgo na sambhavati, pupphagacche tu sambhavatīti ayamupamā upamāpekkhinī. **Sakalaṅko** sasalakkhaṇo **nisākaro** cando **keravākāro** kumudasannibhoti khaṇḍitopamā keravassa antokaṇhattaṃ paṭipādetuṃ “**sabhiṅgakeravākāro**”ti vattabbattā.

208. “**Cande**”ccādi. “**Cande kalaṅko bhiṅgo ivā**”ti ayam **upamāpekkhinī** candassaupamābhūtapupphagacchakādiapekkhanato upamāpekkhinī nāma hoti. Cande bhiṅgapavattiyā abhāvato tassa visayabhūtapupphagacchakādi candassa upamattena gahetvā avuttattā duṭṭhāti adhippāyo. **Sakalaṅko** kalaṅkasahito **nisākaro** cando **keravākāro** kumudasadisoti ayam **khaṇḍitā** candagataṃ kaṇhattaṃ pakāsetuṃ “**sabhiṅgakeravākāro**”ti vattabbe bhiṅgopamābhāvassa khaṇḍitattā khaṇḍitopamā nāma hoti. Upamaṃ apekkhatīti ca, khaṇḍaṃ itā gatīti ca, khaṇḍena itā yuttā vāti ca, keravassākāro asseti ca, saha kalaṅkena vattatīti ca vākyam.

**209. Icevamādirūpesu, bhavanti vigatādarā;
Karonti cā'daraṃ dhīrā, payoge kvacideva tu.**

209. Vuttaṃ nigameti “**iceva**”mādinā. **Rūpesu** payogesū. Vigato apagato ādaro sambhāvanā

yesaṃ tathā bhavanti. Kiṃ bhinnaliṅgādikaṃ niyamenānādarāṇīyameva, aniyameneti [niyameneti (ka.)] ce gayhūpagampi atthīti āha “karonti”ccādiṃ. Kvacideva tu payoge **dhīrā** kavayo ādaraṃ karonti cāti. **Casaddo** vattabbantarattamaṃ samuccinoti.

209. “Icce”ccādi. **Iti** anantaraṃ niddiṭṭhesu **evamādirūpesu** payogesū dhīrā vigatādarā bhavanti. Imeyeva dhīrā kvacideva tu payoge bhinnaliṅgādike ādaraṃ karonti ca. Iti evaṃ ayaṃ pakāro ādi yesamiti ca, tāni ca tāni rūpāni ceti ca, vigato ādaro yesamiti ca viggaho. **Casaddo** vākyantarasaṃuccaye. Tasmā vigatādaratthēna aññamādarakaraṇaṃ vuccamānakathāsantatiṃ ākaḍḍhati.

**210. Itthīvā’yam jano yāti,
Vadatyesa pumā viya;
Piyo pāṇā ivā’yam me,
Vijjā dhanamiva’ccitā.**

210. Udāharati “**itthi**”ccādi. Ayaṃ jano itthīva yāti kriyānuvattito. **Esā** itthī **pumāva** puriso viya vadati tādisassa pāgabbhiyayogato. Ettha liṅganānattamupamānopameyyānaṃ. **Ayam**icchito koci me pāṇā iva **piyo** iṭṭho, **vijjā** byākaraṇādayo dhanamiva **accitā** rāsikatāti vacanabhedo.

210. Idāni bhinnaliṅgānaṃ gahetabbavisayaṃ dasseti “**itthīvā’ya**”miccādinā. Ayaṃ jano **itthīva** avisadagamanena mahilā viya yāti. **Esā** itthī **pumā viya** tādisapāgabbhiyayuttattā puriso viya vadatīti. Iha dvinnaṃ upamānopameyyānaṃ liṅgabhedo satipi kavayo ādaraṃ karonti. **Ayam** puriso **me** mama **pāṇā iva** [pāṇā iva jīvo iva (ka.)] āyavova piyo. **Accitā** sañcitā **vijjā** byākaraṇanighaṇṭṭūdayo dhanamiva hontīti. Ettha upamānopameyyānaṃ vacanato visesatte satipi iṭṭhameva.

**211. Bhavaṃ viya mahīpāla, devarājā virājate;
Ala’maṃsumato kacchaṃ, tejasā rohituṃ ayaṃ.**

211. Hīnādhikamuttamudāharaṇamāha “**bhavaṃ viyi**”ccādi. **Mahīpāleyā**mantanaṃ, devarājā bhavaṃ viya virājate. Iti hīnenāpi hoti. Evaṃvidhe samucite visaye liṅgavacanabhedādikaṃ nopamaṃ dūsetīti [dassetīti (ka.)].

211. “**Bhava**”miccādi. **Mahīpāla** bho rāja, **devarājā** sakko devarājā bhavaṃ viya virājateti. Ettha sakkamupādāya “bhavaṃ viyā”ti hīnattepi iṭṭhameva. **Ayam** rājā **aṃsumato** sūriyassa **kacchaṃ** padaviṃ tejasā **ārohituṃ** pattuṃ **alam** samatthoti. Ettha tejasā adhipokopi sūriyo upamābhūto iṭṭhova, “kacchaṃ ārohitu”nti **ivasaddapariyāyo**. Īdisaṃ bhinnaliṅgādikopamādikaṃ upamādūsanam na karoti.

**212. Upamānopameyyānaṃ, abhedassa nirūpanā;
Upameva [upamāva (sī. ka.)] tirobhūta-bhedā rūpakamuccate.**

212. Rūpakaṃ nirūpayati “**upamāne**”ccādinā. Upamānopameyyānaṃ yathāvuttānaṃ **abhedassa** nānattābhāvassa **nirūpanā** āropanena upamānopameyyānamabhedam rūpayati dassetīti **rūpakamuccate**. Upamānassa upamānopameyyānamabhedāropanena **tirobhūto** apākaṭo **bhedo** nānattaṃ yassāti tādisī **upameva** yathāvuttalakkhaṇā **rūpakamuccate** “rūpaka”nti. “Padambuja”nti ettha padameva ambujasadisattā ambujaṃ rupyate. Ityupameyyopamānabhūtānaṃ padambujānamabhedāropanena upamānopameyyagatasādhammasaṅkhātāyapi upamāya bhedo vijjāmānopi tirohito. Na tu āvibhūto [abbhuto (ka.)] “padaṃ ambujamive”ti. Sā copamā tathāvidhā upamānopameyyānamabhedamāyāti nāmāti rūpakamuccateti adhippāyo.

212. Idāni uddiṭṭhakkamena rūpakālaṅkāraṃ dasseti “**upamāno**”ccādinā. **Upamānopameyyānaṃ** anantaraniddiṭṭhaupamānopameyyānaṃ **abhedassa** sabhāvato bhede satipi vibhūtasadisattaṃ nissāya “so eso, eso so”ti vattārehi parikkappitassa abhedassa **nirūpanā**

upamānopameyyapadatthesu buddhiyā āropanaṃ nissāya **tirobhūtabhedā** “padaṃ ambujamivā”’ti evaṃ pākaṭānānattaṃ vinā “padambuja”’nti tirohitabhedā **upameva** padatthānaṃ sādhammasaṅkhātā upamā eva **rūpakam** iti vuccate. Vibhūtasadisattaṃ nissāya upamānopameyyavatthūni abhedena gayhanti. Tesamabhedaggahaṇeneva te nissāya pavattamānabhinnasādhammasaṅkhātāya upamāyapi bhedo tirohito hoti. Evaṃ tirobhūtanānattavantasādhammasaṅkhātā upamā eva vatthūnamabhedam dīpetīti rūpakam nāma hotīti adhippāyo. Tirobhūto bhedo yasseti ca, abhedam rūpayati pakāsetīti ca vākyam.

**213. Asesavatthuisayaṃ, ekadesavivatti ca;
Taṃ dvidhā puna paccekam, samāsādivasā tidhā.**

213. Tassa bhedaṃ niddisati “**asesa**”’iccādinā. Asesavatthu visayo yassa taṃ tathāvidhañca, **ekadese** avayave vivattaṭīti ekadesavivatti ceti taṃ rūpakam dvidhā, puna **paccekam** viṣuṃ viṣuṃ **samāsādivasā** upamānopameyyānaṃ katasamāsattā samāsarūpaka asamāsarūpaka samāsāsamāsarūpakavasena tidhā siyā.

213. “**Asesi**”’ccādi. **Taṃ** rūpakam asesavatthuisayaṃ ekadesavivatti cāti dvidhā hoti, puna paccekam taṃ dvayampi **samāsādivasā** samāsarūpakaṃ asamāsarūpakaṃ samāsāsamāsarūpakañceti imesaṃ bhedena tidhā hoti. Asesaṃ vatthu visayo asseti ca, ekadese vivattaṭīti ca, ekaṃ ekaṃ patīti ca, samāso samāsarūpakaṃ ādi yesamiti ca, tesam vasa bhedoti ca, tīhi pakārehīti ca viggaho.

Asesavatthuisayasamāsa

**214. Aṅgulīdalasaṃsobhiṃ, nakhadīdhitikesaraṃ;
Sirasā na piḷandhanti, ke munindapadambujam.**

214. Udāharati “**aṅguli**”’ccādi. Aṅgulīhiyeva upamānagamattā siniddhatambāhi **dalehi** pattehi **saṃsobhiṃ** accantaṃ virocamaṇaṃ nakhānaṃ **dīdhitiyo** kiraṇā eva kesarāni yattha tādisaṃ munindassa padameva ambujam **sirasā** muddhanā **ke** nāma janā **na piḷandhanti** pasādhanavasena na dhārentīti. Idamasesavatthuisayaṃ samāsarūpakaṃ aṅgino padassa aṅgānamaṅgulyādīnamasesānaṃ rūpanato. Evamuparipi yathāyogaṃ.

214. Idāni udāharati “**aṅguli**”’ccādi. **Aṅgulīdalasaṃsobhiṃ** aṅgulisaṅkhatehi pattehi saṃsobhiṃ **nakhadīdhitikesaraṃ** nakharaṃsisāṅkhatakesaraṃ munindapadambujam sirasā ke na piḷandhanti. Visesyabhūtaṃ caraṇaṃ visesanabhūtā aṅgulī nakhadīdhiti ceti imesaṃ upamābhūtehi ambujadalakesarehi abhedakappanāya ekattaṃ gahetvā samāseneva niddiṭṭhattā idam asesavatthuisayasamāsarūpakaṃ nāma. Aṅguliyo eva dalānīti ca, tehi saṃsobhīti ca, nakhesu dīdhitiyoti ca, tā eva kesarāni asseti ca vākyam.

Asesavatthuisayaasamāsa

**215. Ratanāni guṇā bhūrī, karuṇā sītalaṃ jalaṃ;
Gambhīrattamaḡadhattaṃ, paccakkho’yaṃ jino’mbudhi.**

215. “**Ratanāni**”’iccādi. Ayaṃ **jino** sammāsambuddho, **paccakkho** na parokkho amhākaṃ **ambudhi** sāgaro. Kathaṃ? Ye tassa **bhūrī** bahavo **guṇā** mettādayo, te **ratanāni** atulyadullabhadassanādisādhammena. Yā tassa karuṇā, sā sītalaṃ jalaṃ sakalajanasantāpāpahattasādhammena. Yaṃ tassa **gambhīrattamanuttānātā** lābhādīsu, taṃ **agādhattamakalalambhaso** ambudhiṭṭhatāsādhammenāti idamasesavatthuisayaṃ asamāsarūpakaṃ.

215. “**Ratanāni**”’ccādi. Ayaṃ jino amhākaṃ paccakkho **ambudhi** sāgaro, tathā hi tassa **bhūrī guṇā** silasamādhīdayo **ratanāni** cittikatādisādhammato ratanāneva, **karuṇā** anaññasādharāṇakarūṇā **sītalaṃ jalaṃ** santāpavinodanasādhammena sītalajalameva hoti, **gambhīrattaṃ** lābhālābhādīsu ekākārātā **agādhattaṃ** gambhīratā eva hoti. Idam

asesavatthuvisayaasamāsarūpakam. “Bhūrī”ti abyayaṃ.

Asesavatthuvisayamissaka

216. Candikā mandahāsā te, muninda vadaninduno; Pabodhayatya’yaṃ sādhu-manokumudakānanam.

216. “Candikā”iccādi. “Muninda”iccāmantanam, te vadanameva indu **vadaninduno** iti samāsarūpakam, ayaṃ mandahāsā **candikā** candakantiyo, asamāsarūpakam. Sādhūnam manāniyeva **kumudāni** keravāni, samāsarūpakam. Tesam **kānanam vanaṃ, pabodhayati** vikāsayatīti idam samāsasamāsarūpakam.

216. “Candi”ccādi. He **munindate** tuyhaṃ **vadaninduno** mukhacandassa **mandahāsā** mandamihitabhūtā **candikā** candakantiyo, “aya”nti jātyekavacanena mandahāsacandikā niddiṭṭhā. Atha vā **ayaṃ** vadanindu. **Sādhumanokumudakānanam** sappurisānam cittasaṅkhātaakeravakānanam **pabodhayati** vikāsayatī. “Candikā mandahāsā”ti asamāsarūpakam. “Vadaninduno”ti ca “manokumudakānana”nti ca samāsarūpakam. Tasmā idam asesavatthuvisayasamāsasamāsarūpakam. Mandā ca te hāsā cāti ca, vadanameva indūti ca, sādhuṇam manānīti ca, tāniyeva kumudānīti ca, tesam kānanamiti ca viggaho.

217. Asesavatthuvisaye, pabhedo rūpake ayaṃ; Ekadesavivattimhi, bhedo dāni pavuccati.

217. Nigamayati “asesi”ccādinā. Dutiyassa pabhedam vattum paṭijānāti “eki”ccādinā.

217. “Asese”ccādi. Asesavatthuvisaye rūpake **ayaṃ** “aṅgulīdalasaṃsobhim”iccādikam udāharaṇattayaṃ pabhedo hoti. Idāni ekadesavivattimhi rūpake **bhedo** viseso pavuccati.

Ekadesavivattisamāsa

218. Vilāsahāsakusumam, rucirādharapallavam; Sukham ke vā na vindanti, passantā munino mukham.

218. “Vilāsa”iccādi. Vilāsenā yutto hāsoyeva kusumam yassa. **Ruciro** manuṅṅo adharoyeva pallavo yassa. Tādisam munino mukham passantā **ke** nāma janā sukham na vindanti sabbeṭīti. Idam aṅgāni hāsādīni rūpayitvā mukhamaṅgi na rūpitanti ekadesavivattisamāsarūpakam. Evaṃ uparipi yathāyogaṃ.

218. “Vilāsi”ccādi. **Vilāsahāsakusumam** līlayuttahāsasaṅkhatapuppham **rucirādharapallavam** manuṅṅaadharasaṅkhatākisalayaṃ munino mukham passantā **ke vā** ke nāma janā **sukham na vindanti** pītisukham nānubhonti, anubhavanteva. Visesanabhūtānam hāsaadharānam upamābhūtākusumapallavehi abhedam dassetvā visesyabhūtassa mukhassa aññataraupamāvattunā abhedena avuttattā abhedāropanam ekadeseyeva vivattīti idam ekadesavivattisamāsarūpakam. Vilāsenā yutto hāsoti ca, soyeva kusumam asseti ca, ruciro ca so adharo ceti ca, soyeva pallavo asseti ca vākyam.

Ekadesavivattiasamāsa

219. Pādadvandam munindassa, dadātu vijayam tava; Nakharamsī param kantā, yassa pāpajayaddhajā.

219. “Pāda”iccādi. **Munindassa** vijayino pādadvandam tava **vijayam** paṭipakkhaparābhavam dadātu. Kīdisam? Yassa **paramaccantam kantā** manuṅṅā nakharamsī **pāpānam** lobhādīnam jaye ussitā **dhajā** ketavoti. Idamekadesavivattiasamāsarūpakam.

219. “Pāde”ccādi. Yassa sambuddhassa **param** atisayena **kantā** manuññā **nakharamsī** caraṇanakhakantiyo **pāpajayaddhajā** pāpavijaye ussāpitadhajāyeva honti, tassa munindassa **pādadvandam** caraṇayugaḷam **tava** tuyham **vijayam** paṭipakkhaparābhavam dadātūti. Nakharamsīnam upamābhūtaḍḍhahajehi abhedamāropetvā “pādadvanda”miti anirūpitattā ekadesavivattiasamāsārūpakam nāma. Pāpānam jayoti ca, tasmim dhajāti ca viggaho.

Ekadesavivattimissaka

**220. Sunimmalakapolassa, munindavadaninduno;
Sādhuppabuddhahadayam, jātam keravakānanam.**

220. “Sunimmala”iccādi. Sunimmalo kapolo yassa, tassa munindavadaninduno sādḥūnam **pabuddham** dhammāvabodhavasena vikasitam **hadayam** cittam keravakānanam jātanti ekadesavivattisamāsāsārūpakam.

220. “Sunimmali”ccādi. Sunimmalakapolassa munindavadaninduno **sādhuppabuddhahadayam** sajjanānam catusaccāvabodhena pasannamānasam **keravakānanam** kumudavanam jātanti. Vadanahadayānam upamābhūtehi indukeravehi abhedāropanam katvā kapolassa maṇḍalādīhi upamāvisesehi anirūpitattā ekadesavivattisamāsāsārūpakam. Ettha samāso nāma vadanindūnameva. Asamāso nāma hadayakeravānamevāti. Tathā hi rūpakavisaye samāsāsamāsattam upamānopameyyapadānam dvinnamēvāti. Suṭṭhu nimmaloti ca, so kapolo assāti ca, munindavadanameva indūti ca, pabuddhañca tam hadayañcāti ca, sādḥūnam pabuddhahadayamiti ca, keravānam kānanamiti ca vākyam.

**221. Rūpakāni bahūnyeva, yuttāyuttādibhedato;
Visum na tāni vuttāni, etthe’va’ntogadhāni’ti.**

221. Ettakoyeva kiṃ rūpakabhedoti āha
“**Rūpakāni**”ccādi; Subodham; Tattha –

“Sītapupphujalam lola-nettabhiṅgam tavānanam;
Kassa nāma mano dhīra, nākaḍḍhati manohara”nti.

Yuttarūpakam yuttattā pupphabhiṅgānam, tadanusārena ayuttarūpakādipi viññeyyanti.

221. Rūpakāni punapi santīti dassetumāha “**rūpakāni**”ccādi. Rūpakāni **yuttāyuttādibhedato** yuttarūpakaayuttarūpakādibhedena bahūni eva honti, **tāni** rūpakāni **ettheva** rūpake antogadhāni. **Iti** tasmā kāraṇā tāni visum na vuttāni. Anto majjhe gadhāni pavattānīti viggaho.

“Sītapupphujalam lola-nettabhiṅgam tavānanam;
Kassa nāma mano dhīra, nākaḍḍhati manohara”nti.

Ettha pupphabhiṅgānam aññamaññayuttattā yuttarūpakam nāma.

He dhīra **sītapupphujalam** mandahasitasāṅkhātehi kusumehi vijotantam lolanettabhiṅgam manoharam tavānanam kassa nāma mano nākaḍḍhatīti. Imassa paṭipakkhato ayuttarūpakam veditabbam.

**222. Candimā’kāsapaduma-miccetam khaṇḍarūpakam;
Duṭṭha’ambhoruhavanam, nettāni’ccādi sundaram.**

222. Rūpakassa virodhāvirodho upamāyamivo’hitum sakkāti upalakkheti “**candimā**”iccādinā. Ettha ākāsassa taḷāke rūpīte candassa padumattam rūpakam yuttanti etam khaṇḍarūpakam duṭṭham, “ambhoruhavanam nettāni”ccādi tu vacanabhedepi sundaram.

222. Rūpake dosādosam upamāyaṃ viya parikappetvā gahetabbanti upadisanto āha “**candimi**”ccādi. “**Candimā** cando ākāsapaduma’nti etaṃ **khaṇḍarūpakam** ākāsassa taḷākattena anirūpitattā khaṇḍarūpakam nāma. **Duṭṭham** khaṇḍitopamā viya dosaduṭṭham nāma. “**Ambhoruhavanam** nīluppalavanam nettānī”tiādikaṃ upamānopameyyānam vacananānattepi sundarameva.

**223. Pariyanto vikappānam, rūpakasso’pamāya ca;
Natthi yaṃ tena viññeyyaṃ, avutta’manumānato.**

223. Kimettakā evopamārūpakabhedā? Neti paridīpento avuttaṃ atidisati “**pariyanto**”iccādinā. Rūpakassa upamāya ca **vikappānam** pabhedānam **pariyanto** avasānam natthi **yaṃ** yasmā kāraṇā, **tena** kāraṇena **avuttaṃ** ihānupātaṃ vikappajātaṃ sabbavikappabyāpakasāmaññalakkhaṇānugatarūpakavikappānusārena viññeyyaṃ. Kasmā? **Anumānato** yathāvuttavikappasaṅkhātalingato avuttasesarūpakāvagamasaṅkhātena anumānaññenāti attho.

223. Idāni imesameva upamārūpakānam avuttānantabhedo vuttānusāreneva ñātabboti dassetumāha “**pariyanto**”iccādi. **Rūpakassa ca** rūpakālaṅkāraṇassa ca **upamāya ca** upamālaṅkāraṇassa ca **vikappānam** vividhākārena kappitapakkhānam **pariyanto** koṭi **yaṃ** yasmā natthi, **tena** kāraṇena **avuttaṃ** imasmiṃ subodhālaṅkāre avuttapakkhāṃ samūhaṃ **anumānato** anumānaññenena viññeyyanti. Upamārūpakānam sakalamavuttapakkhāṃ byāpetvā ṭhitam sāmaññalakkhaṇam anatikkamitvā vuttehi tehi tehi pakkhasaṅkhātehi līngehi siddhānumānaññenena sāmaññalakkhaṇe antogadhānamanuttarūpakasaṅkhātānumeyyānam avabodho sakkāti adhippāyo. Rūpakassa pana upamantogadhattā upamāya niddiṭṭhadosaṃ dvinnamapi uttānuttapakkhassa sādharmaṇam hoti.

**224. Punappunamuccāraṇam, ya’matthassa padassa ca;
Ubhayesaṅca viññeyyā, sā’ya’māvutti nāmato.**

224. Āvuttimadhikiccāha “**puna**”iccādinā. **Atthassa** abhidheyyassa **padassa** saddassa ca **ubhayesaṃ** atthapadānaṅca **punappunam** bhiyyo bhiyyo yaṃ uccāraṇam, **sāyam** tividhā nāmato āvutti viññeyyā, uccāraṇavasena ā punappunam vattanamāvuttīti.

224. Idāni āvuttiṃ dasseti “**punappune**”ccādinā. **Atthassa** saddābhihitaatthassa ca padassa ca **ubhayesaṃ** atthapadānaṅca yaṃ punappunuccāraṇam, **sā ayam** tividhā nāmato āvutti iti viññeyyā. **Punappuneti** etadabyayaṃ kriyābhūlye vattate. Uccāraṇavasena ā punappunam vattanamāvuttīti.

Atthāvutti

**225. Mano harati sabbesaṃ, ādadāti disā dasa;
Gaṇhāti nimmalattaṅca, yasorāsi jinassa’yaṃ.**

225. Udāharati “**mano**”iccādi. Jinassa ayam yasorāsi **sabbesaṃ** janānam **mano** cittaṃ harati, dasa disā ādadāti sabbadā [**sabbadhā** (ka.)] taṃvisayattā, **nimmalattam** nimmalabhāvaṃ gaṇhāti, ettha gahaṇalakkhaṇassa [**dasagahaṇalakkhaṇassa** (ka.)] atthassa anekehi pariyāyavacanehi āvattitattā ayam atthāvutti.

225. Udāharati “**mano harati**”ccādinā. Jinassa ayam yasorāsi **sabbesaṃ** sattānam **mano** cittaṃ **harati** gaṇhāti, dasa disā **ādadāti** avisayaṭṭhānābhāvato gaṇhāti, **nimmalattaṅca** bhūtaparisuddhagūṇena nipphannattā gaṇhāti. Ettha “gaṇhāti”ti ekassevatthassa “harati, ādadāti, gaṇhāti”ti aññehi pariyāyavacanehi āvattitattā ayam atthāvutti nāma. Niggato malehīti ca, tassa bhāvoti ca, yasaso rāsiiti ca viggaho.

Padāvutti

**226. Vibhāsenti disā sabbā, munino dehakantiyo;
Vibhā senti ca sabbāpi, candādīnaṃ hatā viya.**

226. “**Vibhāsenti**”ccādi. Munino dehakantiyo sabbā disā **vibhāsenti** visesena dīpentī, yato evaṃ tasmā kāraṇā candādīnaṃ sabbāpi **vibhā** sobhā **hatā** pahatā viya **senti** pavattantīti padāvutti.

226. “**Vibhāsenti**”ccādi. Munino dehakantiyo sabbā disā **vibhāsenti** yasmā visesena pakāsenti, tasmā candādīnaṃ sabbāpi **vibhā** kantiyo **hatā** pahatā viya **senti** pavattanti ca, “vibhāsenti”ti padasseva āvattanato ayaṃ padāvutti nāma. Dehe kantiyoti vākyam.

Ubhayāvutti

**227. Jitvā viharati klesa-ripuṃ loke jino ayaṃ;
Viharatyā’rivaggo’yaṃ, rāsībhūto va dujjane.**

227. “**Jitvā**”iccādi. Ayaṃ jino klesaripuṃ jitvā loke **viharati** pavattati, ayaṃ tena jito **arivaggo** sattusamūho dujjane rāsībhūto viya tato aladdhappatiṭṭhattā. “Viharatī”ti atthassa padānaṅca āvuttito ubhayāvutti.

227. “**Jitvā**”iccādi. Ayaṃ jino klesaripuṃ jitvā loke viharati, ayaṃ **arivaggo** klesaripusamūho dujjane rāsībhūto va viharatīti. Vāsasaṅkhatassa atthassa ca “viharatī”ti padassa ca puna [punappunam (?)] uccāraṇato ayaṃ ubhayāvutti nāma hoti. Kleso eva ripūti ca, arīnaṃ vaggoti ca, arāsi rāsi abhavīti ca, kucchito janoti ca vākyam.

**228. Ekattha vattamānampi, sabbavākyopakāraṃ;
Dīpakaṃ nāma tañcādi-majjhantavisayaṃ tidhā.**

228. Dīpakaṃ paridīpayamāha “**ekatthe**”ccādi. **Ekattha** vākyassādo majjhe ante vā **vattamānampi** kriyājātyādikaṃ **sabbassa** abhimatassa kassaci **vākyassa** kriyākāraśambandhābhīdhāyīno padasantānassa upakāraṃ vākyatthānvayavasena **dīpakaṃ nāma**, dīpo viya ekadesse vattitopi sakalapadatthavasena sabbavākyam dīpayati pakāsetīti. **Tañca** dīpakaṃ ādi ca majjhaṅca antañca visayo gocaro yassa tādisaṃ **tidhā** ādidīpakaṃ majjhadīpakaṃ antadīpakanti tividhaṃ hotīti attho, tampi kriyādīnaṃ vasena paccekam tividhaṃ hoti.

228. Idāni dīpakālankāraṃ dasseti “**ekatthe**”ccādinā. **Ekattha** vākyassa ādimajjhāvasānesvekasmiṃ **vattamānampi** kriyājātiḡuṇattayaṃ **sabbavākyopakāraṃ** vattumicchitakriyākāraśambandhappakāśakapadasantānaśākhātāvākyassa vākyatthāvabodhavasena payojanaṃ **dīpakaṃ nāma** ekaṭṭhāne ṭhatvā visayībhūtasabbaṭṭhānagatatadabbapakāśakapadīpasamānattā dīpakaṃ nāma hoti. **Tañca** dīpakaṃ **ādimajjhantavisayaṃ** vākyassa ādivisayaṃ majjhavisayaṃ antavisayaṅceti tidhā hoti. Etesu ekekamaṃ kriyājātiḡuṇabhēdena punaṃpi tividhaṃ hotīti viññeyyam. Dīpetīti dīpo, padīpo. Paṭībhāgatthe kappaccayena dīpo viyāti **dīpakaṃ**. Vākyassa ādi ca majjhaṅca antañceti ca, taṃ visayo asseti ca vākyam.

Ādidīpaka

**229. Akāsi buddho veneyya-bandhūnamamitodayaṃ;
Sabbapāpehi ca samaṃ-nekatitthiyamaddanaṃ.**

229. Udāharati “**akāsi**”ccādi. Buddho **veneyyā** vinetabbāyeva bandhavo tesam **amītamaparimitam udayam** abhivuddhiṃ akāsi. Na kevalam tameva, sabbapāpehi **samaṃ** ekato anekānaṃ titthiyānaṃ maddanaṅca akāsīti. Iha “akāsī”ti kriyāpadenādivattinā sabbameva vākyam dīpayatīti kriyādidīpakametam.

229. “**Akāsi**”ccādi. Buddho veneyyabandhūnaṃ **amitodayaṃ** pamāṇarahitābhivuddhiṃ akāsi. Na kevalaṃ tameva, **samaṃ** ekakkhaṇe sabbapāpehi sahanekatitthiyamaddanañca akāsīti. Vākyādīmhi kriyāya ʔhitattā idaṃ kriyādīpakaṃ nāma. Amito ca so udayo ceti ca, anekā ca te titthiyā ceti ca, tesam maddanamiti ca viggaho.

Majjhedīpaka

**230. Dassanaṃ munino sādhu-janānaṃ jāyate’ mataṃ;
Tadaññesaṃ tu jantūnaṃ, visaṃ nīcopatāpanaṃ.**

230. “**Dassana**”miccādi. Munino dassanaṃ sādhujanānaṃ **amataṃ** nibbānaṃ nāma jāyate amatassa sādhanato, **tehi** sādhujanehi aññesaṃ jantūnaṃ nīccamupatāpetīti **nīcopatāpanaṃ** visaṃ jāyate, tasmīṃ manopadosassa visasadisattā nīrayādidukkhāvahabhāvatoti. Kriyāmajjhādīpakametaṃ.

230. “**Dassana**”miccādi. Munino dassanaṃ sādhujanānaṃ **amataṃ** amatasankhātanihbānassa ekantakāraṇattā kāriyopacārena amataṃ bhūtaṃ jāyate, **tadaññesaṃ** tehi sādhujanehi aññesaṃ jantūnaṃ tu **nīcopatāpanaṃ** satatamupatāpakaraṇato **visaṃ jāyate** visatulyapaṭighakāraṇattā kāriyopacārena visaṃ bhavatīti. Idaṃ kriyāya majjhe ʔhitattā kriyāmajjhādīpakaṃ. Sādhavo ca te janā ceti ca, tehi aññeti ca vākyam.

Antadīpaka

**231. Accantakantalāvaṇya-candātapamanoharo;
Jinānanindu indu ca, kassa nā’nandako bhava.**

231. “**Accante**”ccādi. Accantaṃ **kantaṃ** manuññaṃ **lāvaṇyaṃ** piyabhāvo, tameva, tamiva **vācandātapo** candikā, tena manoharo jinānanindu **indu** cando ca **kassa** janassa ānandako na bhavatīti. Kriyāntadīpakaṃ.

231. “**Accanti**”ccādi. **Accantakantalāvaṇyacandātapamanoharo** atisayena manuññāpiyabhāvasāṅkhātavilāsānāmakena candakiraṇena, no ce, atisayena manuññāpiyatāsāṅkhātavilāsasadisena candakiraṇena manoharo **jinānanindu** sambuddhassa mukhacando **ca indu** ca pakaticando ca kassa ānandako na bhava. Idaṃ kriyāya ante ʔhitattā kriyāntadīpakaṃ nāma. Antaṃ atikkantanti ca, tañca taṃ kantañceti ca, lavaṇassa bhāvo lāvaṇyaṃ, madhurabhāvo, taṃsadisattā accantakantañca taṃ lāvaṇyañcāti ca, candassa ātapo kiraṇoti ca, accantakantalāvaṇyameva candātapoti ca, candapakke accantakantalāvaṇyamiva ca so candātapo cāti ca, tena manoharoti ca, jinānanameva indūti ca vākyam. Iminā kriyādīpakattayeneva avuttajātīdīpakaguṇādīpakānīpi ñātābbāni.

Mālādīpaka

**232. Hotā’vippaṭisārāya,
Sīlaṃ pāmojjahetu so;
Taṃ pītihetu, sā cā’yam,
Passaddhādīpasiddhiyā.**

232. Ādīdīpakādīsūpi tesu payogakkamena pakārantaramatthīti vadati “**hoti**”ccādi. **Sīlaṃ** pañcasīlādīkaṃ, **avippaṭisārāya** pacchānutāpābhāvāya hoti, **so** avippaṭisāro **pāmojjassa** uppannamattāya pītiyā hetu hoti, **taṃ** pāmojjaṃ **pītiyā** balavabhūtāya hetu hoti, **sā cā’yam** pīti **passaddhādīnaṃ** passaddhisukhādīnaṃ **pasiddhiyā** nipphattiyā hotīti yojanīyam.

232. Idāni navasu dīpakesu payogavisesena sādhetabbe aññāpakāre dasseti “**hoti**”ccādinā. **Sīlaṃ** surakkhitaṃ pañcaṅgadasaṅgādīsīlaṃ avippaṭisārāya hoti, **so** avippaṭisāro **pāmojjahetu** hoti

uppannamattāya taruṇapītiyā kāraṇaṃ bhavati, **taṃ** pāmojjaṃ **pīti**hetu balavapītikāraṇaṃ hoti, **sā ayañca** pīti **passaddhādīpasiddhiyā** kāyapassaddhicittapassaddhiādīnaṃ siddhiyā hetu hoti. Na vipphaṇṇāro avipphaṇṇāro, **nasaddo** pasajjapaṭisedhe vattate. Pamuditassa bhāvoti ca, tassa hetūti ca, passaddhi ādi yesaṃ sukhādīnanti ca, tesaṃ pasiddhīti ca viggaho.

**233. Iccā’didīpakattepi, pubbaṃ pubbamapekkhinī;
Vākyamālā pavattāti, taṃ mālādīpakam matam.**

233. Kimidaṃ tava pakārantaramiccāha “**iccādi**”ccādi. **Icev**amimaṃ yaṃ taṃ mālādīpakam matam. Nanu kriyādīdidīpakametamiccāha “**ādīdidīpakattepi**”ti. Yajjapyādīdidīpakametam **pubbaṃ pubbaṃ** vākyam “hotāvippaṭisedhāyā silā”ntīādīkaṃ apekkhinī apekkhamānā **vākyānaṃ** yathāvuttānaṃ **mālā** paramparā pavattāti. Taṃ yathāvuttaṃ mālādīpakam matam, nādīdidīpakanti.

233. “**Iccādi**”ccādi. **Ādīdidīpakattepi** kriyādīdidīpakabhāve satipi **vākyamālā** anekavākyena sambajjhamānā paramparā **pubbaṃ pubbaṃ** “hotāvippaṭisedhāyā”ntīādīkaṃ vākyam apekkhinī pavattā. **Iti** idaṃ anantaragatappakāraṃ dīpakam “mālādīpaka”nti matanti. Ādimhi dīpakamiti ca, visayopacārena ādi ca taṃ dīpakañcāti ca, mālā eva dīpakamiti ca vākyam.

**234. Aneneva pakārena, sesānamapi dīpake;
Vikappānaṃ vidhātābbā-nugaṭī suddhabuddhibhi.**

234. Avutte dīpakavikappe atidisanto nigameti “**aneni**”ccādinā. **Aneneva** anantarā vuttena **pakārena** vidhinā **dīpake** dīpakavisaye [**dīpakavisese** (ka.)] **sesāna**mavuttānaṃ **vikappānaṃ** jātyādīdidīpakādībhedaṇaṃ **anugaṭī** avabodho **suddhabuddhibhi** parisuddhamatīhi kavīhi **vidhātābbā** kātabbāti.

234. Idāni avuttadīpakānīpi atidisati “**anenevi**”ccādinā. **Aneneva pakārena** yathāvuttadīpakappakārena **dīpake** dīpakavisaye **sesānaṃ api** vikappānaṃ avuttajātidīpakaguṇādīpakasaṅkhātānaṃ pakkhānaṃ jātyādīdidīpakaguṇādīdidīpakādīnaṃ channaṃ mālādīpakānañca **anugaṭī** avabodho **suddhabuddhibhi** kavīhi **vidhātābbā** vuttānusāreneva kātabbā. Visesto asaṅkarato kappīyantīti ca, suddhā buddhi yesanti ca vākyam.

**235. Visavacanicchāyaṃ,
Nisedhavacanaṃ tu yaṃ;
Akkhepo nāma so’yañca,
Tidhā kālappabhedato.**

235. Akkhepamupakkhipati “**visesi**”ccādinā. **Visesassa** yassa kassaci vacanicchāyaṃ yaṃ **nisedhassa** paṭisedhassa **vacanaṃ** vutti, **so** akkhepo nāma akkhipanaṃ paṭisedhoti katvā. **Soyam**akkhepo ca **kālappabhedato** atītādito **tidhā** tippakāro.

235. Idāni akkhepaṃ dasseti “**visese**”ccādinā. **Visavacanicchāyaṃ tu** yassa kassaci padatthavisesassa kathanicchāya eva yaṃ **nisedhavacanaṃ** paṭisedhavacanaṃ atthi, **so** paṭisedho **akkhepo** nāma akkhepālaṅkāro nāma. **Ayañca** akkhepo **kālappabhedato** atītādīkālavisēsena tidhā hoti. Visesassa kassaci vacananti ca, tasmim icchāti ca, nisedhassa paṭisedhassa vacanamiti ca, akkhipanaṃ paṭikkhipananti ca, kālassa kriyāya vā pabhedoti ca vākyam.

**236. Ekākī’nekasenaṃ taṃ, māraṃsavijayijino;
Kathaṃ ta’matha vā tassa, pāramībalamīdisaṃ.**

Atītakkhepo.

236. “**Ekākī**”ccādi. So jino **ekākī** eko samāno anekasenaṃ taṃ māraṃ **vijayi** parājesi, taṃ kathaṃ yujjate. Atha vā kiṃ na yujjate, yato **tassa** jinassa **pāramī** samatīṃsavīdhā pāramitā eva

balam **īdisam** yādisam tassa vijayakāraṇanti. Ettha ekākittakāraṇasāmatthiyā māravijayāyogabuddhi “sasenaṃ māraṃ vijitavāti kathaṃ yujjati”’ti evamākārā atītā akkhittāti atītakkhepoyaṃ.

236. Idāni udāharati “**ekāki**”ccādinā. **Sa jino** so sabbaññū **ekāki** asahāyo adutiyo anekasenam taṃ māraṃ **vijayī** ajinīti, taṃ kathaṃ yujjati. Atha vā yujjateva, **tassa** jinassa **pāramībalaṃ** samatiṃsapāramībalaṃ samatiṃsapāramītasāṅkhatasena **īdisam**īdisāti. Buddhassa adutiyaabhāvaṅca māraṃsa aparivārabhāvaṅca nissāya kassaci uppannā “ekākinā kathamanekaseno māro jito”’ti viparītabuddhi atītāmāravijayavisayattā atītā hoti, “tassa pāramībalaṃ īdisa”’nti atthavisesassa kathanicchāya “atha vā”’ti niddiṭṭhapāṭisedhavacanena akkhittanti atītassa akkhepanato atītakkhepo nāma.

**237. Kiṃ citte’jāsamugghātaṃ,
Appatto’smiti khijjase;
Paṇāmo nanu soyeva,
Sakimpi sugate kato.**

Vattamānakkhepo.

237. “**Kiṃ citte**”ccādi. Citta **ejāya** taṅhāya samugghātaṃ sabbathā appavattiṃ appattosmīti kiṃ khijjase, tuccho tava khedo. Sugate **sakimpi** ekavārampi kato paṇāmo **soyeva** taṅhāya samugghātoyeva nanu ekantakāraṇattā tassāti vattamānakkhepoyaṃ vattamānassa khedassākkhitattā.

237. “**Kiṃ citte**”ccādi. He **citta ejāsamugghātaṃ** ejāsāṅkhatāya taṅhāya samucchadapahānaṃ appattosmīti kiṃ khijjase, tuccho tava khedo. Tathā hi **sugate** buddhavisaye sakimpi kato paṇāmo **soyeva nanu** taṅhāsamucchadassa ekantakāraṇattā kāraṇakāriyānamabhedabuddhiyā so ejāsamugghātoyeva kiṃ na bhavati, bhavatyeva. “Paṇāmo”’tyādivisesakathanādhippāyena “kiṃ khijjase”’ti cittassa vattamānakhedassa paṭisedhitattā ayaṃ vattamānakkhepo nāma. Ejāya samugghātoti vākyam.

**238. Saccaṃ na te gamissanti, sivaṃ sujanagocaraṃ;
Micchādiṭṭhiparikkanta-mānasā ye sudujjanā.**

Anāgatakkhepo.

238. “**Sacca**”miccādi. Sujanagocaraṃ **sivaṃ** santipadaṃ te **saccaṃ** niyataṃ na gamissanti. Ye **micchādiṭṭhiyā** sassatādikāya **parikkantaṃ** abhibhūtaṃ **mānasam** cittaṃ yesaṃ tādīsā suṭṭhu atisayena dujjanāti yojanīyam. Ayamanāgatakkhepo bhāvino gamanassākkhitattā.

“Jīvitāsā balavatī, dhanāsā dubbalā mama;
Gaccha vā tiṭṭha vā kanta, mamāvattā niveditā”’ti [[kābyādāsa 2.139](#)].

Ayamanādarakkhepoti evamādayo tu tabbhedāyevāti upekkhitā.

238. “**Sacca**”miccādi. **Sujanagocaraṃ** sādhuṇaṃ visayagataṃ **sivaṃ** santipadaṃ te **saccamekanta** na gamissanti. Ke? Ye micchādiṭṭhiparikkantaṃ mānasā sudujjanā, teyevāti. “Micchādiṭṭhi”’tiādivisesassa kathanādhippāyena “te na gamissanti”’ti titthiyānaṃ bhāvino nibbānagamaṇassa buddhiyā paṭisiddhattā ayaṃ anāgatakkhepo nāma. Micchā viparītā ca sā diṭṭhi cāti ca, tāya parikkantaṃ mānasam yesanti ca vākyam.

“Jīvitāsā balavatī, dhanāsā dubbalā mama;
Gaccha vā tiṭṭha vā kanta, mamāvattā niveditā”’ –

Tyādiko anādarakkhepopi dassitātītakkepādīhi anaññattā visum na vutto. Ayaṃ panettha attho

– he **kanta** vallabha mama jīvitāsā balavatī hoti, dhanāsā dubbalā, tvam gaccha vā tiṭṭha vā, **mamāvattā** mama pakati **niveditā** viññāpitā. “Ettha mamāvattā niveditā”ti visesassa kathanādhippāyena “gaccha vā tiṭṭha vā”ti iminā anādaravacanena attano vallabhassa vattamānassa anāgatassa vā gamanassa paṭisedhitattā vattamānakkhepo vā anāgatakkhepo vā hoti.

**239. Ñeyyo sotthantaranyāso,
Yo’aññavākyatthasādhano;
Sabbabyāpī visesaṭṭho,
Hivisiṭṭhā’ssa bhedato.**

239. Atthantaranyāsaṃ nyāsayati “**ñeyyi**”ccādinā. **Aññavākyatthasādhano** aññassa vattumicchitassa kassaci vākyatthassa sādhano samatthako kassacideva atthassa parassa nyāso yo, so atthantaranyāso ñeyyo atthantarassa kassaci vatthuno nyāso payogoti katvā. Tassa bhedaṃāha “**sabbe**”ccādinā. **Assa** atthantaranyāsassa **bhedato** vikappato **hivisiṭṭhā** **hisaddena** visesitā sabbabyāpī ca visesaṭṭho cāti ime bhavanti. Nanu pativatthūpamāya imassa ca ko bhedoti? Saccam, tathāpi ubhayattha atthantaranyāsamattena sadisattepi yattha mukhyato sāmyappatṭisabbhāvo, sā pativatthūpamā. Yattha pana sādhanarūpassevatthantaranyāso, so atthantaranyāsoti pākaṭoyevubhinnaṃ bhedoti.

239. Idāni atthantaranyāsaṃ dasseti “**ñeyya**”ccādinā. **Yo aññavākyatthasādhano** aññavākyatthassa sādhano hoti, aññavākyatthaṃ sādheti, so atthantaranyāso sādhiyavākyatthato aññatthassa ṭhapanam kathanam “atthantaranyāso”ti ñeyyo, **assa** atthantaranyāsassa **bhedato** pabhedena sabbabyāpī visesaṭṭho ca, ete yeva **hivisiṭṭhā** cāti cattāro bhavanti. Attho ca so antaro añño ceti ca, tassa nyāsoti ca, sabbam byāpeti silenāti ca, visese padese tiṭṭhātī ca, **hisaddena** visiṭṭhāti ca vākyam.

Hi-rahitasabbabyāpī

**240. Tepi lokahitāsattā, sūriyo candimā api [candimārapi (sī.)];
Attham passa gamissanti, niyamo kena laṅghyate.**

240. Udāharati “**tepi**”ccādi. Lokassa **hite** abhivuddhiyam **āsattā** abhirattā sūriyo candimā apīti te mahantāpi **attham** udayavipariyāsa’ mabhāvaṃ gamissanti, na [gamissantā puna (ka.)] tatheva tiṭṭhanti, “passe”ti tamavabodhayati. Tathā hi niyamo “bhāvo nāma na pāyini. Sabbe saṅkhārā vayadhammino”ti ayam niyati. **Kena** nāma vatthunā **laṅghyate** atikkamituṃ sakkāti. Ayam **hisaddarahito** sabbabyāpī atthantaranyāso tādisassa niyamassa sabbagatattā.

240. “**Tepi**”ccādi. **Lokahitāsattā** lokābhivuddhiyam laggā sūriyo api candimā api tepi mahānubhāvā **attham** vināsaṃ gamissanti, **passa** etesaṃ pākaṭam vināsaṃ olokehi. Tathā hi **niyamo** “sabbe saṅkhārā aniccā”ti sabbapadatthamanatikkamma pavattaniyamo **kena laṅghyate** paccayasamuppannaena kena padatthena atikkamyateti. Ayam **hisaddarahito** atthagamanasaṅkhāto niyamo sabbattha gatoti sabbabyāpī atthantaranyāso. Pativatthūpamāya ca atthantaranyāsassa ca atthantaranyāsattena tulyattepi tattha sādhammapakāsattasabhāvo, ettha vuttatthassa sādhanasabhāvoti evamimesaṃ nānattaṃ subyattaṃ. **Apīti** sambhāvanāyam, dutiyo **apisaddo** samuccaye.

Hi-sahitasabbabyāpī

**241. Satthā devamanussānaṃ, vasī sopi munissaro;
Gatova nibbutiṃ sabbe, saṅkhārā na hi sassatā.**

241. “**Satthā**”iccādi. **Devamanussānaṃ** devānañca manussānañca ukkaṭṭhaparicchedavasena **satthā** diṭṭhadhammikasamparāyikehi paramatthehi yathārahaṃ anusāsātīti, **vasī** pañcahi vasitāhi atisayavasīhi vasippatto sopi munissaro **nibbutiṃ** khandhaparinnibbānasaṅkhātāṃ **gato** pattoyeva,

hisaddo samatthane. Sabbe **saṅkhārā** paccayasamuppannā **na sassatā** na niccā uppādavayadhammattā aniccā. Ayampi **hisaddasahitasabbabyāpī** atthantaranyāso aniccatāya sabbagatattāti.

241. “Satthā”iccādi. Devamanussānaṃ ukkaṭṭhavasena **satthā** diṭṭhadhammikasamparāyikatthehi yathārahamanusāsako **vasī** vuṭṭhānaadhiṭṭhānādīsu pañcasu vasibhāvesu sātisayaṃ issariyavā so munissaro api **nibbutiṃ** khandhanibbānaṃ gato eva. **Hi** tatheva, sabbe saṅkhārā sassatā na hontīti. Ayaṃ **hisaddasahito** aniccatāya sabbagatattā sabbabyāpī atthantaranyāso. Vaso assa atthīti vākyam.

Hi-rahitavisesatṭha

**242. Jino saṃsāarakantārā, janaṃ pāpeti nibbutiṃ;
Nanu yuttā gati sā’yam, vesārajjasamaṅginaṃ.**

242. “Jino”iccādi. Jino saṃsāroyeva kantāro duggamattā, tato **janaṃ** sakalampi lokaṃ nibbutiṃ pāpeti. **Nanu** pasiddhiyamanumatiyam vā. Sāyam **gati** nibbutipāpanasaṅkhātā pavatti, vigato sārado bhayamassāti visārado, tassa bhāvo nibbhayatā [**nibbhayatāya (ka.)**] **vesārajjam**, tena **samaṅginaṃ** yuttānaṃ. **Yuttāti** anurūpāti. Ayaṃ **hisaddavirahito** visesatṭho atthantaranyāso, vesārajjasamaṅgīnameva tathābhāvato na sabbabyāpī.

242. “Jino”iccādi. Jino **janaṃ** sattalokaṃ saṃsāarakantārā nibbutiṃ pāpeti, sā ayaṃ **gati** pavatti **vesārajjasamaṅginaṃ** catuvesārajjaguṇasamannāgatānaṃ tathāgatānaṃ yuttā nanūti. Ayaṃ janānaṃ nibbānaṃ pāpanā vesārajjasamaṅgīnaṃyeva āveṇikattā visesatṭho **hisaddarahito** atthantaranyāso. Vigato sārado bhayam asseti ca, kassa bhāvoti ca, tena samaṅginoti ca vākyam. **Nanūti** pasiddhiyam anumatiyam vā vattate. Dvinnampi attho vuttanayena ñātabbo.

Hi-sahitavisesatṭha

**243. Surattaṃ te’dharapuṭaṃ, jina rañjeti mānasam;
Sayam rāgaparītā hi, pare rañjenti saṅgate.**

243. “Suratta”miccādi. Jina **te** tava **surattaṃ** bimbaphalasangānaṃ adharapuṭaṃ **mānasam** passataṃ yesaṃ kesañci **rañjeti** pīṇetīti. **Hi** samatthane, tathā hīti attho. Sayam yena kenaci **rāgena** rattavaṇṇena anurāgena vā **parītā** gatā **saṅgate** attanā saṃsaṭṭhe **pare** aññe rañjenti rattavaṇṇe anuratte vā karontīti sasilesa sādhanā. Ayañca **hisaddasahito** visesatṭho atthantaranyāso tathābhāvassa tathāvidhānameva sambhavato.

243. “Suratta”miccādi. Bho **jina** te tava **surattaṃ** adharapuṭaṃ oṭṭhayugaḷaṃ **mānasam** passantānaṃ [**pasannacittaṃ (ka.)**] cittaṃ **rañjeti** pīṇayati. **Hi** tatheva, sayam **rāgaparītā** rattavaṇṇena anurāgena vā yuttā **saṅgate** attanā saṃsaṭṭhe **pare** aññe **rañjenti** rattavaṇṇe anuratte vā karonti. Idaṃ tesam sabhāvameveti. Ayaṃ īdisānameva āveṇikattā visesatṭho **hisaddasahito** atthantaranyāso. Puṭasadisattā adharo eva puṭamīti ca, rāgena parītā yuttāti ca viggaho.

**244. Vācce gamme’tha vatthūnaṃ,
Sadisatte pabhedanaṃ;
Byatireko’ya’mapye’ko-
Bhayabhedā catubbidho.**

244. Byatirekavikappamāha “**vācce**”iccādinā. **Vatthūnaṃ** vattumicchitānaṃ kesañci vatthūnaṃ **sadisatte** kathañci vatthūnaṃ tulyatte **vācce** saddena vācakena paṭipādite atha **gamme** asaddapaṭipādite sabbatthabalena pakaraṇādīnā ñāte vā, na kevalaṃ saddapaṭipādite. **Pabhedanaṃ** tesameva vatthūnaṃ visesakathanaṃ **byatireko** byatirecanaṃ puthakkaraṇanti katvā. **Ayaṃ** byatirekopi **ekobhayabhedā** ekabyatireko ubhayabyatirekoti vāccagammānaṃ paccekam visesena

catubbidho.

244. Idāni byatirekaṃ dasseti “**vācce**”iccādinā. **Vatthūnaṃ** vattumicchitānaṃ kesañci padatthānaṃ **sadisatte** yena kenaci ākārena samānante **vācce** vācakasaddena paṭipādaniye **atha** puna **gamme** tasmimyeva sadisatte atthasattisañkhātasāmatthiyena gammamāne **pabhedanaṃ** tesamyeva vatthūnaṃ nānattakathanāṃ byatireko nāma. **Ayampi** byatireko **ekobhayabhedā** byatirecanasañkhātaṃ puthakkaraṇasāmaññaena abhinno pi vāccagammānaṃ dvinnāṃ paccekameva ekabyatireko ubhayabyatirekoti visesena catubbidho hoti. Sadisānaṃ bhāvoti ca, pakārena bhedanaṃ kathanamiti ca, byatirecanaṃ puthakkaraṇamiti ca, eko ca ubhayo cāti ca, tesam bhedo visesananti ca viggaho.

Vāccaekabyatireka

245. **Gambhīrattamahattādi-
Guṇā jaladhinā jina;
Tulyo tva’masi bhedo tu,
Sarīrene’disena te.**

245. Udāharati “**gambhīra**”iccādi. Tvaṃ **gambhīrattaṃ** agādhatā ajjhāsayaṃ viṣiṭṭhatā ca **mahattaṃ** vepullaṃ guṇamahantatā ca taṃ ādi yassa upakāritādino, tasmā guṇā **jaladhinā** sāgarena tulyo. “**Asī**”tisaddapaṭipāditaṃ sadisattaṃ vuttaṃ. Bhedaṃ dasseti “**bhedo tu**”iccādinā. **Bhedo tu** viseso pana sāgarena saha **īdisena** dissamānena karacaraṇādimitā rucirena te **sarīreneva** hetunā, nāññathā, tassedisaṃ sarīraṃ natthīti. Sadisatte paṭipādite ekabyatirekoyaṃ ekasmiṃ jine vattamānena dhammena upameyyopamānabhūtajinasāgarānaṃ tassa bhedassa paṭiyamānattā.

245. Idāni tamudāharati “**gambhīratti**”iccādinā. He **jina** tvaṃ gambhīrattamahattādiguṇā jaladhinā tulyo asi. Iminā vākyena jinasāgarānaṃ dvinnāṃ saddena vāccasadisattaṃ vuttaṃ. **Bhedo tu** sāgarena saha tava viseso pana **te** tuyhaṃ **īdisena** evarūpena dissamānahatthapādādiavayavayuttana **sarīrena** sarīrahetunā hoti. Dvinnāṃ vatthūnaṃ vattabbasadisattaṃ vatvā iminā vākyena “**īdisena sarīrenā**”ti ekasmiṃyeva jinapadatthe visesakathanena jaladhito jinapadatthassa viṣuṃ katattā sadisatte saddena vācce sati ayamekabyatireko nāma. Gambhīrassa gambhīraguṇayuttassa sāgarassa vā gambhīrajjhāsayasamaṅgino jinassa vā bhāvoti ca, mahato pakatiyā mahato sāgarassa vā guṇehi mahato jinassa vā bhāvoti ca, gambhīrattañca mahattañcāti ca, taṃ ādi yassa upakāritādinoti ca, so ca so guṇo ceti ca vākyam.

Vāccaubhayabyatireka

246. **Mahāsattā’tigambhīrā, sāgaro sugatopi ca;
Sāgaro’ñjanasañkāso, jino cāmīkarajjuti.**

246. “**Mahā**”iccādi. Sāgaro sugatopi cāti te ubho **mahantā sattā** makarādayo yattha sāgare, **mahantaṃ** vā **sattaṃ** sammappadhānaṃ yassa sugatassa, **atigambhīrā** atisayena agādha itī. Sadisatābhedaṃ māha “**sāgaro**”iccādinā. Sāgaro **añjanasañkāso** añjanena tulyo, kaṇhoti vuttaṃ hoti. Jino tu cāmīkarassa suvaṇṇasseva juti sobhā asseti **cāmīkarajjuti**. Vācce sadisatte ubhayabyatirekoyaṃ ubhayattha vattamānena guṇena ubhinnaṃ upamānopameyyānaṃ bhedassa paṭiyamānattā.

246. “**Mahā**”iccādi. Sāgaro sugatopi cāti ime dve **mahāsattā** kamena timitimiṅgalādimahāsattā ca, lābhālābhādīsu anaññasādhāraṇattā mahantatādibhāvasañkhātasadisattayuttā ca, **atigambhīrā** avagāhitumasakkuṇeyyattā ca, ajjhāsayaṃ gambhīrattā ca dve pi atigambhīrā honti. Tesu sāgaro añjanasañkāso, jino **cāmīkarajjuti** suvaṇṇasadisakantiyutto hoti. Ettha pubbaddhena dvinnāṃ vatthūnaṃ sadisattaṃ vatvā aparaddhena tadubhayavatthugatavisesena tesam dvinnamaññaṃ māññato visesitattā sadisatte saddena vattabbe sati ayaṃ ubhayabyatireko nāma. Mahantā sattā macchakacchapādayo yattha sāgareti vā, mahantaṃ

sattaṃ samānabhāvo yassa sugatassāti vā, atisayena gambhīrāti ca, añjanena saṅkāso sadisoti ca, cāmīkarassa iva juti asseti ca vākyam.

Gammaekabyatireka

247. Na santāpāpahaṃ nevi-cchitadāṃ migalocaṇaṃ; Muninda nayanadvandaṃ, tava tagguṇabhūsiṃ.

247. “Ni”ccādi. Migassa locanaṃ santāpaṃ kilesapariḷāhaṃ apahanati hiṃsatīti **santāpāpahaṃ** na bhavati. Neva icchitaṃ saggamokkhasampattiṃ dadātīti **nevicchitadāṃ**. Muninda tava nayanānaṃ dvandaṃ yugaḷaṃ tu **tehi** yathāvuttehi santāpāpahattaicchitadattaḡuṇehi **bhūsiṃ**malaṅkataṃ. Ettha pana migalocanayanānaṃ dīghattādinā sadisattaṃ patīyate. Gamme sadisatte ekabyatirekoyaṃ vuttanayena.

247. “Na santā”iccādi. **Migalocaṇaṃ** migapotakacakkhuyugaḷaṃ **santāpāpahaṃ** kilesasantāpāpahaṃ na hoti. **Ichchitadāṃ** lokehi patthitalokiyalokuttarathānaṃ dāyakaṃ na hoti. He **muninda** tava nayanadvandaṃ pana **tagguṇabhūsiṃ** janasantāpāpahānādiyathāvuttaguṇehi sobhitaṃ hoti, iha santāpāpahananādīnaṃ paṭisedhadvārena upamānopameyyabhūtaubhayalocanasāṅkhātavatthūnaṃ dīghaputhulatādisadisadhammaṃ sāmattiyaena pakāsetvā aparaddhena santāpāpahananādiguṇahetu jinanayanānaṃ visuṃ katattā sadisatte gammamāne ayamekabyatireko nāma. Santāpaṃ apahanati hiṃ satīti ca, icchitaṃ dadātīti ca, te ca te guṇā cāti ca, tehi bhūsiṃtanti ca vākyam.

Gammaubhayabyatireka

248. Munindānana’ambhoja-mesaṃ nānatta’midisaṃ; Suvuttāmatasandāyi, vadaṇaṃ ne’disa’mbujaṃ.

248. “Muninda”iccādi. Munindānanaṃ ambhojañceti yāni vatthūni kantādinā patīyamānattā sadisatthāni, esaṃ **nānattaṃ** bhedo īdisaṃ. Kathaṃ? Vadaṇaṃ suvuttāmataṃ saddhammāmataṃ sandadātīti **suvuttāmatasandāyi**, ambujaṃ tu nedisanti. Iminā bhedena imesaṃ visadisattā “esa”ntyādināhu. Patīyamānena sadisānīti gamme sadisatte ubhayabyatirekoyaṃ vuttanayeneti.

248. “Muninda”iccādi. Munindānanaṃ ambhojañceti imesaṃ dvinnaṃ nānattaṃ īdisaṃ. Kathanti ce? **Esaṃ** dvinnaṃ vadaṇaṃ **suvuttāmatasandāyi** suṭṭhu vuttattā suvuttasaṅkhātassa saddhammāmatassa dāyakaṃ hoti, ambujaṃ tu **edisam na** īdisaṃ na hoti, tādisaṃ dhammāmataṃ na dadātīti adhippāyo. “Esaṃ nānattamīdisa”nti vacanena sugandhakantimattādīhi guṇehi dvinnampi bhedo natthīti gammamānattā taṃ pakāsetvā aparaddhena vadanato ambujassa, ambujato vadanassa visuṃ katattā sadisatte gammamāne ayamubhayabyatireko nāma. Nānā anekappakāraṇaṃ bhāvoti ca, sādhu vuttamīti ca, tameva amatanti ca, taṃ sammā deti sīlenāti ca vākyam.

249. Pasiddhaṃ kāraṇaṃ yattha, nivattetvā’ññakāraṇaṃ; Sābhāvikatta’matha vā, vibhābyaṃ sā vibhāvanā.

249. Vibhāvanaṃ sambhāveti “pasiddha”miccādinā. **Yattha** alaṅkatiyaṃ **pasiddhaṃ** lokappatītaṃ **kāraṇaṃ** kiñci **nivattetvā** nirasya **aññaṃ kāraṇaṃ** pasiddhakāraṇato aññaṃ nimittaṃ **vibhābyaṃ** avagamyate. Yattha kāraṇantaraṃ natthi, tattha kā gatīti āha “sābhāvikatta”ntiādi. **Atha vā** pakkhantare, sābhāvikam [sābhāvikattaṃ (ka.)] dhammatāsiddhaṃ, tassa bhāvo **sābhāvikattaṃ** vibhābyaṃ, **sā** tādīsī **vibhāvanā** viññeyyā, vibhāvīyate pakāsiyate kāraṇantaraṃ sābhāvikattaṃ vā etāyāti, etissanti vā katvā.

249. Idāni vibhāvanaṃ dasseti “pasiddha”miccādinā. **Yattha** alaṅkāre **pasiddhaṃ** lokappatītaṃ **kāraṇaṃ** taṃtaṃguṇasādhanahetum **nivattetvā** paṭisedhetvā **aññakāraṇaṃ** lokappasiddhakāraṇato aññaṃ kāraṇaṃ, **atha vā** no ce pasiddhakāraṇato aññakāraṇe labbhamāne

sābhāvikkattam dhammatāsiddhaguṇam **vibhābyam** pakāsanīyam hoti, sā vibhāvanā nāma hoti, kāraṇantaravibhāvanā sābhāvikkavibhāvanāti duvidhā hotīti adhippāyo. Aññañca tam kāraṇañceti ca, sassa attano bhāvoti ca, tena sambhūtamiti ca, tassa bhāvoti ca, vibhāvīyati aññakāraṇam sābhāvikkattam vā etāya vibhāvanāya, etissam vibhāvanāyanti ca vāti viggaho.

Kāraṇantaravibhāvanā

**250. Anañjitā'sitam nettam, adharo rañjitā'ruṇo;
Samānatā bhamu cā'yam, jinā'nāvañchitā tava.**

250. Udāharati “**anañjita**”iccādi. Jina tava nettañca **anañjitam** añjanasalākāya yavataṭṭhīnamaphuṭṭhameva **asitam** kaṇham, adharo ca **anañjito**yeva lākhārāgādinā **aruṇo** ratto, ayam bhamu ca **anāvañchitā** ussāhena yena kenaci anāmitā samānā **samānatā** suṭṭhu ānatā, tato sabbam lokiyam taveti. Ettha pasiddhakāraṇamañjanādi, tannivattanepi kāraṇantaramatthādināvagamyate, tañca kammaṃ, kāriyassa akāraṇattāyogatotī kāraṇantaravibhāvanā'yam.

250. Idāni udāharati “**anañji**”ccādinā. He **jina** tava **nettam** pakatimadhuraṃ nayanayugalañca **anañjitam** vilocanānam kaṇhattasādhanattham lokappasiddhaañjanehi anañjitam samānam **asitam** bhavantarasiddhena kusalakammena nīlam hoti, adharo **ca arañjito** kenaci rāgena arañjito samāno **aruṇo** rattohoti, ayam bhamu ca **anāvañchitā** kenaci vāyāmena anāmitā samānā **samānatā** suṭṭhu ānatā hotīti. Ettha nayanaadharabhamūnam kaṇharattakuṭilaguṇasādhanā lokappasiddhāni añjanāni kāraṇāni paṭisedhetvā nettādīnam asitādībhāvakathaneneva kāraṇavinimuttassa kāriyassa loke avijjamānattā atthappakaraṇādinā asitādībhāvassa kāraṇam nāma pubbjātiyam siddhakusalakammamevāti patīyamānattā ayam kāraṇantaravibhāvanā nāma. Na añjitantī ca, na rañjitotī ca, na āvañchitotī ca vākyam. Nasaddo pasajjapaṭisedhe vattate. Sam sammā ānatāti viggaho.

Sābhāvikkavibhāvanā

**251. Na hoti khalu dujjanya-
Mapi dujjanasaṅgame;
Sabhāvanimmalatare,
Sādhujaṅtūna cetasi.**

251. “**Na hoti**”ccādi. Dujjanehi saha **saṅgame** samāgame satyapī **sādhujaṅtūnam** sappurisānam sabhāvena tādisena payogena vināva **nimmalatare** atisayena nimmale cetasi **dujjanyam** sujanetarabhāvo na hoti tādisātisayasādhattasamāyogatotī. Iha kiñcāpi **sabhāvasaddena** sabbathā hetunivattanam katam, tathāpi yonisomanasikārādītathāvidhanimittamattheva. Tathāpi loko tamanapekkhamāno, pasiddhañca kāraṇam tādisamapassanto sābhāvikaṃ phalam voharati, tadanusārena ca sābhāvikaṃ phalam vibhābyateti, ayam sābhāvikkaphalavibhāvanā.

251. “**Na hoti**”ccādi. **Dujjanasaṅgame api** dujjanehi saha vāse satipi sādhujaṅtūnam **sabhāvanimmalatare** kiñci payogam vinā pakatiyā eva atinimmale cetasi **dujjanyam** dujjanaguṇam **khalu** ekantena na hotīti. Iha cittanimmalahetubhūtānam yonisomanasikārādīnam vijjamānattepi lokena tam kāraṇam anapekkhitvā aññampi pasiddhakāraṇam cittanimmalakāraṇamadisvā sabhāvasiddham nimmalanti vohariyamānattāteneva lokavohārānusārena “sabhāvanimmalatare”ti sabbākārena kāraṇam paṭisedham katvā sabhāvasiddhanimmalattasāṅkhātaphalassa pakāsītattā ayam sābhāvikkaphalavibhāvanā nāma. Dujjanānam bhāvoti ca, sassa attano bhāvoti ca, tena nimmalataranti ca vākyam.

**252. Janako [kāraṇo (sī.)] nāpako ceti,
Duvidhā hetavo siyam;
Paṭisaṅkharāṇam tesam,
Alaṅkāratayo'ditam.**

252. Hetuṃ niddisati “**janako**”iccādinā. **Janako** bhāvābhāvarūpassa nibbatyādikāriyassa kārako **ñāpako** vijjamānasseva kassaci sambandhato kutoci paṭibodhako cāti hetavo duvidhā siyuṃ. Nanu kimettha asanaṃ [**bhūsanam** (?)], kevalaṃ “anenetam karīyatī”ti sarūpakathanamatta, [**na tu** (?)] vireso tu na [**na tu** (?)] koci visesarūpo vācālaṅkāroti visesaṃ yojayati “**paṭī**”tiādinā. **Tesaṃ** kāriyuppādayogīnaṃ hetūnaṃ **paṭisaṅkharanaṃ** upabrūhanaṃ visiṭṭhabhāvena pariphuṭam katvā yāthāvato kathanam **alaṅkāratāya** bandhabhūsanarūpena **uditam** abhihitam visesarūpattā, na panetenetaṃ karīyatīti.

252. Idāni hetvālaṅkāraṃ dasseti “**janako**”ccādinā. **Janako** ca kassaci “sattā asattā”ti vuttassa bhāvābhāvasaṅkhātakāriyassa janakahetu ca **ñāpako ca** kassaci vijjamānattaṃ aññaena kenaci sambandhena avabodhento ñāpakahetu cāti evaṃ hetavo duvidhā siyuṃ. Iha phalapakāsakahetumhi vuccamāne “iminā hetunā idaṃ phalaṃ jāta”nti sarūpakathanamattaṃ vinā visesarūpālaṅkāro idha natthīti āsaṅkiya alaṅkārasarūpaviseso esoti dassetumaparaddhamāha. **Tesaṃ** phalapakāsanakhamānaṃ hetūnaṃ **paṭisaṅkharanaṃ** visiṭṭhabhāvena pakāsaṃ katvā tatvato kathanam **alaṅkāratāya** alaṅkārasabhāvena **uditam** pasiddham hoti, kavīhi patthitaṃ vā hoti. Sāliānkurādīnaṃ sālibijjādayo viya janyassa accantopakārako janakahetu nāma, vijjamānaaggiādīnaṃ dhūmādayo viya kassaci vijjamānattañāpako ñāpakahetu nāma. Alaṅkārasa bhāvo alaṅkāratā. Alaṅkāratayāti chandaṃ nissāya mattāhāni.

**253. Bhāvābhāvakiccavasā,
Cittahetuvasāpi ca;
Bhedā’nantā idaṃ tesaṃ,
Mukhamattanidassanaṃ.**

253. Udāharati “**bhāva**”iccādi. **Bhāvo** sattā ca, **abhāvo** asattā ca, teyeva kiccāni tesaṃ vasena ca, **cittā** pasiddhahetuviparītā acchariyārahā hetavo tesaṃ vasenāpi ca **bhedā** hetuvikappā **anantā** anavaviyo [**anavadhaya** (?)], yato evaṃ tasmā **tesaṃ** hetūnaṃ idaṃ mukhamattanidassanaṃ, tasmā tammukhena sakkā hetuviseṣe pavisitūti.

253. “**Bhāvā**”iccādi. **Bhāvābhāvakiccavasā** bhāvābhāvasaṅkhatasattāasattākriyāvasena ca, **cittahetuvasāpi ca** pasiddhahetuno viruddhena acchariyahetūnaṃ pabhedena ca, **bhedā** hetuviseṣā **anantā** yasmā aparīyantā hontī, tasmā **idaṃ** vakkhamānaṃ **tesaṃ** hetūnaṃ **mukhamattanidassanaṃ** avasesahetūnaṃ ogāhaṇadvāramattassa nidassanaṃ hoti. Bhāvo ca abhāvo cāti ca, teyeva kiccānīti ca, tesaṃ vaso bhedoti ca, cittā vicittā ca te hetavo cāti ca, tesaṃ vasoti ca, mukhameva mukhamattaṃ, mukhañca taṃ vā mattaṃ sāmāññañceti ca, tassa nidassanamīti ca vākyam. **Mattasaddo** avadhāraṇe sāmāññe vā vattate.

**254. Paramatthapakāseka-
Rasā sabbamanoharā;
Munino desanā’yaṃ me,
Kāmaṃ toseti mānasam.**

Bhāvakicco kārahetu.

254. Udāharati “**paramattha**”iccādi. Paramatthasabhāvassa nāmarūpādino pakāsoyeva **ekaraso** asahāyakiccaṃ yassā sā tādisī. Sabbesaṃ mano haratīti **sabbamanoharā** munino ayaṃ desanā me **mānasam** cittaṃ **kāmamekanta**na tosetīti ayaṃ bhāvakicco kārahetu santosasattāya kāraṇato.

254. Idāni udāharati “**paramattha**”iccādinā. **Paramatthapakāsekarasā** nāmarūpakhandhaāyatanādiuttamatthānaṃ pakāsanasaṅkhātā asahāyakiccavatī **sabbamanoharā** vohārānurūpena visayabhāvūpagamanena sabbesaṃ manoharā munino ayaṃ desanā **me** mayhaṃ mānasam **kāmaṃ** ekanta tosetīti. Buddhassa dhammadeśanā pubbe avijjamānassa santosassa sattāsaṅkhātasamuppādaṃ karotīti kārahetu nāma hoti. Sā ca desanā “mānasam tosetī”ti ettakena adassetvā “paramatthapakāsekarasā”ti savisesanaṃ katvā vuttattā alaṅkāroti abhimatā. Eko ca so

raso ceti ca, paramatthapakāsoyeva ekaraso ekakiccamasseti ca viggaho. **Bhāvakicco** bhāvasaṅkhātamaṃ sattākiccam katvā pavatto **kārahahetu** janakahetu.

**255. Dhīrehi saha saṃvāsā, saddhammassā’bhiyogato;
Niggaheni’ndriyānañca, dukkhassu’pasamo siyā.**

Abhāvakicco kārahahetu.

255. “Dhīrehi”ccādi. **Dhīrehi** sappaññehi saha **saṃvāsā** saṃsaggena ca, **saddhammassa** sambuddhadesitassa **abhiyogato** abhyāsenā ca, **indriyānaṃ** cakkhādīnaṃ **niggahena** visayappavattinirodharūpena vijayena ca hetunā **dukkhassa** pañcakkhandhasaṅkhatassa anuppādanirodhasaṅkhāto **upasamo siyā** bhaveyyāti ayaṃ abhāvakicco kārahahetu anuppādanirodhasaṅkhātassa abhāvassa kāraṇato.

255. “Dhīrehi”ccādi. Dhīrehi saha **saṃvāsā** samaggavāsenā ca, **saddhammassa** buddhadesitassa **abhiyogato** niranantarābhyāsenā ca, **indriyānaṃ** cakkhuādīnaṃ **niggahena** rūpādīraṃmaṇesu subhādīggahaṇassa nivāraṇena cāti imehi kāraṇehi **dukkhassa** khandhāyatanādikassa **upasamo** anuppādanirodho khandhapariniḥḥānaṃ vā siyāti. Abhiṇhaso yogoti viggaho. **Abhāvakicco** dukkhassa upasamasāṅkhātamaṃ asattākiccam katvā pavatto **kārahahetu** avijjamānasāṅkhātāya asattāya uppādanato janakahetu nāma. Abhāvo kiccamasseti ca, kārako ca so hetu cāti ca vākyamaṃ. Bhāvakiccopi vuttabyatirekato ñāyati.

**256. Muninda candasamvādi-kantabhāvopasobhinā;
Mukheneva subodham te, manam pāpābhiniṣṣaṭam.**

Bhāvakicco ñāpakahetu.

256. “Munindi”ccādi. **Munindeti** āmantanaṃ. **Te** tava **candasamvādinā** candasadisena kantabhāvena **upasobhinā** sobhamānena mukheneva **pāpehi** rāgādīhi **abhinissāṭam** byapagataṃ **manam** cittaṃ **subodham** suṭṭhu viññāyatīti ayaṃ bhāvakicco ñāpakahetu avabodhasattāya ñāpanato.

256. “Muninda”iccādi. He **muninda te** tava **candasamvādikantabhāvopasobhinā** candakantabhāvasadisena kantabhāvena sobhamānena mukhena **manam** tuyhaṃ cittaṃ **pāpābhiniṣṣaṭam** rāgādīhi kilesehi nikkhantanti **subodham** suṭṭhu viññāyatīti. Iha mukhaṃ manakantabhāvasambandhena samannāgataṃ sayamaṃ vijjamānameva kilesāpagamassa avabodhasattaṃ ñāpetīti bhāvakicco ñāpakahetu nāma jāto. Candena abhedopacārato candalāvaṇyena samvādi sadisoti ca, so ca so kantabhāvo ceti ca, tena upasobhitoti ca, pāpehi abhinissāṭanti ca vākyamaṃ.

**257. Sādhuhatthāravindāni, saṅkocayatite katham;
Muninda caraṇadvanda-rāgabālātapo phusaṃ.**

Ayuttakārī cittaheṭu.

257. “Sādhu”iccādi. Muninda te caraṇānaṃ dvandassa rāgo bālo ca so ātapo ceti **rāgabālātapo** taruṇakiraṇasamūho lohitattādīnā sādhuṇaṃ hatthāravindāni kantādīnā **phusaṃ** visārittenā’masanto katham **saṅkocayati** makulayati, añjalipaṇāmaṃbandhena ayuttametamaṃ. Bālātapo hi padumānamummīlanahetu, ayaṃ tu apubbo bālātapo yo padumāni nimīletīti anucitakāriyakāraṇā ayuttakārī cittaheṭu, evamaṃvidho viññeyyo bhāvakiccattēpīti.

257. “Sādhu”iccādi. He **muninda te** tava **caraṇadvandarāgabālātapo** pādayugaḷassa aruṇavaṇṇasaṅkhataabhinavasūriyakiraṇo **sādhuhatthāravindāni** sujanānaṃ karapadumāni **phusaṃ** attano sabbabyāpittā phusanto katham **saṅkocayati** karasamputārūpena makulayati. Bālātapo nāma

padumavikasaṃ vinā saṅkocanaṃ na karoti, eso ātapo acchariyo vicittoti gamyamānattā ayuttasaṅkocasaṭṭākaraṇato ayaṃ ayuttakārī cittaṭetu nāma. Ayuttaṃ karotīti ca, cittaṅca taṃ hetu cāti ca vākyam.

**258. Saṅkocayanti jantūnaṃ, paṇipaṅkeruhāni’ha;
Munindacaraṇadvanda-nakhacandāna’maṃsavo.**

Yuttakārī cittaṭetu.

258. “Saṅkocayanti”ccādi. Munindassa pādānaṃ dvande nakhā eva candā kantādinā tesam **aṃsavo** kiraṇā **iha** loke **jantūnaṃ** sattānaṃ pāṇayo eva paṅkeruhāni kantādinā saṅkocayanti paṇāmakaraṇasamputarūpena milīyantīti [**milāyayantīti (?)**] yuttakārī cittaṭetu candato paṅkajasaṅkocassa ucitattā. Vuttanayepīti.

258. “Saṅko”iccādi. **Munindacaraṇadvandanakhacandānaṃ** sambuddhassa pādadvande nakhāvalisaṅkhātānaṃ candānaṃ **aṃsavo** raṃsayo **iha** loke jantūnaṃ paṇipaṅkeruhāni **saṅkocayanti** karasamputākārena saṅkocayanti makulaṃ karontīti. Candakiraṇehi kattabbāya eva padumasaṅkocasaṭṭāya katattā ca, pakaticandakiraṇakattabbakicassa candamarīcisamānaññādiṭṭhapubbavicitraaṃsūhi katattā ca ayaṃ yuttakārī cittaṭetu nāma. Pāṇayo ca te paṅkeruhāni ceti ca, munindassa caraṇadvandamiti ca, tasmim nakhāntīti ca, teva candāti ca vākyam.

**259. Uddiṭṭhānaṃ padatthānaṃ, anuddeso [anuddeso (?)] yathākkamaṃ;
Saṅkhyāna’miti niddiṭṭhaṃ, yathāsaṅkhyam kamopi ca.**

259. Kamaṃ vivaritumupakkamati **“uddiṭṭhāna”**miccādi. **Uddiṭṭhānaṃ** pubbe vuttānaṃ **padatthānaṃ** vatthūnaṃ kesaṅci **yathākkamaṃ** uddesakkamānatikkamena **anuddeso** puna atthantaraniddesanaṃ anukathanam [**kathanam (?)**] **“saṅkhyāna”**mityapi ca, **“yathāsaṅkhyā”**mityapi ca **niddiṭṭhaṃ** vuttaṃ. Vidheyattā tesam padhānattamiti tadapekkhāya napuṃsakattaṃ, anuvaditabbattānuddesassaṃpadhānattamiti na pulliṅgapariggaho. **“Kamo”**iccapi niddiṭṭhoti liṅgavipariṇāmo.

259. Idāni kamālaṅkāraṃ uddisati **“uddiṭṭhāna”**miccādinā. **Uddiṭṭhānaṃ** paṭhamakathitānaṃ padatthānaṃ **yathākkamaṃ** uddiṭṭhakkamamanatikkamma **anuddeso** atthantaraṃ nissāya punakathanam **“saṅkhyāna”**miti ca, **“yathāsaṅkhyā”**miti ca niddiṭṭhaṃ, kamopi ca niddiṭṭho. Ettha pasiddham anuddesaṃ pubbaddhena anuvaditvā appasiddham kamampi kamapariyāyam saṅkhyānaṃyathāsaṅkhyadvayampi aparaddhena vidadhāti. Ettha vidhātābbaṃ dassetuṃ anuvādassa āhariyamānattā anuvādo appadhāno, vidhātābbo padhāno. Yaṅhi vidhātābbaṃ, taṃ padhānaṃ, itaramappadhānanti iminā kāraṇena vuccati. Tasmā **“niddiṭṭha”**nti **“saṅkhyānaṃ, yathāsaṅkhyā”**nti dvayaṃ apekkhāya (tassa appadhānattā) [**idaṃ padadvayaṃ sīhaḷabyākhyāyam na dissati**] napuṃsakam hoti. **“Kamo”**ti apekkhāya **“niddiṭṭho”**ti pulliṅgo hoti. Appadhāno anuddesoti nāpekkhati. Kamamanatikkammāti ca, saṅkhyāya anabhikkamoti ca vākyam.

**260. Ālāpahāsālīhi, muninda vijayā tava;
Kokilā kumudāni co-pasevante vanam jalam.**

260. Tamudāharati **“ālāpi”**ccādinā. Muninda tava ālāpahāsā ca tesam līlāhi, uddesoyam. **Vijayā** kokilakumudānaṃ parābhavena **kokilā** karavikā kumudāni ca, yathoddesamanuddesoyam vuttāpekkhāya. Vakkhamānāpekkhāya tu ayampi uddesova, **“kokilā vanam, kumudāni jala”**miti yathoddesamanuddesoyam. **Upasevante iva** nissayanti maññe. Iti vatthuto eva sambhavo **iveti** parikkappate. Yajjevaṃ parikkappanāya katham yathāsaṅkhyanti ce? Atrocate – yatthālaṅkārantaramapi patīyate. Tatthuddesānurūpānuddesasambhave saṅkhyānamevālaṅkāro voharīyate tasseva mukhyato vattumicchitattā. Yatthālaṅkārantaraṃ na gamyate, tattha accantameva kamoti viññeyyam.

260. Udāharati “**ālāpi**”ccādinā. He **muninda te** tava **ālāpahāsalīlāhi** madhurasaralīlāhi saddhiṃ mandahasitalīlāhi sañjātā **vijayā** jayahetu **kokilā** karavīkā ca **kumudāni** keravāni ca vanaṃ jalañca kamena **upasevante iva** nissayaṃ karonti maññeti. Ettha “**ālāpahāsalīlāhi**”ti uddeso, “**kokilā kumudāni**”ti vuttāpekkhāya anuddeso, “**vanaṃ jala**”nti vakkhamānāpekkhāya uddesova hoti, tatvato īdisavijayena kokilādīnaṃ vanādinissayakāraṇābhāvato **ivasaddapayogena** niddiṭṭho. Evaṃ sati ayaṃ parikappanā na bhavati. Kasmā? Nānālaṅkārasannipāte sati yo yo alaṅkāro vattunā icchito, tasseva mukhyato voharīyamānattā. Evaṃ parikappanālaṅkārasaṃsagge satipi uddesakkamena dassitassa anuddesassa mukhyattā ayaṃ kamālaṅkāro nāma. Īdisaññampi evameva daṭṭhabbaṃ. Ālāpo ca hāso ceti ca, tesam līlayoti ca viggaho.

**261. Siyā piyataraṃ nāma, attharūpassa kassaci;
Piyassā’tisayene’kaṃ, yaṃ hoti paṭipādanam.**

261. Piyataramāharati “**siyā**”iccādinā. Atisayena piyassa kassaci **attharūpassa** abhidheyyasabhāvassa yaṃ **paṭipādanam**ākhyānaṃ hoti, etaṃ piyataraṃ nāma siyā.

261. Idāni piyatarālaṅkāraṃ dasseti “**siyā**”iccādinā, atisayena piyassa kassaci **attharūpassa** abhidheyyasabhāvassa yaṃ **paṭipādanam** kathanam hoti, etaṃ paṭipādanam **piyataraṃ** nāma piyatarālaṅkāro nāma hoti. Atisayena piyanti ca, attho eva rūpaṃ sabhāvoti ca vākyam.

**262. Pīti yā me samuppannā, santa sandassanā tava;
Kālenā’yaṃ bhava pīti, taveva puna dassanā.**

262. Udāharati “**pīti**”ccādi. **Santa** sappurisa mahāmuni tava **sandassanā** cakkhupathāpāthamattena madhurakathāsavanā yā pīti **me** mama samuppannā, ayaṃ pīti **kālena** īdisena sukheṇa [\[sukhaṇane \(?\)\]](#) **taveva** nāññassa kassaci, ko hi nāmoñño tavādisoti, puna dassanā bhaveyyāti.

262. “**Pīti**”ccādi. He **santa** sappurisa tathāgata tava **sandassanā** mama nette āpāthagamanato yā pīti me samuppannā, **ayaṃ** pīti **kālena** īdisakkhaṇena tayā sadisassa aññassābhāvā **taveva** puna **dassanā** dassanato bhaveti. Ettha pītiyā’tisayahetubhūtaṃ atītiṭṭhārammaṇaṇca dassane atigedhaṇca pakāsanena atipītiṭṭi padattham [\[atipiyam pībhipadattham \(ka.\)\]](#), pakāsitaṃ hoti. “**Ayaṃ pīti bhava**”ti pubbakāle uppannapītiyā punāsambhavato taṃsadisāyeva pīti gahitā yathā “**soyeva vaṭṭako** [\[vaddhako \(sī. byākhyāyam\)\]](#), tāniyeva osadhānī”ti.

**263. Vaṇṇiteno’pamānena, vutyā’dhippetavatthuno;
Samāsavutti nāmā’yaṃ, atthasaṅkheparūpato.**

263. Samāsavuttiṃvattumāha “**vaṇṇitena**”ccādi. **Vaṇṇitena** pasamsitena upamānena **adhippetassa** manasi nihitassa **vatthuno** atthassa **vutyā** kathanena **ayaṃ** vuttalakkhaṇā samāsavutti nāma. Kasmā? **Atthassa** vattumicchitassa **saṅkhepo** saṅkhipitvā kathanam **rūpaṃ** sabhāvo, tasmā tatoyamanvatthasaññā saṅkhepavutti samāsavuttīti katvā. Kasmā? Ayaṃ guṇībhūtā sakatthā atthantaram vidadhāti, na tu sakatthapadhānā.

263. Idāni samāsavuttiṃ niddisati “**vaṇṇite**”ccādinā. **Vaṇṇitena** pasamsitena **upamānena** upamānavatthunā karaṇabhūtena **adhippetavatthuno** icchitatthassa **vutyā** kathanena **atthasaṅkheparūpato** vattumicchitatthassa saṅgaharūpattā **ayaṃ** yathāvuttalakkhaṇā samāsavutti nāma hoti. Ettha vattumicchitattham saṅgahetvā manasi katvā tassa upamābhūtattassa vaṇṇanāya manasi katassa pakāsanato ayaṃ samāsavutti nāma. Etissā padābhīhito sakattho appadhāno, gammamānattho pana padhāno hoti. Adhippetāñca taṃ vatthu ceti ca, samāsena saṅkhepena vutti kathanamiti ca, saṅkhepoyeva rūpaṃ sarūpanti ca, atthassa saṅkheparūpanti ca viggaho.

**264. Sā’yaṃ visesyamattena, bhinnā’bhinnavisesanā;
Attheva aparāpya’tthi, bhinnābhinnavisesanā.**

264. Tassā pabhedam dasseti “**sāya**”miccādinā. **Sā ayam** samāsavutti yaṃkiñci vatthu sāmāññākārappatītaṃ “īdisamidaṃ nāññathā”ti kutoci byavacchijjate kenaci guṇādinā vavatthāpīyate, taṃ **visesyam**, tameva **mattam** visesanabhedabyavacchedato, tena. **Bhinnā** atulyā avayavadhammassa samudāye vattanato. Abhinnaṃ tulyākāraṃ visesanaṃ yassaṃ sā **abhinnavisesanāpi** attheva. **Aparāpyatthi**, na kevalaṃ sāyeva. Kīdisī? Bhinnañca abhinnañca visesanaṃ yassanti **bhinnābhinnavisesanā**. Visesyam tu bhinnanti.

264. Idāni tassā samāsavuttīyā bhedaṃ dasseti “**sāya**”miccādinā. **Sā ayam** samāsavutti **visesyamattena** guṇādisadisadhammena karaṇabhūtena kenaci upamānavatthunā manasi kataṃ “īdaṃ upameyyavatthu īdisa”nti sāmāññāvatthato visuṃ katavisesyena **bhinnā** visuṃ jātā, tattakena atulyā vā, **abhinnavisesanā** tulyavisesanayuttā attheva **bhinnābhinnavisesanā** atulyatulyavisesanayuttā bhinnavisesayuttā aparāpi atthi. Evaṃ samāsavutti dvidhā hoti. Visesyameva mattamiti ca, avayavena sambhavabhedasabhāvassa samudāyepi pavattatā bhinnāti vuttā. Abhinnāni visesanāni yassamiti ca, bhinnāni ca abhinnāni ceti ca, tāni visesanāni yassamiti ca viggaho.

Abhinnavisesana

265. **Visuddhāmatasandāyī,**
Pasattharanālayo;
Gambhīro cā’ya’ mambhodhi,
Puññena’pādito [puññenāsādito (sī.)] mayā.

265. Ubhayamudāharati “**visuddha**”iccādinā. Ayamambhodhi sāgaro **puññena** cirānucitakusalāmūlena hetunā mayā **āpādito** patto, kīdiso? **Visuddham** lokavohārato devāsuraṇaṃ mathane visenāsammissattā **amataṃ** piyūsaṃ sandadātīti **visuddhāmatasandāyī**, ambhodhi. **Visuddham** dosalesenāpyasamphuṭṭhattā accantanimmalaṃ **amataṃ** maraṇābhāvena amataṣaṅkhātaṃ nibbānadhātuṃ sandadāti upadesakabhāvenāti **visuddhāmatasandāyī**, saddhammo. **Pasatthāni** niravajjattā **ratanāni** muttāmaṇiādīni, tesam **ālayo** pavattiṭṭhānaṃ, ambhodhi. **Pasatthāni** buddhādīhi anekadhā, vaṇṇitāni **ratanāni** sattatiṃsabodhipakkhiyadhammasaṅkhatāni, tesam **ālayo**, saddhammo. **Gambhīro** ca agādhattā sāgaro saddhammo ca ayamāpādītōti pakataṃ. Ayam visesyamattabhinnā abhinnavisesanā visesyassa ambhodhino vivacchitā saddhammā bhinnattā, visuddhāmatasandāyittādino ca visesanassa vuttena pakārenābhinnattāti.

265. Idāni udāharati “**visuddhā**”iccādinā. **Visuddhāmatasandāyī** lokavohārato devāsuraṇaṃ samuddamathane visena amissattā visuddhabhūtapīyūsadāyako, upamābhūtasamuddavaṇṇanāya buddhiyaṃ vattamānassa saddhammassa pakāsanato visuddhāmatasandāyī kāmāmisādidosalavenāpi amissittatā atinimmalaṃ jarāmaraṇarahitaṃ nibbānaṃ upadesadānena veneyyānaṃ dāyako, **pasattharanālayo** niddosattā pasatthānaṃ muttāmaṇiādīnaṃ ratanānaṃ pavattiṭṭhānabhūto samuddapakkhe, saddhammapakkhe pana **pasattharanālayo** buddhādīhi pasatthānaṃ sattatiṃsabodhipakkhiyadhammasaṅkhataratanānaṃ pavattidesabhūto, **gambhīro** pakatiyāyeva agādhō, ekattanayādicatubbidhanayehi **gambhīro ayam ambhodhi ca** eso samuddo ca, citta gahitasaddhammo ca **puññena** bhavantaropacitakusalakammena mayā **āpādito** pattoti visesyabhūtassa ambhodhino vattumicchitasaddhammato bhinnattā ca, “visuddhāmatasandāyī”ti iccādikānaṃ visesanānaṃ ubhayavisesyepi yathāvuttanayena abhinnattā ca ayam samāsavutti visesyamattena bhinnā abhinnavisesanā hoti.

Bhinnābhinnavisesana

266. **icchitatthapado sāro,**
Phalapupphopasobhito;
Sacchāyo’ya’mapubbova,
Kapparukkho samuṭṭhito.

266. “Icchite”ccādi. Ayamapubbova vuttagaṇayogena acchariyarūpattā kapparukkho samuṭṭhito, kīdiso? Icchitaṃ lokiyaṃ yaṃ kiñci atthaṃ padadātīti **icchitatthapado**, kapparukkho. Icchitaṃ lokiyalokuttaraṃ yaṃ kiñci atthaṃ padadātīti **icchitatthapado**, jino. **Sāro** seṭṭho, kapparukkho jino ca. Phalāni pupphāni, tehi upasobhito, kapparukkho. Saha chāyāya candasūriyālokavilomarūpāya vattate **sacchāyo**, kapparukkho. Jino tu pubbe vuttāya kāyakantādirūpāya chāyāya yuttoti **sacchāyoti**. Ayaṃ visesyamattabhinnā bhinnābhinnavisesanā jinato visesyassa kapparukkhasa bhinnattā, phalapupphopasobhitatthassa kapparukkheyeva sambhavā, icchitatthapatthassa sārātāya sacchāyatāya ubhayattheva bhāvato vuttavidhināti.

266. “Icchitatthi”ccādi. **Icchitatthapado** sattehi icchitānaṃ lokiyaaviññānakavattābharaṇādīnaṃ dāyako kapparukkhaveṇṇanāya citte patitṭhitassa jinapadatthassa kathetukāmatāya **icchitatthapado** sattehi patthitānaṃ lokiyalokuttarānaṃ sakalatthānaṃ anurūpavasena tesam tesam sattānaṃ dāyako, **sāro** rukkhesu īdisarukkhasābhāvato uttamo, **sāro** sadevakādisattalokesu tādīsasattavisesābhāvato uttamo, **phalapupphopasobhito** kappaddumānurūpaphalehi pupphehi ca upasobhito, **sacchāyo** candasūriyālokehi āvaraṇīyarukkhačchāyāya samannāgato, **sacchāyo** nīlapītādichabbidharamsijālehi samannāgato, **apubbo** pubbe asaṅjāto **ayaṃ kapparukkho** eso paccakkho kappapādapo **samuṭṭhito** sattānaṃ puññānubhāvena loke pātubhūtoti. Vattumicchitatthajinapadatthato visesyassa kapparukkhasa bhinnattā ca, icchitatthadānasārabhāvasacchāyasaṅkhatānaṃ visesanānaṃ ubhayasādhāraṇattā ca, phalapupphopasobhitatāya rukkhasseva visesanattā ca ayaṃ samāsavutti visesyabhinnāva bhinnābhinnavisesanā hoti. Icchito ca so attho ceti ca, taṃ padadātīti ca, phalapupphehi upasobhitoti ca, saha chāyāya vattamānoti ca vākyam.

**267. Sāgarattena saddhammo,
Rukkhatteno’dito jino;
Sabbe sādharmaṇā dhammā,
Pubbatrā’ññatra tu’ttayaṃ.**

267. Tadubhayaṃ vivarati “**sāgaratteni**”ccādinā. **Saddhammo** sambuddhabhāsito **sāgarattena** sāgaragaṇasaddisattā sāgararūpena uditoti sambandho, kittitoti attho. Jino **rukkhattena** yathāvuttanayena **udito** taṃ patto anupekkhitassa kakkhavuttiyā ambhodhiādisaddānaṃ. Pakaraṇādīnā tu tathā paṭītyudayo, aññathā kathaṃ ambhodhiādisaddānaṃ dhammādisacchāyakattaṃ siyā. Bhedo tu ayaṃ **pubbatra** “visuddhāmatasandāyī”ccādike **sabbe** ye keci tatropattā visuddhāmatasandāyittādayo **sādharmaṇā** tulyā **dhammā** visesanāni ubhayatrāpi sambhavā, **aññatra tu** anantaravutta “icchitatthapado”iccādo pana tayaṃ sādharmaṇaṃ [[dvayaṃ sādharmaṇaṇca \(ka.\)](#)], asādharmaṇaṇca visesanam vuttanayeneti.

267. Idāni tehi dvīhi samāsavuttehi vuttatthadvayaṃ pakāseti “**sāgari**”ccādinā. **Sāgarattena** sāgararūpena **saddhammo** sammāsambuddhena desitapariyattisaddhammo **udito** kathito, rukkhattena jino uditto. Sāgarakapparukkhadīsaddā attano abhidheyyabhūtasāgararukkhadīke atthe mukhyabhāvena apavattitvā buddhiyaṃ pavattaatthassāpi sādharmaṇabhūtavisesanapariggahena gammamāne vattumicchitasaddhammajinapadattheyeva pakaraṇādīto tādīsattatthapattīyāsambhavato mukhyabhāvena pavattantīti adhippāyo. Tathā hi yadi ete mukhyatthena na pavattanti, ambhodhikapparukkhasaddā saddhammajinapadatthe kathaṃ pakāsentīti tesu dvīsu udāharaṇesu **pubbatra** “visuddhāmatasandāyī”iccādīpubbudāharaṇe **sabbe dhammā** “visuddhāmatasandāyī”ti sabbe visesanadhammā **sādharmaṇā** ambhodhisaddhammānaṃ samānā, **aññatra tu** “icchitatthapado”tiādīke aññasmiṃ udāharaṇe pana **tayaṃ** “icchitatthapado, sāro, sacchāyo”ti visesanattayaṃ sādharmaṇaṃ. Phalapupphopasobhitabhāvo pana rukkhaveṇiko, “apubbo”iccādīkaṃ visesanameva. Tathā hi iminā rukkhadhammabhūto koci viseso pakāsito na hotīti visesanattaṃ aññesuyeva vuttaṃ.

**268. Vatthuno’ññappakārena, ṭhitā vutti tadaññathā;
Parikappīyate yattha, sā hoti parikappanā.**

268. Parikappanaṃ parikappeti “**vatthuno**”ccādinā. **Vatthuno** sajjīvassa nijjīvassa vā **vutti**

avatthā **aññappakārena** vattumicchitappakārāpekkhāya aññeneva rūpena **ñhitā**, tasseva tato yathāvaṭṭhitappakārato **aññathā** aññena pakārena parikappīyate **yattha** vuttiyaṃ, sā **parikappanā** hoti, parikappīyate aññathā karīyate vatthuṭṭhiti etissanti katvā.

268. Idāni parikappanaṃ dasseti “**vatthuno**”iccādinā. **Vatthuno** yassa kassaci saviññānakaavīññānapadatthassa **vutti** pavatti **aññappakārena** kappanīyappakārato aññena vijjamānappakārena **ñhitā** pavattamānā, **tadaññathā** tato vijjamānappakārato aññenāvijjamānappakārena **yattha** vuttiyaṃ parikappīyate, sā parikappanā nāma hoti. Parikappīyate aññathā karīyate vatthuṭṭhiti etissamiti viggaho.

**269. Upamābbhantarattena, kiriyādivasena ca;
Kameno’dāharissāmi, vividhā parikappanā.**

269. Bhedaṃ tassā dasseti “**upamā**”iccādinā. Upamā abbhantare yassā, tassā bhāvo, tena ca, kiriyādivasena ca **vividhā** nānappakārā parikappanā idāni kamena udāharissāmi.

269. Idāni tassa bhedaṃ dasseti “**upamābbhantare**”iccādinā. **Upamābbhantarattena** upamāya abbhantare vijjamānattā ca kiriyādivasena ca vividhā parikappanā kamena udāharissāmi. Upamā abbhantare assā parikappanāyeti ca, tassā bhāvoti ca, aneke vidhā pakārā yāsamiti ca viggaho.

Upamābbhantaraparikappanā

**270. Icchābhaṅgāturā’sīnā,
Tā’tinicala’maccharā;
Vasaṃ nentīva dhīraṃ taṃ,
Tadā yogābhiyogato.**

270. Udāharati “**icchā**”iccādi. Icchābhaṅgena “buddhaṃ bhagavantaṃ vase vattessāmā”ti bodhimūle katābhilāsavināsenā **aturā** dukkhitā atinicalasabhāvappattā **atinicalaṃ** nāsikagge nayane katānatāvasena accantamakriyamāsīnā nisinnā **tā accharā** yoginisaṅkāsā mārāṅganāti yathāvaṭṭhitāya sacetanānaṃ mārāṅganālakkhaṇānaṃ [**mārāṅganāvalakkhaṇānaṃ (ka.)**] vatthūnaṃ vutti vuttā, sāyamaññathā parikappīyate. **Dhīraṃ** devaṅganānampi siṅgārabhāvopacaritavilāsatisayenāpi akampattā. **Taṃ** bhagavantaṃ. **Yogo** mantānuṭṭhānaṃ, tattha abhiyogato yuñjanena **vasamattano** āyattabhāvaṃ tadā **nentīva** vahanti maññeti. Ettha **iva** saddasutiyā upamāsandeho na katabbo, savasānayanamakubbantiyo mārāṅganā vasaṃ nentīvāti parikappīyante. Hoti ca—

“Vasaṃ nentīva dhīra”nti, nayane no’pamānatā;
Na hi kattukriyāya’tthi, upamānopameyyatāti.

Kriyāparikappattepi ayamupamābbhantarā parikappanā, na kevalakriyāparikappanā mārāṅganānamacalopavesanassa yogābhiyogena sāmyasandassanato, tathābhūtāya copavesanakriyāya dhīrassāpi tādisassa bhagavato avasānayanattanti parikappanattoti.

270. Idāni udāharati “**icchā**”iccādinā. **Icchābhaṅgāturā** ajapālanigrodhamūle nisinnaṃ bhagavantaṃ “palobhessāmā”ti mārāṅganā attanāyeva katāya icchāya anibbattiyā pīḷitā, atinicalaṃ hutvā nāsikagge patitadiṭṭhehi samannāgatānaññavuttiyā kriyantaravirahato. **Āsīnā** jhāyamānā nisinnā **tā accharā** yoginisaṅkāsā taṅhāaratiragāsāṅkhātā mārāṅganāyo **dhīraṃ** siṅgārādhīpāyena katānekalīlāvilāsēnāpi akampamānaṃ **taṃ** bhagavantaṃ **yogābhiyogato** mantajappanasāṅkhātayoge yuñjanena **vasaṃ** attano vasaṃ **tadā** attano parājītakāle **nentīva** pāpenti maññeti. Ettha pubbaddhena mārāṅganāsaṅkhātāsajīvapadatthānaṃ vijjamānappakāraṃ dassitaṃ. Puna aparaddhena tesameva avijjamānayogābhiyogena vasīkaraṇaṃ kappitaṃ. Mārāṅganānaṃ niccalanisajjāya yoginīnaṃ mantajjhāyanasādisattā mārāṅganānaṃ yoginīnaṃ

upamānopameyyattaṃ sāmattihiyā gamyateti eṣā upamābbhantaraparikkappaṇā nāma. “Nenti ivā”ti payoge katepi kriyāparikkappaṇaṃ na hoteva. Icchāya bhaṅgoti ca, tena āturāti ca, niggaṭṭaṃ calaṃ calanaṃ asmā āsanasmāti ca, atisayena niccalanti ca, kriyāvisesanaṃ, yoge abhiyogoti ca vākyam.

“Nenti ivā”ti idha **ivasaddasutiyā** upamājotanaṭṭhaṃ ceti saṃsayo na kātabbo, sādhammasaṅkhātaguṇavisesassa sambandhe asati kriyāmattassa upamābhāvato. Vuttaṃ hi—

“Vasaṃ nentīva dhīra”nti, nayena no’pamānatā;
Na hi kattukriyāya’tthi, upamānopameyyatāti.

“**Vasaṃ nentīva dhīra**”nti ettha **nayane** gamyamāne pāpane **upamānatā** upamānabhāvo natthi, **hi** tatheva, **kattukriyāya** kattusambandhiyā kriyāya **upamānopameyyatā** upamānabhāvo upameyyabhāvo natthīti ayaṃ hetthattho.

Kriyāparikkappaṇā

**271. Gajaṃ māro samāruḷho, yuddhāya’ccanta’munnaṭṭhaṃ;
Magga’manvesati nūna, jinabhīto palāyituṃ.**

271. “Gaja”miccādi. Yuddhāya **accanta**matisayena **unnata**muccaṃ **gajaṃ** hatthiṃ samāruḷho **māro** vasavattī taṃ jinātīti atthena **jinato** bhīto palāyituṃ kiñci nilīyanaṭṭhānaṃ **maggaṃ** pathaṃ anvesati **nūna** maññe. Iti kriyāparikkappaṇā ārohanakriyāya maggamanvesanattanti parikkappitattā.

271. “Gaja”miccādi. **Yuddhāya** yuddhatthaṃ **accantaṃ** atisayena **unnataṃ** diyadḍhasatayojanāyāmānurūpauccaguṇasamannāgataṃ **gajaṃ** girimekhalaṃ samāruḷho māro jinā bhīto palāyituṃ **maggaṃ** nibbhayaṃ pathaṃ **anvesati nūna** gavesati maññe. Yuddhatthaṃ kurumāno gajārohanaṃ maggānvesanattamiti kavinaṃ parikkappitattā eṣā kriyāparikkappaṇā nāma. Accantamiti asaṅkhaṃ sasaṅkhyabhāvepi pakaraṇato ādhikke eva vattati.

Guṇaparikkappaṇā

**272. Muninda pādadvande te, cārurājīvasundare;
Maññe pāpābhisammadda-jātasoneṇa soṇimā.**

272. Muninda te cāru ca taṃ rājīvaṃ padumañca tamiva sundaraṃ tasmimṭe pādadvande **soṇimā** lohitattaṃ, iti yathāvaṭṭhitā acetanassa lohitattalakkaṇassa vatthuno vutti vuttā, sāyamaññathā parikkappiyate. **Pāpānaṃ** kilesārīnaṃ **abhisammaddena** atisayaṃ sampisanena jātaṃ **soṇaṃ** rudhiraṃ, tena jātoti maññe. Iti guṇaparikkappaṇā pādadvandasannihitalohitattaṃ, “pāpā...pe... soṇene”ti parikkappitattā.

272. “Muninde”ccādi. He **muninda te** tava **cārurājīvasundare** manuññapadumasundare pādadvande **soṇimā** rattavaṇṇaṃ **pāpābhisammaddajātasoneṇa maññe** saparasantānagatapāpānaṃ sammaddanena jātena rudhiraṇāti maññe. Sabbaññuno pāde bhavantarāsiddhapuññakammānubhāvena jātarattavaṇṇaṃ “pāpābhisammaddanena”ti parikkappitattā ayaṃ guṇaparikkappaṇā nāma. Cāru ca taṃ rājīvañcāti ca, pāpānaṃ abhisammaddoti ca, tena jātañcāti ca, tañca taṃ soṇañcāti ca, soṇassa bhāvoti ca viggaho.

**273. Maññesaṅke dhuvam nūna-miva’miccevamādihi;
Sā’yam byañjīyate kvāpi, kvāpi vākyena gamyate.**

273. Vohāratthaṃ parikkappaṇāsūcake sadde dassento āha “**maññe**”iccādi. **Iti** evarūpo saddarāsī ādi yesaṃ “takkemi, parikkappemi, cintayāmi, yathe”tyevamādīnaṃ, tehi **sāyam** parikkappaṇā **kvāpi** yathāvutte **byañjīyate** pakāsīyate, **kvāpi** katthaci pana vākyena gamyate

maññeiccādīnamabhāvepīti.

273. Vohārasukhatthaṃ parikkappanāpakāsake sadde dasseti “**maññe**”ccādinā. Maññe, sanke, dhuvam, nūna, iva, evamādīhi saddehi **sāyam** parikkappanā **kvāpi** ettha viya katthaci **byañjīyate** pakāsīyate, **kvāpi** katthaci **vākyena** kriyākārahasambandhasahitapadasamudāyena **gamyate** **ivādisaddayogābhāvepi** kevalaṃ vākyasāmatthiyeneva ñāyate. “**Maññe**”ccādīpadapañcakaṃdvandasamāsenā niddiṭṭhaṃ. **Iti evaṃ** pakāro saddasamudāyo ādi yesaṃ “takkemi, parikkappemi, cintayāmi, yathā”tiānīnanti viggaḥo.

Gammaparikkappanā

274. **Dayāsañcārasarasā** [**dayāsañjātasarasā** (ka.)], **dehā nikkhantakantiyo;**
Pīṇentā jina te sādhu-janaṃ sarasataṃ nayuṃ.

274. Udāharati “**dayā**”iccādi. **Raso** sineho, tena saha vattamāno **saraso**. Deho. **Dayāya** karuṇāya **sañcāro** dukkhitasattavisayā nirantarappavatti, tena saraso, tato. Jina te **dehā** sarīrato nikkhantakantiyo sādhujanaṃ **pīṇentā** tappentā tameva janaṃ **sarasataṃ** sapemataṃ **nayuṃ** pāpesuṃ, tādisaṃ tathāvidhadhanikkhantakantiṃ naṃ sādhujanaṃ pīṇenti. Gammamānāparikkappanāyaṃ yato kantiyo laddhasarasasarīrasaṃsaggā sayampi sarasā iva attānaṃ sevamānaṃpī sādhujanaṃ sarasataṃ nentīti gamyate.

274. Vākyagammaparikkappanamudāharati “**daye**”ccādinā. He **jina** te **dayāsañcārasarasā** dukkhitasattavisayāya karuṇāya savisaye nirantarappavattiyā sañjātasnehato **dehā** sarīrato **nikkhantakantiyo** dasadisāsu niggatā nīlādichabbaṇṇaramsiyo **sādhujanaṃ** katapuññaṃ uttamajanaṃ pīṇentā **sarasataṃ** sasnehabhāvaṃ pemaśahitattaṃ **nayuṃ** tameva sādhujanaṃ pāpesuṃ. “Sarasataṃ nayu”nti ettha “sādhujana”nti sutasambandhena ñāyati. Karuṇāsinehasommadehasaṃsaggato kantiyo sayampi nissayaguṇato sommabhūtā attānaṃ visayaṃ katvā pavattajanepi muduṃ karontevāti **ivādīnaṃ** abhāvepi vākyagammaparikkappanā. Ettha acetanānaṃ kantivatthūnaṃ janapasādasankhātavattuṭṭhiti “dayāsañcārasarasā ivā”ti evamādiāññappakārena parikkappito. Dayāya sañcāro punappunaṃ pavattīti ca, saha rasena snehena vattamānoti ca, dayāsañcārena sarasoti ca, nikkhantā ca tā kantiyo ceti ca, sādhu ca so jano ceti ca, sarasassa bhāvoti ca vākyam.

275. **Ārabhantassa yaṃ kiñci, kattuṃ puññavasā puna;**
Sādhanantaralābho yo, taṃ vadanti samāhitaṃ.

275. Samāhitaṃ samāharati “**ārabhantassi**”ccādinā. **Yaṃ kiñci** kāriyaṃ **kattuṃ** sattubhaṅgādikaṃ **ārabhantassa** sajjībhūtassa yassa kassaci pumuno **puññavasā** kusalabalena kāraṇena kusalasāmatthiyena puna sādhyate sādhiyamaneneti **sādhanam**, tato tameva vā **antaramaññaṃ**, tassa lābho, aññakāraṇalābhoti attho. Taṃ samāhitaṃ vadanti, samādhānaṃ **samāhitaṃ**.

275. Idāni samāhitālaṅkāraṃ dasseti “**ārabha**”miccādinā. **Yaṃ kiñci** amittavijayādikaṃ kattuṃ ārabhantassa yassa **puññavasā** kusalabalena puna **yo sādhanantaralābho** tasseva kāriyasiddhiyā upakāraṅkassa aññasādhanassa yo lābho atthi, taṃ kāraṇalābhaṃ **samāhitaṃ vadanti** tasseva kāriyassa samādhānattā patitṭhitattā samāhitaṃ iti kavino kathenti. Sādhyate sādhiyamaneneti ca, tañca taṃ antaramaññañceti ca, tassa lābhoti ca, samādhānamiti ca vākyam.

276. **Mārāribhaṅgābhimukha-manaso tassa satthuno;**
Mahāmahī mahārāvaṃ, ravīya’ mupakārikā.

276. Udāharati “**māra**”iccādi. **Mārāriṇo** mārasattuno **bhaṅge** abhibhave **abhimukhaṃ** na parammukhaṃ manam yassa tassa satthuno **upakārikā** āradhamārābhāṅgākriyānuggāhikā mahāmahī ayaṃ **mahārāvaṃ** mārāridussahaṃ mahānādaṃ **ravī** akāsi. Idha mārāribhañjanaṃ

kāriyamāraddham, tassa puññavaseneva mahīrāvo aparaṃ sādhanam samāpananti lakkhaṇam yojanīyam.

276. “Mārāri”ccādi. Mārāribhaṅgābhimukhamanaso mārasaṅkhātassa sattuno maddane abhimukhacittassa tassa satthuno **upakārikā** āraddhamāravijayassa upatthambhikā ayam mahāmahī **mahārāvam** mārasa hadayavatthum maddanto [maddantī (?)] viya sahitumasakkuṇeyyam mahānādam **ravī** akāsi. Ettha mārabhaṅgajananaṃ satthūhi āraddhakāriyam, tasseva siddhiyā hetubhūtaṃ aññakāraṇam nāma mahīrāvo. Māro eva ari sattūti ca, tassa bhaṅgoti ca, tasmim abhimukham manam yasseti ca, mahantī ca sā mahī ceti ca viggaho.

**277. Avatvā’bhimatam tassa, siddhiyā dassana’ññathā;
Vadanti tam pariyāya-vuttīti sucibuddhayo.**

277. Pariyāyavuttim paṭipādeti “**avatvā**”iccādinā. **Abhimatam** kiñci attham dhanadānādilakkhaṇam **avatvā** añjasā vācakabyāpārena anākhyāya **tassā** bhimatassatthassa **siddhiyā** nipphādanattham **aññathā** aññena pakārena tannibbattianuṇeṇa yaṃ **dassanam** vacanam, tam sucibuddhayo pariyāyavuttīti vadanti. Pariyāyena vacanam **pariyāyavuttīti**.

277. Idāni pariyāyavuttim dasseti “**avatvā**”iccādinā. **Abhimatam** ittham dhanadānādisarūpaṃ [dhanadhāññādīm (sīha)byākyāyam] yaṃ kiñci attham **avatvā** ujumakathetvā **tassa** abhimatattassa **siddhiyā** nipphattiyā **aññathā** vattumicchitattassānurūpenaññappakārena **dassanam** yaṃ kiñci dassanam kathanamatthi, sucibuddhayo pariyāyavuttīti tam vadanti. Pariyāyena vutti kathanamiti ca, suci buddhi yesamiti ca vākyam.

**278. Vivaṭaṅgaṇanikkhittam, dhana’mārakkhavajjitam;
Dhanakāma yathākāmaṃ, tuvaṃ gaccha yadi’cchasi.**

278. Udāharati “**vivaṭaṅgaṇe**”ccādi. Dhanam **vivaṭe** kenaci anāvaṭattā **aṅgaṇe** pakāsappadesse nikkhittam atha ca pana ārakkhavajjitam. **Dhanam** kāmetīti **dhanakāmāti** āmantanam. Tuvam yadi icchasi gantum dhanam vā, yathākāmaṃ gaccheti dhanāvaharaṇamicchitamañjasā avatvā taṃsiddhiyā byājena vadati. Pariyāyavutti.

278. Udāharati “**vivaṭa**”miccādinā. **Dhanam** muttāmañiādi **vivaṭaṅgaṇanikkhittam** pākārādi-parikkheparahitattā nirāvaraṇaṭṭhāne yena kenaci ṭhapitam apica ārakkhavajjitam. Bho **dhanakāma** tuvaṃ yadicchasi dhanam gamanam vā, yathākāmaṃ gacchāti cittenicchitadhanāvaharaṇavidhānam “dhanamāharā”ti ujumavatvā evaṃ byājena vuttattā idaṃ pariyāyavutti nāma. Vivaṭaṅgaṇaṃ tam aṅgaṇaṅceti ca, tasmim nikkhittanti ca, ārakkhena vajjitamiti ca, dhanam kāmetīti ca, kāmaṃ taṇham taṃsampayuttam vā cittamanatikkammāti ca vākyam.

**279. Thutiṃ karoti nindanto, viya tam byājavaṇṇanam;
Dosābhāsā guṇā eva, yanti sannidhi’matrahi.**

279. Byājavaṇṇanam vaṇṇeti “**thuti**”miccādinā. **Nindanto viya** dosaṃ nidassento viya **thutiṃ karoti** vaṇṇam bhāsati, tam byājathutilakkhaṇam byājavaṇṇanam nāma. Kathamettha guṇā paṭiyantīti āha “**dosi**”ccādi. **Atra** vuttiviseṣe dosā viya ābhāsanti paṭibhanti. Tādisapadādinā **dosābhāsā** guṇā eva iddhimantatādayo na dosopi koci **sannidhim**avaṭṭhānam yanti. Hīti avadhāraṇe atra byājavaṇṇanamevidaṃ, na nindakamiti.

279. Idāni byājavaṇṇanam dasseti “**thuti**”ccādinā. **Nindanto viya** dosaṃ dassento viya **thutiṃ karoti** vaṇṇanam karoti, **tam** vaṇṇanākaraṇam byājavaṇṇanam nāma hoti. Nindāsabhāvena pavattathutittā nindā eveti ce? Atra asmim vuttiviseṣe **dosābhāsā** dosā viya paṭibhāsamānā **guṇā eva** tādisapadappayogena iddhimantatādayo guṇāva **sannidhim** guṇasabhāvāvaṭṭhānam **yanti** pāpuṇantīti. Byājena vaṇṇanamiti ca, dosā iva ābhāsanti paṭibhāsantīti ca vākyam.

**280. Sañcāletu'malaṃ tvam'si, bhusaṃ kuvalayā'khilaṃ;
Visesaṃ tāvatā nātha, guṇānaṃ te vadāma kiṃ.**

280. Udāharati “**sañcāletu**” miccādinā. Nātha tvam akhilaṃ **kuvalayaṃ** uppaḷaṃ pathavīvalayañceti siliṭṭhaṃ **sañcāletuṃ** bhamayitumito cito ca **bhusamaccantaṃ alaṃ** samatthopi **tāvatā** taṃmattena te guṇānaṃ **visesaṃ** atisayalakkhaṇaṃ **kiṃ** kena kāraṇena vadāma. Iha uppalacālanasāmatthiyavibhāvanavasena nindati, tāva nikhilabhūmaṇḍalasañcālāvikaṇato paramāya thutiyā saṃyojitoyaṃ bhagavā mahānubhāvaṃ vicitavāti bhuvanamaṇḍalasikhāmaṇṭi. Byājavanānamīdisamaccantaṃ ramaṇīyaṃ, tadidañca sabbathā silesamupajīvati.

280. Idāni udāharati “**sañcāletu**” miccādinā. Nātha tvam **akhilaṃ kuvalayaṃ** nissesam nīluppalavanaṃ pathavīmaṇḍalaṃ vā **sañcāletuṃ** kampetuṃ **bhusamatisayena alaṃ** samattho, tāvatā te guṇānaṃ **visesamatisayaṃ kiṃ vadāma** kathaṃ bhaṇāmāti. **Kuvalayasaddassa** uppalavisesavācakattā paṭhamaṃ nindāva, tasseva saddassa pathavīmaṇḍalavācakattā “iddhimato tava idaṃ kiṃ visesa”nti uttamaḡuṇavaṇṇanā katā hoti. Īdisā byājavanānaṃ pasatthā, sā ca sabbathā silesam nissāya pavattatīti. Kuyā pathaviyā valayaṃ maṇḍalamiti samāso.

**281. Visesi'cchāyaṃ dabbassa, kriyājātiguṇassa ca;
Vekalladassanaṃ yatra, viseso nāma'yaṃ bhava.**

281. Visesavuttiṃ vatteti “**visesicchāya**” miccādinā. **Vise**se atisaye kismiñcīpi kāriyavise

281. Idāni visesālānkāraṃ dasseti “**visesi**” ccādinā. **Visesicchāyaṃ** atisaye kāriyavise

**282. Na rathā na ca mātaṅgā, na hayā na padātayo;
Jīto mārāri muninā, sambhārāvajjanena hi.**

Dabbavisesavutti.

282. Udāharati “**na rathā**” iccādi. Subodhaṃ. Atra ca vijayopakaraṇacaturaṅgānīkalakkhaṇadabbābhāvena samatīmsapāramitāsāṅkhatasambhārāvajjanasseva mārārivijayalakkhaṇo viseso vutto.

282. “**Na rathā**” iccādi. **Rathā tayo** antamaso saporivārānaṃ tiṇṇaṃ rathānaṃ anīkavohārato tādisā tayo rathā ca natthi. **Mātaṅgā tayo** vuttanayena anīkasaṅkhātā tayo mātaṅgā ca natthi. **Na hayā tayo** tādisā anīkasaṅkhātā tayo assā ca natthi. **Padā na** antamaso sāyudhānaṃ catunnaṃ purisānaṃ anīkavohārato tādisā cattāro purisā padā ca natthi. Tathāpi muninā **sambhārāvajjanena hi** samatīmsapāramidhammānaṃ ābhogakaraṇeneva **mārāri** mārapaccattiko **jīto** abhibhavito. Iha jayopakaraṇabhāvena ṭhitānaṃ rathānīkādīnaṃ dabbānaṃ vekallaṃ dassetvā sattuvijayasabhāvanaṃ sambhārānaṃ āvajjanavisesassa vuttattā esā dabbavisesavutti nāma. Ratho nāma catupurisaparivāro, tādisaṃ rathattayaṃ rathānīkaṃ nāma. Hatthī pana dvādasapurisaparivāro hoti, tādisaṃ hatthittayaṃ hatthānīkaṃ nāma. Asso tipurisaparivāro, tādisaṃ hayattayaṃ hayānīkaṃ nāma. Sāyudhā cattāro purisā padānīkaṃ nāma. Iha rathādīsu ṭhitā viya sīghaṃ pādabaleṇa gantvā yujjhamānā purisā pādopacāreṇa “pādā”ti vuttā. Rathādīnaṃ pamāṇaṃ tayoti anīkaṭṭhāne dassetvā purisapamāṇassāvuttepi antamaso cattāro purisā anīkaṃ nāma hontīti pakaraṇato cattāroṭi nāyati. No ce? Sāvudhapurisavācakassa **padātisaddassa** “padātayo”ti bahuvacanena rūpasambhavato “rathā na, mātaṅgā na, hayā na, padātayo na” iti sambandho. **Dabbavisesavutti** dabbena dabbapaṭisedhanato visesakathanāṃ visesassa vuttīti ca, dabbena dabbapaṭisedhena visesavuttīti ca vākyāṃ. Kriyāvisevavutyādittayampi evameva daṭṭhabbaṃ.

**283. Na baddhā bhūkuṭīneva, phurito dasanacchado;
Mārāribhaṅgañcā'kāsi, munivīro varo sayam.**

Kriyāvisesavutti.

283. “Na baddhā”iccādi. **Bhūkuṭī** bhamubhaṅgo kopajanito **na baddhā** na racitā, **dasanacchado** cādharo **neva phurito** neva kampito kopena. Tathāpi ca **varo** uttamo munivīro sayam mārārino **bhaṅgam** parājayaṃ akāsīti. Bhūkuṭībandhanādikriyāvīgamena nibbikāravijayalakkhaṇo viseso dassito.

283. “Na baddhā”iccādi. **Bhūkuṭī** kopavikārabhūto bhamubhaṅgopi **na baddhā** na katā, **dasanacchado** dantāvaraṇo **neva phurito** na kampāpito. Tathāpi **varo** uttamo **munivīro** muniguṇavīraguṇayutto tathāgato sayam mārāribhaṅgañca akāsīti. Ettha bhamubhaṅgaracanādikaṃ kriyaṃ akatvā nibbikārassa mārābhaṅgasabhāvavisesassa [nibbikāramārābhaṅgassa (ka.)] vuttattā esā **kriyāvisesavutti** nāma. Bhūnaṃ kuṭī vaṅkatāti ca, māro eva arīti ca, tesam bhaṅgoti ca vākyam.

**284. Na disāsu byattā [tatā (sī.)] raṃsi,
Nā'loko lokapatthaṭṭo;
Tathāpya'ndhatamaharam,
Param sādhusubhāsitaṃ.**

Jātivisesavutti.

284. “Ni”ccādi. **Disāsu** dasasu **byattā** patthaṭṭa raṃsi na bhavati. **Loke** sakalasmim **patthaṭṭo** vitthato ālokona bhavati. **Tathāpīti** visesanicchāyam, tajjātikattābhāvepi sādhuṇaṃ **subhāsitaṃ** saddhammasaṅkhātāṃ **paramaccantameva** andhatamaṃ iṭṭhāniṭṭhāvekallato paññācakkhussa andhakāraṃ mohandhakāraṃ haratīti **andhatamaharanti**. Raṃsiyā andhakārāpahārasamatthāya nivattiyā viseso subhāsitasā dassito.

284. “Na disāsu”iccādi. Disāsu byattā patthaṭṭa raṃsipi natthi, **lokapatthaṭṭo** ālokopi natthi. Tathāpi **sādhusubhāsitaṃ** saddhammo **paramaccantaṃ andhatamaharam** atthānatthātirāṇakkhamassa paññācakkhussa andhakāraṃ mohatamaṃ haram hotīti. Idha andhakāraviddhamānsane samattham raṃsijātyādikaṃ paṭisedhetvā subhāsitasā andhakārāpahārasaṅkhātāssa visesassa vuttattā ayaṃ **jātivisesavutti** nāma. Loke patthaṭṭoti ca, andhetīti andho moho, tamasadisattā andhoyeva tamoti ca, tam haratīti ca, sādhuṇaṃ subhāsitamiti ca vākyam.

**285. Na kharam na hi vā thaddham, muninda vacanam tava;
Tathāpi gālham khanati, nimmulam janatāmadam.**

Guṇavisesavutti.

285. “Na khara”miccādi. Muninda tava vacanam **na kharam** na lūkhāṃ, **na thaddham vā** kaṭhinañca na hi. **Tathāpi** tādisakharattādiguṇābhāvepi **janatāya** janasamūhassa **madam gālham** daḷham [taṇham (ka.)] katvā nimmulam khanatīti. Ayosaṅkumhi pasiddhakharattādiguṇanisēdhena munindavacanassa viseso āvikato.

285. “Na khara”miccādi. He **muninda** tava vacanam **kharam** kakkasaṃ na hoti, thaddham vā na hoti. Tathāpi **janatāmadam** janasamūhassa jātyādiṃ nissāya pavattam gabbam **gālham** daḷham katvā **nimmulam** mūlamasesetvā khanatīti. Khaṇanakkhamaayosaṅkuādīsū labbhamānam kharattādiguṇam paṭisedhetvā buddhavacanassa madakhaṇanasabhāvāsaṅkhātāssa visesassa vuttattā ayaṃ **guṇavisesavutti** nāma hoti. Natthi mūlamassa khaṇanassāti ca, janānam samūhoti ca, tāya madoti ca viggaho. “Gālham nimmula”nti khaṇanakriyāya visesanattā gālham nimmulam khaṇanam karotīti yojanā.

**286. Dassīyate'tidittam [...tirittam (ka.)] tu,
Sūravīrattanam yahim;
Vadanti viññū vacanam,
Ruḷhāhānkāramīdisam.**

286. Ruḷhāhānkāram vadanti.

286. Idāni ruḷhāhānkāram dasseti “**dassīyate**” iccādinā. **Sūravīrattanam** sūrabhāvavīrabhāvaṃ **atidittam tu** atisayena pana dittaṃ **yahim** vākye dassīyate, īdisam vacanam **viññū** kavayo ruḷhāhānkāramiti vadantīti. Sūro ca vīro cāti ca, tesam bhāvoti ca, ruḷho uggato ahānkāro ettha vuttiviseseti ca vākyam.

**287. Dame nandopanandassa,
Kim me byāpāradassanā;
Puttā me pādasambhattā,
Sajjā santeva tādise.**

287. Udāharati “**dame**”iccādinā. **Nandopanandassa** nāgarājassa appameyyamahānubhāvassa **dame** damane **me** mama niravadhisarantippameyyappabhāvānucaritakittinopi parassa **byāpāradassanā** payogapaṭipādanena **kim** payojanam, na kimpi, yato me **pādasambhattā** pādāvanatā **tādise** kammani **sajjā** baddhakacchā **santeva** vijjanteva, tatoti yojanīyam.

287. “**Dame**”ccādi. **Nandopanandassa** nāgarañño **dame** damakaraṇe **byāpāradassanā** bhuvanattaye pavattamānānubhāvena ca sampavattitakittisamūhena ca samannāgatassa mayhaṃ tādīsapayogadassanena **kim** payojanam. Yasmā **me pādasambhattā** mayhaṃ caraṇāvanatā **tādise** kicce **sajjā** sannaddhā **puttā** bahavo santi eva, tasmāti. Cetovasiṭṭāya sūravīrabhāvo iha atiditto dassito hoti. Byāpārassa dassanamiti ca, pādesu sambhattāti ca vākyam.

**288. Silesa vacanā'nekā-
Bhidheyye'kapadāyutam;
Abhinnapadavākyādi-
Vasā tedhā'ya'mīrito.**

288. Silesam niddisati “**silesa**”iccādinā. Anekam bhinnamabhidheyyattho yassātyanekābhidheyyam. **Ekena** samānena **padena** sarūpena **āyutamanvitaṃ** yaṃ **vacanam** vuttīti anuvaditvā so silesoti vidhīyate, yena kenaci rūpena upamānopameyyalakkhaṇatthānam silesanato. **Ayañcevaṃ**lakkhaṇo silesa tedhā īrito. Kathaṃ? **Abhinnapadavākyādivasā** abhinnamekaṃ padaṃ syādyantatyādyantarūpaṃ yatra, tameva vākyam vākyalakkhaṇopetattā. Taṃ ādi yesam, tesam vasāti attho.

288. Idāni silesālaṅkāram dasseti “**silesa**”ccādinā. Anekābhidheyyam **ekapadāyutam** ubhayattha sādharmaṇattā tulyena saddarūpena yuttaṃ yaṃ vacanam atthi, so silesa nāma. So pana yena kenaci sādhammarūpena upamānopameyyabhūtānamatthānam siliṭṭhattā aññamaññaṃ phusitvā ṭhitattā **silesa** nāma. **Ayam** vuttalakkhaṇo silesa **abhinnapadavākyādivasā** akatavikāraṇam syādyantatyādyantapadasamannāgatānam vākyalakkhaṇopetavākyānam pabhedena tedhā īritoti. Anekamabhidheyyam yasseti ca, ekañca taṃ padañceti ca, tena āyutanti ca, abhinnāni padāni yasminti ca, tañca taṃ vākyāñcāti ca, taṃ ādi yesam abhinnapadavākyānanti ca, tesam vaso bhedoti ca vākyam.

**289. Andhantamaharo hārī, samāruḷho mahodayam;
Rājate raṃsimālī'yaṃ, bhagavā bodhayam jane.**

Abhinnapadavākyasilesa.

289. Udāharati “**andhantami**”ccādi. **Ayaṃ bhagavā** sūriyo mahāmuni ca. Tattha sūriyo tāva **andhantamaharo** pakatiyandhakāropahārī, mahāmuni tu andhakāramohatamāpahārī. **Hārī** manuñño sūriyo mahāmuni ca, sūriyo **mahodayaṃ** mahantaṃ udayaṃ pabbataṃ samāruḷho, mahāmuni tu **mahodayaṃ** mahantamabbhodayaṃ sammāsambodhisamadhigamarūpaṃ **samāruḷho** patto. Raṃsīnaṃ mālā, sā assa atthīti **raṃsimālī**, sūriyo mahāmuni ca. Jane **bodhayaṃ** niddāpagamanena kilesaniddāpagamanena vā pabodhayanto **rājate** dibbatīti. **Abhinnapadavākyasilesa** bhaṅgena vinā yathāvattāṅhamubhayattha padayojanato.

289. Idāni udāharati “**andha**”miccādinā. **Mahodayaṃ** mahantaṃ udayaṃ pabbataṃ, sabbaññupadavisāṅkhātamahābhivuddhiṃ vā **samāruḷho** āruḷho, sampatto vā, **andhantamaharo** cakkavāḷagabbhe patthaṭapakatighanandhakārassa, ñāḷalocanassa andhakaraṇato andhakāroti vuttamohassa vā viddhaṃsako, **hārī** teneva manuñño **raṃsimālī** attano raṃsimālāya samannāgato **jane** pakatiniddāya kilesaniddāya vā samannāgate satte **bodhayaṃ** bodhayanto **ayaṃ bhagavā** divākaro, chahi bhagadhammehi samannāgato buddho vā **rājate** dibbatīti. Dvīsu pakkhesu padānaṃ samānabhāvena tītatā ayaṃ **abhinnapadavākyasilesa**. Andho ca so tamo ceti ca, taṃ haratīti ca, mahanto ca so udayo pabbato cāti ca, mahanto ca so udayo abbhodayo bhivuddhi cāti ca, raṃsīnaṃ mālāti ca, sā assa atthīti ca, bhago sirī assa sūriyassa atthīti ca, bhago sirīkāmapayatanādippakāro assa satthuno atthīti ca viggaho. **Abhinnapadavākyasaṅkhāto** silesa. Aparopi attho ettha silissatīti **silesa**. “**Bhinnapadavākyasilesa**”tiādīkampi iminā nayena ñātappaṃ.

**290. Sāradāmalakābhāso, samānītaparikkhayo;
Kumudākarasambodho, pīṇeti janataṃ sudhī.**

Bhinnapadavākyasilesa.

290. “**Sārade**”ccādi. Sudhā assa atthīti **sudhī**, cando. Sobhanā sabbaññutaññānarūpaṃ buddhi assa atthīti **sudhī**, sammāsambuddho. **Sārado** saradakāle sambhūto **amalako** nimmalo **ābhā** sobhā yassa so, cando. Paresaṃ nibbānasāraṃ dadātīti **sārado**, amalako ābhāso, amalakassa hatthāmalakasseva vā ābhāso asesañeyyāvabodho yassa so, sammāsambuddho. **Sam** sammā kamenānīyamānattā ānīto **parikkhayo** kaṇhapakkho yena so, cando. **Samam** vūpasamaṃ ānīto **parikkhayo** hāni kilesasattukato adhigatakkhayattā yenaso, sammāsambuddho. Kumudākarassa kumudassa raṃsiyā sambodhi vikāso yassa [[raṃsiyo sambodhi vikāsa'ssa \(ka.\)](#)] so, cando. Kuyā pathaviyā mudaṃ pītiṃ karotīti **kumudākaro, sambodho** catusaccāvabodho yassa so, sammāsambuddho, **janataṃ** janasamūhaṃ pīṇetīti. Ayaṃ **abhinnapadavākyasilesa** vuttena vidhinā padānaṃ bhinnattā.

290. “**Sāra**”iccādi. **Sārado** saradakāle sambhūto, veneyyānaṃ nibbānasāradāyako vā, **amalakābhāso** nimmalasobho, nimmalakatumālāsamannāgatattā tādisamatthakasobho vā, atha vā **sāradāmalakābhāso** saradakāle sañjātanimmalasobho, veneyyānaṃ nibbānasāradāyakanimmalasobho vā, atha vā **sāradaāmalakābhāso** nibbānasāradāyakahatthāmalakasadiśañeyyāvabodho. **Samānītaparikkhayo** kaṇhapakkhe suṭṭhu kamena ānīto parikkhayo paripuṇṇo vā cando, samasaṅkhatasantiṃ ānītakilesaparihānisāṅkhātaparikkhayo vā. **Kumudākarasambodho** kumudavikāsanena samannāgato, kusaṅkhātapathavīnissitānaṃ janānaṃ pītijananacatusaccāvabodhena samannāgato vā. **Sudhī** sudhāsaṅkhātaamatavantatāya tannāmakō cando, sundarapaññavantatāya tannāmakō sammāsambuddho vā. **Janataṃ** janasamūhaṃ pīṇetīti. Ubhayapakkhesu padaṃ bhinditvā atthassa yojanato ayaṃ **abhinnapadavākyasilesa**. Sarade bhavo sārado, cando. Sāraṃ dadātīti sārado, bhagavā. “**Sārado**”ti idaṃ “**ābhāso**”ti padassa visesaṃ hoti. Amalakonimmalo ābhāso assa candassāti ca, kamhi matthake ābhāsoti ca, amalō kābhāso assa satthunoti ca, sārado amalako ābhāso yassa candassa bhagavato vāti ca, sārado āmalakassa viya ābhāso ñeyyāvabodho assa bhagavatoti ca, saṃ sammā ānīto parikkhayo kalāhāni aneneti ca, samaṃ vūpasamaṃ ānīto parikkhayo hāni kilesasattuto yeneti ca, kumudānaṃ ākaroti ca, tesam sambodho vikāso yasseti ca, mudaṃ pītiṃ karotīti mudākaro. Kuyā pathaviyā mudākaro ca, so sambodho catusaccāvabodho yasseti ca, sudhā amataṃ assa candassa atthīti ca, su sobhanā dhī buddhi assa sambuddhassāti ca viggaho.

**291. Samāhitattavinayo, ahīnamadamaddano;
Sugato visadaṃ pātu, pāṇinaṃ so vināyako.**

Bhinnābhinnapadavākyasileso.

291. “**Samāhite**”ccādi. **Sam** sammā **āhito** patiṭṭhāpito attassa **vinayo** vinayanaṃ sabbattha savisaye appaṭihatacāravasena yassa so, garuḷo. **Vinayanaṃ** pavivittakāyacittappavattivāsena damanaṃ yassa so, sammāsambuddho. Iti abhinnapadaṃ. Ahīnaṃ sappānaṃ inā nāyakā, tesam madam maddatīti **ahīnamadamaddano**, garuḷo. Ahīnānamuttamapurisānampi mahābrahmādīnaṃ madam maddatīti **ahīnamadamaddano**, sammāsambuddho. Sundaraṃ gataṃ gamanaṃ samuddaṃ bhinditvā jalasaṅgamato paṭhamamevauggamanasāmatthiyayogato yassa so, garuḷo. Sundaraṃ gamanamassa nāgavikkantacārattā **sugato**, sammāsambuddho. Abhinnapadaṃ. **So** vīnaṃ pakkhīnaṃ nāyako, garuḷo. Visam dadātīti **visadaṃ pāṇinaṃ** nāgalokaṃ **pātu** ahiṃsanavasena pālayatu, **so** vineti veneyyeti **vināyako**, sammāsambuddho. **Pāṇinaṃ** sakalasattalokaṃ **visadaṃ** asallīnaṃ pātu. **Bhinnābhinnapadavākyasilesoyam** vuttanayena padānaṃ [pana (ka.)] ubhayamissattā.

291. “**Samāhite**”ccādi. **Samāhitattavinayo** sammā āhitāya ṭhapitāya sarīrassa savisaye gatiyā samannāgato, sammā āhitena ṭhapitena cittadamanena samannāgato vā, **ahīnamadamaddano** nāgarājūnaṃ madamaddano, ahīnānaṃ uttamānaṃ bakabrahmādīnaṃpi madamaddano vā, **sugato** pakkhavātavegena samuddajalaṃ dvidhā katvā tasmiṃ jale anekībhūteyeva nāgabhavanaṃ gantvā nāge gahetvā gamane samatthattā sundaragamaṇo, samantabhaddakaanekappakāragamaṇo vā, **vināyako** pakkhīnaṃ nāyako **so** garuḷarājā **visadaṃ** ghoravisattā visadāyakaṃ **pāṇinaṃ** nāgalokaṃ **pātu** ahiṃsanavasena pāletu. No ce, **vināyako** veneyye vinento **so** sammāsambuddho **pāṇinaṃ** sakalasattalokaṃ **visadaṃ** visāradaṃ katvā **pātu** ahitāpanayanahitopanayanena rakkhatūti. Ubhayapakkhesu “ahīnamadamaddano”iccādikehi bhinnehi ca “samāhitattavinayo”iccādikehi abhinnehi ca padehi samannāgatattā ayaṃ **bhinnābhinnapadavākyasileso**. Attassa vinayoti ca, samāhito attavinayo yassa garuḷassa tathāgatassa vāti ca, ahīnaṃ inā nāyakāti ca, ahīnānaṃ nāgarājūnaṃ madoti ca, hīnehi aññe ahīnā uttamā, tesam madoti ca, tam maddatīti ca, vīnaṃ pakkhīnaṃ nāyakoti ca, veneyyajane vinetīti ca vākyam. Dutiyapakkhe “visada”nti kriyāvisesanaṃ.

**292. Viruddhāviruddhābhinna-kammā niyamavā paro;
Niyamakkehapavacano, avirodhi virodhya’pi.**

**293. Ocīyasamposakādi, sileso padajādi’ti [padajātipi (ka.)];
Esaṃ nidassanesveva, rūpa’ māvivhavissati.**

292-3. Silesabhedamaññathāpi dassetumāha “**viruddha**”iccādi. Viruddhāni cāviruddhāni ca aññamabhinnañca, tāniyeva **kammāni** kriyāni yesam, te tayo silesā. Niyamo’vadhāraṇamasmiṃ atthīti **niyamavā, paro** añño silesopi. Niyamassa **akkhepo** nisedhanaṃ yassa, tam **vacanam** abhidhānaṃ yassa, tādisopi. Nāssa virodho atthīyavirodhi, sopi. Virodho asaṅgati ettha vijjatīti **virodhi**, sopi. Ocīyaṃ samposetīti ocīyasamposako, so ādi yassa alaṅkārantaragocarassa silesassa, so padato jātādisilesopi. **Itite** parepi silesabhedā santi. **Esaṃ** yathāvuttānaṃ **nidassanesu** payogesveva **rūpaṃ** sabhāvo lakkhaṇaṃ āvivhavissatīti.

292-3. Avuttasilesavisese dassetum uddisati “**viruddhā**”iccādi. **Viruddhāviruddhābhinnakammā api** ubhayatthassa viruddhena ca aviruddhena ca abhinnena ca kammena samanvitā tayo silesā ca, **paro** añño **niyamavāpi** avadhāraṇena yuttasileso ca, **niyamakkehapavacanopi** avadhāraṇassa paṭisedhapakāsakābhidhānasileso ca, **avirodhipi** ubhayapakkhāvirodhisileso ca, **virodhipi** ubhayatthassa virodhisileso ca, **padajādi** padena jāto vākyena jāto ocīyasamposakādisilesopīti **esaṃ** silesānaṃ **nidassanesveva** nidassanasāṅkhataudāharaṇesveva **rūpaṃ** sarūpaṃ tesam lakkhaṇaṃ vā āvivhavissati, nidassiyamānaudāharaṇeneva lakkhaṇassa gammamānattā visum na kathessāmīti adhippāyo. Viruddhāni ca aviruddhāni ca abhinnañceti ca, tameva kammaṃ kriyā yesam silesānamīti ca, niyamo avadhāraṇaṃ asmiṃ atthīti ca, niyamassa akkhepo paṭisedho assa atthīti ca, tam vacanaṃ abhidhānaṃ yassa silesassāti ca, nāssa virodho atthīti ca, ocīyaṃ samposetīti ca, so ādi yassa

upamāsilesādinoti ca, padato jātoti ca, so ādi yassa vākyassāti ca viggaho.

Viruddhakammasilesa

**294. Savase vattayaṃ lokaṃ, akhilaṃ kallaviggaho [kalaviggaho (sī.)];
Parābhavati mārāri, dhammarājā vijambhate.**

294. Tato kamena tedassīyanti “**savase**”iccādi. Akhilaṃ lokaṃ savase vattayaṃ mārāri dhammarājā ca, **kallo** manuñño **viggaho** kalaho yassa mārārino, **viggaho** sarīrasampadā yassa dhammarājassa, tesu mārāri **parābhavati** parābhavamapeti bodhiyaṃ paṭiladdhaparājayavasena, **dhammarājā** samantabhaddo tu **vijambhate** lokattayabyāpīsamullapitavijayaddhanipavattivasena samaṃ bhavatīti ayaṃ viruddhakammasileso parābhavavijambhanānamaññoññavirodhato.

294. Idāni uddesakkamena udāharati “**savase**”iccādi. Akhilaṃ lokaṃ **savase vattayaṃ** anatto yuñjanato attano vase vattayanto, no ce, sakalalokaṃ hite yuñjanato attano vase vattayanto **kallaviggaho** manuññakalaho, no ce, manuññasarīrasampattiyutto mārāri **parābhavati** bodhimūle laddhaparājayavasena parābhavaṃ pāpuṇāti, **dhammarājā** tathāgato pana **vijambhate** lokattaye patthaṭṭajayaghosavasena vijambhatīti. Parābhavanavijambhanakriyānaṃ aññamaññaviruddhattā ayaṃ viruddhakammasileso nāma. Sassa attano vaso issariyamiti ca, kallo manuñño viggaho vivādo deho vā yasseti ca vākyam.

Aviruddhakammasilesa

**295. Sabhāvamadhuraṃ puñña-visesodayasambhavaṃ;
Suṇanti vācaṃ munino, janā passanti cā’ mataṃ.**

295. “**Sabhāve**”ccādi. Sabhāveneva **madhurā** piyā vācā, madhuraṃ amataṃ, puññavisēsassa **udayo** abhivaḍḍhi, tena sambhavo, yassa vā taṃ, **munino vācaṃ** saddhammasaṅkhātāṃ janā suṇanti, tassayaṃ amatañca [tassa ca nissayaṃ amatanti (ka.)] passantīti ayamaviruddhakammasileso savanadassanānaṃ aviruddhattāti.

295. “**Sabhāva**”miccādi. **Sabhāvamadhuraṃ** “vācāmadhuraṃ karissāmī”ti kattabbapayogaṃ vināpi madhurattā pakatimadhuraṃ, no ce, kenaci paccayena anuppannattā saṅkharavisesaṃ vināpi pakatipaṇītaṃ, **puññavisēsodayasambhavaṃ** puññavisēsadesakassa munino kassaci kusalavisesassa abhivuddhiyā sambhūtaṃ, no ce, veneyyajanānaṃ nibbānādhippāyena katakusalavisesassa abhivuddhiyā ārammaṇattena paṭiladdhaṃ **munino vācaṃ** saddhammasaṅkhātāṃ suṇanti, **amataṃ** nibbānañca **janā** veneyyajanā passantīti. Savanadassanakriyānaṃ aññamaññaviruddhattā ayaṃ aviruddhakammasileso. Sassa attano bhāvoti ca, tena madhurā, madhuramiti ca, puññameva visēsoti ca, tassodayoti ca, tena sambhavo yasseti ca viggaho.

Abhinnakammasilesa

**296. Andhakārāpahārāya,
Sabhāvamadhurāya ca;
Mano pīṇeti [dhinoti (sī. abhinavaṭṭikā ca)] jantūnaṃ,
Jino vācāya bhāya ca.**

296. “**Andhakāre**”ccādi. Andhakāraṃ mohasaṅkhātāṃ pakatiandhakāraṃ vā apaharatīti **andhakārāpahārā**, vācā, bhā ca. Tāya sabhāvabhāsāya, sobhāya ca jino jantūnaṃ **mano** cittaṃ pīṇetīti ayamabhinnakammasileso pīṇanalakkhaṇāyēkāya kriyāya vācāya bhāya ca sampannoti.

296. “**Andhakārā**”iccādi. **Andhakārāpahārāya** mohandhakāraṃ pakatiandhakāraṃ vā apaharaṇāya **sabhāvamadhurāya** ca sabhāvato kaṇṇasukhāya, sabhāvato nettābhirāmāya **vācāya**

bhāya sarīrakantiyā ca jino jantūnaṃ **mano** cittaṃ **dhinoti** pīṇetīti. Pīṇayanasabhāvāya ekāya kriyāya saddhiṃ karaṇabhūtānaṃ dvinnāṃ vācābhānaṃ yojitattā ayaṃ abhinnakammasilesa. Andhakāra’mapaharātīti ca, sabhāvena madhurātīti ca vākyāṃ.

Niyamavantasilesa

297. Kesakkhīnaṃva kaṇhattaṃ, samūnaṃveva vaṅkatā; Pāṇipādādharānaṃva, munindassā’tirattatā.

297. “**Kesi**”ccādi. Kaṇhattaṃ kesakkhīnaṃveva, na manasi, kaṇhattaṃ pāpattaṅca siliṭṭhaṃ. Vaṅkatā bhamūnaṃveva, na ajjhāsāya, vaṅkatānatattaṃ saṅhattaṅca siliṭṭhaṃ. Atirattatā pāṇipādādharānaṃveva, na citte, atirattatāṅca rāgo ca silissate. “Munindassā”ti “kaṇhatta”ntiādīsu sabbattha sambandhaniyaṃ. Niyamavā silesa kesakkhīnaṃvāti avadhāraṇappayogātī.

297. “**Kesakkhīna**”miccādi. Munindassa kaṇhattaṃ kesakkhīnaṃ eva hoti, kaṇhattasaṅkhatamakusalaṃ na citte. Vaṅkatā bhamūnaṃveva, najjhāsāya. Atirattatā pāṇipādādharānaṃ eva, na kesuci vatthūsūti. “Kesakkhīnaṃvā”tiādīsu niyamasāṅkhātāavadhāraṇapadassa vijjānānattā kaṇhabhāvena saddhiṃ pāpattassa ca, vaṅkagaṇena saddhiṃ sāṅheyyassa ca, rattagaṇena saddhiṃ rāgassa ca siliṭṭhattā ayaṃ niyamavantasilesa nāma. Kesāni ca akkhīni ceti ca, kaṇhassa bhāvoti ca, vaṅkassa bhāvoti ca, pāṇayo ca pādāni ca adharāni cāti ca, atirattassa bhāvoti ca viggaho.

Niyamakkhepasilesa

298. Pāṇipādādharesveva, sārāgo tava dissati; Dissate so’ya’matha vā, nātha sādhuṅṅesvapi.

298. “**Pāṇi**”ccādi. Nātha tava pāṇipādādharesveva **sārāgo** sobhano rattavaṅṅo dissati, na citte, sārāgo rattavaṅṅo chandarāgo cāti siliṭṭhaṃ. Ayaṃ niyamo akkhipyate. **Atha vā** kathaṃ niyamyate, yato **so ayaṃ** sārāgo sādhuṅṅesveva virāgalakkhaṅo dissate iti. Tasmā kathamavadhāriyatīti niyamakkhepavacano silesoyaṃ.

298. “**Pāṇi**”ccādi. He **nātha** tava **sārāgo** sobhano rattavaṅṅo pāṇipādādharesveva dissati, citte lobho pana na dissati. Atha vā **so ayaṃ** sārāgo kattukamyatākusalacchandabhūto **sādhuṅṅesvapi** sajjānānaṃ sīlādiguṅṅesupi dissati. “Evā”ti dassitaniyamassa paṭisedhakena “**atha vā**”ti vacanena samannāgatattā rattavaṅṅasaṅkhātārāgena lobhassa siliṭṭhattā ca ayaṃ niyamakkhepavacanasilesa. Saṃ sobhano rāgoti viggaho.

Avirodhisilesa

299. Salakkhaṅo’tisubhago, Tejassī niyatodayo; Lokeso jitasamkleso, Vibhāti samaṅṅissaro.

299. “**Salakkhaṅo**”iccādi. Saha lakkhaṅena sasarūpena dvattiṃ savarapurisalakkhaṅena vā vattamāno **salakkhaṅo**, cando munindo ca, atisubhago so ca, **tejassī** sūriyo pabhāvisesayutto ca, niyato patidinamudayo pabhālakkhaṅo yassa so **niyatodayo**, sūriyo, niyato thiro udayo sammāsambuddho sambodhirūpo yassa so **niyatodayo**, munindo, **lokeso** brahmā munindo ca, jito samkleso jhānarativasena kāyacittābādho yena so, brahmā, jito samkleso dasavidho aggamaggaññānalābhā yena so. So maṅṅinaṃ issaro upamaṅṅi [uttamamaṅṅi (?)], samaṅṅanaṃ issaro munindo vibhātīti yojjāṃ. Ayamavirodhisilesa lakkhaṅasubhagādīnamubhayatthāpi abyavahitattā.

299. “**Salakkhaṇo**”iccādi. **Salakkhaṇo** lakkhaṇena sahito, **atisubhago** atisundarāya lakkhiyā samannāgato, no ce, dvattiṃsamahāpurisalakkhaṇehi sahito ativiya sobhādīhi yutto, **tejassī** andhakāraviddhamanasāṅkhatamahānubhāvena yutto, **niyatodayo** patidinaṃ pubbaṅhakāle niyamitagaganuggamano, no ce, niranrapavattabuddhatejasā yutto thirasabbaññupadavisāṅkhātābhivuddhiyā samannāgato, **lokeso** brahmabhūto, **jitasamkleso** jhānapītiyā vijitakāyacittadaratho, no ce, tilokassa issarabhūto catutthamaggaññāṇena hatadasavidhasamkleso, **samañissaro** so uttamo maṇi **vibhāti** sobhati, no ce, samañānaṃ issaro **vibhāti** dibbatīti. “**Salakkhaṇo** subhago”iccādikānaṃ dvinnaṃ padānaṃ aviruddhattā ca, paṭhamapāde candena dutiye sūriyena tatiye brahmunā catutthe mañinā ca sabbaññupadatthassa siliṭṭhattā ca ayaṃ avirodhisilesō nāma. Saha lakkhaṇena vattamānoti ca, atisobhano bhago sirī vā sirikāmapayatanādiko vā assāti ca, tejo assa atthīti ca, niyato udayo asseti ca, lokassa iso issaroti ca, jito samkleso yeneti ca, mañīnaṃ samañānaṃ vā issaroti ca vākyam.

Virodhisilesa

**300. Asamopi samo loke,
Lokesopi naruttamo;
Sadayopya’dayo pāpe,
Cittā’yaṃ munino gati.**

300. “**Asamopi**”ccādi. Natthi samo rājaguṇādīhi assāti **asamo**, koci rājādi, “**asamo**”ti lokekasikhāmañibhāvena muni. Tattha yadā samo rājādi, tadā loke samoti viruddhaṃ asamattā tassa. **Apisaddo** virodhaṃ joteti. Pakkhantare tvaviruddhaṃ, loke devadattādīnaṃ virodhisattānaṃ rāhulādīnaṃ avirodhisattānañca samattā, tatoyevāyaṃ virodhābhāsānañcasā virodhoyeva. **Lokeso** brahmā muni ca. Tattha “**brahmā naruttamo**”ti viruddhaṃ dibbayonittā tassa. Pakkhantare tvabyāghāto uttamanarattā tassa. Dayo dānaṃ, saha dayenāti **sadayo**, koci puriso. Saha dayāya vattatīti **sadayo**, muni. Tattha puriso dāyako pāpe jane kathamadayoti virujjhati. Muni pāpe rāgādike adayoti virujjhati. Tasmā munino **ayaṃ** yathāvuttā **gati** pavatti **cittā** abbhutāti ayaṃ vuttanayena virodhisilesō udāhaṭo.

300. “**Asamo**”iccādi. **Asamopi** atulyopi koci rājādiko loke **samo** tulyo, no ce, sadisapuggalarahito eva rāhulabhadradevadattādisabbaloke anunayapaṭighābhāvena samo hoti. **Lokesopi** brahmabhūtopi **naruttamo** naravaro hoti, no ce, sakalalokādhipati hutvā eva naruttamo. **Sadayopi** yācakesu dayasāṅkhātena dānena yuttopi **pāpe** pāpiṭṭhe **adayo** dānarahito, no ce, dayāsahito eva akusale niddayo. Munino ayaṃ **gati** pavatti **cittā** vicittāti rājādino asamasamatā ca, brahmā hutvā uttamanarabhāvo ca, dānasahitassa kassaci purisassa dānarahitabhāvo ca viruddho hoti. Tasmā rājabrahmapurisehi munino siliṭṭhattā ayaṃ virodhisilesō nāma. Pubbapubbapakke virodho aparāparapakkehi nirākato hoti. Pubbapakke **apisaddo** virodhaṃ joteti, aparapakke avadhāraṇanti. Natthi samo yasseti ca, naro ca so uttamo ceti ca, saha dayena dayāya vā vattamānoti ca, natthi dayo dayā vā asseti ca viggaho.

Ocityasamposakapadasilesa

**301. Samsāradukkhopahatā-vanatā janatā tvayi;
Sukha’micchita’maccantaṃ, amatandada vindati.**

301. Udāharati “**samsāre**”ccādi. **Samsāro** abbochinnaṃ vattamānā khandhapaṭipāṭiyeva **dukkhaṃ** dukkhamattādīnā, tena **upahatā** pahaṭā janatā, amatam sukham amatam vā nibbānaṃ dadātīti **amatandadā**ti āmantanaṃ, tvayi **avanatā** paṇānavasena **icchitam**atimatam dukkhāpagamanibbattaṃ kāyikaṃ cetasañca **sukhaṃ** accantaṃ **vindati** paṭilabhatīti. Ettha amatam sudhā nibbānañca, amatandado dukkhopahate sukhayatīti ucitanti “**amatam dadātī**”ti padamadhigate vatthuni ocityam samposayatīti ocityasamposako padasilesoyam. **Ādisaddena** “**sugandhisobhāsambandhī**”tyādyupamāsilesādayo saṅgahitāti.

301. “**Samsāra**”iccādi. **Samsāradukkhopahatā** khandhadhātuāyatanānaṃ

nirantarapavattisaṅkhātena dukkhena upahatā janatā, **amatandada** he sudhādāyaka no ce, nibbānadāyaka tathāgata tvayi **avanatā** paṇamanavasena onatā **icchitam** abhimatam **sukham** kāyikacetāsikasukham **accantam** atisayena **vindati** sevātīti. Amatadāyakā dukkhite sukhite karontīti idaṃ ucitameveti ubhayatthassāpi vācakaṃ “amataṃ dadātī”ti padaṃ tādīsajanassa sukhadāne ocityaṃ poseṭīti ayaṃ ocityasamposakapadasileso. Saṃsāroyeva dukkhanti ca, tena upahatāti ca, amataṃ sudham nibbānaṃ vā dadātīti ca vākyam.

**302. Guṇayuttehi vatthūhi, samaṃ katvāna kassaci;
Saṃkittanaṃ bhavati yaṃ, sā matā tulyayogitā.**

302. Tulyayogitaṃ yojayati “**guṇe**”ccādinā. **Guṇo** dhammo sādhu asādhu vā, tena yuttehi vatthūhi saha **samaṃ katvāna** vatthuto asāmyepi tathābhāvamāropya **kassaci** purisādino thutinindattham yaṃ **kittanamākhyānaṃ**, **sā** tulyakkhaṇā tulyayogitā matā, vattumicchitena guṇena tādīsānaṃ tulyayogitāpaṭipādanato tadatthiyena tulyayogitā tathā dvidhā vattati.

302. Idāni tulyayogitālaṅkāraṃ dasseti “**guṇayuttehi**”iccādinā. **Guṇayuttehi** sundarāsundarehi yehi kehici guṇehi yuttehi vatthūhi, **samaṃ katvāna** tatvato asamānesupi samānattabuddhiyā āropanaṃ katvā, **kassaci** purisādino thutiṃ nindaṃ vā nissāya yaṃ **saṃkittanaṃ** guṇāguṇakathanaṃ bhavati, sā tulyayogitāti matāti. Guṇehi yuttāti ca, tulyena guṇena saha yogoti ca, so etesaṃ raṃsimālībhagavantādīnamatthīti ca, tesam bhāvo tulyaguṇasambandhoti ca viggaho. Ettha tulyaguṇayuttapadatthānaṃ tagguṇasambandhassa tulyayogitābhāvato tappāṭipādako uttiviseso tadatthiyena tulyayogitāti ñeyyā.

**303. Sampattasammado loko,
Sampattālokasampado;
Ubhoḥi raṃsimālī ca,
Bhagavā ca tamonudo.**

303. Udāharati “**sampatte**”ccādi. Tamaṃ nudatīti **tamonudo**. **Raṃsimālī** sūriyo ca, atha vā sammāsambuddho cāti **ubhoḥi** karaṇabhūtehi hetubhūtehi vā **loko** sattaloko, sampatto sammado pīti yena tathāvidho ca, sampatto ālokassa sampadā yena tathāvidho cāpīti. Ettha pītidānādiguṇayuttana raṃsimālīnā samaṃ katvā bhagavato thutivasena kittananti lakkhaṇaṃ yojanīyaṃ.

303. Idāni udāharati “**sampatti**”ccādinā. **Tamonudo** andhakāraṃ paharanto raṃsimālī ca bhagavā ca **ubhoḥi** karaṇabhūtehi hetubhūtehi vā, **loko** sattaloko **sampattasammado** paṭiladdhapīti ca sampattālokasampadā ca hotīti. Ettha pītidānālokakaraṇasaṅkhātiguṇayuttana sūriyena tulyaṃ katvā bhagavato thutivasena guṇakathanaṃ hoti. Sampatto sammado pīti yenetī ca, ālokassa sampadāti ca, sampattā ālokasampadā yenetī ca, tamaṃ nudatīti ca vākyam. Udāharaṇe adassitepi asādhuguṇayuttana kenaci vatthunā samaṃ katvā kassaci kātābbanindāpi evameva datṭhabbā.

**304. Atthantaram sādhatā, kiñci taṃsadisaṃ phalaṃ;
Dassīyate asantaṃ vā, santaṃ vā taṃ nidassanaṃ.**

304. Nidassanaṃ padasseti “**atthantara**”miccādinā. **Atthantaram** nidassetabbāpekkhāya aññaṃ kiñci ucitaṃ kāriyaṃ **sādhatā** kenaci vatthunā hetubhūtena, tena atthantareneva **sadisam** tulyaṃ phalaṃ kiñci **asantaṃ** aniṭṭhaṃ vā **santaṃ** iṭṭhaṃ vā **dassīyate** paṭipādīyate, taṃ evaṃlakkhaṇaṃ nidassanaṃ siyā.

304. Idāni nidassanālaṅkāraṃ nidasseti “**atthantari**”ccādinā. **Atthantaram** niddisitabbato aññaṃ ucitakāriyasaṅkhātamattaṃ [ucitakicca... (ka.)] **sādhatā** sādhayantena kenaci vatthunā **taṃsadisaṃ** tena atthantarena samānaṃ **asantaṃ** aniṭṭhaṃ vā **santaṃ** iṭṭhaṃ vā kiñci phalaṃ **dassīyate** vatthūhi paṭipādīyate, **taṃ** tādīsaṃ phalaṃ nidassanaṃ nāmāti. Attho ca so antaro añño cāti ca, tena atthantarena sadisamīti ca, nidassīyateti ca viggaho.

Asantaphalanidassana

**305. Udayā samañindassa, yanti pāpā parābhavaṃ;
Dhammarājaviruddhānaṃ, sūcayantā [dīpayantā (sī.)] durantataṃ.**

305. “Udayā”iccādi. **Samañindassa** mahāmunino **udayā** pātubhāvena **pāpā** lobhādayo **parābhavaṃ** nidhanaṃ yanti, parābhavantīti vuttaṃ hoti. Udayapubbakena pāpaparābhavanatthantarena sadisaṃ phalaṃ nidasseti. Kiṃ karontā? **Dhammarājā** dhammānapeto rājā, munindo cāti siliṭṭhaṃ, tena viruddhānaṃ, duṭṭho viruddho anto avasānaṃ yassa, tassa bhāvo, taṃ sūcayantāti dhammarājavirodhahetukaṃ asantaphalametaṃ nidassanaṃ parābhavassāniṭṭhattā.

305. Idāni udāharati “**udayā**”iccādinā. **Samañindassa** munindassa **udayā** loke pātubhāvena **pāpā** lobhādayo **dhammarājaviruddhānaṃ** rājadhammehi samannāgatarājūhi, dhammādhipatinā munindena vā viruddhānaṃ **durantataṃ** aniṭṭhāvasānataṃ **sūcayantā** pakāsento **parābhavaṃ** parihāniṃ **yanti** pāpuñantīti. Ettha pubbaddhena udayapubbako pāpaparābhavanasānkhāto atthantaro dassito, aparaddhena taṃsadisavirodhahetukaṃ durantasānkhātaṃ asantaphalaṃ dasseti. Dhammarājavirodhahetukaṃ asantaphalametaṃ parābhavassāniṭṭhattā. Samañānamindoti ca, dhammena yutto rājāti vā dhammesu rājāti vāti ca, tena viruddhāti ca, duṭṭho virūpo anto pariyosānaṃ yesamīti ca, tesāṃ bhāvoti ca vākyaṃ.

Santaphalanidassana

**306. Sironikkhittacaraṇo-
Cchariyāna’mbujāna’yamaṃ;
Paramabbhutaṃ loke,
Viññāpetā’ttano jino.**

306. “Siro”ccādi. **Acchariyānaṃ** bhagavato caraṇāravindadvandasampañiggahaṇatthaṃ pathaviṃ bhinditvā samuggatānamacchariyaguṇopetānamambujānaṃ **sirasi** matthake nikkhittā caraṇā yena so jino. Ambujoparicaraṇanikkhepalakkhaṇenatthantarena sadisaṃ phalaṃ dasseti. Attano paramacchariyabhāvaṃ viññāpeti. Santaphalamidaṃ nidassanaṃ jinabbhutatthadīpanassa iṭṭhattāti.

306. “Siro”iccādi. Ayaṃ jino **acchariyānaṃ** attano pādapaṭiggahaṇatthaṃ pathaviṃ bhinditvā uggatattā accharāpaharaṇayoggānaṃ ambujānaṃ **sironikkhittacaraṇo** matthake ṭhapitapādo **loke** sattaloke attano **paramabbhutaṃ** atiacchariyaguṇaṃ **viññāpeti** avabodhetīti. Ettha acchariyapadumānaṃ matthake caraṇanikkhepasānkhātena atthantarena paramabbhutaṃ viññāpetīti ayaṃ sadisasantaphalaṃ jinabbhutatthadīpanassa iṭṭhattā. Sirasi nikkhittāni caraṇāni yeneti ca, accharaṃ accharāsānkhātaṃ arahantīti ca, paramo uttamo abbhuto guṇo asseti ca, tassa bhāvoti ca viggaho.

**307. Vibhūtiyāmahantattaṃ, adhippāyassa vā siyā;
Paramukkaṃsataṃ yātaṃ, taṃ mahantatta’mīritaṃ.**

307. Mahantattamupadasseti “**vibhūtiyā**”iccādinā. **Vibhūtiyā** sampattiyā **adhippāyassa vā** ajjhāsayaṃ vā **paramukkaṃsataṃ** paramāṭisayaṃbhāvaṃ **yātaṃ** upagataṃ mahantattaṃ nāma **īritaṃ** kathitaṃ.

307. Idāni mahantattālaṅkāraṃ dasseti “**vibhūti**” iccādinā. **Vibhūtiyā** sampattiyā vā **adhippāyassa** ajjhāsayaṃ vā **paramukkaṃsataṃ** atyukkaṃsabhāvaṃ **yātaṃ** yaṃ mahantattaṃ siyā, **taṃ** mahantattamīti īritanti. Mahato bhāvoti ca, paramo ukkaṃso atisayo yasseti ca, tassa bhāvoti ca vākyaṃ.

Vibhūtimahantatta

**308. Kirīṭaratanacchāyā-nuviddhātapavāraṇo;
Purā paraṃ sirim vindi, bodhisatto' bhinikkhamā.**

308. Udāharati “**kirīṭe**”iccādi. Abhinikkhamā **purā** pubbe **bodhisatto** māyādeviyā putto **paramukkaṭṭhaṃ** anāññasādhāraṇaṃ **sirim** vibhūtiṃ **vindi** paṭilabhi. Kīdiso? **Kirīṭe** makuṭe ratanānaṃ **chāyāhi** sobhāhi **anuviddho** churito **ātapavāraṇo** setacchattaṃ yassa so tādisoti vibhūtiyā mahantattaṃ vuttaṃ “ātapavāraṇo ratanacchāyānuviddho”’ti.

308. Idāni udāharati “**kirīṭa**”iccādinā. **Bodhisatto** antimajātiyaṃ mahābodhisatto **abhinikkhamā** abhinikkhamanato **purā** pubbe **kirīṭaratanacchāyānuviddhātapavāraṇo** moliratanaraṃsīhi rañjitasetacchatto **paramukkaṭṭhaṃ** **sirim** vibhūtiṃ **vindi** anubhavīti. Ettha moliratanakantiyā setacchattassa oviddhabhāvakathanena vibhūtiyā mahantattaṃ hoti. Kirīṭe ratanānīti ca, tesam chāyāyoti ca, tāhi anuviddho churito ātapavāraṇo yasseti ca vākyam.

Adhippāyamahantatta

**309. Satto sambodhiyaṃ bodhi-
Satto sattahitāya so;
Hitvā sneharasābaddha-
Mapi rāhulamātaraṃ.**

309. “**Satto**”iccādi. **Snehena** piyabhāvena jātena **rasena** rāgena ābaddhamattani **rāhulamātaraṃ** bimbādevimpi, kimutaññaṃ yuvatijanaṃ, **hitvā** anapekkhitvā anāsatto hutvā **sattānaṃ hitāya** lokiyalokuttarāya vaḍḍhiyā **bodhisatto** siddhattho **sambodhiyaṃ** sabbaññutaññāneyeva **satto** āsatto, tattheva laggoti adhippāyo. Mahantattamukkaṭṭhaṃ tādisavanitāratanānāsajjanalakkhaṇamālakkhīyatīti.

309. “**Satto**”iccādi. So bodhisatto **sneharasābaddhaṃ** piyabhāvasaṅkhātārāgena ābaddhaṃ **rāhulamātaraṃ api** bimbādevimpi hitvā **sattahitāya** sattānaṃ lokiyalokuttaratthāya **sambodhiyaṃ** sabbaññutaññāneyeva **satto** laggoti. Tādisaitthiratanepi alaggatākathanena bodhisattassa ukkaṭṭhājijhāsaya mahantattaṃ vuttaṃ hoti. Sammā bujjhati etāyāti ca, bodhiyaṃ satto laggoti ca, sattānaṃ hitamiti ca, snehena piyabhāvena jāto raso rāgoti ca, tena ābaddhāti ca viggaho.

**310. Gopetvā vaṇṇanīyaṃ yaṃ,
Kiñci dassīyate paraṃ;
Asamaṃ vā samaṃ tassa,
Yadi sā vañcanā matā.**

310. Vañcanaṃ vadati “**gopetvā**”iccādinā, **vaṇṇanīyaṃ** kiñci vatthuṃ **gopetvā** niraṃkatvā **tassa** vaṇṇanīyassa **asamaṃ** visamaṃ visadisam **paramaññaṃ yaṃ kiñci** vatthu yadi dassīyate kavināti anuvaditvā sā vañcanā matāti vidhīyate.

310. Idāni vañcanālakāraṃ dasseti “**gopetvā**”iccādinā. **Vaṇṇanīyaṃ** kiñci vatthuṃ gopetvā **tassa** vaṇṇanīyassa **samaṃ** sadisaṃ vā **asamaṃ** visadisam vā **paraṃ yaṃ kiñci** vatthu yadi dassīyate kavinā, sā vañcanāiti matāti. Vañceti vaṇṇanīyaṃ etāya vuttīyāti vākyam.

Asamavañcanā

**311. Purato na sahasseu,
Na pañcesu ca tādino;
Māro paresu tasse’saṃ,
Sahassaṃ dasavaḍḍhitam.**

311. Udāharati “**purato**”iccādi. **Māro** kāmo **tādino** lobhādīsu tādisattā munino **purato**

sammukhe sahasaṃ isavo assāti **sahassesu** ca na hoti. Pañca isavo assāti **pañcesu** ca na hotīti vaṇṇanīyo mārotra gopyate. **Tassa** yo tibhuvanāṃ jayī. **Paresu** aññasattesu sarāgesu **esamisūnaṃ dasavaḍḍhitāṃ** dasahi gūṇitaṃ sahasaṃ, kathamaññathābhuvanattayaṃ jayeyyāti māraṃ gopetvā dasasahassopalakkhitavattantarassa dassitattā asamavañcanaṃ.

311. Idāni udāharati “**purato**”iccādinā. Māro **tādino** lābhālābhādīsu avikārino tathāgatassa **purato** abhimukhe **sahassesu** ca sahasasaropi na hoti, **pañcesu** pañca isu ca tādise ṭhapetvā pañca isu na hoti. **Paresu** sugatasammukhe īdisesupi aññesu saṃkilesesu **tassa** tilokajetuno māraṃ **esam** sarānaṃ **dasavaḍḍhitāṃ** dasagaṇanāya vaḍḍhitāṃ **sahassaṃ** hoti dasasahassaṃ hotīti. Vaṇṇanīyaṃ māraṃ gopetvā dasasahassasaṅkhyāhi gaṇitassa aññassa sarasaṅkhātavattthuno dassitattā ayaṃ asamavañcanā nāma. Sahassaṃ isavo asseti ca, pañca isavo asseti ca, dasahi vaḍḍhitanti ca vākyāṃ.

Samavañcanā

**312. Vivāda’manuyuñjanto,
Munindavadanindunā;
Sampunṇo candimā nā’yaṃ;
Chatta’metaṃ manobhuno.**

312. “**Vivāda**”miccādi. **Manobhunoti** kāmassa. Samavañcanāyaṃ puṇṇacandaṃ niraṃkatvā chattassa dassitattā.

312. “**Vivāda**”iccādi. **Munindavadanindunā** sabbaññuno mukhacandena vivādaṃ anuyuñjanto sampunṇo **ayaṃ** paccakkho candimā na hoti. Kiñcarahi **etaṃ** candamaṇḍalaṃ **manobhuno** anaṅgassa ubbhūtiyaṃ **chattaṃ** samussitasetacchattanti. Vaṇṇanīyaṃ candamaṇḍalaṃ ṭhapetvā tato aññassa candasadisassa chattassa dassitattā ayaṃ vutti samavañcanā nāma. Munīnaṃ indoti ca, tassa vadanamiti ca, indusadiso indu, munindavadanameva indūti ca, samantato puṇṇoti ca, manasi bhūtoti ca viggaho.

**313. Parānuvattanādīhi, nibbindeni’ha yā katā;
Thutira’ppakate sā’yaṃ, siyā appakatatthuti.**

313. Appakatatthutiṃ pakāseti “**pari**”ccādinā. **Paresaṃ** yesaṃ kesañci **anuvattanaṃ** sevā, tamādi yesaṃ tehi **nibbindena** virattena **appakate** asannihite buddhivisayeyeva **iha** kismiñci vatthumhi katā yā **thuti** saṃrādhanāṃ, sāyaṃ appakatatthuti siyā.

313. Idāni appakatatthutiṃ dasseti “**parānu**”ccādinā. **Parānuvattanādīhi** aññassa yassa kassaci anuvattanādīhi **nibbindena** ubbegaṃ pattena **appakate** anadhigate buddhivisaye eva **iha** imasmiṃ kismiñci vatthumhi katā yā **thuti** saṃrādhanasaṅkhātā pasamsā atthi, sā ayaṃ appakatatthuti nāma siyāti. Paresamanuvattanamiti ca, taṃ ādi yesaṃ parapīḷādīnamiti ca, na pakatoti ca, rakāro sandhijo, appakate katā thutīti ca vākyāṃ.

**314. Sukhaṃ jīvanti hariṇā, vanesva’parasevino;
Anāyāsoṇalābhehi, jaladabbaṅkurādibhi.**

314. Udāharati “**sukha**”miccādi. Jalehi **dabbaṅkurehi** dabbatiṇuggamehi. **Ādisaddena** tarupallavādīhi. Kīdisi? **Anāyāse** sevāpariklesādinā vinā **upalābhehi** pāpuṇitabbehi. Paramaññaṃ kiñci na sevanti sīleneti **aparasevino**. Paracittārādhanabyasanaparammukhā hariṇā vanesu **sukhaṃ** nirākulaṃ jīvanti. Ettha rājānuvattanaklesanibbindena sannihitā migavutti pasamsitāti.

314. Idāni udāharati “**sukha**”miccādinā. **Hariṇā** migā **aparasevino** vuttiṃ nissāya paraṃ asevamānā **anāyāsoṇalābhehi** parapariṅgahābhāvato parasevāparissamaṃ vinā labbhanīyehi **jaladabbaṅkurādibhi** udakadabbaṅkurarukkhalatāpallavādīhi **vanesu** icchiticchitāraññesu **sukhaṃ**

jīvanti sukhajīvanam karontīti. Ettha rājasevābyasanappattena kenaci anadhigatāpi migajīvikā pasamsitā hoti. Param na sevanti sīlenāti ca, abhāvo āyāsasseti ca, tena upalabhitabbāti ca, dabbānam ankurānti ca, jalañca dabbānukurāni ceti ca, tāni ādi yesam pallavādīnamiti ca viggaho.

**315. Uttaram uttaram yattha, pubbapubbavisesanam;
Siyā ekāvalī sā'yam, dvidhā vidhinisedhato.**

315. Ekāvalim kathayati “**uttara**” micchādīnā. **Yattha** vuttiyam **uttaram uttaram** upariṭṭhānamupariṭṭhānam pubbassa pubbassa visesanam vidhinisedhanavasena ekāvalī nāma siyā. **Ayam** ekāvali **vidhinisedhato** vidhivasena nisedhanavasena ca dvidhā.

315. Idāni ekāvalim dasseti “**uttara**” miccādīnā. **Yattha** uttiyam **uttaram uttaram** uparūparibhavam padam **pubbapubbavisesanam** pubbapubbapadassa vidhinisedhanavasena visesanam hoti, sā ekāvalī nāma siyā. **Ayam** ekāvali **vidhinisedhato** vidhinisedhavasena dvidhā hotīti. Uttaram pubbanti ṭhānūpacārena ṭhānībhūtam padameva vuccati. Pubbassa pubbassa visesanamiti ca, ekato āvaliyanti samvaliyanti padāni etāyāti ca, vidhividhānañca nisedho paṭisedho cāti ca vākyam. Ettha “**uttaram uttara**”nti ca “**pubbassa pubbassa**”iti ca kamena visesanavisesyaguṇena byāpanicchāyam nibbacanam, visesyaguṇam gammadānameva.

Vidhiekāvali

**316. Pādā nakhālrucirā,
Nakhālī raṃsibhāsura;
Raṃsī tamopahāneka [...pahāreka (sī.)] -
Rasā sobhanti satthuno.**

316. Udāharati “**pādā**”iccādi. Sugammaṃ. Ettha pādādīnam visesyānam nakhālrucirattādividhānena visesanena visetitabbattā ayam vidhiekāvali.

316. Idāni udāharati “**pādā**”iccādīnā. Satthuno pādā **nakhālrucirā** nakhapantīhi manuññā **nakhālī** nakhapantiyo **raṃsibhāsura** raṃsīhi dibbamānā **raṃsī** kantiyo **tamopahānekarasā** andhakāraavidhamane asahāyakiccā hutvā sobhantīti. Ettha pādādīnam pubbapadānam nakhālrucirattādividhāyakehi uttarauttaravisesanehi visetitattā ayam vidhiekāvali nāma. Nakhānam āli pālīti ca, nakhālīhi rucirāti ca, raṃsīhi bhāsuraṭi ca, tamaso apahāro apaharaṇamiti ca, so eko raso kiccaṃ etāsam raṃsīnamiti ca viggaho.

Nisedhaekāvali

**317. Asantuṭṭho yati neva,
Santoso nā'layāhato;
Nā'layo yo sajantūnam,
Nā'nantabyasanāvaho.**

317. “**Asantuṭṭho**”iccādi. **Asantuṭṭho** catupaccayasantosavasena yo koci yati nāma neva siyā. **Ālayena** tañhāya āhato ca yo, so santoso nāma na hoti. Yo **jantūnam** sattānam anantabyasanāvaho na hoti, so ālayo nāma na bhavatīti. Asantuṭṭhādīnam yatittādīnisedhanavasena visesanānam pavattiyā nisedhaekāvali ayam.

317. “**Asantuṭṭho**”iccādi. **Asantuṭṭho** cīvarādīsū catūsū paccayesu dassitadvādasavidhasantosānam aññatarena asantuṭṭho **yati na eva** bhikkhu nāma na hoti. **Ālayāhato** tañhāya pahato santoso na hoti. Yo jantūnam **anantabyasanāvaho na** yo sattānam apariyantapīlāpāpako na hoti, so ālayo na hotīti. Asantuṭṭhādīnam yatibhāvādīpaṭisedhavasena visesanānam pavattattā ayam nisedhaekāvali nāma. Asantuṭṭhapadam yatisahitasakalasattasamudāyassa sādharmaṇabhāvena ṭhitam, yati na bhavatīti yatito aññesu

sakalasattasañkhātesu avayavesu patitthāpanato “asantuṭṭho”ti visesyo, “yati ne”ti idaṃ visesanaṃ. Sesesupi visesanavisesyattaṃ vuttaniyāmena yathārahaṃ yojetabbaṃ. Na santussatīti ca, ālayena hatoti ca, natthi anto etesamīti ca, tāni ca tāni byasanāni ceti ca, tāni āvahaṭīti ca vākyam.

**318. Yahiṃ bhūsiyabhūsattaṃ, aññamaññaṃ tu vatthunaṃ;
Vināva sadisattaṃ taṃ, aññamaññavibhūsanam.**

318. Aññamaññamāha “yahi”miccādinā. Yahiṃ sadisattaṃ vinā eva **vatthunaṃ** padatthānaṃ aññamaññaṃ bhūsiyabhūsattaṃ, taṃ aññamaññaṃ nāma vibhūsanamalankāroti.

318. Idāni aññamaññālaṅkāraṃ dasseti “yahi”miccādinā. **Yahiṃ** alaṅkāre sadisattaṃ vinā eva vatthunaṃ aññamaññaṃ tu **bhūsiyabhūsattaṃ** alaṅkāriyaalaṅkāraṭṭaṃ hoti, **taṃ** aññamaññavibhūsanam hotīti. Bhūsiyañca bhūsā cāti ca, tāsam bhāvoti ca, aññañca aññañceti ca viggaho. “Aññamañña”nti ettha chaṭṭhuntaasañkhyamabyayam, sasañkhye ceti “bhūsiyabhūsatta”nti imassa visesanaṃ katvā vattabbaṃ. Alaṅkāriyamapekkhāya alaṅkāravatthu ca, tamapekkhāya alaṅkāriyavatthu ca aññamaññaṃ nāma. Tandīpakālaṅkāropi tadatthiyena tannāmakō hoti.

**319. Byāmaṃsumaṅḍalam tena, muninā lokabandhunā;
Mahantiṃ vindatī kantiṃ, sopi teneva tādisiṃ.**

319. Udāharati “byāmaṃsu”iccādinā. Subodham.

319. Idāni udāharati “byāmaṃsu”iccādinā. **Byāmaṃsumaṅḍalam** byāmapabhāmaṅḍalam **lokabandhunā tena muninā** karaṇabhūtena **mahantiṃ** mahantiṃ pūjanīyam vā **kantiṃ** sobham **vindatī** sevati, **sopi** muni **tena eva** byāmaṃsumaṅḍalena tādisiṃ kantiṃ vindatīti. Aññamaññaṃ asadisānaṃ byāmaṃsumaṅḍalamunisāñkhātānaṃ dvinnaṃ vatthūnaṃ byāmaṃsumaṅḍalam paṭhamavākye alaṅkāriyam hoti, munipadattho alaṅkāro hoti. Aparavākye ime dve vipallāsena alaṅkāriyaalaṅkāra honti. Aṃsūnaṃ maṅḍalamīti ca, byāmaṃ eva aṃsumaṅḍalamīti ca, loko bandhu asseti ca, sā viya dissatīti ca viggaho.

**320. Kathanaṃ sahabhāvassa, kriyāya ca guṇassa ca;
Sahavuttīti viññeyyam, tadudāharaṇam yathā.**

320. Sahavuttiṃ vadati “kathana”miccādinā. Subodham.

320. Idāni sahavuttiṃ dasseti “kathana”miccādinā. Kriyāya guṇassa cāti dvinnaṃ **sahabhāvassa** sahattassa kathanam sahavuttīti viññeyyam. **Tadudāharaṇam yathā** tassa udāharaṇam evam vakkhamānanayena daṭṭhabbanti. Saha saddhiṃ bhavanamīti ca, sahabhāvassa vutti kathanamīti ca, tassa udāharaṇamīti ca viggaho. Sahabhāvo candarasminakhaṃsuādīnaṃ padatthānaṃ. Evam santepi tesam taṃsahattaṃ yassam kriyāyam guṇe vā bhavatīti sahattaṃ kriyāguṇānaṃ hotīti katvā “kathanam sahabhāvassa kriyāya ca guṇassa cā”ti vuttaṃ.

Kriyāsahavutti

**321. Jalanti candaraṃsīhi, samam satthu nakhaṃsavo;
Vijambhati ca candena, samam tammukhacandimā.**

321. “Jalanti”iccādi. Samanti saha, tassa satthuno mukhacandimā. Sesam subodham. Ettha jalanavijambhanānaṃ ubhayasādhāraṇānaṃ kriyānaṃ sahabhāvo vihitoti kriyāsahavutti ayanti.

321. Idāni yathāpaṭiññātaudāharaṇam dasseti “jalanti”iccādinā. **Satthu** satthuno **nakhaṃsavo** nakhakiraṇā candaraṃsīhi samam jalanti, tammukhacandimā ca candena samam vijambhatīti. Ettha ubhayapadatthānaṃ sādāhāraṇabhūtajalanavijambhanakriyānaṃ sahabhāvassa vuttattā esā

kriyāsahavutti nāma. Candassa raṃsiyoti ca, nakhānaṃ aṃsavoti ca, tassa satthuno mukhanti ca, tameva candimasadisattā candimāti ca vākyam. **Samamiti sahapariyāyo nipāto.**

Guṇasahavutti

322. Jinodayena malinaṃ, saha dujjanacetāsā; Pāpaṃ disā suvimalā, saha sajjanacetāsā.

322. “**Jinodayena**”ccādi. **Jinodayena** karaṇabhūtena, hetubhūtena vā dujjanacetāsā saha pāpaṃ **malinaṃ** kiliṭṭhaṃ, **sajjanacetāsā** saha **disā** dasavidhāpi **suvimalā** accantanimmalā suvimalayasomālāvalayitattā sajjanaceto pāpāpagameneti. Ettha malinattassa ca suvimalattassa ñāyasambandhino sahabhāvo vuttoti ayaṃ guṇasahavutti.

322. “**Jino**”iccādi. **Jinodayena** jītamārassa bhagavato pātubhāvena, karaṇabhūtena hetubhūtena vā **pāpaṃ** lobhādidhammaṃ **dujjanacetāsā** dujjanānaṃ cittena saha **malinaṃ** kiliṭṭhaṃ hoti. Imināyeva jinodayena **disā** dasa disāyo **sajjanacetāsā saha suvimalā** sajjanacetasantānato pāpānaṃ apagamena kittimālāya bhuvanattaye patthaṭattā atinimmalāti ubhayapadattānaṃ sādharmaṇabhūtamalinabhāvasuvimalabhāvasaṅkhātassa guṇassa sahabhāvassa vuttattā eṣā guṇasahavutti nāma. Jīnassa udayoti ca, dujjanānaṃ cetoti ca, vigataṃ malaṃ eṭāhiti ca, su atisayena vimalāti ca, santo ca te janā ceti ca, tesam cetoti ca vākyam.

323. Virodhīnaṃ padattānaṃ, yattha saṃsaggadassanaṃ; Samukkaṃsābhidhānatthaṃ, matā sā’yam virodhitā.

323. Virodhaṃ vibhāveti “**virodhīna**”miccādi. **Virodhīnaṃ** aññamaññaviruddhānaṃ kriyādīnaṃ **yattha** vuttiviseṣe **saṃsaggassa** sannidhino dassanaṃ, kimatthaṃ? **Samukkaṃsassa** atisayassa **abhidhānatthaṃ** kathanatthāya, sā ayaṃ **virodhitā** virodhīti matā.

323. Idāni virodhālaṅkāraṃ dasseti “**virodhīna**”miccādinā. **Yattha** uttiviseṣe **samukkaṃsābhidhānatthaṃ** vaṇṇanīyavatthugataadhikakathanāya **virodhīnaṃ** aññamaññaviruddhānaṃ **padattānaṃ** kriyāguṇādīnaṃ **saṃsaggadassanaṃ** sanniṭṭhānadassanaṃ sambandhadassanaṃ hoti, **sā ayaṃ** utti virodhitāti matāti. Virodho etesaṃ guṇādīnaṃ atthīti ca, saṃsaggassa sambandhassa dassanamīti ca, samukkaṃsassa adhikassa abhidhānanti ca, virodhīnaṃ bhāvo asaṅgahitoti ca vākyam. Virodhitādīpakavutti tadatthena tannāmikā hoti.

324. Guṇā sabhāvamadhurā, api lokekabandhuno; Sevitā pāpasevīnaṃ, sampadūsentī [sampadūsanti (ka.)] mānasam.

324. Udāharati “**guṇā**”iccādi. **Lokekabandhuno** lokanāthassa **sabhāvamadhurā** sādhujanasampīṇanekacāturā api **guṇā** arahantatādayo **sevitā** pāpasevīhi tesam pāpasevīnaṃ mānasam **sampadūsentī** dosaduṭṭhāpādanavasenāvīkaronti “tādiso guṇātisayo tassā”ti. Ettha guṇānaṃ sabhāvamadhurānaṃ pītivisesuppādanayoggānaṃ sampadūsanena saha virodhoti daṭṭhabbaṃ.

324. Udāharati “**guṇā**”iccādinā. **Lokekabandhuno** buddhassa **guṇā** arahattādayo **sabhāvamadhurā api** pakatimadhurā api **sevitā** pāpasevīhi sevītā samānā pāpasevīnaṃ mānasam **sampadūsentī** atisayena kopentīti. Evaṃ hīnādhimuttikehi sahitumasakkuṇeyyo tassa guṇātisayo vattati. Nanu sabhāvamadhuro guṇo pītiṃ vinā sampadūsanam na kareyya, sampadūsanampi tādisasabhāvamadhuraṃ vinā na bhavyeyāti aññoññaviruddhānamesam madhuraṃ sampadūsanakriyānaṃ saṃsaggaguṇādhikadassanatthanti lakkhaṇena yojetabbaṃ. **Apisaddo** virodhatthe vattate. Sabhāvena madhurāti ca, eko ca so bandhu cāti ca, lokassa ekabandhūti ca, pāpaṃ sevanti sīlenāti ca vākyam.

325. Yassa kassaci dānena, yassa kassaci vatthuno; Visiṭṭhassa ya’ mādānaṃ, parivuttīti sā matā.

325. Parivuttiṃ pavatteti “**yassa**”iccādinā. **Yassa kassacīti** paṭiggāhakaṃ dasseti. Visiṭṭhassa yaṃ ādānanti sambandho. Sesam subodham.

325. Idāni parivuttiṃ dasseti “**yassa kassaci**”ccādinā. **Yassa kassaci vatthuno** khuddakavatthuno **yassa kassaci** paṭiggāhakassa **dānena** hetubhūtena **visiṭṭhassa** uttamavatthuno yaṃ **ādānaṃ** gahaṇaṃ atthi, sā parivuttīti matāti. Dānaggahaṇaparivuttattā parivutti nāma.

326. **Purā paresaṃ datvāna, manuññaṃ nayanādikaṃ;**
Muninā samanuppattā, dāni sabbaññutāsiri [[muninda samanuppattā, dāni sabbaññutāsiriṃ \(ka.\)](#)].

326. Udāharati “**purā**”iccādi. Subodham. Ettha nayanādīdānena sabbaññutāsiriya ādānanti parivutti yaṃ.

326. Idāni udāharati “**purā**”iccādinā. Muninā **purā** pubbe paresaṃ manuññaṃ nayanādikaṃ datvāna idāni **sabbaññutāsiri** sabbaññutāsaṅkhātā anaññasādhāraṇā sirī samanuppattāti. Iha yassa dīnaṃ tato eva gahaṇe parivuttisaddassa niruḥattā nayanādīnaṃ dānena sabbaññutāsiriya ādānato, dānābhāve ādānābhāvato ca paṭiggāhakaṃ avijjāmanēpi sabbaññutā vijjāmanattena parikkappitāti parivutti hoti. Teneva daṇḍiyaṃ—

“Sathappaharaṇaṃ datvā, bhujena tava rājunaṃ;
Ciraṃ citābhaṭo tesam, yaso kumudapaṇḍaro”’ti [[kābyādāsa 2.356](#)].

Imasmiṃ udāharaṇe paccatthikānaṃ āyudhappahāraṃ datvā tava bāhunā tesam rājūnaṃ ciraṃ rāsikato keravanimmalo yaso ābhaṭoti. Dadāti kammayuttato eva ādānaṃ dassetvā parivuttiphuṭā katā. Nayanāni ādāni yassa uttamaṅgādinoti ca, sabbaṃ jānātīti ca, tassa bhāvoti ca vākyam.

327. **Kiñci disvāna viññātā,**
Paṭipajjati taṃsamam;
Saṃsayāpagataṃ vatthum,
Yattha so’yaṃ bhamo mato.

327. Bhamam sambhāveti “**kiñci**”tiādinā. **Viññātā** puriso **kiñci disvā** ujjalanādikaṃ disvāna **taṃsamam** tassa pure dissamānassa padatthassa sadīsamaññaṃ vatthum **saṃsayāpagataṃ** asannidhiṃ katvā **paṭipajjati** jānāti **yattha** visese, sāyaṃ bhamo mato.

327. Idāni bhamālanākāraṃ dasseti “**kiñci**”iccādinā. **Yattha** uttivisese **viññātā** avabodhakāraṃ **kiñci** disāvilocanādikaṃ disvāna **taṃsamam** vatthum tena dissamānavatthunā tulyamaññaṃ vatthum **saṃsayāpagataṃ** nissamsayaṃ katvā **paṭipajjati** jānāti, **so ayam** alaṅkāro bhamoti matoti. Tena tassa vā samanti ca, saṃsayo apagato etasmāti ca, bhamanaṃ anavaṭṭhānaṃ vatthūnanti ca viggaho. Saṃsayāpagatanti kriyāvisesanaṃ.

328. **Samaṃ disāsu’jjalāsu, jinapādanakhaṃsunā;**
Passantā abhinandanti, candātapamanā janā.

328. Udāharati “**sama**”miccādi. Jinassa pādesu nakhaṃsunā **disāsu** sabbāsu **samaṃ** ekato **ujjalāsu** sajotīsu tā ujjalā disā passantā janā, candātapoti mano yesam te tathāvidhā. **Abhinandanti** santussantīti.

328. Idāni udāharati “**sama**”miccādinā. **Jinapādanakhaṃsunā** karaṇabhūtena **disāsu** dasasu **samaṃ** ekakkhaṇe ujjalāsu tā ujjalā disā passantā janā **candātapamanā** candātapoti pavattacittā abhinandantīti. Vijjāmanānakhamarīciyaṃ buddhimakatvā candātape buddhiyā pavattāpanato bhamo nāma. **Samanti** asaṅkhyam. Candātapoti mano yesanti vākyam.

**329. Pavuccate yaṃ nāmādi,
Kavīnaṃ bhāvabodhanaṃ;
Yena kenaci vaṇṇena,
Bhāvonāmā'ya'mīrito.**

329. Bhāvaṃ bhāveti “**pavuccate**”ccādinā. Kavīnaṃ **bhāvo** adhippāyo, taṃ bodhetīti **bhāvabodhanaṃ** yaṃ nāmādi. Ādisaddena visesanavākyānaṃ gahaṇaṃ. **Yena kenaci** nisedhanarūpena ākārena pavuccate, ayaṃ bhāvo nāma īritoti.

329. Idāni bhāvālaṅkāraṃ dasseti “**pavuccate**” iccādinā. Kavīnaṃ vattūnaṃ **bhāvabodhanaṃ** adhippāyapakāsakaṃ yaṃ **nāmādi** nāmapadavisesanapadādi yena kenaci **vaṇṇena** ākārena sāgarādiatthantaraṃ paṭisedhetvā vā no vā pavuccate, ayaṃ bhāvo nāmāti īritoti. Nāmaṃ ādi yassa visesanavākyadvayasseti ca, bhāvaṃ bodhetīti ca vākyam. Kavīnaṃ adhippāyasaṅkhātābhāvapakāsako uttiviseso tadatthena bhāvo nāma, tassa nissayabhūtaṃ nāmādi padasantānaṃ iha nissitopacārena bhāvo nāmāti īritaṃ.

**330. Nanu teye'va santā no,
Sāgarā na kulācalā;
Manampi mariyādaṃ ye,
Saṃvaṭṭepi jahanti no.**

330. Udāharati “**nanu**”ccādi. **Manampīti** īsakampi. **Mariyādanti** attano ācārasīmaṃ, **saṃvaṭṭepi** palayakālepi. Sesam subodham. Ettha na ime pakatisamuddādayo samuddādayo honti, ye palayakāle attano velānullaṅghanasaṅkhātāṃ acalattasaṅkhātāṃca mariyādaṃ pariccajanti. Kiñcarahi santā evete samuddādayo, ye yadi palayakālepi samāpateyyuṃ, tadāpi attano mariyādaṃ na muñcanti. Koci vipattiṃ patto niratisayaṃ dhīrattamattanovabodhetīti aññanisedhena kathitaṃ nāmaṃ kavisabhāvaṃ yathāvuttaṃ bodhetīti bhāvoyamīti.

330. Idāni udāharati “**nanu**”ccādinā. **Sāgarā** saṃvaṭṭakāle tīramariyādaṃ atikkamentā pakatisamuddā sāgarā na bhavanti. **Kulācalā** tādisakāle acalasaṅkhātāmariyādamatikkamentā satta kulapabbatā kulācalā nāma na bhavanti. Kiñcarahi sāgarādayo. **Ye** sādhave **saṃvaṭṭepi** sabbavatthuvināsakakappavināsakālepi **mariyādaṃ** attano ācāramariyādaṃ **manampi** īsakampi no jahanti. Santā eva te sāgarādayo nāma honti nanūti. Koci byasanaṃ patto attano anaññasādhāraṇaṃ dhīrattaṃ pakāsetīti iha sāgarādiatthantarapaṭisedharūpena dassitasāgarādinā vattuno akampanādhippāyaṃ avabodhetīti ayaṃ bhāvālaṅkāro nāma. **Mananti** appakālavācakamasāṅkhyam. **Apīti** sambhāvane.

**331. Aṅgaṅgībhāvā sadisa-balabhāvā ca bandhane;
Saṃsaggo'laṅkatīnaṃ yo, taṃ missanti pavuccati.**

331. Missaṃ dasseti “**aṅga**”iccādinā. **Aṅgamupakāra**kaṃ, **aṅgī** upakāriyaṃ, tesam bhāvo **aṅgaṅgībhāvo** sādhiyasādhanattaṃ, tato ca. Sadisaṃ samaṃ balaṃ yesaṃ te, tesam bhāvo aṅgaṅgībhāvamantarena appadhānabhāvenāvaṭṭhānaṃ tato ca hetuto. **Bandhane** visaye, yo alaṅkatīnaṃ **samsaggo** ekattha sannidhānaṃ, taṃ missanti pavuccati.

331. Idāni missālaṅkāraṃ dasseti “**aṅgaṅgī**”ccādinā. **Aṅgaṅgībhāvā** upakāraupakāriyasaṅkhātapaṭipādakapaṭipādanīyasabhāvena hetubhūtena **sadisabalabhāvā** ca sādhiyasādhanabhāvaṃ vinā samānabalavantabhāvena ca **bandhane** pajjādibandhanavisaye **alaṅkatīnaṃ** alaṅkāraṇaṃ yo **samsaggo** sannidhānaṃ, taṃ missanti pavuccatīti. Aṅgaṃ sādhanam assa sādhiyassa atthīti ca, aṅgaṃca aṅgī ceti ca, tesam bhāvo sādhiyasādhanasaṅkhāto sambandhoti ca, sadisaṃ balaṃ yesam alaṅkāraṇamīti ca, tesam bhāvo aññamaññanirapekkhatāti ca, missanaṃ missībhavanamīti ca vākyam.

Aṅgaṅgībhāvamissa

**332. Pasatthā munino pāda-nakharaṃsimahānadī;
Aho gāḷhaṃ nimuggepi, sukhayatyeva te jane.**

332. Udāharati “**pasatthā muni**”ccādi. Munino pādesu nakhā tesam raṃsi eva mahānadīsadisattā **mahānadī**, sā **pasatthā** acchariyappattisabbhāvato **gāḷhaṃ** accantam nimuggepi te jane sukhayatyeva, **aho** acchariyam yato sesanadīvidhuram. “Ayaṃ attani gāḷhaṃ nimuggepi sukhayati”ti ettha “nimuggepi”ti samādhino sādhiyattenāṅgitāyāvaṭṭhitassa “pādanakharaṃsimahānadī”ti rūpakam sādhanattenaṅgatāyāvaṭṭhitanti missamidamalankaraṇam.

332. Idāni udāharati “**pasatthā**” iccādinā. **Munino pasatthā** acchariyattā pasamsanīyā **pādanakharaṃsimahānadī** caraṇanakhakiraṇasaṅkhātamahāgaṅgā **gāḷhaṃ** atisayena nimuggepi te **jane** sādhusappurise **sukhayati eva** sukhite kato eva. **Aho** acchariyam sesanadīnamesā pavatti viruddhāti. Ettha sādhanīyabhāvena aṅgino “nimugge”ti samādhialaṅkāraṇassa “pādanakharaṃsimahānadī”ti rūpakālaṅkāro sādhanabhāvena aṅganti katvā aṅgāṅgībhāvena imesam alaṅkāraṇam missitā. Pādesu nakhāti ca, tesam raṃsīti ca, mahatī ca sā nadī ceti ca, mahānadī viya mahānadī pādanakharaṃsiyo eva mahānadīti ca vākyam. **Gāḷhanti** kriyāvisesanam. Gāḷham nimujjanam ye akamsu, tepīti yojanā. Sukhasamaṅgino janā sukhite sukhe karotīti vākyam.

Sadisabalabhāvamissa

**333. Veso sabhāvamadhuro, rūpaṃ nettarasāyanam;
Madhūvamunino vācā, na sampīṇeti kaṃ janam.**

333. “**Veso**”iccādi subodham. Idam pana samādhirūpakopamāmissasadisabalanti.

333. “**Veso**”iccādi. Munino **sabhāvamadhuro** pakatimadhuro **veso** jināveṇiko buddhaveso ca **nettarasāyanam rūpaṃ** lakkhaṇānubyañjanasampannaṃ rūpaṅca **madhūva** madhurattena madhusamānā **vācā** bhārati ca kaṃ janam na sampīṇetīti. “Sabhāvamadhuro”ti samādhialaṅkāro ca, “nettarasāyana”nti rūpakālaṅkāro ca, “madhūva”ti upamālaṅkāro cāti ime tayo piṇane aññamaññāpekkharahitattā tulyabalāti imesam missattam hoti. Sabhāvena madhuroti ca, rasīyati assādīyatīti ca, raso rasabhūto āyanam gati pavatti assāti rasāyanam, rasavatthu. Rasāyanamiva rūpaṃ rasāyanam, nettānam rasāyananti ca vākyam.

**334. Āsī nāma siyā’tthassa,
Iṭṭhassā’sīsanam yathā;
Tilokekagatī nātho,
Pātu loka’mapāyato.**

334. Āsiṃ dasseti “**āsī**”ccādinā. **Iṭṭhassa** abhimatassa vatthuno **āsīsanam** patthanamityanuvaditvā āsī nāma siyāti vidhīyate. “**Yathe**”tyudāharati. **Tilokassa** lokattayavattino janassa **ekagati** asahāyagati paṭisaraṇabhūto nātho **lokaṃ** sattalokaṃ apāyato **pātu** pāletūti. Etthātilasitam pālanamāsīsitanti.

334. Idāni āsīlaṅkāraṃ dasseti “**āsī**” iccādinā. **Iṭṭhassa atthassa** icchitavattthuno **āsīsanā** patthanā āsī nāma siyā. **Yathā** tatthodāharaṇamevaṃ. **Tilokekagati** tibhavassa asahāyasaṇabhūto **nātho** lokasāmi **lokaṃ** sattalokaṃ apāyato **pātu** rakkhatūti. Āsī nāma patthanā, taddīpikāpi utti tannāmikāva hoti. “Tilokekagati”ti imasmim udāharaṇe pālanam āsīsitam. Tiṇṇam lokānam samāhāroti ca, ekoyeva gati paṭisaraṇanti ca, tilokassa ekagatīti ca vākyam.

**335. Rasappatījanakam, jāyate yaṃ vibhūsanam;
Rasavantanti tam ñeyyam, rasavantavidhānato.**

335. Rasavantamudāharati “**rasa**”iccādinā. **Yaṃ vibhūsanam** alaṅkāraṇam rasābhāsādino **patījanakam** avagamasampādakam jāyate, **tam** vibhūsanam **rasavantavidhānato** sampādanato “rasavanta”nti viññeyyam yathā atthappatīti janako saddo “atthavā”ti.

335. Uddese rasīti uddiṭṭharasālaṅkāraṃ dasseti “**rasa**”iccādinā. **Yaṃ vibhūsaṇaṃ** vuttālaṅkāraṇamantare yo koci alaṅkāro **rasappatīṭijanakaṃ** siṅgārādinavavidharasesu ekassa rasassa vā tasseva rasābhāsassa vā avabodhanaṃ sampādentō jāyate, **taṃ** vibhūsaṇaṃ **rasavantavidhānato** attano rasasahitabhāvassa pakāsanato **rasavantanti** rasīti ñeyyanti. Yathā atthappatīṭijanako saddo “**atthavā**”ti vuccati, evaṃ rasappatīṭijanako alaṅkāro rasavanto “**rasī**”ti ca vuccati. Rasassa patīti ca, taṃ janetīti ca, raso assa atthīti ca, rasavato bhāvoti ca, tassa vidhānaṃ sampādananti ca vākyam.

**336. Rāgānatabbhutasarojamukhaṃ dharāya,
Pādā tilokaguruno’dhikabaddharāgā;
Ādāya niccasarasena karena gālhaṃ,
Sañcumbayanti satatāhitasambhamena.**

336. Udāharati “**rāga**”iccādi. **Dharāya** pathavīaṅganāya rāgena ānataṃ, mukhaṃ. **Rāgaṃ** rattavaṇṇaṃ **ānataṃ** ninnamitaṃ, sarojaṃ. Paṭhame abbhutasarojasadisatāya mukhaṃ, tena samānādhikaraṇanti rāgānataṇca taṃ abbhutasarojaṃ pathaviṃ bhinditvā sirīpādasampatiggahaṇatthaṃ utṭhamacchariyapadumaṅca, tameva tassā mukhasadisattā mukhanti **rāgānatabbhutasarojamukhaṃ**. **Tilokaguruno** sammāsambuddhassa pādā. Kīdisā? Adhikabandho **rāgo** anurāgo, rattavaṇṇo vā yesaṃ te, tathāvidhā. **Niccama**navarataṃ **sarasena** rasavatā **karena** hatthena, raṃsinā vā gālhaṃ **ādāya** gahetvā **satataṃ** niccaṃ āhito **sambhamo** ādaro, tadabhimukhatā vā, tena sañcumbayanti, nikkhipanti vā. Ettha silesarūpakehi sambhogasiṅgārarasābhāso janyate. Siṅgāro duvidho vippalambho, sambhogo ceti. Tesu vippalambhova samaggavaṇṇanādhārattā manoharo, nediso sambhogo. Sambhogābhāse tu vattabbameva natthi. Tathāpi’hā’dhigataṃ sambhogābhāsodāharaṇaṃ bālappabodhanatthaṃ kiñci vicāressāma. Tatra pādānaṃ kāmukattaṃ dharāya kāmīnītaṇca vākyasāmatthiyā viññāyate. Saddena vuccamānaṃ puna vuttaṃ siyā. Atra pādānaṃ taṃ viññeyyaṃ, ratyukkamsābhāso yadi kavīnā paṭipādetabbo na bhaveyya, tadā gāthāyamananupapannaṃ siyāti evaṃvidhavacanatova pādā ratyābhāsavantoti gamyate. Ratiyā ālambaṇavibhāvābhāso dharākāmīni, rammadesādivisesābhāve acchariyapadumuggamanābhāvato abbhutasarojasaddasavanena gammamānā rammadesādayo uddīpanavibhāvābhāsā, byabhicārībhāvābhāsabodhakāni kavivacanaṇi anubhāvābhāso. Tathā hi “**niccasarasena karena gālhaṃ ādāya**”ti karassa sarasatāgālhaṅgahaṇakathanena harisādayo gamyante. “**Satatāhitasambhamenā**”ti iminā ussukkattādayo pahīyantīti evaṃ bandhavuttīti vibhāvādīhi bandhatthābhāsānaṃ manasi yo uppajjati ānandābhāso, so rasābhāso sambhogarasābhāso vuttoti.

336. Idāni udāharaṇaṃ dassento uttaripi dassetabbasiṅgārahassakarūṇādirasuddesassa anurūpato siṅgārarasayuttameva dasseti “**rāgā**”iccādinā. **Dharāya** mahīaṅganāya **rāgānatabbhutasarojamukhaṃ** rāgena anurāgena abhimukhaṃ katvā namitaṃ acchariyaguṇopetapadumasadisānaṃ no ce, rattavaṇṇaṃ ānataṃ abbhutasarojasaṅkhatamukhaṃ **tilokaguruno** bhuvanattayānusāsakassa sammāsambuddhassa pādā **adhikabaddharāgā** adhikabaddhānurāgavantaṃ no ce, pubbakamma kataadhikarattavaṇṇā **niccasarasena karena** satatānurāgayuttana hatthena no ce, avikalattā satatasampattisahitena kiraṇena **gālhaṃ ādāya** gālhaṃ gahetvā no ce, phusitvā **satatāhitasambhamena** niccaṃ katādarena no ce, nirantarāhitaabhimukhabhāvena **sañcumbayanti** cumbanti no ce, ṭhitikriyāsādhanattena phusantīti.

Rāgena anurāgena ānataṃ abhimukhīkatamiti ca, abbhutaṇca taṃ sarojaṅceti ca, tena sadisatāya abbhutasarojaṇca taṃ mukhaṅceti ca, rāgānataṇca taṃ abbhutasarojamukhaṅceti ca, rāgaṃ rattavaṇṇaṃ ānataṃ ninnamiti ca, taṇca taṃ abbhutasarojaṅceti ca, tameva tādisamukhasadisattā mukhamiti ca, tilokassa gurūti ca, adhikaṃ katvā baddho, attano pubbakamma vā kato, rāgo anurāgo rattavaṇṇo vā yesamiti ca, rasena anurāgena sampattiyā vā saha vattamānoti ca, āhito vihito ca so sambhamo ādaro tadabhimukhabhāvo vā ceti ca viggaho.

Ettha “**rāgānata**”tiādikena silesālaṅkārena ca “**abbhutasarojamukha**”nti rūpakālaṅkārena ca sambhogasiṅgārarasābhāso uppādīyati. Tādisaṃ itthipurisānaṃ sambhogābhāvena, tadākārena ca kappitattā rasābhāso nāmāti daṭṭhabbo. Siṅgārassa āyogavippayogasambhogavasena tividhattepi

āyogavippayogadvayaṃ vippalambhamevāti vippalambho, sambhogo ceti duvidho hoti. Tesu vippalambhova anūnavañṇanāya bhūmittā manoharo. Sambhogo pana tādiso na hoti. Sambhogābhāsopi hīno hoti. Evaṃ sante payogaṃ katvā kurumānāya vañṇanāya ucitabhāvena ihādhiḡatasambhogasiṅgārarasābhāsena rasibhūtālaṅkārasa udāharaṇe rasābhāso evaṃ vedītabbo. Pādānaṃ kāṃukabhāvābhāse ca dharāya kāṃinībhāvābhāse ca vācakapadena avuttepi “dharāya pādā tilokaguruno”ti idaṃ ṭhapetvā paṇidhammapakāsakehi avasesapadehi ñāyate.

Dvinnāṃ aññamaññāṃ ratiābhāso “adhikabaddharāgā rāgānata”nti imehi vutto. Ayaṃ ratiābhāso idha ṭhāyībhāvo purisaratiyā itthiyā ca, itthiratiyā purisassa ca ālambaṇattā pādakāṃukadharākāṃiniyo dve aññamaññāṃ ālambaṇavibhāvābhāsā honti. Rammadesādivisesaṃ vinā acchariyapadumodayassa abhāvato abbhutasarojasaddassa uccāraṇena gammamānā rammadesādayo ratiṃ uddīpayantīti uddīpanavibhāvābhāsā nāma. “Niccasarasena karena gālhamādāyā”ti iminā karassa sarasabhāvassa ca gālham gahaṇassa ca vuttattā harisādayo ñāyante. “Satatāhitasambhamenā”ti iminā ussāhādayo ñāyanti. Tattha harissaussāhādayo byabhicārībhāvābhāsā nāma honti. Te byabhicārībhāvābhāse pakāsenti yathāvuttakavivacanāni anubhāvābhāsā nāmāti evaṃ bandhe dissamāṇṭhāyībhāvabyabhicārībhāvavibhāvānubhāvehi atthāvabodhaṃ karontānaṃ paṇḍitānaṃ uppajjamaṇo yo santosābhāsasaṅkhāto rasābhāso atthi, so idha sambhogarasābhāsoti kathitoti. ṭhāyībhāvādayo upari āvibhavissanti.

**337. Iccā’nugamma purimācariyānubhāvaṃ,
Saṅkhepato nigadito’ya’malaṅkatīnaṃ;
Bhedo’parūpari kavīhi vikappiyānaṃ,
Ko nāma passitu’malaṃ khalu tāsā’mantaṃ.**

Iti saṅgharakkhitamahāsāṃipādaviracite

Subodhālaṅkāre

Atthālaṅkāravabodho nāma

Catuttho paricchedo.

337. Evamuddesānukkamena yathāpaṭiññātaṃ niṭṭhapetvā idāni nigamanapubbakaṃ bahuttamesaṃ niddisitumāha “**icci**”ccādi. **Iti** iminā vuttappakārena purimānaṃ daṇḍīdīnaṃ **ācariyānaṃ ānubhāvaṃ** bandhalakkhaṇāni **anugamma** anugantvā **alaṅkatīna** malaṅkāraṇaṃ ayaṃ bhedo saṅkhepato **nigadito** kathito. Saṅkhepatoti vutto, kasmāti āha “**uparūpari**”tiādi. **Uparūpari** dīghakālamārabha yāvedāni matthakamatthake kavīhi **vikappiyānaṃ** pabhediyaṃānānaṃ **tāsāmalaṅkatīnaṃ antaṃ** pariyaṇtaṃ passitum **khalu ekantena ko nāma** jano **alaṃ** samattho.

Iti mahāsāmināṃikāyaṃ subodhālaṅkāraṭīkāyaṃ

Catuttho paricchedo.

337. Evaṃ uddesakkamena yathāpaṭiññāte atthālaṅkāre niṭṭhapetvā idāni nigamanamukhena esaṃ atthālaṅkāraṇaṃ bahubhāvaṃ dasseti “**iccānugamma**”iccādinā. **Iti** yathāvuttanayena **purimācariyānubhāvaṃ** pubbakālikānaṃ daṇḍībhaddapāṇādīnaṃ alaṅkārasatthasaṅkhātānubhāvaṃ anugamma alaṅkatīnaṃ ayaṃ bhedo **saṅkhepato nigadito** mayā vutto saṅgahito. Kasmāti ce? **Uparūpari** dīghakālato paṭṭhāya yāvajjatanā **kavīhi** racanākattārehi **vikappiyānaṃ** anekappakārato kappiyamānattā puthakkariyamānānaṃ **tāsāmalaṅkatīnaṃ antaṃ** pariyaṇtaṃ passitum **khalu** ekantena **ko nāma** puggalo **alaṃ** samatthoti. Saṅghamanādiyitvā kenāpi pariyaṇtaṃ adhigantaṃ na sakkāti adhippāyo. Pure bhavāti ca, purimā ca te ācariyā ceti ca, tesamānubhāvoti ca, visesato asaṅkarato kappiyanti ca vākyam.

Iti subodhālaṅkāranissaye

Catuttho paricchedo.

5. Bhāvāvabodhpariccheda

338. Paṭibhānavatā loka-vohāra’manusārinā; Tato’cityasamullāsa-vedinā kavinā param.

338. Tadeva yathāpaṭiññātamalaṅkāravibhāgaṃ bodhetvā sampati rasavantālaṅkārappasāṅgenādhigataṃ ramaṃ sakala saṃsāradukkhanissa raṇekanimittavimuttirasekarasavisuddhasaddhammāgamaviggāhasappiṇaṇaṇatamatīnaṃ paramasaddhālūnāmanadhigatattepi lakkhaṇamattena lokavohāraṃkosallamattapariggahāya kiñcimattamupadisituṃ na sākallena “**paṭibhānavatā**”tiādimāha. **Paṭibhānaṃ** taṃtaṃṭhānānurūpappavattā paññā. Sā hi sarasaracanāyaccantopakārikā, tatova kabbam “paṭibhāna”nti vuccati. Tenāha “**paṭibhānavatā**”ti. Kavinā lokavohārānugantabbo. Yo hi sakalam lokavohāraṃ nānusrati, so kaviyeva na hoti. Tenāha “**lokavohāraṃmanusārinā**”ti. Yato ocityaṃ nāma kavīnaṃ paramaṃ rahassaṃ lokavohārepi ucitaññūyeva pasamsiyate, samucitalokavohārānusāreṇa ca vakkhamānānukkamena viracitā racanā sacetanānaṃ rasassādāya sampajjate, tasmā ocitye samullasattaṃ dittaṃ phuṭameva bandhanaṃ kātuṃ vaṭṭati. Tatovaccantamocityasamullāsavedinā kavīna bhavitabbaṃ. Tenāha “**param ocityasamullāsavedinā**”ti. Sabbañcetam “kavinā”ti ettha visesaṃ, “**kavinā**”ti cetam “nibandhā”ti ettha avutto kattā.

338. Evaṃ yathāpaṭiññātanamalaṅkāraṇaṃ dassanāvasare rasavantālaṅkārappasāṅgenādhigatanavavidhasiṅgārādirase sakalasaṃsāradukkhanissaraṇasaṃsārahāyakaṇaṇabhūtavimuttirasena ekarasabhūte atipaṇṭe saddhammāmataraseyeva luddhānaṃ saddhābhāvasuddhasaṃyamānaṃ vimukhepi lakkhaṇamattaparīññāṇena lokavohāreṣu asammohatthaṃ saṅkhepena dassatukāmo idāni “**paṭibhānavatā**”iccādimāha. **Paṭibhānavatā** sarasaracanāya accantopakāraṭṭhānocitapaññāvīsesavatā **lokavohāraṃmanusārinā** sakalaloke vohārānurūpamanugatenā **tato** yasmā ocityaṃ nāma hadayato abahi kātabbaṃ, rahassamiva bandhato viyojanīyaṃ na hoti. Tasmā **paramatisayena ocityasamullāsavedinā** ucitabhāvena vattumicchitatthassa uddīpanasseva anurūpappakāreṇa iṭṭhatthassa samullāsaṃ dittaṃ jānanta **kavinā** bandhakāreṇa nibandhāti sambandho. Paṭibhā paṭibhānanti paññāyetaṃ nāmaṃ, tato jātakabbassapi paṭibhāti vuccamānattā ayaṃ paññāvīseso racanāya accantopakāroti ñātabbo. Paṭibhānamassatthīti ca, lokassa vohāroti ca, taṃ anugacchati sīlenāti ca, ocityena samullāsoti ca, taṃ vijānāti sīlenāti ca viggaho.

339. Ṭhāyīsambandhino bhāva-vibhāvā sānubhāvakā; Sampajjanti nibandhā te, rasassādāya sādhuṇaṃ.

339. “**Ṭhāyi**”ccādi. Ṭhāyino vakkhamānaratyādayo tehi saha sambandho vibhāvādīhi yoge ratyādīnamassādiyattamānīyamānattā etesamatthīti **ṭhāyīsambandhino**. Saha anubhāvehi vakkhamānalakkhaṇehīti **sānubhāvakā**, bhāvo vibhāvo ca, vakkhamāno bhāvena bhāvābhāsopi imināva saṅgahito, rasassādāya sampajjantīti sambandho.

339. “**Ṭhāyi**”ccādi. **Ṭhāyīsambandhino** ṭhāyīpadena, tena vāccaratihāsādiatthena vā sambandhupagatā **sānubhāvakā** vakkhamānānubhāvehi saha pavattā **bhāvavibhāvā** vakkhamānabhāvavibhāvā **nibandhā** vuttaguṇopetakavinā bandhitā ekattha āharitvā dassitā **sādhuṇaṃ** issādidosarahitānaṃ sajjanānaṃ **rasassādāya** siṅgārādivakkhamānārasassa assādanatthaṃ **sampajjanti** pavattantīti. Imāya gāthāya ṭhāyībhāvo byabhicārībhāvo kevalabhāvo vibhāvo anubhāvo raso ceti ime uddīṭṭhā bhavanti, kathanti ce? Bhāvavibhāvānaṃ “ṭhāyīsambandhino”ti visesaṃ bhavati, tena bhāvassa ṭhāyī ca so bhāvo ceti ca ṭhāyīpadena sambandhattā ṭhāyībhāvo ca, puna byabhicārībhāve sati “ṭhāyībhāvo”ti imassa sādhakattā imasseva ṭhāyībhāvapadassa payogasāmatthiyena gammamāno byabhicārībhāvo ca, puna ṭhāyīpadena

samāsamakavā viṣuṃ dassitabhāvasaddasutiyā ṭhāyībhāvabyabhicārībhāvehi añño bhāvo ca, tathā eva ṭhāyīpadena vāccaratiḥāsādiatthassa uppattiuddīpanadvayaṃ vibhūtaṃ katvā sajjetvā ṭhitattā tehi ratihāsādīhi atthehi sambandhino ālambaṇauddīpanasaṅkhatavividhāvibhāvā ca, evameva sānubhāvakapadena samāyogena dassitānubhāvo ca, “rasassādāyā”ti iminā niddiṭṭharaso cāti evamime ṭhāyībhāvādayo uddiṭṭhā honti. Ṭhāyīnā saha sambandhoti ca, so etesamatthīti ca, bhāvo ca vibhāvo ceti ca, saha anubhāvehi vattantīti ca, rasassa assādoti ca vākyam.

Bhāvaadhippāya

340. Cittavuttivisesā tu, bhāvayanti rase yato; Ratyādayo tato bhāva-saddena parikittitā.

340. Idāni yathāuddiṭṭhesu ṭhāyādīhi bhāvavibhāvānubhāvarasesu paṭhamam bhāvaṃ vibhāvetuṃ bhāvasaddamanvatthayati “**citta**”iccādinā. Cittassa vuttiyo ramaṇahasānādiākārena pavattiyo, tāva visesā viṣiṭṭhasabhāvattathāti **cittavuttivisesā**. **Ratyādayo** ṭhāyībyabhicārīsāttikā. **Tusaddo** vivese. Yato **rase** siṅgārādayo **bhāvayanti** nipphādentī. Tato bhāvasaddena **parikittitā** bharatādīhi kathitā. Ettha hi ṇyanto bhūdhātu karaṇe vattate. Yato cāyaṃ na kevalam karaṇeyeva vattate, atha kho byāpane, paṭipādane ca, tasmāssa paṭibhānaṃ cittaṃ bhāvayanti byāpentī. Atha vā kavino lokaṭṭhitiñāṇalakkhaṇam adhippāyam bhāvayanti paṭipādentīti **bhāvāti** evamettha attho daṭṭhabbo.

340. Idāni uddiṭṭhesu ṭhāyībhāvādīsu ṭhāyādīnaṃ [[ṭhāyībhāvādīnaṃ \(ka.\)](#)] tiṇṇam sādharmaṇo bhāvo nāma esoti dassento anvatthavasena dasseti “**citta**”iccādi. **Cittavuttivisesā tu** cittassa uttari vakkhamānārammaṇahasānādihi, nibbedādīhi, thambhādīhi ca ākārehi pavattisaṅkhātā aññamaññam asaṅkarākārasaṅkhātā vivesā pana ṭhāyībyabhicārīsāttikā **yato** yasmā **rase** siṅgārādirase **bhāvayanti** nipphādentī karontī. No ce, **rase** siṅgārādirasavisaye paṇḍitānaṃ cittaṃ **bhāvayanti** byāpanam karontī. No ce, tasmimyeva rasavisaye kavino lokasabhāvaṃ visayaṃ katvā pavattañāṇalakkhaṇam adhippāyam **bhāvayanti** paṭipādanam karontī. Tato **bhāvasaddena** hetukattari nipphanena **ratyādayo** ratihāsādayo **parikittitā** bharatādīhi vuttā hontīti. “Ratyādayo”ti ettha **adisaddena** hāsādayo ṭhāyībhāvā ca, nibbedādayo byabhicārībhāvā ca, thambhapalayādayo sāttikabhāvā ca saṅgahitāti daṭṭhabbā. Cittassa vuttiyoti ca, tā eva vivesāti ca, bhāvo iti saddoti ca vākyam.

Ṭhāyībhāvaadhippāya

341. Virodhinā’ññabhāvena, Yo bhāvo na tirohito; Sīlena tiṭṭhati’cce’so, Ṭhāyībhāvoti saddito.

341. Ṭhāyādike tividhe bhāve kamenāha “**virodhinā**”iccādinā. Virodhinā **aññena** jigucchādinā bhāvena **yo bhāvo** ratyādiko **na tirohito** nacchādito, **eso** bhāvo anucchiṅjamānattā eva tiṭṭhati sīlenāti, ṭhāyī eva bhāvoti **ṭhāyībhāvoti saddito** kathito. Yo bhāvādīhi ālokitassādam nīto samānīto, so sāmājikehi assādiyamānattā rasoti vuccati. Vakkhati hi “savibhāva”iccādi.

341. Idāni ṭhāyādike tividhabhāve kamena niddisati “**virodhi**”iccādinā. **Virodhinā aññabhāvena** ratihāsādīnaṃ viruddhena jigucchādinā aññabhāvena **yo bhāvo** ratihāsādiko **tirohito na** byavahito na hoti, **eso** viruddhabhāvena abyavahito bhāvo tiṭṭhati sīlenāti iminā atthena ṭhāyī nāma hotīti katvā **ṭhāyībhāvoti saddito** kathitoti. Yo vibhāvānubhāvādīhi assādanīyattam pāpito sabbhehi assādanīyattā rasoti vuccati, so ṭhāyī nāmāti vuccati. Añño ca so bhāvo ceti ca, tiro kayirithāti ca, ṭhāyī ca so bhāvo ceti ca viggaho.

Ṭhāyībhāvappabhedauddesa

**342. Ratihāsā ca soko ca,
Kodhussābhaya'mpi ca;
Jigucchāvimhayā ceva,
Samo ca nava ṭhāyino.**

342. Ratyādīnaṃ navannameva ṭhāyitvaṃ sambhavatītyāha “**rati**”ccādi. Samo ceti evaṃ ṭhāyino navāti yojanā. Navevete sakasakavibhāvānubhāvehi samullāsītā visumpi bandhitabbā kavinā, abhinetabbā ca naṭena, tathā sesabhāvāpi. Tattha yadi paṇāyaṃ rati asesaitthipurisagaṇayuttānaṃ itthipurisānaṃ aññamaññaṃ janitā, candādīhi uddīpanavibhāvehi uddīpitā, ussukkatādibādakehi anubhāvehi paripositā, sakasakānubhāvasāmatthiyā patiyamānehi anekarūpehi byabhicārīhi cittatā siyā, tadā tu ṭhāyī rati naṭābhīnāyena, subandhasavanena vā sabbhehi assādiyamānā siṅgārarasattamāpajjate. Evaṃ yathāyogaṃ hāsādīṭhāyībhāvānaṃ hassarasādibhāvāpajjane yuttim samanneyya.

342. Ṭhāyībhāvo nāma ratyādayo naveveti dassetuṃ “**ratihāsā**”tiādimāha. Ratihāsā ca soko ca kodhussābhayampi ca jigucchāvimhayā ceva **samo** santagaṇo cāti evaṃ ṭhāyino nava honti. Imesaṃ ratyādīnaṃ navannaṃ sarūpakathanāṃ “siṅgārahassakaruṇā”tiādikāya uddesagāthāya anantare niddese pākaṭo hoti. Rati ca hāso cāti ca, kodho ca ussāho ca bhayañceti ca, jigucchā ca vimhayā ceti ca vākyam. Ime nava ca evaṃ byabhicārībhāvasāttikābhāvo ceti ime yathāsakamanurūpavibhāvānubhāvehi dittaṃ katvā paccekam kavinā bandhitabbā, naṭena gahetvā dassitabbā ca. Imesu tividhabhāvesu ayaṃ rati asesapumitthiguṇehi yuttehi naranārīhi aññamaññaṃ uppādītā, candādīhi uddīpanavibhāvehi uddīpitā, ussāhādīpakāsakakāyikavācasikapayogasaṅkhātānubhāvena positā, sakasakānubhāvasāmatthiyehi gammamānānekappakārabhyabhicārībhāvehi vicittakatā hoti. Idīsā’yaṃ rati naṭassa abhināyena ca pasatthabandhasavanena ca sabbhehi assādiyamānāsiṅgārādirasattamāpajjate viññātabbā. Hāsādīnaṃ sesaṭhāyībhāvānaṃ hassarasādibhāvāpattiyam yutti evaṃ yathārahaṃ veditabbāti.

Byabhicārībhāvaadhippāya

**343. Tirobhāvavibhāvādi-
Visesenā’bhimukhyato;
Yete caranti sīlena,
Te honti byabhicārino.**

343. Byabhicārino āha “**tirobhāva**”iccādinā. **Tirobhāvo** ṭhāyīnaṃ ekassāpi bhāvassa nibbedādino aciraṭṭhāyitā ca **āvibhāvo** pākaṭatā ca nānārasanissayattā te ādayo yassa. **Ādisaddena** ṭhāyīdhammassa sukhadukkhādirūpassa gahaṇam, sova viseso, tena. Ṭhāyīdhammassa sukhadukkhārūpassa gahaṇam, attano dhammassa sukhadukkhārūpassa ṭhāyīni samāropanaṅcā**bhimukhyam**. Tathā hi ratiyaṃ parisamo sukhānuviddho bhavati, soke dukkhānuviddho. Ratiyaṃ sukhābhāvāpi gilānippabhutayo byabhicārino sakammaṃ dukkhamimaṃ samāropayanteva. Tato tena abhimukhabhāvena **ye ete** bhāvā sīlena **caranti** pavattanti, te byabhicārino hontīti.

343. Idāni uddesakkamena byabhicārībhāve lakkhaṇato dasseti “**tirobhāvā**”iccādinā. **Tirobhāvavibhāvādivisesena** byabhicārībhāvānaṃ attano anekarasam nissāya pavattattā, lokassa bhinnarucikattā ca kismiñci ṭhāyībhāve byabhicārībhāvānamattano guṇassa līnattañca kismiñci tasseva guṇassa pākaṭattañcātiādikena visesena **abhimukhyato** ṭhāyībhāvānaṃ sukhadukkhārūpaṃ attani ca attano sukhadukkhārūpaṃ ṭhāyībhāvesu ca āropanasaṅkhātena abhimukhabhāvena **ye ete** bhāvā **sīlena caranti** pakatiyā pavattanti, **te** bhāvā byabhicārino nāma hontīti. Evameva [evarūpā (ka.)] pīlā sarūpena eko parisamasāṅkhatabyabhicārībhāvo ratiyaṃ sagaṇena līno sukhānuviddho hutvā, soke sagaṇena pākaṭo dukkhānuviddho ca hutvā pavattate. Evameva sukhābhāvāratiyaṃ gilānādayo byabhicārino sakiyaṃ dukkhasārūpaṃ āropentīti katvā tirobhāvavibhāvādivisesena abhimukham pavattanti. Tirobhāvanamiti ca, āvibhāvanamiti ca, tirobhāvo ca āvibhāvo ceti ca, te ādayo yassa ṭhāyībhāvesu vijjāmānānaṃ sukhadukkhābhāvānaṃ attani āropanasetti ca, soyeva visesoti ca, abhimukhānaṃ bhāvoti ca viggaho. Byabhicārīpade **visaddo** visesatthe **abhisaddo**

abhimukhabhāve vattati.

Byabhicārībhāvappabheda

**344. Nibbedo takkasaṅkā sama-
Dhitijaḷatā dīnatuggālasattam,
Suttam tāsō gilānu'ssukaharisa-
Satissāvisādābahitthā.**

**Cintā gabbā'pamāro'marisamada-
Matummādamohā vibodho,
Niddāvegā sabīlam maraṇa-
Sacapalābyādhi tettiṃsame'te.**

344. Te dasseti “**nibbedo**”iccādinā. **Dīnatuggālasattanti** dīnatā ca uggatañca ālasattañca, gilāni **ussukai**ti ussukkaṃ. Capalaiti cāpallaṃ, saha capalena sacapalo, so cāyaṃ byādhi ca, maraṇaṅca sacapalabyādhi ca samāhāre. Tañca saha biḷāya vattatīti **sabīlanti ete** yathāvuttabyabhicārībhāvā tettiṃsa hontīti. Ussāhavatā vīraraso taṃvaseneva assādīyati. Bhīrunā tu sova bhayānakarasavaseneṭi lokasabhāvassa anekattā tadatthamete byabhicārino ekekassarasassa bahavo vaṇṇanīyā, yato taṃvaṇṇanādvārena sabbopi tesu kiñci assādetīti. Tattha yasmā pana māraṇopagataveridassanamekameva taṅkhaṇeyeva bhinnaṃ pakativasena bhīruno bhayassa hetu, saṅgāmalolassa tu ussāhanimittam siyā. Tathā naṭena kataṃ vikatamābharaṇam kriyāvā nīcapakatīnam ṭhāyino hāsassa hetu, gambhīrapakatīnam byabhicārino hāsassa, tasmā bhāve vaṇṇayatā kavinā bhāvā tathā vaṇṇanīyā, yathocityapariṇāso siyā. Ocityabhaṅgo tu mahatā vāyāmena pariharitabbo.

Tesu **nibbedo** attāvamānanam. Tassa ca itthīnañca nīcānañca dāliddiyam vibhāvo, yogīnam tu tatvasaṃvedanam vibhāvo, assupatanacintādayo ettha anubhāvā.

Takko vitakkanam. Tassa sandeho vibhāvo, sirokampādi anubhāvo.

Saṅkāya viruddhacaraṇam vibhāvo, kampādayo anubhāvo.

Samo khedo. Tattha gatyādi vibhāvo, sedādi anubhāvo.

Dhiti santoso. Nāṇādi vibhāvo, anubhāvo bhogālolatādi.

Jaḷatā appaṭipatti. Tassā itthāniṭṭhadassanādi vibhāvo, animisanayanālocanādi anubhāvo.

Dīnatā cetaso anojatā. Tassā vibhāvo duggatatādi, anubhāvo malinavatthatādi.

Uggatā dāruṇattam. Tassā vibhāvo balavāparādhādi, tassa anubhāvo tajjanādi.

Ālasattassa parisamādi vibhāvo, jimhatādi anubhāvo.

Suttassa niddā vibhāvo, tassādādayo anubhāvo.

Tāsō cittakkhobho. Vibhāvo assa gajjitādi, kampanādi anubhāvo.

Āyāsapipāsādi vibhāvo **gilāniyā**, vivaṇṇatādayo anubhāvo.

Kālakkhamatā **ussukam**. Vibhāvo tassa ramaṇīyadassanicchādi, anubhāvo turitatādi.

Cetopasādo **harito**. Tatra ussavādi vibhāvo, assusedādayo anubhāvo.

Sadisadassanādi vibhāvo **satīyā**, anubhāvo bhamusamunnamanādi.

Paresamukkaṃsāsahanatā **issā**. Tassā dujjanattagabbādayo vibhāvo, dosakathanāvajānanādayo anubhāvo.

Visādo khedo. Vibhāvo tassa āraddhakāriyāsiddhādi, bādhayatāpādi anubhāvo.

Abahitthā kāyasaṃvaraṇaṃ. Tassā vibhāvo lajjādi, anubhāvo'ññavikriyā.

Cintā iṭṭhālābhādīhi, anubhāvo mukulitanayanādi.

Gabbo abhimāno. Vibhāvossa issariyādi, anubhāvo avajānanādi.

Apamāro gāharukkhādīhi [**gāharukkhapatanādīhi (?)**], bhūpātādayo ettha anubhāvo.

Amariso akkhamatā. Vibhāvo assāvamānanādi, sirokampanatajjanādayo anubhāvo.

Mado pamādukkamaṃso. Tassa vibhāvo pānaṃ, calamānaṅgavacogatihāsādayo anubhāvo.

Mati kaṅkacchedo. Upadesādi vibhāvo, mukhavikāsādi ettha anubhāvo.

Asamekkhitakāritā **ummādo**. Tassa vibhāvo sannipātagahaṇādi, aṭṭhānaruditagītahāsādayo anubhāvo.

Moho bhayādīhi, anubhāvo thambhakampādi.

Durācārādīhi **biḷaṃ**, adhomukhatādi anubhāvo.

Maraṇaṃ vibhāvaanubhāvehi supasiddhaṃ.

Capalatā rāgadosādīhi, sacchandacaraṇādi anubhāvo. **Byādhi** pākaṭo.

Ye vā panaññe idha niddiṭṭhā cittavuttivisesāpi saṃvijjanti sukhumabhedā, tesu keci vuttessantogadhā honti. Yathā hi icchāsabhāvā sabbe kāmā ratiyaṃ antogadhā, tathā dosappakārā kodhā marisaissādīsvantogadhā, dukkhasabhāvā sokasamabyādhiḡilāni visādādīsvantogadhā. Pītyādayo sukhasabhāvā hariseti daṭṭhabbaṃ. Tesu bhayā taso añño, saṅkā tathā amariso. Tasmā issā, tathā ḡilānito samo, niddāya suttamaṃ, ussukā capalatā, tathā mohā palayo vakkhamāno aññoti mantabbaṃ.

344. Idāni te byabhicārībhāve sarūpena dasseti “**nibbedo**”iccādinā. **Nibbedo** attanindāsaṅkhato ca, takkasaṅkā ca, **samadhitijaḷatā** parisamo santosalakkhaṇā dhiti jaḷatā ca, **dīnatuggālasattaṃ** dīnabhāvadāruṇabhāvaalasabhāvā ca, **suttaṃ** sayanañca, **tāso** cittakkhobho ca, ḡilānaparimadditabhāvo ca, **ussukaharissatissāvisādābahitthā** ussāhapitisatiissākhedaākārasaṃvarā ca, cintā ca, **gabbo** abhimāno ca, apamāro ca, **amarisamadatummādamohā** akkhanṭipamādādhikkā kaṅkacchedaummādamohā ca, **vibodho** pabodho ca, **niddāvegā** niddā ca, āvegasaṅkhato sambhāmo ca, **sabiḷaṃ** lajjāsahitaṃ **marāṇasacapalābyādhi** marāṇaṅca cāpalyasahitā byādhi ceti. **Ete tettīmsa** byabhicārībhāvā nāma honti. Takko ca saṅkā ceti ca, samo ca dhiti ca jaḷatā ceti ca, dīnatā ca uggo ca alasattañcāti ca, ussukañcahariso ca sati ca issā ca visādo ca abahitthā ceti ca, amariso ca mado ca mati ca ummādo ca moho ceti ca, niddā ca āvego ceti ca, saha biḷāya vattatīti ca, saha capalena cāpalyena vattatīti ca, sacapalo ca so byādhi ceti ca, marāṇaṅca sacapalabyādhi ceti ca vākyaṃ. Maraṇasacapalābyādhiḡi samāhāradvando. Tasmā “sabiḷa”nti padaṃ etassa visesaṃ hoti.

Lokasabhāvassa anekavidhattā ekoyeva vīraraso ussāhavatā vīrarasākārena assādanīyo hoti,

soyeva bhīrunā bhayākārena assādanīyo hoti. Tasmā ekekassa rasassa ime bahū byabhicārino vaṇṇetabbā honti. Evaṃ sati anekādhippāyako loko tesu kiñci assādeti. Evaṃ sati bandho sabbajanassa kanto hoti. Tassaṃ bhāvavaṇṇanāyaṃ yasmā māretumāgacchantānaṃ sattūnaṃ dassanamekameva taṅkhaṇe janādhippāyato bhijjivā pakatibhīrūnaṃ purisānaṃ bhayassa ca yuddhalolassa ussāhanassa ca kāraṇaṃ hoti. Evaṃ naṭena hasanattamaṃ katavikatamābharaṇaṇca tādisakiriyaṃ ca uttānapakatikānaṃ purisānaṃ thāyihāsassa ca gambhīrapakatikānaṃ byabhicārīhāsassa ca hetu bhavēyya. Tasmā bhāve vaṇṇentena kavinā ocityabhaṅgamakatvā sakkaccamocityaṃ sajjetvā bhāvappakāsakāni savibhāvānubhāvavivacanāni vaṇṇetabbāni. Ettha bhāvāvabodhakavibhāvādīnaṃ jānitabbatā tehi tehi bhāvehi saddhiṃ evaṃ veditabbā.

Tesu bhāvesu attāvamānanalakkhaṇo **nibbedo**. Itthīnaṃ, hīnānaṃ [**hīnācārānaṃ (ka.)**] vā uppajjati ce, dālidhiyaṃ ālambaṇavibhāvo nāma, yogīnaṃ ce, tathāvabodho ālambaṇavibhāvo, ettha assupatanacintādikaṃ anubhāvo nāma.

Vitakkassa sandeho uddīpanavibhāvo nāma, sirokampādikaṃ anubhāvo nāma.

Saṅkāya viruddhappavatti uddīpanavibhāvo, kampādiko anubhāvo. Upari “vibhāvo”ti vutte ālambaṇuddīpanesu dvīsu yaṃ yujjati, taṃ gahetabbaṃ.

Khedalakkhaṇassa **samassa** gamanādikaṃ vibhāvo, sedādi anubhāvo.

Santosalakkaṇāya **dhitiyā** nāṇādi vibhāvo, bhogesu alolabhāvādi anubhāvo.

Ayoggaṭalakkhaṇāya **jaḷatāya** iṭṭhāniṭṭhānaṃ ajānanādi vibhāvo, vivaṭanayanehi abhimukhavilokanātādi anubhāvo.

Cittassanittejalakkhaṇāya **dīnatāya** duggatātādi vibhāvo, malīnavatthātādi anubhāvo.

Dāruṇatālakkaṇassa **uggabhāvassāti**sayāparādhādi vibhāvo, tajjanādi anubhāvo.

Alasattassa aṭṭhānaparisamādi vibhāvo, vaṅkikabhāvo anubhāvo.

Sayanasaṅkhātassa **suttassa** niddādi vibhāvo, assādādi anubhāvo. Ettha assādanaṃ nāma seyyasukhapassasukhādikaṃ.

Cittakkhobhasaṅkhātassa **tāsassa** gajjitādi vibhāvo, gajjitaṃ nāma bhayajanakavacanaṃ. Kopena kampanā anubhāvo.

Pīḷasaṅkhātassa **gilānassa** āyāsapipāsādi vibhāvo, dubbaṇṇatādi anubhāvo.

Anurūpakālassa anolokanassa ussukkassa rammavattudassanicchādi vibhāvo, turitatādi anubhāvo.

Cetopasādalakkhaṇassa **harisassa** maṅgalakīḷādi vibhāvo, santosavacanādi anubhāvo.

Saraṇalakkaṇāya **satiyā** saññānadassanādi vibhāvo, bhamukkhepādi anubhāvo.

Parasampattiasahanalakkhaṇāya **issāya** dujjanabhāvagabbādi vibhāvo, dosakathanāvajānanādi anubhāvo.

Khedalakkhaṇassa **visādassa** āradhakāriyāsiddhikāriyabyāpattiādi vibhāvo, manosantāpādi anubhāvo.

Ākārasaṃvaraṇalakkaṇāya, rasasabhāvapaṭicchādanalakkhaṇāya vā abahitthayalajjādi

vibhāvo, tadaññakriyākaraṇaṃ, adhomukhakaraṇaṃ, pādehi bhūmikhaṇanantiādi anubhāvo.

Cintāya iṭṭhatthālābhādī vibhāvo, makulitanayanādi adhokhittacakkhādi vā anubhāvo.

Gabbassa issariyādi vibhāvo, avajānanādi anubhāvo.

Apamārassa yakkhapīlādi vibhāvo, bhūmipatanādayo anubhāvo.

Akkhamalakkhaṇassa **amaris**assa avamānanādi vibhāvo, sirokampanatajjanādi anubhāvo.

Pamādādhikkalakkhaṇassa **mad**assa santosapānaṃ vibhāvo, kampamānahatthapādavacanagamanahāsādī anubhāvo.

Kaṅkhāchedanalakkhaṇāya **matiyā** upadesādi vibhāvo, mukhasantosādi anubhāvo.

Anupaparikkhakāritālakkhaṇassa **ummād**assa sannipātajjarayakkhādi vibhāvo, akāraṇarodanahanādi anubhāvo.

Muyhanalakkhaṇassa **moh**assa adhikabhayādi vibhāvo, sabhāvānavabodhanādi anubhāvo.

Niddāpagamasankhātassa **vibodh**assa kālapariṇāmādi ālokasaraṇādi vā vibhāvo, akkhamaddanādi anubhāvo.

Manosampīlanalakkhaṇāya **niddā**ya kassaci acintanaakaraṇādi vibhāvo, akkhipidahanādi anubhāvo.

Bhayāgamanalakkhaṇassa **āveg**assa paccatthikadassanādi vibhāvo, utrāsakampādi anubhāvo.

Lajjālakkhaṇāya **biḷā**ya durācārādi vibhāvo, adhomukhatādi anubhāvo.

Maraṇassa satthapahārarogādi vibhāvo, mukhavikārādi anubhāvo.

Cāpallassa rāgadosādi vibhāvo, attano sacchandacaraṇādi anubhāvo.

Byādhiyā vātapittādīnaṃ ussadabhāvādi vibhāvo, nitthunanādi anubhāvo.

Imasmiṃ subodhālaṅkāre adassitasukhumabhedā aññāpi cittavuttivisesā santi, tesu icchāsabhāvā sabbe bheda kāmaratiyañca, dosapakārā kodhaamarisaissādīsu ca, dukkhasabhāvā sokasamabyādhiḡilānavisādādīsu ca, pītiādayo harise ca antogadhāti veditabbā. Evaṃ samānaṃ saṅgahe satipi tāsato bhayassa ca, saṅkāya amarissa ca, amarisato issāya ca, gilānato samassa ca, niddāya suttassa ca, ussukkato capalatāya ca, mohato vakkhamānapalayassa ca pākaṭavisesena aññathā viṣuṃ viṣuṃ dassitanti daṭṭhabbaṃ.

Sāttikabhāvaadhippāya

**345. Samāhitattappabhavaṃ, sattaṃ teno'papādītā;
Sāttikā'pya'nubhāvatte, viṣuṃ bhāvābhavanti te.**

345. Sāttike vadati “**samāhite**”ccādinā. **Samāhito** ekaggaṭābhāvāpādanena katasamādhāno **attā** cittaṃ tato **pabhavaṃ** uppannaṃ yaṃ, taṃ sattaṃ nāma. **Tena** sattena **upapādītā** nibbattitā thambhādayo sāttikā vuccante. Te ca puna anubhāvāpi bhavanti thambhādi bhāvasaṃsūcanasabhāvavikārarūpattā. Tañca “cittavuttivisesattā”iccādinā vakkhati. Tenāha “**anubhāvattēpi**”ti. Evaṃ satyapi te sāttikā **viṣuṃ** puthageva bhāvā bhavanti, vuttanayena cittabhavattavirūpattā tesanti.

345. Idāni uddesakkamenādhigatakevalabhāvasaṅkhātaṃ sāttikābhāvaṃ dasseti “**samāhita**”iccādinā. **Samāhitattappabhavaṃ** ekaggatābhāvāpādanena katasamādhānacittato sambhūtaṃ sattaṃ nāma hoti. **Tena** lābhālābhādīsu ekākārassa hetunā thirabhāvena **upapādītā** nipphādītā thambhādayo sāttikā nāma bhavanti. **Te** sāttikā **anubhāvattepi** cittākārasaṅkhātathambhādīpakāsanasabhāvavikārasarūpattā attano anubhāvatte satipi viṣuṃ **bhāvā bhavanti** yathāvutta “cittavuttivisesā tu, bhāvayanti rase yato”tiādinā bhāvā nāma hontīti. Ime sāttikābhāvānubhāvavasena duvidhā honti. Samāhito ca so attā ceti ca, tato pabhavamiti ca, santo upasanto ca so attā ceti ca, sattato bhavantīti ca, sattena uppādītāti ca, anubhāvānaṃ bhāvoti ca vākyam. **Apīti** anuggahatthe nipāto.

Sāttikabhāvappabheda

**346. Thambho palayaromañcā,
Tathā sedassuvepathu;
Vevaṇṇiyaṃ vissaratā,
Bhāvā’ṭṭhe’te tu sāttikā.**

346. Te dasseti “**thambho**”iccādinā. Ettha **thambho** avissarakāyacittatā. **Palayo** assāsapassāsamattāvaseso suttāvattthāsabhāvo niddāpabhavo. Subyattalakkhaṇā sesā.

346. Idāni sāttike dasseti “**thambho**”iccādinā. **Thambho** kāyacittānaṃ avisarabhāvasaṅkhāto ca **palayaromañcā** niddāya uppajjamānaassāsapassāsamattātirittasuttāvattthā ca pasādādisambhavo romuggamo ca **tathā** evaṃ **sedassuvepathu** ca bhayādīhi uppajjamānadāho ca santosādīhi uppajjamānaassu ca kampā ca **vevaṇṇiyaṃ** virūpatā ca **vissaratā** virūpasaddatā cāti ete aṭṭha sāttikā bhāvā nāma honti. Romānaṃ aṅgo uggamoti ca, palayo ca romaṅgo ceti ca, vepanaṃ kampanamiti ca, sedo ca assu ca vepathu cāti ca, virūpo vaṇṇo asseti ca, tassa bhāvoti ca, virūpo saro asseti ca, tassa bhāvoti ca vākyam.

**347. Yadā ratyādayo bhāvā,
Ṭṭhisilā na honti ce;
Tadā sabbepe te bhāvā,
Bhavanti byabhicārino.**

347. Na kevalaṃ vuttāyeva byabhicārino, ratyādayopīti āha “**yadā**”iccādi. **Bhavanti byabhicārinoti** yathāyogaṃ yathāsambandhaṃ byabhicārino hontīti attho. Sesam subodham.

347. Idāni nibbedādayo viya ratihāsādayopi kismiñci kāle byabhicārinopi hontīti dasseti “**yadā**” iccādinā. **Ratyādayo** ratihāsādayo **bhāvā** nava ṭṭhāyībhāvā yadā **ṭṭhisilā na honti ce** virodhīhi tehi tehi bhāvantarehi byavahitattā sabhāvato ṭṭhisabhāvā yadā na honti, tadā **te bhāvā** ratyādayo sabbepe byabhicārino bhavantīti. Yathāsakaṃ byabhicāritānurūpavibhāvānubhāvānaṃ yogānurūpena byabhicārībhāvā honti. Ratiādi yesam hāsādīnamiti ca, ṭṭhiti silam yesam ratyādīnamiti ca viggaho.

**348. Vibhāvo kāraṇaṃ tesu’-
Ppattiyu’ddīpane tathā;
Yo siyā bodhako tesa-
Manubhāvo’ya’mīrito.**

348. Idāni vibhāvānubhāve dasseti “**vibhāvo**”iccādinā. **Tesam** ratyādīnaṃ bhāvānaṃ uppattiyā, tathā uddīpane ca **kāraṇaṃ** ālambaṇauddīpanavasena duvidho vibhāvo nāma. Tattha ālambaṇavibhāvo kantādi, uddīpanavibhāvo candādi. Tesam **bodhako** nāpako kāyiko ca vācasiko ca byāpāro siyā, ayaṃ anubhāvo īrito.

348. Idāni vibhāvānubhāve dasseti “**vibhāvo**”iccādinā. **Tesam** ṭṭhāyībhāvādīnaṃ tiṇṇam

uppattiyā ca tathā **uddīpane ca** uppannānaṃ dīpane ca **kāraṇaṃ** ālambaṇauddīpanavasena duvidho hetu vibhāvo nāma, **tesaṃ** ṭhāyībhāvādīnaṃ **bodhako** kāyikavācasiko **yo siyā** naṭakavīnaṃ byāpāro atthi, ayaṃ anubhāvoti īritoti. Visesa bhāveti vaḍḍhetīti **vibhāvo**. Anubhāveti bodhetīti **anubhāvo**. Ettha **vibhāvo** nāma rativiseya naranārīnaṃ aññamaññaṃ ālambaṇavibhāvo, candarammadesādi uddīpanavibhāvo ceti duvidho. Hāsādīnaṃpi duvidhavibhāvaṃ yathārahaṃ yojetabbaṃ. **Anubhāvo** nāma ṭhāyībhāvādīnaṃ tesaṃ tesaṃ bhāvānaṃ pakāsakavācasikabyāpārasaṅkhātakavipayogo ca kāyikapayogabhūto naṭānaṃ abhinayasāṅkhāto taṃtaṃbhāvasarūpanirūpako ceti duvidho byāpāro.

**349. Nekahetuṃ manovutti-visesaṅca vibhāvituṃ;
Bhāvaṃ vibhāvānubhāvā, vaṇṇiyā bandhane phuṭaṃ.**

349. Vibhāvādivaṇṇanāyameva bhāvavisesāvabodho siyā, aññathā “devadattassa sāsulocanayugaṃ sañjāta” miti vutte sokā ānandā rogā ceti ko nāma sakkoti kāraṇaṃ nicchituṃ, cittavuttivisesaṅca bhāvaṃ vinā vibhāvānubhāvāṃ kavi vaṇṇetuṃ naṭobhinetuṃ sāmajjiko vā viññātuṃ ko sakkotīti dassetuṃāha “**neka**”iccādi. **Nekahetuṃ** bahuhetuṃ manovuttivisesaṅca bhāvaṃ **vibhāvituṃ** pakāsetuṃ **vibhāvānubhāvā** vuttalakkhaṇā **bandhane** sabhāvanirūpakapade phuṭaṃ vaṇṇanīyā, vibhāvādirūpakeneva avuttampi kiñci patīyate.

349. “Devadattassa cakkhūni assupuṇṇānī” ti vutte sokena santosena rogena vāti yathā assukāraṇakathanāṃ vinā na jānāti, evaṃ cittassa pavattisaṅkhātā ratihāsādayo te te bhāvā attano patīyānurūpaṃ vibhāvānubhāvāvakathanāṃ vinā kavīhi vaṇṇetabbā, naṭehi dassetabbā, sabbhehi assādanīyā natthīti ṭhāyīādīnaṃ vaṇṇanameva kātabbanti idāni anusāsento āha “**neka**”iccādi. **Nekahetuṃ** tesaṃ tesaṃ bhāvānaṃ uppadyādo ālambaṇavibhāvādibahukāraṇavantaṃ **manovuttivisesaṃ bhāvāṅca** cittassa pavattivisesasaṅkhātābhāvāṅca **vibhāvituṃ** pakāsetuṃ **vibhāvānubhāvā** anantaraniddiṭṭhā **bandhane** rasabhāvappakāsane **phuṭaṃ** pakāsaṃ katvā **vaṇṇiyā** kavinā vaṇṇanīyā hontīti. Na ekoti ca, so hetu asseti ca, manaso vuttīti ca, tāya visesoti ca, vibhāvo ca anubhāvo ceti ca vākyāṃ.

**350. Savibhāvānubhāvehi, bhāvā te te yathārahaṃ;
Vaṇṇanīyā yathocityaṃ, lokarūpānugāminā.**

350. Idāni te bhāvā lokasabhāvānatikkamena vibhāvādīhi vaṇṇanīyāti āha “**savibhāve**”ccādi. Saha vibhāvehi savibhāvā, te ca te anubhāvā ca, tehi. **Yathārahanti** attano sambandhīnaṃ vasena yathārahaṃ vaṇṇanīyā.

350. Idāni vibhāvānubhāve nissāya vaṇṇanīyā te bhāvā lokasabhāvamanatikkamma kātabbāti anusāsanto āha “**savibhāvā**”iccādi. **Lokarūpānugāminā** lokavohāramanuvattamānena **te te bhāvā** ṭhāyībhāvādayo tayo **yathocityaṃ** ocityānurūpaṃ **savibhāvānubhāvehi** vibhāvasahitehi anubhāvehi karaṇabhūtehi **yathārahaṃ** tehi tehi bhāvehi sambandhīnaṃ vibhāvādīnaṃ vasena anurūpato **vaṇṇanīyā** vaṇṇetabbā hontīti. Vibhāvehi saha ye vattantīti ca, te ca te anubhāvā ceti ca, anatikkamma arahanti ca, anatikkamma ocityamīti ca, lokassa rūpaṃ sarūpamīti ca, taṃ anugacchati sīlenāti ca viggaho.

**351. Cittavutti visesattā, mānasā sāttika’ṅgato;
Bahinissaṭasedādi-anubhāvehi vaṇṇiyā.**

351. Sāttikā kathaṃ vaṇṇanīyāti āha “**citte**”ccādi. Cittassa vuttiviseso yesaṃ, tesaṃ bhāvo, tasmā **mānasā** manasi bhavā sāttikā **ṅgato** sarīrato **bahinissaṭe**hi niggatehi sedādīhi anubhāvehi vaṇṇanīyā, na pana sedasalilameva bhāvoti adhippāyo.

351. Evaṃ sāmāññena bhāvavaṇṇanakkamaṃ dassetvā idāni visesa sāttikabhāvavaṇṇanā īdisāti dasseti “**citta**”iccādinā. **Cittavuttivisesattā** cittassa pavattivisesattā **mānasā** citte bhavā sāttikābhāvā **ṅgato** sarīrato **bahinissaṭesādianubhāvehi** bahinikkhantasedādīhi anubhāvehi karaṇabhūtehi **vaṇṇiyā** vaṇṇanīyā hontīti, ṅgato bahi nissaṭanti visesanena

visiṭṭhabhūtasedādīnameva bhāvānubhāvattaṃ vinā kevalaṃ sedādayo vuttā samānā bhāvādayo nāma na hontīti adhippāyo. Cittassa vuttīti ca, sā eva viseso yesaṃ sāttikānamiti ca, tesam bhāvoti ca, manasi bhavāti ca, sedo ādi yesaṃ kheḷādīnamiti ca, nissaṭṭa niggaṭā ca te sedādayo ceti ca, te eva anubhāvāti ca vākyam.

Rasaadhippāya

352. Sāmajjikāna'mānando, yo bandhatthānusāriṇaṃ; Rasiyatīti taññūhi, raso nāmā'ya'mīrito.

352. Idāni “rasassādāya sādḥūna”nti vuttattā rase niddisanto āha “**sāmajjikāna**”miccādi. Bandhassa attho, tadanussaranti manobhāvanāvassenāti **bandhatthānusāriṇo**, tesam **sāmajjikānaṃ** sabbhānaṃ manasi yo ānando, ayaṃ lokamadhurādiraso viya bandhe siṅgārādi raso nāma īrito **taññūhi** rasaññūhi. Kathamityāha “**rasiyatī**”ti, assādiyatīti attho. Kiñca? Yathā nānābyañjanasaṅkhatamannaṃ bhuñjamānā rase assādiyanti sumānasā purisā santosañcādhigacchanti, tathā nānābhīnaya byañjite vācaṅgasatthopete ṭhāyībhāve assādentī sumānasāpekkhā, tasmā ete nāṭyātipi vuccanti.

352. Idāni “rasassādāya sādḥūna”nti vatvā uddiṭṭhakkamena sampattaṃ rasaṃ dasseti “**sāma**”iccādinā. **Bandhatthānusāriṇaṃ** bandhassa atthānurūpasāriṇaṃ buddhiyā pavattānaṃ **sāmajjikānaṃ** sabbhānaṃ citte bhavo yo **ānando** santoso atthi, ayaṃ loke madhurādiraso viya assādanīyo hotīti atthayuttēna “**rasiyatī**”ti iminā vacanathena raso nāmāti **taññūhi** rasaññūhi **īrito** kathitoti. Sāmajjāyaṃ niyuttāti ca, bandhassa atthoti ca, taṃ anussarantīti ca, taṃ jānantīti ca vākyam. Yathā nānābyañjanehi abhisāṅkhatamāhāraṃ paribhuñjantā sattā lavaṇambilādayo te te rase assādeyyuṃ, santuṭṭhā ca bhavēyyuṃ, evameva nānappakāraabhīnayehi pakāsītavāṇṇāyā aṅgabhūtehi anurūpehi satthehi yutte ṭhāyībhāve issādirahitapaññavantā assādentī, tasmā ime ṭhāyībhāvā naṭābhīnaye byañjitattā ca sabbhānaṃ santosaṅkhatarasassa hetuttā ca naṭarasātipi vuccanti.

Rasappabheda

353. Savibhāvānubhāvehi, Sāttikābyabhicārihi; Assādiyatta'mānīya- Māno ṭhāyeva so raso.

353. Ṭhāyīnameva rasattāpattimāha “**savibhāve**”ccādinā. **Ṭhāyeva** soti so yathāvutto raso ṭhāyībhāvoyeva, nāññoti attho.

353. Idāni ṭhāyībhāvānameva rasasarūpassa pāpuṇanattaṃ vibhāveti “**savibhāvā**”iccādinā. **So raso** anantaraniddiṭṭho **savibhāvānubhāvehi** tesam tesam ṭhāyīnaṃ anurūpehi vibhāvasahitehi anubhāvehi ca, **sāttikābyabhicārihi** pakāsetabbāṭṭhāyībhāvāsseva anukūlasāttikabhāvabyabhicāribhāvehi karaṇabhūtehi **assādiyattaṃ ānīyamāno** kavino sāmattiyā pāpuṇiyamāno **ṭhāyeva** ṭhāyībhāvo evāti kāriyopacārena raso nāmāti vedītabboti. Saha bhāvehi pavattantīti ca, savibhāvā ca te anubhāvā ceti ca, sāttikā ca byabhicāriṇo ceti ca, assādiyassa bhāvoti ca vākyam.

354. Siṅgārahassakarūṇā, ruddavīrabhayānakā; Bībhacchabbhūtasantā ca, rasā ṭhāyīna'nukkamā.

354. Tesam nāmavasena vibhāgamāha “**siṅgāre**”ccādinā. **Ṭhāyīnanukkamā**ti “**ratihāsā** ca soko cā”tiādinā vuttānaṃ ṭhāyībhāvānaṃ anukkamā, paṭipāṭiyāti attho.

354. Rasāvattāsampattaratihāsādīnaṃ ṭhāyībhāvānaṃ idāni kamena nāmantaraṃ dasseti

“**siṅgāra**”iccādinā. **Ṭhāyīnaṃ** heṭṭhā vuttānaṃ ratiḥāsādiṭṭhāyībhāvānaṃ **anukkamā** paṭipāṭiyā **siṅgārahassakarūṇā** siṅgāro hasso karūṇā ca **ruddavīrabhayānakā** ruddo vīro bhayānako ca **bībhacchabbhutasantā** ca bibhaccho abbhuto santo ceti nava rasā nāma hontīti. Siṅgāraso hassarasotiādīnā **rasasaddo** paccekamaṃ yojetabbo. Siṅgāro ca hasso ca karūṇā ceti ca viggaho. Sesesupi līngasamāsā imeyeva. Ime siṅgārādīnaṃ ratyādīhi anaññattā upari ratyādivivaraṇeyeva ñātabbā.

**355. Dukkharūpe’ya’ mānando,
Kathaṃ nu karūṇādike;
Siyā sotūna’ mānando,
Soko vessantarassa hi.**

355. Sokādirūpokarūṇādi kathaṃ raso siyāti āha “**dukkhe**”ccādi. Vessantarassa puttadāravīyogā karūṇā sokarūpo dukkhameva ahosi, sampati pana **sotūnaṃ** sabbhānaṃ ānandoyevāti etthādhīppāyo.

355. Heṭṭhā vuttaraso santosova, sokakodhādīlakkaṇo karūṇāruddādīko kathaṃ raso nāma bhaveyyāti āsaṅkāyamāha “**dukkharūpe**”iccādi. **Ayaṃ ānando** “sāmajjikānamānando”tiādīnā niddiṭṭho **dukkharūpe** dukkhalakkaṇe **karūṇādike** karūṇāruddādīke visaye kathaṃ bhaveyyāti ce, nesa doso **hi** tatheva **vessantarassa** bodhisattassa **soko** puttadāravirahato jātasoko **sotūnaṃ** idāni suṇantānaṃ sabbhānaṃ **ānando siyā** ānandassa kāraṇattā kāriyopacārena santoso nāma bhaveyyāti. Vattuno sāmattiyā karūṇārasādīkaṃ pāpetvā pakāsiyamānassa sokādīkassa dukkharūpena ṭhitattā suṇantānaṃ pīti uppādiyatevāti adhippāyo. Dukkhaṃ rūpaṃ sabhāvo yassa karūṇādinoti ca, karūṇā ādi yassa ruddādīnoti ca vākyamaṃ.

Ṭhāyībhāvaniddesa

Ratiṭṭhāyībhāva

**356. Rammadesakalākāla-vesādīpaṭisevanā;
Yuvāna’ññoññarattānaṃ, pamodorati ruccate.**

356. Siṅgārādayo vibhāgato dassetumāha “**ramme**”ccādi. Tattha “**rammadesa**”iccādinā uddīpanavibhāvā dassitā. “**Yuvāna**”nti iminā ālambaṇavibhāvo. Itthī hi purisassa, puriso itthiyā ālambaṇavibhāvo. **Pamodoti** aññamaññābhīraṇavasena āmodarūpo.

356. Idāni siṅgārādīnāmake teratyādīke kamena niddisati “**ramma**”iccādinā. **Rammadesakalākālavesādīpaṭisevanā** ramaṇīyanirāvaraṇasucipavittavāsārahadeso rammagītikādīkalā ratijanakavasantādanurūpakālo mālāgandhādi upasobhitakīriyādi manuññaveso, **ādisaddena** niddiṭṭhabhāsītamihītādiceti imesaṃ diṭṭhasutamutādīsu diṭṭhādīmattamakavā paññāya tena tenākārena punappunānubhavanena **aññoññarattānaṃ** aññamaññānaṃ nimittānubyañjanasaṅkappavasenātīrattānaṃ **yuvānaṃ** taruṇitthi purisānaṃ **pamodo** abhīraṇavasena santoso pīti **rati ruccate** ruccanato “**rati**”ti vuccatīti. Imasmīṃ pakkhe rakāro sandhījo. Deso ca kalā ca kālo ca veso ceti ca, te ādayo yesamīti ca, rammā ca te desa...pe... vesādayo ceti ca, tesamaṃ paṭi punappunaṃ sevanamīti ca, añño ca añño ceti ca, tesu rattāti ca vākyamaṃ.

**357. Yutyā bhāvānubhāvā te,
Nibandhā posayanti naṃ;
Sopyā’yogavippayoga-
Sambhogānaṃ vasā tīdhā.**

357. “**Yutyā**”iccādi. **Te** yathāvuttā **bhāvānubhāvā yutyā** ālasīyauḅgatājīgucchāvajjitā ye saṅkāussukkādayo bhāvā tambyañjakā tadanurūpā anubhāvā ca ayogādīke siṅgāre yathā yathā yuñjanti, tādisīyāva yuttīyā nibandhā **naṃ** ratiṃ samposayanti, **soyevamevaṃ** posito siṅgāro nāma

raso sampajjate. Sopi tidhāti sambandho. Tattha **ayogo** nāma pubbe asaṅgatānaṃ anurāgena saṅgamamicchantānaṃ itthipurisānamasāṅgamo. Atisayavirulhapemānamubhinnampi silesa **vippayogo**. Balavakāmāvesavisesānaṃ kāmīnaṃ dassanādisamañjanaṃ **sambhogo**.

357. Idāni ratiyā puṭṭhakāraṇaṃ puṭṭhapayogañca dasseti “**utyā**”iccādinā. **Te bhāvānubhāvā** niddiṭṭhabyabhicārībhāvesu ratyānurūpabyabhicārībhāvo tappakāsako anubhāvo ceti ime dve **utyā** hetubhūtāya ayogavippayogasambhogasaṅkhatānaṃ tiṇṇaṃ siṅgārānaṃ anukūlatthena ratiyā viruddhattā ālasiyauggajigucchādike parivajjetvā saṅkāussukkādīnaṃ ratyānukūlabhāvānaṃ vasena yathāyogaṃ **nibandhā** kavīhi bandhā **naṃ** ratim **posayanti** yathā tappakāsana pūrenti sajjenti, evaṃ sajjito ratisiṅgāro nāma raso hoti. **Sopi** sāmāññena niddiṭṭhasiṅgārarasopi **ayogavippayogasambhogānaṃ** siṅgārānaṃ **vasā** bhedena tidhā bhavati. Tattha **ayogo** nāma pubbe aññamaññasaṅgamarahitānaṃ abhinavānurāgabalena saṅgamaṃ patthentānaṃ thīpumānaṃ asaṅgamo. **Vippayogo** nāma saṅgamātisayena virulhapemānaṃ thīpumānaṃ aññamaññavisilesa. **Sambhogo** nāma balavakāmātaṇhāvisesavasena yuttānaṃ kāmīnikāmukānaṃ aññamaññaṃ dassanādiassādo. Bhāvo ca anubhāvo ceti ca, ayogo ca vippayogo ca sambhogo ceti ca vākyam.

Imamalaṅkāraṃ karontena ācariyasāṅgharakkhitamahāsānipādena pana paramamadhurasaddhammāmatalluddhasuddhasantānaṃ tapodhanānaṃ aññarasāvabodhane payoanābhāvepi lokiyesu tesu tesu vohāresu asammohatthaṃ siṅgārādinavavidharasānaṃ lakkhaṇamattasseva dassitattā tadanurūpalakkhiyapariggāhe asati lakkhaṇāvabodhassa subyattābhāvato vuttalakkhaṇāvabodhatthaṃ taṃtaṃlakkhaṇakathanānantaraṃ tassa tassa lakkhiyassa mukhamattaṃ dassetabbaṃ hoti. Heṭṭhā “rāgānatabbhutasarojamukhaṃ dharāyā”tiādīna niddiṭṭhasambhogasiṅgārarasābhāseneva hasābhāsādīnaṃ aṭṭhannaṃ rasābhāsarūpassa bhāvābhāsassa, vibhāvābhāsassa, anubhāvābhāsassa ca nātābattā siṅgārarasassa lakkhiyamevaṃ vedittabbaṃ.

Gītassarena upakaḍḍhiya nettarasmi-
Bandhaṃ karaṃva vivasañca karaggahena;
Yā tādisepi viniyojayi dukkare maṃ,
Serandatī adhigatā vidhinā mayajjāti.

Gītassarena hatthīnaṃ gītīkāya piyattā gītīkādhaniṇā **upakaḍḍhiya** attano samīpaṃ ākaḍḍhitvā **nettarasmiibandhaṃ** nettasaṅkhātāhatthācariyassa rajjunā bandhaṃ **karaggahena** hatthaggāhena soṇḍaggahaṇena **vivasañca** apagataicchācāraṃ paravasam **karaṃ iva** hatthaṃ iva **gītassarena** attano līlopetagītīkādhaniṇā **upakaḍḍhiya** attano samīpaṃ netvā **nettarasmiibandhaṃ** attano nayanakantiyā paṭibandhaṃ **karaggahena** hatthaggāhena vivasañca apagatahitim mūlhaṃ **maṃ yā** kantā tādisepi dukkare viniyojayi, **sā irandatī** irandatī nāma nāgamānavikā mayā ajja **vidhinā** bhāgyena **adhigatā** laddhāti.

Ettha gītassaranettarasmi karaggahasāṅkhatāhi imāhi padāvalīhi uddīpanavibhāvo dassito. Thiyā puriso ca, purisassa thī ca ālambaṇaṃ hotīti “sā irandatī mayā”ti iminā ārammaṇavibhāvo dassito. “Upakaḍḍhiya bandhaṃ vivasa”nti imehi kāmēna uddīpitaṭṭhāyībhāvasāṅkhatā rati dassitā. “Tādisepi dukkare viniyojayī”ti imehi ussāhādīkā ca “vidhinā adhigatā mayajjā”ti imehi harisādīkā ca byabhicārībhāvā dassitā. Ratiyā viruddhe nibbēdaālasiyauggatajigucchādike byabhicārībhāve vajjetvā vuttappakāravibhāvādike pakāsanto “gītassarene”ccādikā ratippatītiyā anurūpaṃ payuttā kavippayogā idha anubhāvā nāma hontī. Nāṭakādidassanīyasatthe abhinayo anubhāvo. Rammadesarammakālarammavesādayo tadabhāve ratiyā anuppajjanato sāmattihiyā gamyā bhavanti evaṃ lakkhaṇānugatalakkhiyapariggāho sabbattha kātabbo. Evaṃ satibandhatthāvabodhakānaṃ sabbhānaṃ uppajjamānāyapītiyā kāraṇattā kāriyopacārena eso bandho raso nāma hotīti. Uparipi evameva.

Hassaṭṭhāyībhāva

358. Vikārakatiādīhi,
Attano’tha parassa vā;

**Hāso niddā samālasya-
Mucchādibyabhicāribhi;
Paripose siyā hasso,
Bhiyyo'tthipabhutīna so.**

358. “**Vikāre**”ccādi. **Vikārākati** desavayādīnaṃ viparīto kesabandhanādi, so ādi yesaṃ aññākatyādinaccanādīnaṃ, tehi vibhāvehi **hāso** cetovikāso, sopi attano sambandhī vā atha parassa sambandhī vā, tattha yo vibhāvasāmatthiyāyevābhibyattiṃ yāti, so attattho. Yo pana vibhāvadassanā uppannāpi purisassa gambhīrattādīnā chādito samāno purisantare hasatyābhibyatto, so paraṭṭho. So hāso niddādīhi byabhicārīhiyeva, anubhāvapakke **ādisaddena** akkhiphandanādayo gahitā. Paripose sati hasso nāma raso siyā. So hasso bhiyyo itthipabhutīnaṃ siyāti sambandho. Ettha **pabhutisaddena** nīcapakatayo saṅgaṇhanti.

358. Idāni hassarasassa posanākāraṃ dassetumāha “**vikāra**”iccādi. **Vikārākatiādīhi** desavayoliṅgānaṃ viparītehi kesabandhagatiṭṭhitiādikehi, naccagītaādikehi ca duvidhehi ākatisaṅkhatehi hetubhūtehi attano vā atha parassa vā sambandhī so **hāso** ceto vikāsalakkhaṇo **niddāsamaālasyamucchādibyabhicāribhi** niddāsamaālasyamucchāakkhiphandanādīhi anubhāvehi sutasambandhena teheva niddāsamaālasyamucchāsaṅkhatabyabhicārīhi karaṇabhūtehi paripose sati **hasso** hasso nāma raso siyā, **so** hasso bhiyyo itthipabhutīnaṃ, nīcapakatīnaṃca siyāti. Vikārā ca sā ākati ceti ca, so ādi yesanti ca, niddā ca samo ca ālasyaṅca mucchā ceti ca, te ādi yesaṃ akkhiphandanādīnaṃ anubhāvānanti ca, te ca byabhicārino ceti ca, itthī pabhuti yesaṃ nīcapakatīnanti ca vākyam.

Hassappabheda

**359. Sitamiha vikāsinayanaṃ,
Kiñcā'lakkhiyadjantu taṃ hasitaṃ;
Madhurassaraṃ vihasitaṃ,
Saṃsasirokampamupahasitaṃ.**

**360. Apahasitaṃ sañjala'kkhi,
Vikkhittaṅgaṃ bhavatyā'tihasiṃ;
Dve dve hassā kathitā ce'saṃ,
Jeṭṭhe majjhe'dhamepi ca kamaso.**

359-360. Hasse bhedamāha “**sita**”miccādinā. **Iha** hasse vikāsinī nayanāni yassa taṃ sitaṃ, kiñci ālakkhiyā **dijā** dantā yassa taṃ hasitaṃ. Evaṃ madhuro saro saddo yassa taṃ vihasitaṃ. Aṃsasirokampena saha vattamānaṃ upahasitaṃ, saha **jalena** assunā vattamānāni akkhīni yassa taṃ apahasitaṃ. Vikkhittāni ito tato pasāritāni aṅgāni yassa taṃ atihasiṃ nāma. Esaṅca sitādīnaṃ majjhe dve dve hassā ādito paṭṭhāya **kamaso** yathākkamena jeṭṭhe majjhe adhamepi ca kathitāti sambandho. Purātanehīti viññāyati.

359-360. Idāni hassabhedam dasseti “**sita**”miccādinā. **Iha** imasmiṃ hassavisaye **vikāsinayanaṃ** vivaṭṭanayanaṃ sitaṃ nāma. **Kiñci ālakkhiyadijaṃ tu** kiñci dissamānadantaṃ, taṃ hasitaṃ nāma. **Madhurassaraṃ** madhuranādaṃ vihasitaṃ nāma. **Saṃsasirokampam** aṃsasirokampasahitaṃ upahasitaṃ nāma. **Sajalakkhi** assuvilocanasahitaṃ apahasitaṃ nāma. **Vikkhittaṅgaṃ** aṭṭhāne pasāraṇavasena vikkhittatthapādādiavayavavantaṃ atihasiṃ nāma bhavati. **Esam** channaṃ **kamaso** kamena dve dve jeṭṭhe majjhe adhamepi visaye kathitā purātanehi bhāsītāti. Vikāsinī nayanāni asseti ca, kiñci īsakaṃ ālakkhiyā dijā yasseti ca, madhuro saro asseti ca, aṃso ca siro ceti ca, aṃsasiraso kampoti ca, tena saha vattatīti ca, saha jalena vattamānāni akkhīni yasseti ca, anusvarāgamo. Vikkhittāni aṅgāni yasseti ca vākyam. Sitahasitadvayaṃ uttame, vihasitapahasitadvayaṃ majjhime, apahasitatihasiṃadvayaṃ adhame vattate. Evaṃ sitādayo anurūpavibhāvādīnā payuttā ime rasā'vatthaṃ pāpuṇantīti adhippāyo.

Hassarasassa evamudāharaṇaṃ ñātappaṃ –

Pūjesi kaṇṭhamaṇinā api yo pasanno,
Dhamme purā'samadhuraṃ vidhuraṃ sa hantuṃ;
Gopentiyāpi vacanena thiyā sabhāvaṃ;
Bhattiṃ akāsi pharuse mayi nāgarājāti.

Yo **purā** pubbe **dhamme** tassa dhammakathane **pasanno kaṇṭhamaṇinā api** attano anagghakaṇṭhamaṇināpi taṃ pūjesi, **so** nāgarājā **sabhāvaṃ** attano adhippāyaṃ gopentiyā api thiyā **vacanena** itthiyā vacanena **asamadhuraṃ** tulyarahitaṃ **vidhuraṃ** vidhurapaṇḍitaṃ **hantuṃ** vināsanatthaṃ **pharuse** caṇḍe mayi bhattiṃ akāsīti. Iha ekasmiṃyeva vatthuni nāgarājassa pasādavadhavidhānādiviparītappavatti ālambaṇavibhāvo, paṭhamaṃ anagghapiyavatthūhi pūjitaḥhāvo ca bodhisattassa atulyabhāvo ca itthivacanassa sampaticchanabhāvo ca tassādhippāyassa aññātabhāvo ca puṇṇakassa caṇḍabhāvo ceti imehi sabbavacanehi uddīpanavibhāvo dassito. Imehi uddīpitaḥhāyībhāvasaṅkhato hāso vākyasāmatthiyā pakāsito hāsavirodhinibbedādivajjitā samālasiyasantosaassuvepathādikā byabhicārībhāvā sāttikābhāvā ca evaṃ sāmattiyena dīpitā. Tadanurūpavibhāvādīpakāsakā yathāvuttakavippayogā anubhāvā nāma honti. Hassabhedena majjhime purise vattabbāpi hasitaupahasitā dve imā daṭṭhabbā.

Karuṇāḥhāyībhāva

**361. Sokarūpo tu karuṇo-
Niṭṭhappattiṭṭhanāsato;
Tatthā'nubhāvā rudita-
Palayatthambhakādayo;
Visādālasayamaṇa-
Cintādī byabhicārino.**

361. “Soke”ccādi. **Aniṭṭhassa** puttaviyogādino desanikkaḍḍhanādino patti ca **iṭṭhassa** dhammassa, dhanādino vā nāso ca tato vibhāvabhūtehi sampanno **sokarūpo** sokasabhāvo tu karuṇo raso nāma. Tattha uttamānaṃ soko puttaviyogādianiṭṭhuppattito, dhammādiṭṭhanāsato ca jāyate. Nīcānaṃ tu desanikkaḍḍhanādianiṭṭhuppattito, dhanādiṭṭhanāsato ca, paresaṃ dhanādīnāsato tu uttamasseva mahākāruṇikattā, sesaṃ subodhaṃ. Anubhāvo panettha yathocityaṃ nirūpayitabbo.

361. Idāni karuṇārasaposanakkamaṃ dasseti “soka”iccādinā. **Aniṭṭhappattiṭṭhanāsato** puttaviyogādino, desacāgādino vā aniṭṭhassa uppatti ca silādino, dhanādino vā **iṭṭhassa** kantivatthuno vināso cāti imehi ālambaṇavibhāvehi karaṇabhūtehi uppanno **sokarūpo tu** sokasabhāvo pana **karuṇo** karuṇāraso nāma hoti. **Tattha** karuṇārase **ruditapalayatthambhakādayo** rudito palayo thambhotiādayo anubhāvā nāma bhavanti. Thambhādīnaṃ sarūpo heṭṭhā vuttova. Visādālasayamaṇacintādayo byabhicārino tasmīṃyeva byabhicārino bhavanti. Iha puttaviyogādianiṭṭhappattiyā ca silādhammādiṭṭhanāsanaena ca uttamānaṃ soko uppajjati, desacāgādianiṭṭhappattiyā ca dhanādiṭṭhanāsanaena ca nīcānaṃ. Aññesaṃ dhanādivināsanena pana mahākāruṇikattā uttamasseva uppajjati. Tasmīṃ visaye so soko sesānaṃ nuppajjati. Tasmā yathārahaṃ payogo kātabbo. Sokassa rūpo sabhāvoti ca, aniṭṭhassa pattīti ca, iṭṭhassa nāsoti ca, aniṭṭhappatti ca iṭṭhanāso ceti ca, ruditaṇca palayo ca thambhako ceti ca, te ādi yesamiti ca, visādo ca ālasyaṇca maraṇaṇca cintā ceti ca, tā ādi yesamiti ca vākyāṃ. Imassa karuṇārasassa lakkhiyamevaṃ daṭṭhabbaṃ –

Ākaḍḍhite'kasatarājapurakkhato yo,
Dhammena āsanamalaṃkurute jinova;
So assavālamavalambiya dāni nīto,
Yakkhena lokatilako kurute kimekoti.

Yo **ekasatarājapurakkhato** rājūnaṃ ekasatena parivārito **jino iva** buddho iva **dhammena** madhuradhammakathanena **āsanam** dhammāsanam **alaṃkurute** sajjeti, **lokatilako** lokassa piyatāya tilakālankārabhūto **so** vidhurapaṇḍito **yakkhena** puṇṇakena ākaḍḍhito hutvā nīto assavālam avalambiya idāni eko kiṃ kuruteti. Ihānītoti dassitapiyavatthuviyogo sokassa ālambaṇavibhāvo hoti.

“Ākaḍḍhitekasatarāje” ccādinā sakalena vākyena uddīpanavibhāvo dassito, uddīpitasokasaṅkhātāḥāyībhāvo ca visādālasacyacintādiko byabhicārībhāvo ca rudītapalayathambhakādīkā vibhāvādībodhakaanubhāvā ca vākyasāmatthiyena dīpitā honti.

Ruddaḥāyībhāva

362. **Kodho macchariyādīhi, pose tāsamadādīhi; Nayanāruṇatādīhi, ruddo nāma raso bhave.**

362. “**Kodho**”iccādi, subodham. Ettha paṭhamena **ādisaddena** avikkhepaupahāsādayo vibhāvā gahitā, dutiyena uggasambhamādayo byabhicārino, tatiyena bhūkuṭṭipuraṇaṇaṭṭhanippīlanādayo anubhāvā.

362. Idāni ruddarasassa posanakkamaṃ dasseti “**kodho**”iccādinā. Kodho **macchariyādīhi** macchariyaavikkhepaupahāsādīhi ālambaṇādīhi vibhāvehi ca hetubhūtehi **tāsamadādīhi** tāsamadauggatasambhamādīhi byabhicārībhāvehi **ca nayanāruṇatādīhi** nettarattasubhaṅgaṇaṭṭhapīlanādīhi anubhāvehi ca karaṇabhūtehi pose satī ruddo nāma raso bhaveti. Macchariyaṃ ādi yesanti ca, tāsō ca mado ceti ca, te ādi yesamīti ca, nayanāni ca tāni aruṇāni cāti ca, tesam bhāvoti ca, sā ādi yesamīti ca vākyam.

Ruddarasassa udāharaṇamevaṃ daṭṭhabbam –

Yakkhena bho adhigatosi manussabhakkhe,
Nā’ssassa vāla’ mavalamba puram avekkha;
Verambhavātamukhacuṇṇitasabbagatto,
Macco katham punapi passati jīvalokanti.

Bho manussabhakkhena yakkhena **adhigatosi** gahito asi, assassa **vālamavalamba** vāladhiṃ gahetvā idāneva **puram avekkha** tuyham nagaram olokehi, tatheva hi **verambhavātamukhacuṇṇitasabbagatto** verambhavātassa abhimukhacuṇṇitasakalasarīro **macco** manusso **jīvalokam** sattalokam punapi katham passatīti. Iha macchariyādivibhāvā ca kodhādīsaṅkhāto ḥāyībhāvo ca vākyasāmatthiyā dīpitā honti, aparaddhena tāsamadauggatādībyabhicārībhāvā vibhāvītā honti. Samudāyena nayanāruṇatādayo anubhāvā sūcitā honti.

Vīraḥāyībhāva

363. **Patāpavikkamādīhu-ssāho viroti saññito; Raṇadānadayāyogā, vīro’yaṃ tividho bhave; Tevā’nubhāvā dhitima-tyādayo byabhicārino.**

363. “**Patāpi**”ccādi. **Patāpo** sattusantāpakārī tejo, **vikkamo** paramaṇḍalakkamantam, te ādayo yesam balāvikkhepādīnam paṭipuggalagatānam vibhāvānam, tehi jāto **ussāho** rasattamāpanno vīro rasoti saññito, ayam vīro raṇadānadayāyogā tividho bhave yuddhavīro dānavīro dayāvīroti, **te** yuddhakarāṇādayo eva tattha anubhāvā bhavanti. Dhitimatiuggatādayo byabhicārino bhavanti.

363. Idāni vīrarasabhedam, posanakkamañca dasseti “**patāpa**”iccādinā. **Patāpavikkamādīhi** aññarājūnam daṇḍajatejasāṅkhatapatāpo, tesameva paramaṇḍalakkamanasaṅkhātavikkamo phalabhedo cetiādīhi uppanno **ussāho vīroti** vīrarasoti **saññito** kavīhi nāto, ayam vīraraso **raṇadānadayāyogā** yuddhacāgakarūṇāyogena hetubhūtena tividho bhave. **Te eva** raṇadānadayā eva imā anubhāvā nāma honti. **Dhitimatyādayo** dhitimatiuggatagabbādayo byabhicārino bhāvā hontīti. Yuddhavīradānavīradayāvīravasena vīraraso tividho hoti. Patāpo ca vikkamo ceti ca, te ādi yesamīti ca, raṇo ca dānañca dayā ceti ca, tāhi yogoti ca, tayo vidhā pakārā assāti ca, dhiti ca mati ceti ca, tā ādi yesamīti ca vākyam.

Vīrarasassa udāharaṇamevaṃ daṭṭhabbaṃ –

Viññāpetvā kuveraṃ sumahati-
Mapi ce'kovakumbhaṇḍasenam,
Uttāsetvā gahetvā maṇiratanavaram
Lakkhamādhāya jūte;
Jetvā korabyarājam sacivaratana-
Muddhacca raññaṃ satamhā,
Etthānetvā'diyissam suyuvatiratanam
Ko mame'ttha'tthi bhāroti.

Kuveram vessavaṇamahārājam **viññāpetvā** bodhetvā **sumahatimapi kumbhaṇḍasenam** atimahantiṃ kumbhaṇḍasenam ekova **uttāsetvā** bhayaṃ janetvā maṇiratanavaram gahetvā **jūte** akkhakīlayam lakkham **adhāya** ṭhapetvā korabyarājam jetvā **raññaṃ satamhā** rājasambandhinā satena **sacivaratanam** amaccaratanam **uddhacca** uddharitvā etthānetvā **suyuvatiratanam** sobhanaitthiratanam **ādiyissam** gaṇhissāmi, **ettha** yathāvuttesu mama ko bhāro atthīti. Ettha “ko mame'thatthi bhāro”ti iminā ussāhasaṅkhāto ṭhāyībhāvo pakāsito. Etassa uppattiuddīpanesu kāraṇabhūtaṃ itthiratanassa ādānakhātānāgarājagatapatāpavikkamādivibhāvo ca, taṃtaṃrūpappakāsakakavivacanaṅkhātānubhāvo ca “viññāpetvā”iccādinā vākyasāmatthiyena paṭipādanīyā honti. “Sumahatimapi kumbhaṇḍasenam eko”ti ca, “raññaṃ satamhā sacivaratanamuddhaccā”ti ca imehi dhitiuggatagabbādayo ca, “viññāpetvā kuvera”nti ca, “uttāsetvā korabyarāja”nti ca, “etthānetvā iccādayo”ti ca imehi matyādayo ca byabhicārino bhāvā vibhāvītā honti. Imehi vibhāvānubhāvabyabhicārībhāvehi yuddhavīraraso positoti daṭṭhabbo. Imināyeva nayena dānavīrādayo viññātabbā.

Bhayaṭhāyībhāva

**364. Vikārisanasattādi-
Bhayukkaṃso bhayānako;
Sedādayo'nubhāve'ttha,
Tāsādī byabhicārino.**

364. “Vikāri”ccādi. **Vikāri** asabhāvappavatto viruddho **sano** saddo satto ca, te ādayo yesam suññāraññādīnaṃ itthinīcappakatisambhavantānaṃ, vibhāvānaṃ, guruādīnaṃ vā uttamānaṃ, tehi jātassa bhayassa, kittimassa vā ukkaṃso bhayānako nāma raso. Ettha sedakampanapādacalanādayo anubhāvā, tāsādayo byabhicārino.

364. Idāni bhayānarakarasassa posanakkamaṃ dasseti “**vikāri**”ccādinā. **Vikārisanasattādibhayukkaṃso** pakativirahena vikāravantehi viruddhehi asanisaddādisaddehi, rakkhasādisattehi vā vibhāvehi hetubhūtehi sañjāto sābhāviko, kittimo vā bhayapaṭibandho ukkaṃso bhayānarakaraso nāma hoti. **Ettha** bhayānarakarasavisaye **sedādayo** dāhasarīrakampanādayo **anubhāvā** kāyikavācasikappayogasaṅkhatā anubhāvā honti. **Tāsādī byabhicārino** tāsasaṅkādayo iha byabhicārībhāvā hontīti. Sano ca satto ceti ca, vikāro etesaṃ atthīti ca, vikārino ca te sanasattā ceti ca, te ādayo yesam suññāraññādīnamiti ca, tehi jātamaṃ bhayamiti ca, majjhe padalopo, tassa ukkaṃsoti ca, sedo ādi yesam kampanādīnamiti ca, tāso ādi yesam saṅkādayo ca vākyam. Itthinīcappakatīkānaṃ bhayahetu vikārisanasattādi, uttamānaṃ guruādi.

Ettha lakkhiyamevaṃ veditabbaṃ –

Yaṃ diṭṭhisatthapātanena parippurantī,
Kumbhaṇḍarakkhasacamū gamitā samantā;
Ācakkavāḷanaga'massagataṃ purīva,
Bhoto muhuṃ muhu'mapassi sa puṇṇako'hanti.

Diṭṭhisatthapātanena diṭṭhisallasampātanena **parippurantī** kampamānā **samantā**

parisamantato **ācakkavāḷanagaṃ** cakkavāḷapabbatāvadhi **gamitā** palāpitā
kumbhaṇḍarakkhasacamū kumbhaṇḍarakkhasānaṃ senā yaṃ **assagataṃ** assapiṭṭhe nisinnakaṃ
bhoto bhavataṃ tumhākaṃ **purī iva** puriyā dassanamiva **muhūṃ muhūṃ apassi** khaṇe khaṇe
 apassittha, **so** ahaṃ puṇṇako nāma yakkhoti. Ettha “diṭṭhisatthapātenā”ti diṭṭhisatthāropanena ca
 “sa puṇṇako aha”nti iminā ca bhayajananassa hetubhūtaviruddhasattasaṅkhātā vibhāvā niddiṭṭhā,
 “muhūṃ muhū”mapassī”ti rasāvattasampattabhayukkamsasaṅkhato ṭhāyībhāvo vibhāvito,
 “kumbhaṇḍarakkhasacamū gamitā samantā ācakkavāḷanaga”nti tāsasaṅkhādikā byabhicārino bhāvā
 jotitā. “Paripphuranti”ti sedakampādayo anubhāvā dassitā honti.

Jigucchāṭhāyībhāva

365. Jigucchā rudhirādīhi,
Pūtyādīhi virāgato;
Bībhaccho khobhanu’bbegī,
Kamena karuṇāyuto;
Nāsāvikunanādīhi,
Saṅkādihi’ssa posanaṃ.

365. “Jigucchā”iccādi. Rudhirantādīhi pūtikimiādīhi virāgato ca jātā **jigucchā** garahā kamena
 khobhano ubbegī karuṇāyuto ca bībhaccho bhavati, nāsāvikunanamukhacchadanādīhi anubhāvehi,
 saṅkāvegādīhi byabhicārīhi ca assa posanaṃ bhavati.

365. Idāni bībhaccharasassa posanakkamaṃ dasseti “**jigucchā**”iccādinā. **Rudhirādīhi**
 rattantaguṇādīhi ca, **pūtyādīhi** pūtikimiādīhi ca, **virāgato** virattabhāvena cāti imehi tīhi vibhāvehi
 hetubhūtehi uppajjamānā jigucchā **kamena** rudhirādīnaṃ tiṇṇaṃ vibhāvānaṃ paṭipāṭiyā **khobhano**
 anavaṭṭhāno asamāhito **ubbegī** ubbegavā **karuṇāyuto** sokarūpena sahito cāti evaṃ bībhaccho raso
 nāma hoti. **Nāsāvikunanādīhi** nāsasaṅkocanamukhapidahanādīhi anubhāvehi ca **saṅkādihi** ca
 saṅkāvegādīhi byabhicārībhāvehi ca karaṇabhūtehi **assa** bībhaccharasassa posanaṃ hoti.
 Rudhirādīsu tīsu padesu, khobhanādīsu tīsu ca gamyamānattā avuttopi **casaddo** yojetabbo, tasmā
 khobhanādīhi tīhi yuttova bībhaccharaso nāmāti daṭṭhabbo. Rudhiraṃ ādi yesaṃ antādīnamiti ca,
 pūtiādī yesaṃ kimiādīnamiti ca, ubbego assa bībhacchassa atthīti ca, karuṇena āyutoti ca, nāsāya
 vikunamaṃ saṅkocanamiti ca, taṃ ādi yesaṃ mukhacchadanādīnamiti ca, saṅkā ādi yesaṃ
 āvegādīnamiti ca vākyamaṃ.

Imassa bībhacchassodāharaṇamevaṃ veditabbaṃ –

Yakkhā maccakaraṅkakaṅkanadharā ye nimmitā puṇṇake-
 Nu’ttaṃsīkatapāṇipallavadharā hārīkatantoragā;
 Littā lohitakuṅkumehi vidhurene’tte pivantā vasā-
 Majjaṃ sīsakapālapāṭīhi pure dhuttā viya’pekkhitāti.

Puṇṇakena yakkhena nimmitā **maccakaraṅkakaṅkanadharā**
 manussaṭṭhisāṅkhātakarabhūsanadhārino **uttaṃsīkatapāṇipallavadharā**
 matthakamālikatahatthatalasaṅkhatapallavadhārino **hārīkatantoragā**
 muttāhārīkatamanussantasaṅkhātauragasampayuttā **lohitakuṅkumehi**
 rudhiraṅkhatakuṅkumakakkehi littā **sīsakapālapāṭīhi** sīsakapālasāṅkhātehi sarāvehi **vasāmajjaṃ**
 vasāsaṅkhātasuraṃ **pure** abhimukhe pivantā ye yakkhā siyumaṃ, ete yakkhā **vidhurena** paṇḍitena
dhuttā viya nagare surādhattā viya upekkhitā hontīti. Iha “littā lohitakuṅkumehi”ti ca
 “uttaṃsīkatapāṇipallavadharā”ti ca “hārīkatantoragā”ti ca imehi cittakkhobhakāraṇabhūto
 rudhirādivibhāvo ca, “maccakaraṅkakaṅkanaro”ti ca “sīsakapālapāṭīhi vasāmajjaṃ pivantā”ti ca
 imehi ubbegavantasabhāvassa hetubhūto pūtyādivibhāvo ca pakāsito. Karuṇāyutasabhāvassa
 kāraṇabhūtavirajjanavibhāvo ca nāsāvikunanādiyanubhāvo ca saṅkāvegādībyabhicārībhāvo ca
 bībhacchasaṅkhātāṭhāyībhāvo cāti ime sabbe vākyasāmatthiyena gammāti veditabbā.

Vimhayaṭhāyībhāva

**366. Atilokapadatthehi,
Vimhayo'yaṃ raso'bbhuto;
Tassā'nubhāvā sedassu-
Sādhuvādādayo siyuṃ;
Tāsāvegadhittipaṇṇā,
Honte'ttha byabhicārino.**

366. “**Ati**”ccādi. **Atilokehi** lokātivuttīhi māyādibbagehārāmādīhi padatthehi jāto ayaṃ **vimhayo** cittavikārasaṅkhāto ṭhāyībhāvo abbhuto raso nāma. Sedaassusādhuvādaromañcādayo tassa anubhāvā siyuṃ, tāsādayo byabhicārino hontīti.

366. Idāni vimhayarasassa posanakkamaṃ dasseti “**ati**”iccādinā. **Atilokapadatthehi** lokaṭṭhitimatikkamma pavattehi māyādibbabhavanaārāmavimānādipadatthehi hetubhūtehi uppajjamāno ayaṃ **vimhayo** cittabyāpanasaṅkhāto ṭhāyībhāvo **abbhuto raso** abbhutaraso nāma bhava, sedassusādhuvādādayo **tassa** abbhutarasassa anubhāvā siyuṃ, tāsāvegadhittipaṇṇā **ettha** abbhutarasavisaye byabhicārino bhāvā hontīti. Atikkantā lokamiti ca, te ca te padatthā ceti ca, sādhuṭi vādoti ca, sedo ca assu ca sādhuvādo ceti ca, te ādi yesaṃ romañcādīnamiti ca, tāsō ca āvego ca dhiti ca paṇṇā ceti ca vākyam.

Imassa abbhutarasassodāharaṇamevaṃ datṭhabbaṃ –

Sa puṇṇakenā'haṭānekabhiṃsane-
Sva'ho naṭeneva suniccalo'calā;
Nipātito tena avaṃsiropataṃ,
Asantasaṃ taṃ mini diṭṭhiyaṭṭhiyāti.

So vidhuraṇḍito **puṇṇakena** yakkhena **naṭena** iva anekavikāradassanakena nāṭakena viya **āhaṭānekabhiṃsanesu** bhayattamānītānekavidhabhiṃsanesu vattamānesu suniccalo **tena** puṇṇakena **acalā** saṭṭhiyojanubbedhakālāgiripabbatamatthakato nipātito **avaṃsiropataṃ** adhosīsaṃ patanto **asantasaṃ** evaṃ appatitṭhepi anuttasanto **taṃ** pabbataṃ diṭṭhiyaṭṭhiyā **mini** pamāṇamakāsi, **aho** acchariyanti. Ettha bhayahetumhi sati bhītiyā ca tattha parijānanābhāvassa ca lokasabhāvattā tamatikkamma bhayakaraṇe asantāsassa ca diṭṭhiyā pabbataminanassa ca pavattabhāvakathanena lokātikantapadatthasaṅkhāto vibhāvo “asantasaṃ taṃ mini diṭṭhiyaṭṭhiyā”ti iminā pakāsito. “Aho”ti vacanena, tassa sāmattihiyena ca sādhuvādasedaassuādayo anubhāvā vibhāvītā. Tāsāvegadhitticcādibyabhicārībhāvā, vimhayasaṅkhātāṭhāyībhāvo ca samuditavākyasāmattihiyena jotito.

Samathāyībhāva

**367. Ṭhāyībhāvo samo mettā-
Dayāmodādisambhavo;
Bhāvādīhi tadu'kkamaṃso,
Santo santanisevito.**

Iti saṅgharakkhitamahāsānipādaviracite

Subodhālānkāre

Rasabhāvāvabodho nāma pañcamaṃ paricchedo.

Subodhālānkāro samatto.

367. “**Ṭhāyi**”ccādi. Mettādisambhavo **samo** upasamasāṅkhāto ṭhāyībhāvo bhavati, tadanurūpehi bhāvānubhāvehi tassa ukkamaṃso yassa, so santo nāma raso bhavati, so ca

santanisevitoti.

Iti subodhālaṅkāre mahāsāmināmikāyaṃ ṭīkāyaṃ

Rasabhāvāvabodho pañcamo paricchedo.

367. Idāni santarasassa posanakkamaṃ dasseti “**ṭhāyi**”ccādinā. **Mettādayāmodādisambhavo** mettākaraṇāpītiādivibhāvehi sambhūto **samo** kāyacittopasamo ṭhāyībhāvo nāma hoti, **bhāvādihi** byabhicārībhāvādihi karaṇabhūtehi, apica tassa samassa anurūpehi byabhicārībhāvānubhāvehi **tadukkamaṃso** tassa ṭhāyībhāvassa ukkaṃsayutto **santanisevito** sādhuhi sevito **santo** santaraso nāma hotīti. Mettā ca dayā ca modo ceti ca, te ādayo yesamiti ca, tehi sambhavo yasseti ca, tassa ukkaṃso assa santasseti ca, satamaṃ nisevitoti ca vākyamaṃ.

Assa santarasassodāharaṇamevaṃ daṭṭhabbamaṃ –

Entesu kesarikaṛīsva’pi veṭṭhayante,
Nāge nagaṃ madagaje viya veḷugumbaṃ;
Yakkhe vicālayati nocali īsakampi,
Santiṃ gatova vidhuro madhurāpi bhāvoti.

Kesarikaṛīsu sīhahatthīsu **entesu api** bhīṃsanākārena samīpamāgacchantesupi **nāge veṭṭhayantepi** nāgesu sarīraṃ veṭṭhayantesupi. Jātyāpekkhāyevacanaṃ, veḷugumbaṃ **madagaje viya vicālayati** madagaḷitahatthimhi cārente iva **yakkhe** puṇṇake **nagaṃ** kāḷāgiripabbataṃ **vicālayatipi** anekappakāre cālentepi **vidhuro** paṇḍito **santiṃ gatova** nibbānaṃ ālambaṇakaraṇavasena sampatto viya phalasaṃpattisaṃpānaṃ iva atha vā diṭṭhadhammanibbānasaṅkhatanīrodhasaṃpattisaṃpānaṃ viya **īsakampi** appakampi **madhurā bhāvā api** madhurasabhāvatoṇi no cali, nisinnaṭṭhānato pagevāti adhippāyo. Ettha dhāvanarodanakampanādīnaṃ karaṇabhūtaṃ sīhādīnamāgamaṇaṃ nāgaveṭṭhanaṃ pabbatakampanantiādīsu vattamānesupi nibbikārattena santiṃ gatoti iminā santarasassa pakatībhūte uddese dassito navamo ṭhāyībhāvo dassito hoti, etassa uppattiuddīpanānaṃ kāraṇabhūtā mettādayāmodādivibhāvā sāmattiyā dassitā hotīti. Dhitimatisatiādayo tadanurūpabyabhicārībhāvā ca tādisānubhāvā ca “entesu veṭṭhayante vicālayatī”ti iminā, sakalavākyasāmattiyena ca pakāsītāti daṭṭhabbā.

Iti subodhālaṅkāranissaye

Rasabhāvāvabodho nāma pañcamo paricchedo.

Subodhālaṅkāraṭīkā samattā.